

**O‘ZBEKISTON RESPUBLIKASI OLIY TA’IM,
FAN VA INNOVATSIYALAR VAZIRLIGI
SHAROF RASHIDOV NOMIDAGI
SAMARQAND DAVLAT UNIVERSITETI**

**G‘AFUR G‘ULOMNING
POETIK MAHORATI**

mavzusidagi ilmiy-amaliy
konferensiya materiallari
(13-may 2023-yil)

Samarqand-2023

“G‘afur G‘ulomning poetik mahorati” mavzusidagi ilmiy-amaliy konferensiya materiallari (13-may 2023-yil). – Samarqand, SamDU nashri, 2023. – 254 bet.

Konferensiya materiallaridan o‘rin olgan maqolalarda o‘zbek adabiyotining zabardast vakili, o‘ta murakkab davrda yashab ijod etgan iste’dodli adib G‘afur G‘ulomning poetik olami haqida so‘z boradi. G‘afur G‘ulomning o‘zbek she’riyati, nasri, dramaturgiyasi, adabiyotshunoslik borasidagi qarashlari, tarjimonlik mahorati haqidagi mulohazalariga tahliliy yondoshilgan. G‘afur G‘ulomning o‘zbek she’riyati, nasri, adabiyotshunosligi, tilshunosligi va publisistikasiga qo‘shgan hissasiga munosabatlar, tahliliy yondoshuvlar asosidagi qarashlar o‘rin olgan. Shuningdek uning ijodi, ilmiy faoliyati adabiyotshunoslik, tilshunoslik va pedagogika fanlari nuqtaiy nazaridan tahlil qilingan.

Tahrir hayati:

Umurov H.I.

Muhiddinov M.Q.

Hasanov Sh.A (mas’ul muharrir).

Pardayev A.B.

Nasirov A.N.

Qobilov U.O‘.

Ernazarova G.I.

Xursanov D.B (mas’ul kotib)

**SamDU Kengashi tomonidan
nashrga tavsiya etilgan**

To‘plamdan o‘rin olgan maqolalardagi faktlarning to‘g‘riligiga mualliflar mas’uldir.

@ Sharof Rashidov nomidagi Samarqand davlat universiteti-2023

G‘AFUR G‘ULOM ABADIYATI

Betakror iste’dod sohibi, akademik, faylasuf shoir, mohir nosir sifatida o‘zbek adabiyoti xazinasiga ulkan hissa qo‘shgan, adabiyotimiz tarixida o‘chmas iz qoldirgan siymolardan biri G‘afur G‘ulomdir.

G‘afur G‘ulom tarix haqiqatini badiiy haqiqatga aylantirgan faylasuf shoir. Shoir tavalludiga bag‘ishlangan katta anjumanlardan biri Samarqand universitetida o‘tkazilayotganining ramziy va mantiqiy asoslari bor. Zabardast shoirimizning “Samarqand uchun”, “O‘ttiz yoshli O‘zGUga”, “Sevsam sevibmanda” kabi bir qator she’rlarida dorilfunun bilan bog‘liq lirik kechinmalar bayon etiladi.

O‘z davlat tug‘roli, hur O‘zbekiston,
Mazlum Sharq xalqiga bo‘laolur ko‘zgu.
Yashna, ey xalqimning dorulfuni,
Ilm-u fan manbai barhayot O‘zGU!

Samarqand davlat universiteti 1961-yilga qadar O‘zbekiston davlat universiteti deb atalib kelingan. Mazkur she’rda shoir universitetni jahon ilm-fani va madaniyatiga ne-ne ulug‘ allomalarni yetkazib bergan Ulug‘bek madrasasining vorisi deb biladi va uni Sharq ma’rifatining beshigi deya tarannum etadi.

Bundan tashqari G‘afur G‘ulom ijodini o‘rganish, poetik mahoratini tadqiq etish universitetimiz olimlari tomonidan shoir hayotligidayoq boshlangan edi. G‘afur G‘ulomning ijod sirlarini, badiiy olamini kashf etishda o‘nlab maqolalar, monografiyalar, qolaversa, nomzodlik va doktorlik dissertatsiyalari bilan munosib ulush qo‘shgan professor N.Shukurovning xizmatlarini alohida ta’kidlab o‘tishimiz joiz.

G‘afur G‘ulomshunoslikning keyingi rivojida munosib xizmatlari singgan o‘nlab filolog olimlarimizning ilmiy ishlarini mamnuniyat bilan qayd etmoqchiman.

Mustaqillik arafasida va uning dastlabki yillarida G‘afur G‘ulom ijodi borasida turli-tuman qarashlar bildirilgan edi. Biroq o‘tgan davr shoir ijodi xalqimiz tarixining badiiy solnomasi ekanini yana bir bor tasdiqladi.

G‘afur G‘ulom ijodini mutaxassislar mumtoz adabiyot bilan zamonaviy adabiyotni bog‘lovchi ko‘prik hisoblashadi. Chindan ham shunday. Shoirning milliy g‘urur va iftixorga to‘la she’riyati bugungi voqeligimizning konsepsiyasiga aylanib borayotgan milliy g‘oyamiz

negizidagi sifatli ta'lim, samarali ilm, milliy manfaatlar ustuvorligi kabi g'oyalarga hamohangligi bilan e'tibor va ehtiromga sazovordir.

XX asr o'zbek adabiyotini G'afur G'ulom ijodisiz tasavvur etish qiyin. Uning badiiy jihatdan yuksak, xalqchil, ta'sirdor va jo'shqin asarlari bir asrdan buyon elimiz tomonidan sevib o'qib kelinmoqda. Zero, bugungi kunda uning asarlari adabiyot va ma'naviyat olamida mash'aldek ziyo taratib, ko'ngillarga poklik, mehr-muhabbat, sadoqat nurlarini ulashib kelmoqda.

Fursatni g'animat bilish, vaqtning qadriga yetish, ilm-u ma'rifatga intilish kabi shoir kuylab o'tgan mavzu va motivlar bugungi yoshlarimiz uchun ibrat va hayot saboqlari bo'lib yangrayotganligi G'afur G'ulom abadiyatini tayin etadi, u kuylagan g'oyalarning haqqoniyligi va hayotiyligini ta'minlaydi.

Rustam Xolmurodov
Sharof Rashidov nomidagi
Samarqand davlat universiteti
rektori, professor

“SAMDU QOPQASIDA BIR QIZNI KO‘RDIM” SHE’RINING YARATILISH TARIXI

***Umurov Hotam Ikromovich,
SamDU professori,
filologiya fanlari doktori***

G‘afur G‘ulom shaxsining yuksakligi, xayol kuchining parvozi, aql ufqining kengligi, ijodiy hozirjavoblighi kamyob hodisa edi. Shoir qalbi hamma vaqt suv to‘la kosadek xalqimiz va Vatanimiz mehriga limmo-lim edi. Uni ifodalashga esa doimo ruhan tayyor turardi. Kosadagi suvga biror tomchi suv qo‘shilsa yoki turtki bo‘lsa toshganidek, G‘afur G‘ulomning badihago‘y qalbidan turli sabablar bahonasida she‘rlar favvoradek otilib chiqardi.

Said Ahmad ta’kidlashicha, ba’zan “G‘afur akani yozuv stoli yoniga o‘tqazib olish qiyin edi, bir o‘tirib olgandan keyin turmasdi. Ayniqsa, she‘r bo‘lsa bitta to‘rtlik, hikoya bo‘lsa birinchi sahifa to‘lgandan keyin o‘zi ham qiziqib ketib, to asar bitmaguncha o‘rnidan turmasdi”. Shukrullo: “U qayerga borsa, o‘sha yer uning uchun ijodxona, ham dam oluv yeri hisoblanardi. Odamlar orasida tug‘ilgan fikrlarni o‘sha yerda qog‘ozga tushirib, ularni o‘qib ham berardi. G‘afur akaning ish vaqti hech kimnikiga o‘xshamasdi. U dam oluv orasida ijod qilar, ijod qilayotgan paytida dam olaverardi” - deb eslaydi. “Birorta so‘z yoki tarixiy voqealar ildizlarini ish bahonasida so‘rasang, u shu turtki sabab bir zarb bilan she‘r to‘qirdi” - deya xotirlaydi ustozni Nuriddin Shukurov.

Said Ahmad “Nazm chorrahasida” kitobida yozganidek, G‘afur G‘ulomning ko‘plab she‘rlarining tug‘ilishiga u “doyalik” qilgan. Jumladan, mazkur kitobning 19-betida muallif shunday yozadi: “Men G‘afur akaning... erkaliklarini yaxshi bilardim, Uning qaysarligi-yu, jindek maqtangannamo gapirishlarini, yozilgan har bir to‘rtlik ketidan maqtab turadigan odam zarurligini ham bilardim. Boshqalardan ko‘ra u kishini men kelishtirib maqtardim. O‘zi ham bunga tan berib: “Maqtashni senga-yu yozishni menga chiqazgan” derdi”. Uning yozishicha, G‘afur G‘ulom rasmlar chizar edi. U raqs tushganida zo‘r raqqosalar ham davradan chiqib, tomosha qilardi. Qo‘liga taqsimcha olib, xalq termalarini aytganda, hamma jimib qolardi. Dutor chertganda, tinglovchilar bosh egib tebranishardi. G‘afur aka Yusuf qiziqlar bilan teng kelib askiya aytishardi. Xalq dostonlarini baxshidek ohangi, ifodasi bilan boshdan-oyoq ayta olardi.

Xullas, G‘afur G‘ulom haqidagi bu xotiralarni o‘qir ekansiz, shoir bo‘y-basti bilan ko‘z o‘ngingizga keladi... Ushbu aytilgan fikrlarni Shukrulloning “Javohirlar sandig‘i” kitobi, kitobdagi ustoz va shogird (G‘afur G‘ulom va Shukrullo)ning munosabatlarini yanada boyitadi.

Unda G‘afur G‘ulomning istalgan mavzu bo‘yicha, istalgan narsa haqida, istalgan hodisa to‘g‘risida she‘r yoza olish qudrati, hozirjavoblik qobiliyati ishonarli ochib berilgan: - Ko‘zingga ko‘ringan narsani bir lahzada she‘r qila olasanmi? - deb so‘radi. - Har bir narsani she‘r qilish mumkin. Mana, ko‘zingga

ko‘ringan, ko‘nglingga kelgan biron narsani aytib ko‘r, she‘r bo‘ladimi, yo‘qmi - bilamiz qo‘yamiz.

Men shoirning xonasi va hovli atrofidagi narsalarni ko‘zdan kechira boshladim. Bu uydagi har bir narsa shoirona did bilan tanlangan. Har bir narsada shoirning nozik tabiati, o‘tkir farosati ko‘rinib turadi. Ish stoli ustida Gyotening bronzadan qilingan kichkina byusti... devorlarda gilam, tanbur, dutor osig‘liq. Men hali hech kim she‘r qilishi uchun qo‘l urmagan, G‘afur akaning o‘zi ham kutmagan narsani izlar edim. Birdaniga ko‘zim siyohdonga tushdi-yu, shu haqda bir she‘r qilishlarini so‘radim. G‘afur aka siyohdonga bir tikilib, guvranib oldi. Nimanidir tutmoqchi bo‘lgandek, yirik-yirik barmoqlari harakatga keldi. Ko‘zlari yondi, lablari nimanidir pichirlay boshladi. Hamlaga otlangan sherdek bir on jim qoldi, ketma-ket satrlar qog‘ozga tusha boshladi:

Alisher davotga qilganda xitob,
Qalami yodidan ko‘tarildimu
Siyohdon, azizim, qora ko‘zlugim,
Qora tunlar aro yorigan ko‘zgu...
Ulug‘ jang kunlarni yozar chog‘imda
Shahidlar qonidek daftarga tomding,
La‘nati ma‘lunlar nomin yozganda
“Men qora emasman” deding-ku, tonding.

G‘afur aka she‘rni bitkazib, mening fikrimni so‘radi:

- Qalay? Men nima derdim... Bitta siyohdon orqali shuncha gaplarni topib aytish mening xayolimga kelmagan edi. Albatta, maqtadim. Bu she‘rning yozilishi men uchun mo‘jiza edi”.

G‘afur G‘ulomning zukkoligiga, bilimdonligiga, tantiligiga, mardligiga, soddaligiga, erkaliklariga qoyil qolmagan, beqiyos iste‘dod egasi ekanligini tan olmagan kishilar topilmasa kerak. U kishi mo‘jiza yaratadigan afsungar – “she‘riyatimiz afsungari” ekanligiga bizlar ham shohid bo‘lganmiz.

1961-yil mart oyida SamDUning majlislar zalida G‘afur G‘ulom bilan uchrashish uchun shahar ahli, o‘quvchilar, talabalar to‘planishdi. Ayniqsa, oldingi qatorlardan joy olish, shoirni yaqinroqdan ko‘rish va eshitish istagidagi yuzlab tolibi ilmlar eshikdan kirishga oshiqar edik. Hali kirishga ulgurmasimizdanoq G‘afur G‘ulomni hamrohlari bilan viloyat rahbarlari kuzatib kelib qolishdi. Bir qismimiz ularga yo‘l berishga majbur bo‘ldik. “Yo‘lak“ ochilganidan foydalangan bir guruh qizlar olg‘a intilishdi. Qizlar ham mehmonlarga aralashib ketishdi. Shunda G‘afur G‘ulom o‘sha qizlarning bir nechtasini to‘xtatib, nimalardir deyayotganligi va suqlanib boqayotgan nigohlariga ko‘zimiz tushdi. Qizlardan biri nimalardir degandi. G‘afur G‘ulom kulib yubordi. So‘ng hamma birin-ketin majlisxonaga kirib ketdi. Gulduros qarsaklar ostida mehmonlar prezidiumdan joy olishdi. Tantana boshlandi. G‘afur G‘ulom haqida kim gapirmasin, zal uni ham shoirga qo‘shib olqishlardi. G‘afur G‘ulom esa o‘tirgan chog‘idanoq kissasidan qog‘oz va ruchka chiqardi. Zalga bir zum nigoh tashladi-yu, nimalarnidir yoza boshladi. Ma‘ruzachilarning nutqi unga tegishli emasdek, o‘zi bilan o‘zi band edi. Chehrasida ba‘zan nimkulgi balqir, ba‘zan o‘ta jiddiylik namoyon bo‘lardi. Biz tabiiyki, so‘zga chiquvchilarning gaplariga munosabat bildirish uchun biror

narsalar qoralayotgan bo'lsa kerak, degan fikrga borardik. So'z berilganda ularni «boplasa» kerak, deb o'ylardik.

Majlis raisi G'afur G'ulomga so'z berdi, olqishlar yangradi. Shoir o'ng qo'lini ko'tarib zaldan tinchlanishni so'radilarda, «Sizlarga bag'ishlab hozirgina yozganim she'rimni o'qib beraman» dedilar:

“SamDU qopqasida bir qizni ko'rdim”.

Bu misrani eshitish bilan zaldagilar gulduros qarsak chalib yuborishdi. Birozdan so'ng shoir mamnun qiyofada zalga nigoh tashladi va qo'lini ko'ksiga qo'yib, rahmat, deganday egilib qo'ydi. Bir zumda zal shunchalik tinchlandiki, pashsha uchsa ham eshitilardi. G'afur G'ulom jarangdor va shirali ovozda she'r o'qiy boshladi:

SamDU qopqasida bir qizni ko'rdim,
Yetti rang tovlangan quyosh kabi pok.
Koshkiydi o'ttiz yil orqaga qaytib,
Ishqimni aytsaydim qilib yoqa chok.
So'zlarning jarangin eshitmak uchun,
Izlanib, topoldim bahona - savol.
Samarqand tongining yeliday mayin
Kulimsirab lab ochdi, bir butun jamol:
- Mayiz bozoriga chapdan borilur,
Anjir ham shu yerda, anor ham shunda.
Muncha ham soddasiz, muncha o'zbeksiz,
Yo'l yitib bo'larmi, yop-yorug' kunda...
Agar-chi, qadimiy Samarqandiyman,
Kaftim chizig'iday hamma yer ayon.
Bag'rimni erkalash, musiqa tinglash,
G'oyat zarur edi shu nozik bayon.
SamDU qopqasida ko'rganim qizning
Qaymoq mazmuniga jonim omoda.
Samarqand mazmunli ko'rkam yulduzni
Sevsam sevibman-da, o'zbekman, sodda...

SamDuning qizi – “Ilhom parisi” sabab G'afur G'ulom hamma samarqandliklarga mehr-u muhabbatini ana shunday izhor etdi. Ayni paytda, betakror badihago'y shoirligini, yoshlikni judayam qumsagan hazilkash va nuroniy insonligini, umuman, o'zbekning sodda mutafakkiri, she'riyatimizning ko'rkam yulduzi ekanligini ko'rsatgan edi, o'shanda. Shoir “Kapalak umriga qiyos etgulik” umri jarayonida sodda, ammo mazmunga boy, faylasufona satrlari bilan she'riyat ixlosmandlari qalbida o'chmas iz qoldirdi. Qalbimizda u shunday naqshlanadi va o'lmas asarlari bilan tirikday bugun ham Siz-u men bilan Istiqlol sari ulkan odim otmoqda.

BADIIY TAFAKKUR VA TALQINDAGI IZDOSHLIK

*Muhiddinov Muslihiddin Qutbiddinovich,
SamDU professori, filologiya fanlari doktori*

Turkiy nazmni samoviy borliqqa qiyoslasak, uning markazida hazrat Navoiy siymosi turishi muqarrar. Undan badiiy, irfoniyl-ijodiy ziyo olib evriluvchi sayyorlarni esa o'tkir qalamli, nuqtadon ijodkorlarimizga qiyos etish mumkin. Shu ma'noda G'afur G'ulom ijodiyotini tafakkur, tasvir va talqindagi izdoshtlik masalasida Navoiy ijodi bilan bog'liqlikda o'rganish ayni muddaodir. G'afur G'ulom "Sharq nazmi osmonining ikki porloq quyoshi" sarlavhali maqolasida: "Men – Sharqning shoiriman. Shu tufayli Sharq nazmining hamma klassiklari mening qardoshlarim – aqrobalarim, desam, xato bo'lmaydi... Meni ana shular yaratgan meros tarbiyalagan" [1,158-bet] – deb yozadi. Bu e'tirofdan ochiq ko'rinadiki, G'afur G'ulom ijodida Sharq she'riyati an'analari xususida bahs ochish, umuman, o'tmishdagi Sharq ilg'or adabiyotiga shoirning munosabat masalasini ko'tarib chiqish deganidir.

G'afur G'ulom badiiy-ijodiy an'ananing rango-rang iplari bilan o'z salaflaridan, dastlab, ulug' Alisher Navoiy ijodiga eng ko'p bog'langandir. U Alisher Navoiy ijodining g'oyalari, obrazlari va falsafiy mazmuni bilan izchil ravishda tanisha bordi. Bu tanishish, ayniqsa, "Farhod va Shirin" baytlarini nasrda izohlash mashg'ulotlari jarayonida ustoz ijodining g'oyaviy-badiiy tarovatini ijodiy o'zlashtirish va rivojlantirish darajasida o'sib chiqdi.

Badiiy ta'sir g'oyatda ko'p qirralidir. U g'oyaviy uyg'unlik, shakllar yaqinligi ko'rinishlariga ega bo'lishi mumkin. Shuning bilan birga, u badiiy vosita va obrazlardan foydalanishdagi yaqinlikda ham ko'zga tashlanadi. Masalan, buyuk Alisher Navoiy "she'r... o'yinchoq va ermak bo'lib qolgan, adabiyot o'layotgan" [2,51-bet] bir sharoitda, adabiyotning ahamiyati uchun jon kuydirib, o'z asarlarining (jumladan, "Farhod va Shirin"ning) "Navosizlarga" ham, "gado va g'anilarga" ham, "qul va shohlarga" ham kerakli narsa bo'lishini istab, hayajonli satrlar bitadi:

... Buyursang sochmog'in men benavoga,
Chiqor yuz benavo ilgin havoga,
Ayirgoch bazl ila bu benavodin,
Navosizlarga qormotqil havodin.
Gadolarga dog'i andin ato ber,
G'anilarga dog'i oni tuto ber.
Shah olsa dog'i qilsun toji torak,
Qul olsa ham anga bo'lsun muborak [3,267-bet].

Gʻafur Gʻulom ham biron bir taʼma ilinjida sheʼr yozishdan begona, u oʻz asarlarining dehqon oʻlka daryosidek vatan tuprogʻiga singib, elga maʼnaviy qut yetkazishini orzu qiladi:

Ufqim doirasidan dostoncha gullar terib,
Qachondir ushbu sheʼrim Sirdaryodek oqolsa.
Vatanim tuprogʻining magʻzi-magʻzida erib,
Qatra-qatralaridan xalqimiz gul taqolsa [4, 278].

Alisher Navoiy oʻzbek adabiyotiga voqelikni falsafiy idrok etish va muayyan falsafiy qarashlar asosida uni tahlil qilish anʼanasini olib kirdi. Agar anʼanani faqat shakliy omillardan emas, balki mohiyatdan qidiradigan boʻlsak, Alisher Navoiyning Gʻafur Gʻulom poeziyasidagi anʼanalari, eng avvalo, ijtimoiy hodisalarni chuqur mushohada va tahlil qilib, ularga falsafiy-badiiy xarakteristika berishda koʻrinadi.

Alisher Navoiyning sheʼrlaridagi lirik qahramon uchun xudbinlik kayfiyati mutlaqo yotdir. U elga xizmat qilishni Tangriga xizmat qilishday sharaflilik deb biladi:

Mendek qul oʻlgay elga, qoʻyib Tengri qulligin,
Mingdan bir emas emgagim oning sazositidin [5,507-bet].

Albatta, Navoiyning lirik qahramoni tabiatidagi bu xususiyat eʼtiborga loyiqdir. Elning tilaklarini amalga oshirish yoʻlida fidoyilik qilib, dunyoda ezgu nom qoldirishga intilish Gʻafur Gʻulom poeziyasida ham oʻzining koʻpdan-koʻp qirralari bilan keng yoritiladi. Ammo uning sheʼrlaridagi mavzu va mazmun Alisher Navoiy sheʼrlariga birmuncha yaqin boʻlsa-da, ular jiddiy farqlar, novatorlik xususiyatlaridan ham xoli emas. Bu narsa, birinchi navbatda, yangi bir iqtisodiy-ijtimoiy jamiyatda yashagan Gʻafur Gʻulom sheʼrlarida elga xizmat qilishning muayyan sohalari xususida falsafiy mushohadalar yuritib, konkret ilmiy xulosalar chiqarishda koʻrinadi. Masalan, uning “Kulol va zargar” sarlavhali sheʼrida elga xizmat qilishning kamtarona koʻrinishi boʻlgan kulol mehnatining mohiyati teran falsafiy mushohadalar vositasida quyidagicha yoritib berilgan:

Otang yasar edi sopol piyola,
Xalq uchun xizmat bas,
na shuhrat,
na nom.

U yasab bermagan qon yoshga toʻla
Iskandar, Dorolar uchun oltin jom.
Otang oʻz charxida doʻndirgan tovoq
Ming-ming kishilarni suvga qondirgan.
Achitma goʻjalar, qimiz, shirqovoq
Charchoqni yenggan-u kuch uygʻontirgan...
Biror arxeolog qazilmalardan
Topib ola qolsa bir siniq sopol,
Shunda iyeroglif chizilmalardan
Ming yillik tarixni oʻqir bemalol.

Bu tepa qayer-u bu qaysi qo'rg'on
Bu yerda kim yashab, kim obod qilgan,
Xalqi kimlar edi va qanday zamon
Qay umid o'rtaqan, ne ijod qilgan?
Chuqur o'ylar ichra toliqar olim,
O'rtada gangiydi ming shubha, savol.
Shunda javob berar go'yo allakim,
Sopol tovoq tutgan bir keksa kulol [6, 352-353-betlar].
G'afur G'ulomning "Shofyor", "Aql va qalam", "Quyosh
tevaragida" kabi juda ko'p she'rlarida ham el va yurt yumushida
fidokorlik ko'rsatishning konkret sohalari xususida fikr yuritilib,
uning chuqur ijtimoiy mohiyati ochib beriladi.

Alisher Navoiyning ijodiy dahosidan novatorlarcha bahramand
bo'lish hamma hollarda ham shoirni ma'lum mavzu atrofidagi
mulohazalardan favqulodda quvvatli bo'lgan falsafiy xulosalar
chiqarish sari yetaklaydi. Bu jihatdan uning "G'oliblar» she'rida
quyidagi satrlar ibratli bo'lib, ularda, bir tomondan, Alisher
Navoiyning Odamiy ersang", – deb boshlanuvchi mashhur bayti
mazmuniga hamohang fikrlar ifodalangan bo'lsa, boshqa bir
tomondan, tekinxo'rlarcha hayot kechirish kasbi va niyati bo'lgan
kimsalarning sha'niga nisbatan ta'riz-kesatig ham mavjuddir:

Insoniyat huquqi, rostini aytsam,
Hamma odamlarga muyassar emas.
Mal'un bo'lib yashashni afzal ko'rganlar,
Bo'lolmas odamzod bilan hamnafas.
Odamning muqaddas, ulug' mehnati,
Ne'mat olamiga yozur dasturxon.
Bir to'da haromxo'r qurtdan chirimas,
Koinotga nisbatan olmaday jahon [6,197-bet].

Bir mavzuda yaratilgan she'rlar misolida Alisher Navoiy va
G'afur G'ulom poeziyasidagi falsafiy-poetik fikrlar mushtarakligini,
yoxud ulardagi ayrim muhim tafovutlarni aniq belgilashda har ikkala
shoir ijodidagi ayollar timsoli mazmun va mohiyati yanada to'ldiradi.
Alisher Navoiy o'z dostonlarida oqila, zakovatli, davlat arbobi,
san'atkor, hatto jangchi bo'lgan xotin-qizlar (Shirin, Mehribonu,
Layli, Dilorom, Nozmehr va ko'plab boshqa) timsolini yaratadi.
Lirikada esa o'zining ayollar haqidagi falsafiy-poetik fikrlarini
otashin insonparvar, donishmand sifatida zo'r hayajon bilan
ifodalaydi.

G'afur G'ulom ham mazkur mavzu talqinida Navoiy fikrlariga
hamohang mulohazalar bayon etadi:

Astoydil har erkak – yo'ldosh demasa,
Insof mahkamasi sudga beradi.
Ikki do'st qiyinni yenga olmasa,
Hayotning chippakka chiqar omadi [7,187-bet].

She'riyatda xotin-qizlar mavzusini yoritishda G'afur G'ulom ijodiga shunday bo'rtib turgan navoiyona xususiyat xoski, u o'zbek adabiyotining Hamid Olimjon, Uyg'un, Zulfiya, Sobir Abdulla kabi vakillaridan farqli o'laroq, bu mavzuni aksariyat hollarda falsafiy-poetik umumlashmalarga ega fikrlar vositasida tasvirlaydi. Aniq badiiy qiyofaga kirgan obrazlar vositasida ayollar mavzusini yoritish G'afur G'ulom poeziyasida ko'zga kam chalinadi. Masalan, bu xususiyatni shoirning "Mash'allarimiz" sarlavhali she'ridagi shunday bandlar misolida yaqqol ko'rish mumkin:

Barcha ishda teppa-teng,
Yondosh, mehribonmiz.
Ona, opa-singlimiz,
Shafqatli yorimizsiz.
Siz yoqa-yu, bizlar yeng,
Biz jism-u siz jonimiz.
Quvonadi ko'nglimiz
Biz tanbur, torimiz – siz [8,326-bet].

G'afur G'ulomning o'rta asr sharqi falsafasiga, xususan, Alisher Navoiy adabiy-falsafiy merosiga munosabati va novatorligini belgilashda uning vaqt tushunchasiga poetik-falsafiy ta'rif berilgan she'rlari alohida o'rin tutadi. Navoiy vaqtning hukmidagi insoniyat manzarasini shunday tasvirlaydi:

Sabuhi aysh bo yoron qadah xo'r, nest chun ma'lum

Ki yobandat shabi oyanda yoron yo tu yoronro [9,42-bet].
(Tonggi ayshda do'stlar bilan qadah ich, chunki ertangi tunda do'stlar seni yoki do'stlarni sen topishing ma'lum emas). Alisher Navoiy singari G'afur G'ulom ham umrning tez o'tib ketishini ta'kidlaydi, umrdan o'tgan har bir onning yana qaytmasligini uqtiradi:

O'tgan har bir daqiqa go'yoki otilgan o'q,
Hattoki tik nazar ham orqaga qayrilmaydi...
Chaman debochasining lavhasiga ko'z solib,

Sayr etib ulgurmayсан, rangin bahor o'tadi [8,366-bet]. Lekin shoir vaqt tushunchasini poetik-falsafiy suratlantirar ekan, uning har bir lahzasi olam-olam voqealarning sodir bo'lishi uchun yetarli vaqt ekanligini ham qayd etadi. Ana shuning uchun ham u kishilarni «Umrдан o'tajak har lahza uchun, Qudratli qo'l bilan qo'yaylik haykal» deb yaratuvchilikka da'vat etadi, lahzalarning qadriga yetishga chaqiradi:

Mehnatda har minut non kabi aziz,
Yam-yashil qirlarda olam yashirin.
Ko'k gumbaz – chimildiq umriday laziz,
Dalada har nafas o'pichday shirin [8,331-bet].

G'afur G'ulomning o'zbek g'azalchiligi gulshanida eng xushovoz bulbul bo'lganligi hammaga ayon. Uning "Bu Vatan maqtovlarin har qancha yozsang, oz erur", "Dildagi sevgi jilosini jamolidan so'rang"

kabi gʻazallari poeziyamizning shu janrda yaratilgan eng aʼlo namunalaridir. Shoirning “Alisher Navoiy qabri ustida” muxammasi esa tatabbuʼ yozish hamda tazmin etishning har qanday shoir oʻrgansa arziydigan porloq namunasi. Lekin Gʻafur Gʻulom Alisher Navoiy gʻazali asosida yaratilgan “Tun bilan tong” muxammasi oʻzbek adabiyotida Navoiy gʻazallariga qilingan muxammaslar orasida eng aʼlosi desak, hech qanday mubolagʻa boʻlmaydi.

Mazkur muxammasda, avvalo, shoirning muxammas bogʻlash uchun gʻazal tanlashdagi sinchkovligi koʻzga tashlanib turadi. Nega deganda, Alisher Navoiy XV asrning vakili sifatida oʻsha davr dunyoqarashini ifodalar edi. Shuning uchun ham uning gʻazalini muxammas etishga bel bogʻlagan yangi jamiyat shoiri tanlangan gʻazalning biror bir baytidagi fikr zamona ruhiga mos kelmay qolishini hisobga olish shart edi. Aks holda, muxammasnavislik oʻzga shoir baytlaridagi fikrni toʻldirishni, kuchaytirishni talab etar ekan, u jiddiy nuqsonga yoʻl qoʻygan boʻlar edi. Gʻafur Gʻulom esa bu ishni qoyil qilib oʻrinlatgan. U shoirning sof hayotiy ishq mavzusidagi eng yaxshi gʻazalini tanlab topolgan. Buning ustiga gʻazal oʻta sanʼatkorlik bilan yozilgan.

Gʻazal tanlangandan keyin Gʻafur Gʻulom oldida gʻoyatda qiyin vazifa turar edi: birinchidan, Alisher Navoiy fikrlariga uygʻun ravishda, ularni toʻldira, kuchaytira oluvchi fikrlar ayta bilish; ikkinchidan esa, navoiyona badiiy tasviriy omillar bilan u fikrlarni muzayyan etish. Navoiy gʻazalining oʻta sanʼatkorlik bilan yozilganligini esa qayd etib oʻtdik. Matlaʼni Navoiy tazod sanʼati asosida qurib, yorning visolini tongga, oʻzining chekayotgan firoqini esa tunga tashbeh etgan. Yana bu xil tun bilan tong dahrda yoʻq deb tasvirni kuchaytiruvchi fikr ham aytgan.

Gʻafur Gʻulom gʻazalga muxammas bogʻlar ekan, matlaʼdagi mazmunni emas, balki undagi sanʼatni ham yanada kamolot darajasiga koʻtarishga musharraf boʻladi. U oshiqning “qarogʻi” va yorning “kamoli”, oshiqning “zavoli” va yorning “kamoli”, oshiqning “quyuq oyi” va yorning “hiloli” orasida favqulodda mahorat bilan zidlik – tazod topib, yuksak badiiylikni yuzaga keltiradi:

Mening qarogʻim-u oning jamoli tun bilan tong,

Mening zavolim-u oning kamoli tun bila tong.

Mening quyuq mahim, oning hiloli tun bila tong,

Mening firoqim-u oning visoli tun bilan tong,

Bu navʼ dahrda yoʻq ehtimoli tun bila tong [9,359-360-betlar].

Tazmin muxammasning umumiy mazmun-salmogʻini belgilab turuvchi gʻoyaviylikdagi tafakkur tarzining mushtarakligida, birinchi bandidagi dastlabki uch misra (Gʻafur Gʻulomga tegishli)da qoʻllangan tashbeh (qarogʻ va jamolni, zavol va kamolni tun va tongga mengzalishi)larda, istiora (hiloday yuz deyilmay, yuzni toʻgʻridan-toʻgʻri hilol deya talqin qilinishida), tazod (zavol va kamol)kabi

she'riy san'atlarda, ohangdor satrlarning hazaji musammani maqsur vaznidagi aruziy tarovatida, oshiq va ma'shuqa timsollarining fe'l-atvori, holati va bir-biriga munosabatidagi tasviriylilikda Navoiy ijodiyotidan bahramandlik, undan ta'sirlanish, ilhomlanish masalasini va munosib izdoshlikni anglash qiyin emas, bizningcha. Xullas, Navoiy ijodining tarovati akademik shoir G'afur G'ulom lirikasining o'zak-mag'zini tashkil etadi, desak, mubolag'a bo'lmaydi.

Foydalanilgan adabiyotlar:

1. F.Фулум, Асарлар, 10 томлик, II том, – Т., 1972.
2. Е.Э.Бертельс, Навоий, М-Л. 1948.
3. Алишер Навоий. Хамса (танқидий матн). Нашрга тайёрловчи П.Шамсиев. – Т., “Фан”, 1960.
4. F.Фулум. Асарлар, V томлик. III том. – Т., 1964.
5. Алишер Навоий. Хазойин-ул маоний. IV том, ЎзАН наш., – Т., 1960.
6. F.Фулум. Асарлар, V томлик. II том. – Т., 1964.
7. F.Фулум. Асарлар. V томлик. I том. – Т., 1964.
8. Алишер Навоий. Девоний Фоний. I китоб. – Т., 1974.
9. F.Фулум. Асарлари. 10 томлик. 3-том. – Т., 1972.

O'ZBEKNING O'KTAM SHOIRI

*Damin To'rayev
Qarshi DU professori,
filologiya fanlari dokori*

Xalqimizning asl farzandi, alloma shoir Fafur Fulom butun iste'dodi va faoliyatini milliy adabiyot, madaniyat rivojiga bag'ishlagan ijodkorlardan edi. U asarlari orqali o'zbek xalqining shuhratini dunyoga keng yoydi. Darvoqe, uning ijodiga oshno har bir kitobxon ko'z o'ngida xalqimiz hayoti va turmush tarzi, taraqqiyot yo'li namoyon bo'ladi. Shoir she'rlarida haqli ravishda o'zini elning ishonchli vakili va ovozi deb atardi:

Men o'zbek shoiriman, o'z xalqimning tiliman,
Qalbm buyurganini aytib keldim hamisha.

G'afur G'ulom she'riyati o'zbek nazmini yangi ohanglar va mavzular, o'lmas g'oyalar bilan boyitgan bo'lsa, hikoya, felyeton, ocherk va qissalari XX asr o'zbek nasridagi realistik yo'nalishning shakllanishiga katta hissa ko'shdi. Shoir ilk asarlaridanoq o'z faoliyatini xalq hayoti bilan bog'ladi, har qanday badiiy asar xalq hayotini aks ettirishi kerakligini, insoniyat erishgan yutuqlar tinimsiz mehnat samarasi ekanligini ifodaladi.

G'afur G'ulomning 30-yillardagi she'riyati o'zining ko'tarinkiligi, hayotbaxshligi, falsafiy mushohadaga uyg'unligi, jangovar tashviqiyiligi bilan xarakterlanadi. Shubhasiz, erkin hayot nashidasi bilan yashayotgan bugungi kitobxonda shoirning “Yalovbardorlikka”, “Turksib yo'llarida”, “Ko'kan”, “Egalari egallaganda”, “Xitoydan lavhalar”, “Ikki vasiqa” kabi asarlarida olg'a

surilgan g'oyalar erish tuyulishi tabiiy. Lekin har qanday ijodkor o'z davrining mahsuli ekanligini ham unutmasligimiz zarur. Eng muhimi, G'afur G'ulom bu she'rlarida, birinchi galda, real hayotda kechayotgan ijobiy o'zgarishlarni va o'sha o'zgarishlar bunyodkori bo'lgan elni ulug'lashni maqsad etadi. Bu shoir she'riyatining bir xususiyati. Ikkinchidan, badiiy vositalarning ta'sirchanligi, xalqchilligi, tarixiy voqeaning obrazli qilib, poetik mazmunga mos holda berilishi, g'afurona ko'tarinkilik bu asarlarni badiiyatning yaxshi namunalari qatoriga qo'yadi.

Shoirning o'z davrini ulug'lovchi she'rlaridagi "Hamisha ulug' inson G'afurning temasida", "Har kunning qayd etarlik mazmuni, tarixi bor", "Ustiga but va tasbeh ortgan karvonlar", "Qalam bilan tozalov shoirning ishi", "Men o'zbek shoiriman, o'z xalqimning tiliman" kabi quyma misralar mag'zini bir chaqib ko'raylig-a. Ularda ne-ne dard yashirin, ne-ne donishmandona mulohazalar mavjud. Bu misralarda shoir o'z xalqining ruhiy olamini go'yo musavvir yanglig' chizadi...

Shu yillarda yaratilgan "Turksib yo'llarida" she'ri nafaqat G'afur G'ulom ijodida, balki XX asr o'zbek poeziyasida ham muhim adabiy hodisa bo'ldi. She'rda o'z davri mafkurasi bo'y ko'rsatib tursa-da, asar katta estetik va ijtimoiy qudratga ega. Lirik qahramon kechinmalarida nafaqat o'zbek xalqi, ba'zi Sharq xalqlarining ham achchiq taqdiri, dardlari o'z ifodasini topgan:

Gardanda cho'yandan quyilgan zanjir,
Yerlarda hashorat kabi
Ochlikdan, on
Zorlikdan gezarib labi,
Ojiz,
mahkum, xor va betadbir
- Non, - deya,
- Non, - deya
Surunib kechmishdir.

Atoqli olim, ustoz Aziz Qayum "Akademik G'afur G'ulom" (Toshkent, 2008) nomli kitobida to'g'ri ta'kidlaganidek, bu she'rdagi harbiy yurishlar, ularning yovuz oqibatlari to'g'risidagi olovli misralar o'zining chuqur mazmuni, tasviriyligi va ta'sir kuchi jihatidan rassom kartinalari bilan bir qatorda turadi. Darhaqiqat, she'rda bashariyat taqdiriga daxldor voqealar, o'lkalar va xalqlar kechmishi, yangi turmush haqidagi orzu-istaklar hali-hanuz kitobxonlarni to'ldirib kelmoqda.

She'rlar kompozitsiyasidagi tazod-qarshilantirish usuli, tasvirdagi ijtimoiy hodisaning mohiyatini atayin bo'rttirishga yo'naltirilgan mubolag'a, siyosiy lirikaning mayinlik va hajv qobig'ida berilishi shoir ijodiga xos individual xususiyatlardir.

"G'afur G'ulom poeziyasining eng muhim fazilatlaridan biri uning hayotiyligidir, - deb yozgandi ustoz Ozod Sharafiddinov, — u o'z ijodida faqat real hayotga murojaat qildi, she'rlarning mazmuni, mavzusini ham real hayotdan oldi. G'afur G'ulomning poetik obrazlari tarkibi zaminida ham kundalik turmushda mavjud bo'lgan nisbatlar, real hayot tug'dirgan assotsiatsiyalar, qiyoslar yotadi".

Aytish mumkinki, bu fikr Gʻafur Gʻulomning turli davrlarda yozilgan barcha asarlariga taalluqli.

Gʻafur Gʻulom oʻz maslakdoshlari boʻlgan Oybek va H.Olimjon bilan yangi oʻzbek adabiyotida vatan mavzusida dilbar sheʼrlar yaratish anʼanasini boshlab bergan. U “Bari seniki”, “Toshkent” (dastlabki varianti “Yurtim” deb nomlangan), “Bogʻ”, “Chaman” kabi sheʼrlarida oʻlkamizning goʻzal va betakror manzarasini chizadi, xalqimizga xos gʻurur va vatanparvarlikni ulugʻlaydi. Bu yurt mard, arslondek botir yigitlarga vatan ekanligidan faxrga toʻladi:

Baland-baland togʻlaring ming pillapoya,
Archalar baxt boshiga tashlaydi soya.
Sheʼr oʻqiy, sheʼr toʻqiy bilanihoya...
Sen minglab azamat, botirga doya,
Arslon yigitlaring bari seniki.

Vatan tavsiflangan bu sheʼrlardagi muhim ijtimoiy mazmun, falsafiylik, shoir koʻnglidan otilib chiqqan nozik tuygʻular, tabiiy tasvirlar oʻquvchi qalbiga munavvarlik baxsh etadi. Koʻklam shabnamidan lirik qahramonning dili, shu goʻzal chamanning farzandi ekaniga shukrona aytadi. Shoir fikricha, vatan madhi ijodning asosi va ilhom manbayidir. Vatandagi gulgun manzaralarni kuylamaslik mumkin emas:

Bir vatanning oʻgʻlimenkim, har taraf gul, lola, bogʻ,
Qalb koʻziday eng qorongʻi kechada porlar charogʻ,
Har yigit magʻrur-u har qiz koʻkragi qoʻsh choʻqqi togʻ,
Suv desang, sharbat oqar, iqlim desang, qaymogʻ-u yogʻ,
Oʻz-oʻzini maqtaganda maqtamay qolgʻaymi men?

Gʻurur-iftixorga toʻlib-toshgan bu kabi sheʼrlar mustaqil yurtimizning bugungi avlodini ham vatanparvarlik ruhida tarbiyalashda muhim estetik ahamiyat kasb etishi shubhasizdir.

Shoirning bolalarga atab yozilgan “Yasha deyman, oʻgʻlim!”, “Bilib qoʻyki, seni Vatan kutadi” kabi sheʼrlari xalq orasida mashhur boʻlib ketgandi. Ulardagi millatimizga xos farzand tarbiyasiga eʼtiborlilik, yoshlarni el-yurt kelajagi uchun fidoyi va aql-zakovatli insonlar boʻlib yetishishga undash, mustaqil hayotga endi qadam qoʻyayotgan har bir oʻspirinda jamiyat va ota-ona oldidagi masʼuliyat hissini uygʻotishga qaratilgan daʼvatkor misralar, oradan yillar oʻtsa-da, oʻz ahamiyatini yoʻqotmagan. Shoir kelajak egalariga ilm-fan va kasb sirlarini puxta oʻrganish zarurligini qayta-qayta uqtiradi:

Fanlar koʻp, fanlar, ber oʻrganishga kuch:
Yerda yur, suvda suz, osmon uzra uch.
Hammasidan aʼlo, barchadan oldin,
Bilib qoʻyki, seni dunyo kutadi.

Ikkinchi jahon urushi yillarida shoir sheʼrlarida yangi mavzu va yangi ohanglar paydo boʻldi. Gʻurur va mushohada, hayqiriq va oʻch-alam, chuqur ehtirosalar bilan sugʻorilgan misralar bitdi. Bu asarlar hayot-mamot uchun kurash ketayotgan davrda xalqimizni qahramonliklarga undadi, gʻam-qaygʻularini yengillatishga xizmat qildi. Shayxzodaning quyidagi fikrlarini eslash oʻrinli: “Bu... sheʼrlar orasida, ayniqsa, uch sheʼrni alohida qayd qilib oʻtishni istar edim. Bular

urushning birinchi kunlaridanoq yozilgan “Kuzatish”, 1942-yil 16- mayda yozilgan “Sog‘inish” va 1945-yil 5-noyabrda yozilgan “G‘oliblar bayrami” she‘rlaridir. Mukammal bir she‘riy salosa (trilogiya) tashkil qilgan bu uchlikni anglash shoirimiz qalbining urush yillaridagi daftarini o‘qimoq demakdir”.

Darhaqiqat, ushbu salosaning birinchi she‘ri “Kuzatish”da xalqimizga xos fazilatlar ulug‘langan. Ma‘lumki, ushbu she‘r shoirning talaba farzandi Jo‘ra frontga ketishi munosabati bilan yozilgan. Lirik qahramon ota o‘z farzandini urushga jo‘natar ekan, uning diqqat markazida umumxalq muammosi Vatan himoyasi turadi. Shuning uchun u o‘g‘liga elning o‘tmishini va qahramonliklarini eslatadi, xalq nomidan mardona kurashishga da‘vat etadi, ma‘naviy yuksaklikka undaydi:

Saflar oldida bo‘l, mard bo‘l, botir bo‘l,
Do‘stlarga hamohang, jo‘ra bo‘l, jo‘r bo‘l.
Ona yurt hurmati, Vatan hurmati,
Xalqimning hurmati, g‘olib bo‘l, zo‘r bo‘l.

“Sog‘inish” she‘rida “Kuzatish”dagi badiiy tafakkur yanada quyuqlashgan. Tom ma‘nodagi insoniy fazilatlar egasi bo‘lgan otaning ruhiy kechinmalari orqali urush davri voqeligi hamda unga munosabat beriladi. Chunonchi, o‘z jigarbandini frontga jo‘natgan har bir ota-onani uning taqdiri haqida qayg‘urish, sog‘inch hislari chulg‘ashi tabiiydir. She‘rda ana shu holat o‘ziga xos milliy chizgilarda gavdalanadi:

Ne qilsa, otamen, meros hissiyot...
Jondan sog‘inishga uning haqqi bor.
Kutaman, uzoqdan ko‘rinsa bir ot,
Kelyapti deyman, ko‘rinsa g‘ubor.

Salosaning so‘nggi asari “G‘oliblar bayrami”da umumxalq shodiyonasi tasvirlansa-da, g‘oliblarni kutayotgan ba‘zi ota-onalar qalbidagi ayriliq zahri, mungli qiyofasidagi armon va o‘kinchlar ham yoritiladi:

Ko‘ngillar agarchi loladek xandon,
Musibat tamg‘asi qalb ustiga dog‘!

Xullas, bu uch she‘rda urush davri o‘zbek xonadonidagi insoniy kechinmalar, xalqimizga xos ma‘naviy yuksaklik, vatanparvarlik fazilatlarini mujassamlashgan.

G‘afur G‘ulomning bu davrda yaratilgan “Men yahudiy”, “Xalq otlandi”, “Sen yetim emassan”, “Bizning ko‘chada ham bayram bo‘lajak” kabi she‘rlari katta ijtimoiy mazmunga ega. Ularga barcha davrlar uchun dolzarb bo‘lgan baynalmilallik, insoniylik, vatanparvarlik g‘oyalari G‘afur G‘ulomga xos keng qamrovli badiiy fikrlash asosida singdirilgan. Xususan, “Sen yetim emassan” she‘ri dunyoning ko‘pgina tillariga tarjima qilinib, mashhur bo‘lib ketgan.

Shoir ijodiy maktabida kamol topgan mashhur adibimiz Said Ahmadning guvohlik berishicha, XX asrda Moskvaning Kolonna zalida G‘afur G‘ulom xotirasiga bag‘ishlagan marosimda atoqli rus shoiri Nikolay Tixonov so‘zga chiqib: “AQSHning sobiq Prezidenti Franklin Ruzvelt shoirning “Sen yetim emassan” she‘rini o‘qib turib ko‘z yosh to‘kib yig‘laganiga o‘zim guvohman”, - degan ekan. Bu she‘rning umumbashariy e‘tirofidir. G‘afur G‘ulom nazari tushgan,

uning olqishini olgan davrimizning yana bir mashhur shoiri Abdulla Oripov bu she'rlarni xalqimizga qo'yilgan umrboqiy haykal deb bilaman deganida haq edi.

Umuman, G'afur G'ulom davrning qanday dolg'ali voqealariga duch kelmasin, ijodining asosiy g'oyasi, motivi va mazmunini ulug' inson tashkil etdi. Urushdan keyingi yillardagi ijodida ham g'oyaviylik, zamonaviylik yetakchi xususiyat bo'lib qoldi, faqat mavzu ko'lami yanada kengaydi. Bu yillarda yozilgan she'rlar orasida "Vaqt" alohida ajralib turadi. Adabiyotimizni bezagan bu she'r falsafiy lirikaning eng yaxshi namunalaridandir. Shoir mazkur she'rda inson umri har bir onning salmog'i haqida falsafiy mushohadalar yuritadi:

Yashash soatining oltin kafgiri
Har borib kelishi bir olam zamon,
Koinot shu damda o'z kurrasidan
Yasab chiqa olur yangidan jahon...
Hayot sharobidan bir qultum yutay,
Kosani to'ldirgin, umrzoq soqiy.
Quyosh-ku falakda kezib yuribdi,
Umrimiz boqiydir, umrimiz boqiy.

Misralardan alloma shoirning hayot hodisalarini nihoyatda chuqur bilishi va tahlil etishi, donishmandligi, haqiqiy so'z ustasi ekanligi ko'rinib turibdi.

Adabiyotlar ro'yxati:

1. G'afur G'ulom. Sizga in'omim mening. – Toshkent, 2003
2. Sharafiddinov O. Xalq baxtining otashin kuychisi // Birinchi mo'jiza. – Toshkent, Adabiyot va san'at, 1979.
3. Mamajonov S. Shoir va zamonaviylik. – Toshkent., 1963 // G'afur Fulom prozasi. – Toshkent., 1966 // Uslub jilolari. – Toshkent, 1972.

G'AFUR G'ULOM VA SamDU

Mirzayev Ibodulla
SamDU professori,
filologiya fanlari doktori

Ma'lumki, ilm-ma'rifat o'choqlari barcha davrlarda ham ijodkorlar tomonidan muqaddas sanalib, ularga bag'ishlab nasriy va nazmiy asarlar bitilgan. Ana shunday, aytish mumkin bo'lsa, madhiyalardan biri akademik, O'zbekiston xalq shoiri, muborak tavalludining 120 yillik sanasini katta iftixor tuyg'ulari bilan nishonlayotganimiz G'afur G'ulomning "Samarqand uchun" (O'zbekiston davlat universitetining 20 yillik to'yiga bag'ishlanadi) she'ridir.

O'n ikki banddan iborat ushbu she'rda G'afur G'ulom dahosi, uning Samarqand va SamDUga ehtiromi o'zining yorqin ifodasini topgan. Osmon gumbazi ichra yana bir osmonday salobat kasb etgan, yuksak fazolarda charx urmish kabutar yanglig' parvozli, yer yuzining sayqali sifatida dong taratgan va Sharqning chinakam ko'rkiga aylangan qadimiy shahar – Samarqand ta'rifi bilan

boshlangan bu she'ning dastlabki satrlari fikrimizni olis moziyga qaratishga undaydi:

Niliy gumbazlari ko'k ichida ko'k,
Lojuvard osmonda chiniy kabutar.
Samarqand sayqali ro'yi zamin ast,
Sharqning ko'rki bo'lgan tarixiy shahar.

G'afur G'ulom jonajon universitetimizning tarixi uzoq davrlarga borib taqalishini ta'riflar ekan, avvalo, jahon ilm-fani sivilizatsiyasida yorqin iz qoldirgan buyuk, betakror alloma Mirzo Ulug'bek ilmiy faoliyati va G'arbda "Samarqand akademiyasi" nomi bilan mashhur bo'lgan rasadxonada tuzilgan "Ziji ko'ragoniy" asarini eslatib o'tadiki, bu ham qutlug' ilm dargohimizning mantiqan Ulug'bek davri bilan hamohang deyishimizga asos bo'ladigan jihatdir. Shoir asar nomini xalq toleyi, uning kechmishiga daxldor bo'lgan voqea-hodisalar jarayoniga bir qiyosiy misol sifatida keltirib o'tadi:

Manglaying bir ajin kasb etolguncha,
Minglab jafolarni kechirdi boshing
"Ziji ko'ragoniy" sekundlarida
Ko'p karra tutildi ko'kda quyoshing.

Tabiiyki, qatag'on yillarida muqaddas Vatan kechmishi, uning ilm-ma'rifat markazlarini to'g'ridan to'g'ri tarixga bog'lab qalamga olish va madh etish jasorat bo'lishi barobarida, yuksak poetik mahoratni va yurtga sodiq farzandlik tuyg'usini ham talab qilardi.

Quyidagi misralarda esa, ma'naviy komil va iqtidori baland ko'plab farzandlarga beshik bo'lgan, shuningdek, ma'rifat eshigini keng ochgan Sharq mamlakati Samarqand ekanligi faxr-u g'urur bilan ta'kidlanadi:

Vatanga – jamoli jahonoroni
Berguvchi farzandlar beshigi bu yer.
Sharqqa ma'rifatning aniq yuzini
Beniqob ko'rsatgan eshigi bu yer.

Mutafakkir G'afur G'ulom mazkur she'rida temuriy hukmdorlar, xususan, sulton Husayin Boyqaro mamlakatida piri murshid sanalgan hazrati Abdurahmon Jomiy va millat otasi hamda faxri hisoblanmish Nizomiddin Mir Alisher Navoiy nomlarini keltirish, turkiy xalqlar ma'naviyati taraqqiyotida ulkan hodisa bo'lgan "Xamsa"ni eslatish, "olimlar bahsini" tilga olish bilan ham bu dargohning darhaqiqat tarixiy ekanligini, uning mustahkam poydevor asosida faoliyat ko'rsatayotganini e'tirof etadi:

Ishq-u vafolarning "Xamsa"sin yozgan,
Jomiy, Navoiyning asriy nidosi.
Hali gumbazidan g'ung'irlab kelur,
Olimlar bahsining aksi sadosi.

Quyidagi satrlar esa ulkan adibimizning orzu-istaklari Vatan istiqboliga, uning istiqboliga umid tuyg'usi sifatida taassurot uyg'otadi.

Ulug'bek yulduzlar sirin fosh etib,
So'nik sham oldida taqdim etdi bosh.
Mazlum Sharq xalqiga bo'laolur ko'zgu

Toptalmas tuproqqa tushganda quyosh.

Yuqorida bayon qilinganlarga asoslanib, quyidagilarni aytib o'tmoq maqsadga muvofiq ko'rinadi:

1.O'zbekistonda oliy ta'lim tarixi uzoq zamonlarga borib taqalishi badiiy ijodda ham muayyan ma'noda o'z aksini topgan. Shulardan biri ustoz shoir va jamoat arbobi G'afur G'ulomning "Samarqand uchun" she'ri hisoblanadi.

2.Samarqand davlat universiteti tarixining Ulug'bek davriga borib taqalishi haqidagi izlanishlar g'oyat o'rinli va ibratlidir. Agar yurtimizdagi boshqa oliy o'quv yurtlari ham o'z tarixlarini tiklash borasida SamDUda qilinayotgan ishlardan ilhomlanib, tegishli tadqiqot ishlarini olib borishsa, pirovard natijada, yurtimizda oliy ta'lim tarixi yaxlit tarzda yaratilgan bo'lardi.

3.Vaholanki, ta'lim muassasalari tarixiyligi haqida gap ketar ekan, aytish joizki, o'sha ilm maskanlarida olib borilgan tahlil usullari ham o'ziga xos bo'lgan. Shuning uchun ham yurtimizdan jahon ilm-fani va madaniy sivilizatsiyasiga ulkan hissa qo'shgan ko'plab olimlar yetishib chiqqan. Abu Rayhon Beruniy, Abu Nasr Farobiy, Abu Ali ibn Sino, Al Xorazmiy, Al Farg'oniy singari o'nlab allomalarimizning beshigi bo'lgan bu muqaddas zaminda turli fan sohalari chuqur tahlil etilgani shubhasiz. Shu ma'noda, hozirgi paytda Istiqlol davri barchamizda ta'lim mazmunini jiddiy isloh qilishni talab etayotgan ekan, bunda bizdan, eng avvalo, mumtoz ta'lim-tarbiya tamoyillarini qiyoslab o'rganish talab etiladi.

"SHUM BOLA"NING MAKONI VA ZAMONI

***Karimov Bahodir Nurmetovich,
TDO'TAU professori,
filologiya fanlari doktori***

Yo'l - xronotop: Rus olimi M.Baxtin badiiy asar voqealar kechadigan bir qancha makonlar qatori yo'l xronotopini ham sanab o'tadi, uning qamrovi katta ekaniga urg'u beradi. Yo'l xronotopi asosiga qurilgan "Don Kixot", "Kapitan qizi", "O'lik jonlar" kabi qator asarlar jahon adabiyotida, "Yo'lovchi", "Yashil Niva", "Bayramdan boshqa kunlar" kabi asarlar o'zbek adabiyotida ham yetarlicha topiladi. Yo'lga chiqqan qahramon turli voqea-hodisalarni boshidan kechiradi. M.Baxtin ta'kidiga ko'ra "hayot yo'li", "yangi yo'lga kirish", "tarixiy yo'l" kabi metaforalar ham xronotopik mazmunga ega: unda makon va zamon tushunchasi mujassamdir.

G'afur G'ulomning "Shum bola" qissasida yo'l xronotopik mohiyat kasb etadi. Asar boshidayoq qahramon "katta safar uchun yo'lga tushdim", deydi. Sherigi Omon bilan ham "ulug' safarni mo'ljal" oladi. Shum bola asar voqealari fonida hamisha safarga, sayohatga otlangan, qay bir makondan ko'chib, yana qaysi bir yo'lga chiqqan holda ko'rinadi. Shuningdek, xronotopik mazmunli Shum bola obrazi ma'lum yo'l orqali borib bir muddat kechadigan yoki nisbatan muqimlashadigan makonlar bor: bozor, takyaxona, uy-joy, o'choq tandir va h.k..

Shum bola G'afur G'ulomning shunday bir yo'lga chiqqan qahramoniki, yo'l bo'yi unga uchragan odamlar – epizodik obrazlarni adib o'zining asosiy

maqsadga xizmat qildiriladi. Shum bola yurgan yo‘l asar syujet chizig‘ini tashkil etadi.

“Daryo toshqin, suvlar to‘lqin,
O‘tolmayman-a, yor-yor.
Otim oriq, manzil uzoq,
Yetolmayman-a, yor-yor”.

Shum bola yo‘l bo‘yi shu xalq qo‘shig‘ini xirgoyi qilib ketayotgan qahramondir.

Qissa roviysi aytadiki: “Etakni turmaklab, sag‘rimga bir mushtlab, “hayyo, hu” deb, shahardan tashqariga qarab yo‘lga ravona bo‘ldim”. Bilasiz: bu Shum bolaning ammasi uyidan chiqib ketishi edi. Boshqa bir joyda Yaxshiqiz kampirning uyidan sheriklari bilan “kallayi saharlab yo‘lga ravona” bo‘lishadi. “Shum bola”da yo‘lga xotirjam, ko‘p tayyorgarlik ko‘rib chiqilmaydi. Aksar hollarda biror sabab ortidan qochib chiqiladi.

Qissaning ikkinchi bo‘limi boshida Shum bola sheriklari bilan Sulton o‘g‘ri va uning hamtovoqlaridan qochib, bir necha soat yo‘l yurganlaridan keyin Tepaguzar, so‘ngra Oynabuloqqa yetib boradi. O‘lik yuvgich izlab yurgan kimsaga duch kelishadi. Sarguzasht asarlarga tasodifan ko‘rib qolish, kutilmaganda uchrashib qolish unsuri xos. Bularni bir sidra ko‘zdan kechirmoq lozim.

G‘afur G‘ulom o‘z qahramoniga mahalladoshlari, o‘rtoqlari, tanishlarini kutilmagan vaziyatlarda uchratib qo‘yadi. Uchrashgan odamning salomdan keyingi birinchi ishi, albatta, o‘z holining bayoni va birovdan ahvol so‘rash bo‘ladi.

Sariboy eshigida bir oy-u o‘n to‘qqiz kun ishlab, ko‘chaga haydalgan Shum bola “namozshom yo‘lga” chiqadi. Keyin o‘z holiga: Yana o‘sha darbadarlik, yana o‘sha makonsizlik balosi. “Qo‘ndoqdan ajragan kakku bolasiday, qo‘narga shox-butoqsiz. Kalasdan yuqoriroq tomon o‘rlab ketar edim”, deb izoh beradi. Yo‘lda birovlar o‘tovida “xudoyi qo‘noq” bo‘ladi. “Xudoyi qo‘noq” – yo‘lovchi, musofir; bu bir muddat nafasini rostlagandan keyin o‘z yo‘liga ketishi shart. Shum bola doimiy yo‘lga chiqqan qahramondir. Chunki u donishmand Sa‘diy: “Bir mamlakatda g‘arib bo‘lsang, hurmatsizlansang, safarni ixtiyor qil”, deb aytgan hikmatini yaxshi biladi.

Shum bola ba‘zan yolg‘iz o‘zi va ba‘zan sheriklari bilan yo‘l yuradi. Ertaklar voqeligida kelganidek “bir talay manzil-marohil yo‘l bosib, ko‘p yurib, ko‘p yursam ham mo‘l yurib”, o‘zi o‘ylamagan maskanga yetib boradi. Biror ishkaldan keyin “qochadigan yo‘l mo‘ljallar”ini oladi. Yo‘lidan adashadi; yo‘l izlaydi. Gohida yolg‘izoyoq yo‘l – so‘qmoqlardan yuradi. Bir xil epizodlarda Shum bola qilarga ishi qolmagach, barchaga “xayr-xo‘shni nasiya qilib biyobonga yo‘l” oladi va ba‘zan “osmon uzoq, yer qattiq” deganicha, qayerga ketib borayotganini o‘zi bilmay yozg‘iradi. Bunday adashgan mahallarda yo‘lovchilardan yo‘l so‘raydi.

Umuman olganda, Shum bola o‘ziga bir najot yo‘lini izlab yurgan qahramondir. U “yo‘l-yo‘lakay ming xil xayollarga” botib boradi. Makondan makonga ko‘chadi. Tanish-notanish, do‘st-dushman, o‘g‘ri-to‘g‘ri, jinni-sog‘, boy-kambag‘al, domla, muazzin, qalandar, ko‘knori, it, tuya, karvon va boshqalar yo‘lidan chiqadi. It quvlaydi. Gohida Shum bolaning yo‘li bozor, mahkama, sartaroshxona, novvoyxona, takyaxona tomonga tushadi. Hindistondan ajib-

gʻaroyib mamlakatni koʻrishni orzu qiladi. Uning tasavvuricha, koʻchalarda marvarid sochilib yotadi; “hind bolalari koʻngalagiga marvarid, yoqut solib yotadi, non daraxtda pishadi, odamlari besh yuz yoshga kirganda moʻylovi chiqadi...”; u yerda “qish boʻlmaydi, qoʻy tekin, ona-bolali fil toʻrt tanga va hokazo, va hokazo...”. Shum bola ichida Hindistonga safar orzusi yashaydi.

Asar oxirida “toʻrt tomoni”ni qibla bilgan Shum bola “qayoqqa qarab yoʻl” olishni oʻylab yana **yoʻl** oʻrtasida qoladi. Shoir aytmqchi “Umr – yoʻl, qayrilish koʻp, Uchrashish, ayrilish koʻp, Unutish, aytilish koʻp” (Omon Matjon misralari). Shum bola hali-hamon yoʻldadir. Shum bola – yoʻldagi yoʻlovchi va u barcha zamon odamlariga yoʻldosh qahramondir.

Bozor: Gʻafur Gʻulomning “Shum bola” qissasida koʻp yoʻllar bozorga olib boradi. Aslida badiiy adabiyotda bozor ham alohida, muhim xronotoplardan biridir. Zamonaviy oʻzbek adabiyotida voqealarining ayrim epizodlari bozorda kechadigan (“Bolalik”, “Oʻtmishdan ertaklar”, “Jajman”) yoki ayni nom “Bozor”, “Bozor dunyo” oʻlaroq sarlavhaga chiqqan holatlar ham yoʻq emas.

“Shum bola” qissasida esa bozor xronotopi muhim qiymatga ega. Asarning boshidagi bir necha betda bozor tavsiri keladi. “Rastalar obod. Qaymoq bozorining burilishida, mahkamaning boshida Ilhom samovarchining kattakon choyxonasi boʻlib, unda grammofon chalinadi”. Muallif Shum bola nazarini birinchi sahifalardan bozor boʻylab yuritadi. Bunda “bir tomoni sarrochlik, bir tomoni sahhob – kitob bozor, bir tomoni vofurushlik – oyoq kiyim bozori, bir tomoni nogʻora bozor, bir tomoni pichoqchilik, namat bozor...” – bozor toʻla, tabiiyki, odam. Bozor gap-soʻzga, shovqin-suronga, toʻpolon-tortishuvlarga toʻla joy. Shum bola koʻpincha shu notinch makonda harakatlanadi.

Omon bilan yoʻlga chiqqan Shum bola kechga yaqin juda ham katta Koʻkterak degan “shahar”ga va uning bozoriga kirib boradi. “Juma kuni bozor edi. Erta bilan bozorga chiqdik. Hay-hay, bozor boʻlganda ham qanday bozor, deng? Bu tomoni Eron-u Turon, Makka-yu Madina, Maymana-yu Maysara, Xitoy-u Chin, Istambuli Mozandaron–na quyi, na past, na oʻng-u na chap. Bunday katta bozorni odam bolasi koʻrmagan boʻlsa kerak”. Tabiiyki, bu ifodada folklorga xos mubolagʻa yoʻq emas. Raviy davom qiladi: “Bozordagi rastalarni ayting, mollarning shigʻal toʻlib ketganligini ayting, bozor ahlining turlanganini ayting. Savdogarlarning makkor basharalarini, rango-rang kiyim-boshlarini ayting...”. Takror kelayotgan “ayting” murojaatida taʼkid va ohang bor. Shum bola shu bozorda turli lash-lushlarini, Omon esa ketmonini sotadi. Bozor – oʻziga xos olam. Bozor – xronotopik makon. Unda hayot qaynaydi. Odamlar uchrashadi va ajralishadi. Qiziq hangomalar, toʻgʻrilar, tovlamachilar, oʻgʻrilar, nafs bandalari va shu bilan birga halol non topish niyatida boʻlganlar ham bozordan joy oladi.

Kisavvur Sulton oʻgʻrining tirikchiligi ham bozorda. Toʻqli jallob mahallasida yashaydigan bechora, sodda Abdurayim pulini olgan oʻgʻriga tashakkur aytadi: “Rahmat, aka, bu yaxshiligingizni oʻlgunimcha unutmayman, qiyomatli aka-uka tutindik”, deydi. Sulton oʻgʻri shu zaylda nonini oʻzining buzuq tarozusiga solib “halollab” yeydi. Qissadagi koʻp obrazlar bozorda sinaladi. Bozorni bilgan inson dunyoni, odamni biladi. Odamshunos shoir Gʻafur Gʻulomning oʻzi bozorshunos ham edi, menimcha.

Ho‘kiz o‘rniga eshakni so‘yib, tomma-tom qochib, tandir ichiga tushgan va u yerdan chiqqan Shum bola Kalas bozoriga boradi. Tuhmatdan qutulib, bozor aylanadi va “Bugun bozorga o‘xshaydi, Yetimlar zor qaqshaydi, Yo ollo do‘st, yo ollo” deb talqin aytayotgan qalandalarga borib qo‘shiladi.

Sariboynikidan ketgandan keyin Shum bola yana bir bozor ustidan chiqadi: “Qaysi qishloqqa borsam, bozorning ustidan chiqar edim. Aksiga yurib bugun Sariog‘ochning bozor kuni edi”. U bozorda olmalarini sotadi. G‘afur G‘ulom inson tabiatining muhandisi o‘laroq qo‘li pul ko‘rgan Shum bolani sotuvchidan endi xaridorga aylantiradi. Garchand qimmatbaho mollarga sarmoyasi yetmasa ham, narx-navosi bilan qiziqadi. Deylik, “tunuka vanna” narxini yerga urgani uchun tanbeh eshitadi; “qunduz yoqalik bobrik palto”ga yoki “shoxlari mullavachchalarning sallasiday buralib-buralib ketgan do‘ng peshonalik, katta bir qo‘chqor”ga xaridor bo‘ladi. Bozor – bozor-da! Bozorda Omon qayta uchraydi. Eslassangiz, ular o‘lik yuvish marosimidan keyin olomondan qochib ajrashgan edi.

Shum bola Omon bilan Sariog‘och bozoridan “qurey-qurey”lashib, qo‘ylarni haydab, yana Ko‘kterakka – Toshkent bozoriga borishadi. Bozor shunday bir g‘aroyib joy. Shum bola e‘tirofi: “Bozor-o‘char degan joyda o‘zingni to‘daga urding, qutulding ketding-da! Kisavvurlar ham to‘daga urib, qutulib ketadi-ku!” Toshkent shahrining bozori Shum bolaga begona emas. Shuning uchun qissadagi yana bir makon – takyaxona bilan bozor hayotini yozuvchi Shum bola orqali bog‘laydi.

Takyaxona - bosh qahramon eng ko‘p muddat qolib ketgan makon. Unda keldi-ketdi ko‘p; qalandarlar, ko‘knorilar, turli mijozlar jamlanadi. Orom olishadi, ba‘zida rivoyatnoma kitoblar o‘qib, mazza qilishadi. SHum bola esa vaqti-vaqti bilan bozorga chiqadi.

“Shum bola”dagi barcha voqelikni qamrab oladigan asosiy makon – bu Toshkent va uning tegrasidagi mahalla hududlaridir. Ularning nomini sanab o‘tirmayman. Faqat ta‘kidlash lozim bo‘lgan narsa shuki, shu kichik mahallalar Shum bola uchun “shahri azim” bo‘lib ko‘rinadi. G‘afur G‘ulom Shum bolani har bir makonga ko‘chirib, yo‘llar ekan, o‘sha hududlarni, kichik mahallalarni kengaytirib kattalashtiradi. “Achchabod degan “shahri azim”ga borganimda, bir to‘da katta-kichik qora-qura o‘spirinlar atrofimni o‘rab olishdi”. Boshqa bir o‘rinda falon “shahri azimda boshimga tekkan toshlarning soni ko‘zimdan oqqan yoshlardan ko‘proq”, deb xomush tortadi. Ko‘kterak, Eshonbozor, Qoplonbek, Sharobxona kabi “shahri azimlar”ni sanab keladi-da, bu yerlarda bo‘lib o‘tgan “ko‘p voqealarni ushbu sarguzashtda yozganim yo‘q”, deydi.

Vaqt: Shum bolaning: “Xuftonga yaqin yana katta bir “shahri azim”ga kirib bordim”, degan gapi bor. Bu qaysi “shahri azim” ekanini aniqlashga zarurat sezmadim. Bizga ayni jumladagi badiiy asar xronotopi uchun muhim bo‘lgan vaqt ifodasiga doir “xuftonga yaqin” birikmasi kerak. Odatda badiiy asar voqeahodisalari bayonida vaqt tushunchasining asrlar, yillar, fasllar, oylar, haftalar, kunlar hamda kunning yoki tunning taqsimotiga tegishli turli ifodalar qo‘llanadi.

Shum bola “innakeyin”chi Sariboy eshigida bir oy-u o‘n to‘qqiz kun xizmatda bo‘ladi. Qayta uchrashganlaridagi sherigi Omonning aytishicha, u “adashib-uloqib o‘n yetti kun deganda Chimkentga yetib” boradi. Shum bola Hoji

boboning ko'knorixonasida sal kam to'rt oy xizmat qiladi. Qissadagi umumiy vaqt qamrovi olti oylarni tashkil etadi. Yozda ko'chaga chiqib ketgan Shum bolaning safari qishga borib oxirlaydi. Ketish va qaytishga taraddud orasidagi voqea-hodisalar qissaga jamlanadi. Ammo unda uzun tarixiy hodisalar, o'zbeklarning turmush tarzi, oilalar muhiti, o'yin-kulgilari, ahli kitobning holatlari, mullanamo kimsalarning turish-turmushlari, islom dini haqiqatiga nomunosib urchigan turli bid'atlarning badiiy talqini, birinchi jahon urushi davridagi odamlarning turmush tarzi, nisbatan og'ir zamon manzaralari – barcha-barchasi xuddi qo'lning kafti-oynasidek namoyon bo'ladi.

Yozuvchining kunlik vaqtni aniq ko'rsatishlari voqea-hodisa yuz bergan paytni teran tasavvuri etishga yordam beradi. “Shum bola” qissasida “quyosh chiqqan”, “kun og'ib”, “hozir oydin kecha”, “yarim kechada oy ko'tarilgandan keyin” kabi quyosh, oy harkati bilan vaqtni aniqlashtirish, ba'zan soat va minut bilan belgilash hollari uchraydi. Lekin asar uchun olingan davr-muhiti va musulmon millatining urfi-odati koloritiga mos vaqt bu, nazarimda, namoz vaqtlaridir [1,84-103-bet].

G'afur G'ulom qissada ora-orada Shum bolaning kun qaysi mahali qayerga borgani yoki umuman voqelikni yuritishda ko'p o'rinlarda “kun og'ib, peshin bo'ldi”, “vaqt oxir peshin bo'lib qolgan edi”, “peshindan keyin namoz asrga yaqin”, “namoz asrdan sal o'tar-o'tmas”, “asr bilan shom o'rtasida ro'paramdan katta bir daryo chiqib qoldi”, “namozshomdan keyin”, “namozshomdan keyin qonuniy ravishda, albatta, xufton ham bo'ldi”, “xufton namozini o'qib bo'lganlaridan keyin”, “xuftondan ancha o'tib qolganda” kabi ta'birlarni qo'llaydi.

Deylik, xo'jayinining eshagini so'yib qo'ygan Shum bola qochishi qachon edi? Bomdodda – “kallayi saharlab boshdan-oyoq qonga belanib, tomma-tom” qochadi va mo'ridan tandir ichiga tushadi. Kun bo'yi tandir ichida o'tirish oson emas. Ammo “oshiq-ma'shuqlarning kirdikorlari”ga guvoh qilish uchun yozuvchi Shum bolani shunga majburlaydi, qimirlatmaydi. Kechgacha tuz totmay, joyidan siljimag, tandir o'choqning ichida o'tiradi. “Piyozdog'ining hidlari dimog'imga kirib, ishtaha ham namozshomgulning karnayiday ochilib ketgan”, deydi u. Vaqt “xuftondan ancha o'tib qolgan”dan keyingina tandir iskanjasidan qutuladi. Yozuvchi ba'zan o'z qissasida “tovuq qo'noqdan tushmasdan”, “bir osh pishim vaqt” kabi metaforik ta'birlardan ham unumli foydalanadi.

Uchrashish-ayrilish: Rus adabiyotshunosligida xronotop masalasini jiddiy o'rgangan M.Baxtin qahramonlarning uchrashish-ajralish, yo'qotish-topish, tanib qolish-tanimaslik motivlari barcha adabiy turlarda borligini, “bu motivlar o'z tabitaiga ko'ra xronotopik mazmunga ega” ekanini ta'kidlaydi va “Badiiy asar syujetida tugun, ba'zan kulminatsiya yoki yechim uchun uchrashuv xronotopi kompozitsion mazmun kasb etadi”, deb yozadi [2, 134-bet]. Bunday uchrashuvlar, tasodifan ko'rib qolish vaziyatlari “Shum bola” matnida yetarlicha topiladi.

Shum bola yo'lda, bozorda o'rtog'i Omonni ko'rib qoladi. Omon bilan birga Husnibiyni uchratishadi. U laxtakfurushlik bilan mashg'ul. Husnibiy Shum bolaga onasi izlab yurganini, pochchasining kaptarlarini lo'libachchalarga sotganini, so'ngra pochchasi Nabi mirshab bilan borib ikki so'm to'lab, qumrisini qaytarib olganini aytadi. Husnibiy ularni mahalla yangiliklaridan xabardor etadi.

Bir chorshanba bozorga tushganida ro'parasidan Turobboy chiqib qoladi. Keyingi chorshanba qaymoq bozorida "ikki xurma qatig'ini yerga qo'yib" savdo qilayotgan mahalladosh o'rtog'i Ubayga yo'liqadi. Beixtiyor ko'rib qolish, kutmaganida uchrashish – bu sarguzasht asarlar uchun juda muhim atribut.

Hoji bobo ozodlik olib, qovun bozoriga borgan mahali "Eski shahar bozorida qorovullarning boshlig'i Rahmatullo sarkorga ko'zi" tushib qoladi. Rahmatullo sarkor – elda gapi tosh kesadigan obro'li odam. O'zaro hol-ahvol so'rashadi. "Mirza akam omon-eson yuribdilarmi?" deb rahmatli bo'lib ketgan otasini surishtiradi. Muallif odamiyligi baland bu obraz zimmasiga birinchidan Shum bolaning otasi ismi kimligini ma'lum qilish, ikkinchidan, onasi va uch singlisi xabarini boshqalarga bildirish vazifasini yuklagan bo'ladi. Shu bilan birga Shum bolaning domlaga, qo'ychi boyga, qalandarlar yoki Hoji boboga yo'liqishlari ham dunyo sarguzasht adabiyotiga xos bo'lgan uchrashuv motivi uchun misol bo'la oladi.

Mazkur maqolada G'afur G'ulomning "Shum bola" qissasining bir qirrasiga nazar solindi. Holbuki, "Shum bola" o'zining ko'plab fazilatlari bilan yangicha adabiy-nazariy talqinlar uchun asos bo'ladi.

Adabiyotlar ro'yxati:

1. Бу хусусда қаранг. Баҳодир Карим. "Адабий макон ва замон шарҳи" / "Абдулла Қодирий феномени" китоби. –Т., "InfoCapital Grop" нашриёти. 2019.

2. Бахтин М.М. Литературно-критический статьи. –Москва. Художественная литература, 1986.

G'AFUR G'ULOM LINGVOPOETIKASI XUSUSIDA AYRIM MULOHAZALAR

*Karimov Suyun Amirovich
SamDU professori,
filologiya fanlari doktori*

G'afur G'ulom uslubining shakllanishida u yashagan davr, bu davrning o'ziga xos murakkabligi, ijodiy muhit, mumtoz adabiyotimiz namoyandalari, xususan, Alisher Navoiy, Bedil singari klassiklarning, shoir o'ziga ustoz deb hisoblagan boshqa adiblar va nihoyat, uning o'z ijodiy manerasi hamda iqtidorining ta'siri bo'lgan, albatta.

G'afur G'ulom badiiy merosining tadqiqotchilari 20-yillarni uning shoir sifatida shakllanish davri deb hisoblashadi. Demak, bu davrni uning uchun o'z uslubini izlash davri deb baholash ham mumkin.

Shoir uslubining shakllanishiga rus adabiyotining, xususan, V.V.Mayakovskiyning ta'siri katta bo'lganligini uning o'zi ham "Ustozimiz" maqolasida ta'kidlab o'tgan: "Mayakovskiy satirasidagi qahrli, omonsiz kinoya, lirikasidagi ulkan larzakor kuchga ega bo'lgan ehtirosidan tashqari, men uning poetik sistemasiga, ritm va intonatsiyalarining mardonavor notiqlik qudratiga, materiallarning dadilligi va mubolag'alarining yorqinligiga, misralarning

bo‘linishiga, she‘rning ritmik ohangi hamda mazmun yorqinligini oshirishga mo‘ljallangan satrlarning alohida-alohida ajratilishiga e‘tibor berdim. ...Mening “Turksib yo‘llarida” she‘rim shunday shaklda yozilgan she‘rga xos bo‘lgan ohang va ma‘no boyligini ko‘rsatibgina qolmasdan, lirik samimiyat, jonli nutqning ko‘tarinkiligi, uning zavq-shavqini ham namoyish qilish kerak edi... Men uning da‘vatiga javoban “Ko‘kan” degan birinchi dostonimni yozgan edim. Uning xalqimiz orasida hamon o‘qilishi, ajab emaski, Mayakovskiy tufaylidir” [1,128].

Bu davr uslubiy izlanishlarini nimalarda ko‘rish mumkin? Birinchi navbatda, bu savolga tilga bo‘lgan munosabatda deb javob berishga to‘g‘ri keladi. Fikrning isboti uchun uning she‘rlaridan ayrim namunalar keltiramiz. G‘afur G‘ulom “Biz ikkov” she‘rida chiqish kelishigi **-dan** o‘rnida qaratqich kelishigi qo‘shimchasi - **ning** ni qo‘llaydi:

Gerdayish ulug‘lik **sening**,

Yalinish, yolborish **mening**.

-dan ning egalik ma‘nosini anglatadigan **-niki** qo‘shimchasi vazifasini bajarishini “Sevdigim” she‘rida kuzatamiz:

Tiriklik, ong, bilim berib gullarga,

Obodlik, shul gigant davronlar **sening**.

Aytilganlardan shunday xulosa kelib chiqadiki, shoir bu davrda tildagi birliklarning ma‘no imkoniyatlarini axtargan va uni topa bilgan ko‘rinadi. Garchi hozirda qaratqich kelishigi qo‘shimchasining bu kabi ma‘nolarni anglatishi chegaralanib qolgan bo‘lsa ham, o‘sha davrlarda unda bu imkoniyatning mavjud bo‘lganligini tasdiqlaydi.

G‘afur G‘ulom sinfiy pozitsiyasi aniq, ona-Vatanga muhabbati nihoyatda kuchli bo‘lgan shoir. Shuning uchun ham jamiyat taraqqiyotiga zid bo‘lgan har qanday kamchilik, illat va unsurga nisbatan qalbidagi nafratini yashirmasdan qog‘ozga tushira olgan va bunda tildagi har bir imkoniyatdan foydalanishga harakat qilgan. Birgina tinish belgisi – qo‘shirnoqqa bo‘lgan munosabatda ham buni ko‘rish mumkin bo‘ladi. Adib “Dongli” shoirga” she‘rida bu belgidan ironiya usulida g‘azab-nafratni ifoda etish uchun, so‘zlarni teskari ma‘noda qo‘llash maqsadida foydalanadi:

Kelgindi, bosh kesib qahramon sanalgan,

Sardor bosqinchining qonli sadog‘in

Yalashdan to‘ymagan, ey epchil, **«shirin til!»**

Buzg‘unlik ichida tamomlab o‘z ishin,

Gunohsiz **murdalar ustida iljaygan**,

Ma‘lun ko‘kraklarda bir misqol qo‘rg‘oshin,

Mazlumlar nomidan joylashgan erurkan,

Bir **nomard «botir»-chun yig‘lagan** ey ko‘ngil!

Shirin til iborasini ishlatishi va uni qo‘shirnoq ichida berishi shartmidi? Gap bu iborani berish yoki bermaslikning shart yoki shart emasligi haqida ketayotgan emas. Gap uning muallifning o‘z fikrini ifodalashiga qay darajada ko‘maklasha olishida, shoirni muddaosiga yaqinlashtirishida. G‘afur G‘ulom she‘rda tasvirlayotgan «dongli» shoir hammaga shirin til bilan gapiradi. Ammo uning haqiqiy basharasi keyingi “Gunohsiz murdalar ustida iljaygan” misrasida ochiladi,

uning munofiq kimsa ekanligi ma'lum bo'lib qoladi va ana shu holatda shirin til iborasining nega qo'shtirnoqqa olingani ham ayon bo'ladi. SHunda o'quvchi sarlavhadagi *dongli* so'zining ham nima maqsadda qo'shtirnoqqa olinganligini to'la his qiladi.

She'r bayonidan ma'lum bo'ladiki, tasvirlanayotgan kimsa doim iljayadi, shirin tilli. Yuzaki qaraganda bu so'zlarda uyg'unlik mavjud. Aslida esa ular bu nutqiy holatda antiteza hosil qilmoqda. Murda ustida iljayish uniki, ammo shirin tillilik soxta. Mazlumlar o'ldirganni u "botir" deb hisoblaydi, muallif uchun esa u mal'un, nomard.

"Insoniyat bayrami" she'rida ham qo'shtirnoq zimmasida alohida vazifa bor. Tasvirlanayotgan arslon odatdagi ijobiy ma'noda qo'llaniladigan metaforik so'z emas, balki aksincha – salbiy ma'nodagi tushunchani ifoda etmoqda. Qo'llanilayotgan qo'shtirnoq *to'ymas*, *qari* epitetlarining matnda mustahkam joylashuviga ko'maklashmoqda:

Sharqning azamat fili zalvordor xartumi-la

To'ymas qarri «arslon» ning belini bukajakdir.

Shu tarzda asarda shoir qo'shtirnoqqa olgan so'z va iboralar o'zida ma'lum uslubiy ma'no tashiydi.

O'rni kelganda yana shu gapni ham aytib ketish lozimki, faktlarni bir-biriga qarama-qarshi qo'yish, voqea-hodisalarni taqqoslab keltirish, bir-biriga zid ma'noli so'zlarni yonma-yon keltirish va shu tarzda badiiy uslub uchun zarur bo'lgan antiteza usulidan foydalanish G'afur G'ulomning bayon uslubiga xos xususiyat sanaladi. Masalan: ko'kat – somon:

Bu, bu qanday ish?!

Azob, o'lim, el-yurt vayron.

Qahatlik, mudhish

Alanga, zaharli tutunda **ko'katlar somon!**

("Agar urush bo'lib qolsa...")

"Uylanish" she'rida: *bilmasdan uylanish – eng shirin ne'matga alamni o'rtoqlash; to'satdan bo'lgan esh – kulfatga sudrovchi yov to'nin kiyish; "taqdir" degan dardisar ulfatga yo'liqish – qahraton qish; hayotga mensimay iljayish – yo'lsiz gangratib qo'yish* tarzida antiteza hosil qilinadi, ya'ni mohiyat shu usul ko'magida ochiladi.

She'rdagi

Hayotga mensimay **iljayish**

Kishini yetaklab g'urbatga,

bir yo'lsiz gangratib qo'ymasmi?

parchasida *iljaymoq* so'zi nihoyatda o'rinli ekanligini ta'kidlamoqchimiz. Chunki sinonimik qatordagi *jilmaymoq*, *kulimsiramoq*, *irjaymoq*, *tirjaymoq*, *ishshaymoq*, *irshaymoq* singarilarning birontasi ham shoir muddaosini ifoda eta olmasligi mumkin edi.

Antiteza, ya'ni mumtoz adabiyotdagi **tazod** san'atining eng yaxshi namunasini uning "Sen yetim emassan" she'rida ko'ramiz: g'urbat, ofat, g'am - harorat, muhabbat, shafqat:

Cho'chima, jigarim,

O'z uyingdasi,
Bu yerda
na **g'urbat**,
na **ofat**,
na **g'am**.

Bunda bor:
harorat,
muhabbat,
shafqat

Va mehnat nonini ko'ramiz baham.

G'afur G'ulomning tasvirni obrazli bo'yoqlarda berishga ishtiyoqi ham 20-yillardagi o'z uslubini izlash yo'lidagi harakatlar sanaladi. "Rasm egasiga" she'rida mulohaza shunday: agar rasmdan qarab turgan qizning qoshi yoki ko'zi qimirlab ketsa, unga qarab turgan yigit qanday ahvoliga tushishi aytilgan, xolos. Ammo bu holat poetik matnda qanday tasvir etilgan? Bunda endi shoirning bir qadar ijodiy ulg'ayganiga, badiiy mahoratining tobora yuksala borayotganiga tan bermaslikning iloji bo'lmaydi:

Shu qoshlar o'ynoqlab ketsalar,
Yana ko'p termulish gunohi qoplaydi yigitni,
Shu ko'zlar javdirab qo'zg'ala ketsalar,
Telbalik chulg'aydi sukutni.

Mana endi manzarani, holatni shoir chizganday qilib tasavvur etadigan bo'lsak, rasmdan qarab turgan qizning qoshlari shunchaki qimirlamasdan, o'ynab, o'ynoqlab ketsa, unga qarash emas, termulishdan o'zini tiya olmagan yigit gunohga botishi mumkin. Agar qizning ko'zlari ham harakatga kelib qolsa, qo'zg'alsa, qo'zg'alganda ham javdirab qo'zg'alsa, jimlik, sukunat buziladi, shoir ta'biri bilan esa telba bo'ladi. To'rt misraning o'zida ham G'afur G'ulomga xos bo'lgan yengil yumor, ham tasvirni g'ayriodatiy tarzda berish, ham mubolag'a bor. Ularning barchasi jamuljam bo'lib, ajoyib badiiy manzarani yuzaga keltirmoqda.

G'afur G'ulomning tildan foydalanishdagi o'ziga xos bo'lgan uslubini izlashda davom etar ekanmiz, uni ijodkorning fe'l-u atvoridan, dunyoqarashi va xalqqa hamda jamiyatga bo'lgan munosabatidan tashqaridan axtarmaslik kerakligini anglaymiz. Zero, shoirga xos bo'lgan xususiyatlardan biri uning baynalmilal adib ekanligi bilan izohlanadi. Shoir shunday fazilatga ega bo'lgani uchun ham

Xalqlar oilasini buzolmas dushman,
Do'stlarga jonimni fido qilganman
deb yozgan edi.

U baynalmilallikni qalbdan his qila olgani uchungina ijod jarayonida bir matnning o'zida turli tillarga xos bo'lgan so'z va iboralarni bimalol ishlata bildi:

O'rta Osiyoning Sharq fakulteti
Lisonlar, zabonlar, tillar-la obod;

"Obaki dandon" she'rida quyidagi misralarni o'qiymiz:

Duyuzlamalarga cho't emasdir ikki dunyo,
Bilmay o'ng-u so'l, atrofda qolib bo'lmoq ovoro –

Bir necha riyokor «madaniy» xumparlar uchundir.

Bu yerda *du* soʻzining qoʻllanilishi matn talabi bilan amalga oshirilgan boʻlishi ham mumkin. Chunki, shu satrning oʻzidayoq oʻzbekcha ikki soʻzi turibdi.

Matn talabi degan fikrni kengroq doirada tushunish lozim. Vazn va qofiya talabi ham shuning ichiga kiradi:

Ufqimda ranglardan yuz talosh erdi,

Oʻngimda naʼmalar-la dillar **xarosh** edi,

Gʻafur Gʻulom asarlari matnini koʻzdan kechirib, uni bimalol zullisonayn shoir va ikki tilda ham bimalol ijod qila olish uning uslubiga xos boʻlgan xususiyat deb ayta olamiz. Shoirning “Qozoq elining ulugʻ toʻyi” sheʼrini olib qaraylik. Sheʼr shu darajada ustalik bilan yozilib, boʻgʻinlar, qofiyalar va ayrim soʻzlar shunday tanlanganki, uni ham oʻzbekcha, ham qozoqcha talaffuzda bimalol oʻqish mumkin boʻladi:

Azamat xalq – ulkan qozoq, Oʻzbek elidan qutlov.

Bir tugʻ osti birlashtirdi Partiya bergan yalov.

Bir tomirmiz, bir chorvamiz, Bir qozonmiz, bir olov,

Oʻrtamizda neʼmat toʻla, Dasturxonday keng yaylov kabi.

Buning ustiga *ulkan, qutlov, qutli, yalov, tomir, chorva, qozon, olov, yaylov, el, ogʻa, oʻtrik, jeka, jengay, ini, jondosh, manglay, tutash, tugʻishqon, quralay, boʻrk, sarimoy, soʻlqildogʻan, oʻmrov, manov, aytishuv* (sheʼrda aytisuv), *tortishuv, manaday* singari soʻzlar ushbu asarning betakror uslubini belgilaydigan lingvistik vositalar sanaladi.

Shoir asarlari matnida uchraydigan *arzi muqaddas, huquqi bashariy, markazi olam, arzi ishq* singari forsha-tojikcha shakldagi izofali qurilmalarning faol ishlatilishi ham uning bu tillar va ularning vakili boʻlgan xalqqa munosabatini koʻrsatuvchi namunalardir.

Garchi bu baynalmilallik va zullisonaynlikning sabablarini izohlab oʻtirishga hojat boʻlmasa-da, shoirning oʻzi «Sobir Tohirzoda bizning uyimizda» nomli maqolasida keltirgan ushbu gaplarini eslash joizdir deb oʻylaymiz: “Men tugʻilib yashagan oila maʼrifatli oilalardan edi. Otam Mirzo Gʻulom - Muhiddin Mirza Orif oʻgʻli uch-toʻrt tilni mukammal bilar edi. Ona tilisi oʻzbekcha, ona tilisidan boʻlak tojikcha va oʻsha zamonaning ham ilgʻor va davlat tili boʻlgan ruschani ham bilar edi” [1, 278-279-bet]. Boshqa sabablarini esa, albatta, shoir yashagan davrdan izlash toʻgʻri boʻladi.

1941-yilda shoirning oʻgʻli Joʻraxonning harbiy xizmatga chaqirilishi munosabati bilan yozilgan “Kuzatish” sheʼri boshdan oxirigacha Vatanga muhabbat, uning tuprogʻini dushmanlardan tozalashga chaqiriq ruhida yozilgan. Hayotdan rozilik, taqdirdan shukronalik kayfiyatda boʻlgan lirik qahramonning tilidan aytilgan ushbu gaplar diqqatimizni tortadi:

Taajjub qilaman oilamizning

Tolelar yaratgan tasodifiga

Bandning sheʼr davomida uch marta takrorlanishi va har takrorda tasodifning sabab va oqibatlarini bandan keyin kelayotgan

Tasodif emasdir, balki sen-bizni

Kurashlar taqmishdir baxtning ipiga.

Tasodif emasdir, balki sen-bizni
Hayot o'zi taqdim baxtning ipiga.
Fashizm itlari quturgan damda
Kira olding kurashning keskin safiga
tarzidagi uch bandda ochib berilgan.

N.Shukurov ana shu she'rni tahlil qilar ekan, "donishmad ota o'z o'g'li Jo'raxonning harbiy yoshi "fashizm itlari quturgan dam"ga – ya'ni Ulug' Vatan urushi davriga to'g'ri kelib qolganligi bilan benihoya faxrlanadi", deb yozgan edi [2, 14-bet].

Ammo biz matndagi *taajjub* so'ziga e'tibor qilishni istar edik. Vatanga qattol yov bostirib kirganda uning himoyasiga o'tlanish har bir farzandning burchi, albatta. Bunga otalar qiladigan da'vat ham tabiiy hol deb qabul qilinadi. Hamma zamonlarda ham shunday bo'lib kelgan. Bu otalik mas'uliyatini zarracha ham unutmagan lirik qahramon, ayni paytda, taqdir yaratgan tasodifdan taajjublanadi. Oddiy bir inson sifatida fikrlaydigan bo'lsak, bu baxtsiz tasodifning aynan lirik qahramonning farzandlari yigit bo'lib voyaga yetgan damlarga to'g'ri kelishidan taajjublanadi. Sezilib turibdiki, bu taajjub ichida afsuslanish hissi ham yo'q emas. Ana shuning uchun ham *taajjub* so'zi zamirida juda katta mazmun yashiringanligini ta'kidlashni istar edik.

Adabiyotlar ro'yxati:

1. Гафур Гулом. Мукаммал асарлар тўплами. Ўн биринчи том. Адабий танқидий мақолалар. – Тошкент, 1989.
2. Шукуров Н. Услублар ва жанрлар. – Тошкент, 1973.

G'AFUR G'ULOM SHE'RIYATIDA VAQT FALSAFASI

Hasanov Shavkat Ahadovich

SamDU professori,

Ernazarova Gulbaxor Isakovna

filologiya fanlari bo'yicha falsafa doktori (PhD)

G'afur G'ulom nomini XX asr o'zbek she'riyatining peshqadam vakili darajasiga olib chiqqan ilmiy-falsafiy asos bu uning mumtoz adabiyot an'alarini davom ettirganligida, uslubidagi falsafiylik, tabiatidagi hozirjavoblik va javonmardlik, voqelikni rindona keng talqin etishi, xayoliy go'zal manzaralar yarata olishidadir. Ushbu omillarning yaxlit bir quyma holatga kelganligi G'afur G'ulom fenomenini yuzaga chiqargan asoslar desak, to'g'riroq bo'lardi. Chunki shular bilan birga gendan genga o'tib kelayotgan, ruhiy-psixologik jarayonlarni boshqargan, shoirning o'z iborasi bilan aytganda, toledagi qismatni ham aytib o'tish o'rinli bo'lardi. Tasavvuf ahli buni taqdiri azal deyishadi. G'afur G'ulom esa "Taqdirni qo'l bilan yaratur inson", – deydi. Ana shu satrning o'zi ham shoirni Naqshbandiya tariqatiga mansub shoirlarga ruhan yaqin ekanligini ko'rsatadi. To'g'ri, shoir o'z davriga xizmat qildi, bu yo'lda ato etilgan iste'dodining ma'lum qismini qurbon qilishga majbur bo'ldi.

Masalaning ikkinchi tomoni ham borki, atrofda vayronalik va qashshoqlik hukm surgan bir zamonda, yaqinlari, birodarlari, xalqi boshidan kulfat arimay turgan bir davrda soʻfiylarning aqidasi-yu turmush tarzi bilan kun kechirish ham mumkin emas edi. Ichki bir intuitsiya, xudo bergan botinbinlik unga ezilgan, xor boʻlgan xalqning koʻnglini koʻtarishga, ruhini tiklashga xizmat qiladigan yangi bir sheʼriyat yaratish kerakligini uqtirgan boʻlsa, ajab emas. Buning uchun u ona allasi bilan qalbiga quyilgan sharqona sheʼriyatdan tashqari rus sheʼriyati tajribalarini ham oʻrgandi.

Mumtoz sharq adabiyotida alohida eʼtiborda boʻlgan, qayta-qayta murojaat qilingan masalalardan biri VAQT falsafasidir. Hazrat Navoiy devon tartib berganlarida uni inson umriga qiyoslab toʻrt faslga ajratadilar. Har bir fasl muayyan vaqt doirasida oʻzligini namoyon etadi va oʻzidan keyingi faslga yoʻl ochib beradi. Shu bois yoshlikda egallanishi zarur boʻlgan ilm-maʼrifatni, kasb-hunarni boshqa faslga koʻchirib boʻlmaydi. Shoir aytganidek, na bahona, na koʻzyosh, na pushaymon oʻtgan fursatni ortga qaytarolmaydi. Chunki inson falakning aylanishi, zamonlarning oʻtishi, tabiat qonunlariga qarshilik qilolmaydi. Shunday ekan, fursat gʻanimatligini anglamoq soʻz sanʼatida koʻp bor taʼkidlangan.

“Men Sharq shoiriman. Shuning uchun Sharq klassiklarining hammasi mening xesh-aqrabolarim”, – deya eʼtirof etgan Gʻafur Gʻulom mumtoz sheʼriyatda sayqal topgan Vaqt poetikasidan yaxshi xabardor boʻlgan va bir qator sheʼrlarida bu tushunchaning mukammal obrazini yaratdi. “Boqiylik”, “mangulik”, “abadiyat” kabi mavhum tushunchalarni Gʻafur Gʻulom “oy”, “hafta”, “kun”, “mavsum”, “fursat”, “dam”, “minut”, “sekund” singari vaqt lahzalari tarzida konkretlashtirib, hayotiy tasvirlaydi.

Zoʻr karvon yoʻlida yetim boʻtadek,

Intizor koʻzlarda halqa-halqa yosh.

Sharq sheʼriyatida lirik qahramonning ichki kechinmalarini, sogʻinch, intizorlik, dard-u armonlarini ifodalashda “karvon”, “sarbon”, “tuya”, “boʻtaloq” kabilar ramziy-majoziy xarakter kasb etadi. Shu sheʼriy tarbiya ruhida kamol topgan Gʻafur Gʻulom ham buni teran anglaydi. Shayx Saʼdiyning “Ey, sarbon...” deb boshlanuvchi gʻazali, Gulxaniyning “Tuya bilan boʻtaloq” hikoyati kabi asarlarning xotira qatlaridagi yogʻdusi gʻayri shuuriy taxlit ana shunday samimiy va haroratli satrlarga koʻchadi.

Diqqat qilinsa, “Zoʻr karvon” – bu hayot karvoni, uni toʻxtata oladigan kuch yoʻq, shu bois u “zoʻr”. Boʻta ham shunchaki boʻta emas, “yetim boʻta” oddiy boʻtadan koʻra uning yetimligi sogʻinch azobini yanada chuqurroq, taʼsirdorroq ifoda etadi. Koʻzlar ham har galgidek qora emas, “intizor koʻzlar”, koʻzyosh esa shoshqator emas, “halqa-halqa”. Negaki, qora soʻzi intizor soʻzining maʼno koʻlamini ifoda etolmaydi, faqat milliy belgi sifatida tushunilishi mumkin. Koʻzyoshning “shashqator” yo “duv-duv” toʻkilishi fojea anglangandan keyin yuz beradigan ruhiy holat ifodasi, intizorlikda esa umidvorlik tuygʻusi yashirin, yosh “halqa-halqa” boʻlganda ham ich-ichdan yigʻlash mumkin, ham tevarakni koʻrish mumkin. “Kutaman uzoqdan koʻrinsa bir ot // Kelayapti deyman koʻrinsa gʻubor”.

Gʻafur Gʻulomning badiiy mahorati shundaki, u qoʻmsash hissiga, sogʻinch tuygʻusiga toʻla hayot lahzalarini vaqtning shafqatsiz harakatidan toʻxtatib, goʻyoki uni turli rakurslardan suratga olayotgandek boʻladi.

Uzilgan bir kiprik abad yoʻqolmas,
Shunchalar mustahkam xonai xurshid.
Bugun sabza boʻldi qishdagi nafas,
Hozir qonda kezar ertagi umid.

Shoirning nazdida “xonai xurshid”, yaʼni quyosh tizimidagi sayyoralarning harakati koinot qonuniyatlari bilan shunchalar mustahkam tuzilganki, hatto qattiq sogʻinish, ichikish belgisi hisoblangan kiprik uzilishi ham behuda emas, sabab va oqibat birligi qonuniyatlariga asoslanadi. Shu bois qishdagi nafas bugun sabza boʻldi, ertagi umidning roʻyobga chiqishi esa hozirgi hatti-harakatga bogʻliq.

“Sogʻinish” sheʼrini shoirning uzluksiz va parchalanmas vaqt oqimidan ajratib olingan sogʻinch iztirobi tasviri desak, toʻgʻriroq boʻladi. Chunki vaqt kechishi bilan tabiatda kechayotgan oʻzgarishlar silsilasi lirik qahramon qalbidagi sogʻinch hissini yanada kuchaytiradi, – baʼzan dilini vasvasalarga soladi.

Kechqurun osh suzsak bir nasiba kam –

Gʻafur Gʻulom vaqt boʻlaklarini shunday mahorat bilan qoʻllaydiki, uni boshqa bir sinonimi bilan oʻzgartirishning iloji yoʻq. Mabodo “kechqurun” oʻrnida “tush chogʻi” desak, birinchidan hayotiy haqiqatga toʻgʻri kelmaydi: urush davri tush chogʻida oshni orzu qilinishini oʻzi xomxayollik, ikkinchidan, dilning xufton boʻlishiga qorongʻulikning ham hissasi bor.

Balki bir gʻalat oʻq, yo xavf-u xatar
Xazinai umrindan yoʻqotdi olmos...

Oʻgʻlini urushga joʻnatgan otaning sogʻinch tuygʻusi goʻyoki vaqtning chigʻiriqlariga solingandek taassurot qoldiradi.

Tong otar chogʻida juda sogʻinib.
Bedil oʻqir edim, chiqdi oftob.
Loyqa xayolotlar chashmaday tindi,
Pok-pokiza yurak bir qatra simob.

Nega shoir aynan Bedilni oʻqiyapti? Yo qoʻliga shunchaki Bedilning kitobi tushib qolganmi? Bizningcha, Gʻafur Gʻulom oʻzining ayni holatiga ruhiy yaqinlikni “Abul Maoniy”da, yaʼni Bedilda his qilgan. Chunki Bedil boshqa soʻfiy shoirlardan farqli oʻlaroq tasavvuf masalalarini inson kechinmalari, qalbi, turmush tarzi, oddiy hayotiy masalalari bilan bogʻlab tasvirlagan.

Shoir bir sheʼr doirasida asosiy poetik fikrni rivojlantirar ekan, goh hikoya, goh murojaat uslubiga oʻtib turadi, ayni paytda lirik chekinmalar qilib, oʻz shaxsiyati, biografiyasiga oid gaplarni ham singdirib yuboradi. Bunda ham vaqt tushunchasi (tong otar chogʻda)ni muayyan faoliyat turi bilan bogʻliq tarzda konkretlashtiradi, erta tongda turib kitob oʻqiydi, oʻrogʻ-u gulqaychi koʻtarib milliy voqelikka xos ish bilan mashgʻul boʻladi. “Loyqa xayolotlar”ni bundan oʻzgacha yoʻllar bilan tindirish mumkinmikan?! Gʻafur Gʻulom sheʼrlarida vaqt falsafasi goʻyoki milliy ob-havodan nafas oladi, sharqona libos kiyadi:

...Xoki anjir tugab, qovun gʻarq pishgan
Baxtli tong otar chogʻ uni kuzatdim...

“Vaqt” she’ri G‘afur G‘ulomning zamon kategoriyasi bilan bog‘liq mulohaza va mushohadalarini umumlashtiruvchi mukammal asarlardan biri.

G‘uncha ochilguncha o‘tgan fursatni

Kapalak umriga qiyos etgulik.

Kapalak bor-yo‘g‘i uch kun hayot kechirar ekan. Mana shu qisqa fursatda tug‘iladi, tabiatning bir uzviga aylanadi, guldan gulga qo‘nadi, parvoz qiladi, ko‘zlarni yashnatadi va o‘ladi. Shularni o‘ylaganda, kunlar, haftalar, oylar, ba‘zan yillarning behuda o‘tayotganligidan, umrning bebaho lahzalarini arzimmas narsalarga, mayda hoy-u havaslarga sarflanayotganidan iztirobga tushadi kishi.

... Yarim soat ichida tug‘ilib, o‘sib,

Yashab umr ko‘rib, o‘tguvchilar bor.

Ko‘z ochib yumguncha o‘tgan dam – qimmat,

Bir lahza mazmuni bir butun bahor.

“Vaqt” she’ridagi har bir so‘z, har bir detal, gap, poetik g‘oyani ochishga yo‘naltirilayotgan har bir mushohada vaqt tushunchasiga, uni behuda sarflamaslik masalasiga bog‘lanaveradi, o‘zining yangidan yangi qirralari bilan namoyon bo‘laveradi.

Ba‘zida bir nafas olgulik muddat

Ming yulduz so‘nishi uchun yetgulik.

(1-band)

Yashash soatining oltin kaftgiri

Har borib kelishi bir olam zamon.

(2-band)

Bir onning bahosin o‘lchamoq uchun

Oltindan tarozu olmosdan tosh oz.

(4-band)

Tiriklik ko‘rkidur mehnat, muhabbat,

Fursatdir qilguvchi aziz, mukarram.

(6-band)

Bunday misollarni yana davom ettirish mumkin. Muhimi shundaki, misradan misraga, banddan bandga o‘tgan sari daqiqa, soniyalarning betakrorligi va ahamiyati ochila boradi va she’r so‘ngida umrboqiylik mazmuni fursatni g‘animat bilib, undan unumli foydalanishda degan teran xulosa chiqariladi.

G‘afur G‘ulom qaysi mavzuda she’r yozmasin, eng avvalo, masalaning mohiyatiga falsafiy aspektida yondashadi. Tabiat va jamiyat taraqqiyoti qonuniyatlari hamda tarixiy voqelikdan olingan misollar bilan poetik fikrini quvvatlab, asoslab boradi. Biroq yoshlarga bag‘ishlab yozgan o‘nlab she’rlarida uslubi o‘zgaradi, o‘quvchining saviyasiga moslashadi, murakkabroqdek tuyulgan falsafiylik o‘rnini xalqona soddalik egallaydi. “Oltin medal” she’ri 10-sinfni tugatayotgan o‘qil-qizlarga bag‘ishlangan. Unda qizlarga murojaat etib, ko‘ngil muddaosini quyidagicha aniq, ravshan va obrazli qilib ifodalaydi:

Baxtimiz charog‘i, qizlar, janonlar,

O‘xshashsiz chamanda ko‘rguzing jamol.

Husnning umri oz, ammo go‘zallik –

Ilm-u ma'rifatda topadi kamol, – deya go'zallikni husnda emas, ilm ma'rifatda ekanligini ta'kidlaydi.

“Farhod va Shirin” dostonida Shirin Farhod sharafiga majlis tuzganida o'nta dilorom ham ishtirok etadi. Navoiy ularni ta'rif-tavsif etar ekan, har birini ma'lum bir ilm-fan, sohaning yagonasi deydi:

Biri – ash'or bag'ri ichra g'ovvos,

Biri – advor davri ichra raqqos.

Biri – mantiq rusumida raqamkash,

Biri – hay'at ruqumiga qalamkash...

G'afur G'ulom “Quyoshni qutlab” maqolasida “Farhod va Shirin”dan olingan ana shu she'riy parchani sharhlab shunday yozadi:

“Ko'rdingizmi, bu qizlar – har biri bir fanning mutaxassisi edi, deydi Navoiy. – Duxoba paranjisi bor edi, erining uchinchi “xotini edi, mushkulkushoddan qolmas edi”, – deyilayotgani yo'q”

G'afur G'ulom “Oltin medal” she'rida zamona qizlarining besh yuz yil oldin Navoiy tasvirlagan qizlardek ilimli, ma'rifatli bo'lishini orzu qiladi, o'zi aytganidek, pirining an'alarini davom ettiradi. Shoir “Avval o'qi” she'rida o'g'liga nasihat qilar ekan, yoshlar psixologiyasini yaxshi bilgani bois fikrini ba'zan mutoyiba ohangida bayon etadi:

Qo'shnidan kelarsa jaranglagan sas,

Hushingni elitar ishqning g'ammozi.

Tentagim, bu qizning kulgusi emas,

Jonon piyolaning yangroq ovozi.

Kichik yoshli bolalarga atab yozgan she'rlarida esa yanada soddaroq tasviriy-ifodaviy uslubni qo'llaydi, poetik fikrning ixcham va oddiy, tushunarli bo'lishiga erishadi.

„Avval o'qi”, “Bilib qo'yki, seni Vatan kutadi”, „Quyoshchalar she'ri”, “Samarqand uchun”, “Sizga”, “Yoz”, “Orzu”, “Diplom” kabi o'nlab she'rlarida milliy g'urur, milliy iftixor, o'zlikni anglash tuyg'ulari barobarida ulug' ajdodlarning an'alariga munosib voris bo'lish istagi ustuvorlik qiladi.

O'tkinchi hoy-u havaslar yo'lida umrni zoye ketkazmaklik, uning har bir daqiqasini g'animat bilmoq, haqiqiy go'zallik- inson ma'naviy olamining boyligi ekanligini anglash, inson ruhiy kamoloti kabi irfoniy va hayotiy g'oyalar G'afur G'ulom poetikasining o'zagini tayin etadi.

G'afur G'ulom va u mansub bo'lgan avlod vakillari insoniyat tarixidagi chigal va fojeali bir davrda yashab ijod etdi. Ularni barchasidan ham ko'proq millat, Vatan taqdiri qayg'uga solgan. Shu bilan birga tarix g'ildiragini ortga qaytarishning iloji yo'qligini tushunishgan, anglashgan. Shuning uchun hazrat Naqshbandiyning “Dil ba yoru dast ba kor” aqidalariga amal qilishni ma'qul topishgan. Quyidagi satrlar ham buni tasdiqlaydi:

Aziz umrimizning aziz onlari

Aziz odamlardan so'raydi qadrin.

Fursat g'animatdir, shoh satrlar-la

Bezamoq chog'idir umr daftarin.

“...so‘fiylar nazarida muhabbat, shafqat va muruvvat biri ikkinchisini taqozo etuvchi o‘zaro bog‘liq tushunchalar bo‘lib, nafaqat muhabbat, balki shafqat va muruvvat ham ilohiydir, – deb yozadi N.Komilov. – Negaki Allohga muhabbat qo‘ygan odam zolim va shafqatsiz bo‘lishi mumkin emas” [6, 34-bet]. Masalaga shu nuqtai nazardan yondashadigan bo‘lsak, G‘afur G‘ulom ijodida shu tushunchalar bilan sayqal topgan yuzlab bayt-u bandlarni misol keltirish mumkin.

Bu yerda
na g‘urbat,
na ofat,
na g‘am.
Bunda bor:
harorat,
muhabbat,

shafqat

Va mehnat nonini ko‘ramiz baham,
Sen yetim emassan,
Uxla, jigarim [5, 95- bet].

Qalbida insonga buyuk muhabbati bo‘lgan shaxsgina shunday haroratli gumanistik g‘oya va tushunchalarni ifoda eta olishi mumkin. Shoirning yuqoridagi satrlarida ta’kidlangan “harorat”, “muhabbat”, “shafqat” shunchaki tasodifiy emas. Chunki “Ko‘ngli qattiq xaloyiqdan qochish” motivi Ahmad Yassaviy, Jaloliddin Rumiy, Mirza Abdulqodir Bedil va boshqa shoirlar she’riyatida sayqal topgan edi.

G‘afur G‘ulom poetikasida o‘zlikni anglash tuyg‘usi milliy iftixor hissiyotlari bilan uyg‘unlashib ketgan. Shuning uchun shoir juda ko‘p she’rlarida o‘z xalqining tarixiga, uning shonli va shonsiz sahifalariga qayta-qayta murojaat qiladi. Millat tarixi G‘afur G‘ulom ijodining bosh pafosi. Bola erga oyog‘ini tirab turganidek, mo‘min Allohga suyanib qad rostlaganidek, G‘afur G‘ulom she’rlarining tayanch nuqtasi milliy g‘urur va iftixordir.

O‘zbekiston Qahramoni Erkin Vohidov Najmiddin Komilov xotirasiga atab yozgan “Teran daryo sokin oqar” maqolasida 60-yillardagi tasavvufni bilish darajasini shunday izohlaydi: “Biz o‘sha mahalda tasavvufni garchi aqlimiz, ilmimiz bilan tushunib etmagan bo‘lsak-da, lekin tasavvuf olamini ko‘nglimiz bilan his qilib, qalbimiz bilan uni anglaganmiz” [2, 161-bet].

Bu Abdulla Oripov, Jamol Kamollar avlodining yetuk vakili Erkin Vohidovning e’tirofi. G‘afur G‘ulomlar avlodi esa tasavvufni aqli, ilmi bilan ham tushunib etgan, biroq ko‘pchilik she’rlarida buni ifoda eta olishga jur’at va imkon topolmaganlar. Garchi G‘afur G‘ulom, Maqsud Shayxzoda madrasa ta’limini olmagan bo‘lsalar-da, ularni o‘sha ruhda mumtoz adabiyot tarbiyalagan. Ular mumtoz shoirlarning izdoshi ekanliklarini yaxshi anglashgan. Har ikkala shoirning nafaqat she’rlari, balki mumtoz adabiyotga oid maqolalari, tadqiqotlari shundan darak beradi.

Xullas, Timoti J.Uinterning “Postmodern dunyoda qiblani topish” kitobida qayd etilishicha, o‘tmishda juda ko‘plarga xizmat qilgan g‘oyalar davrlar o‘tishi bilan zamonasiga qarab modernizatsiya qilinadi yoki muvofiqlashtiriladi. Bizningcha, G‘afur G‘ulom ham mumtoz she’riyatdan olgan ta’limini o‘z davriga

moslashtirishga harakat qildi va buni muvaffaqiyat bilan uddaladi. Chunki ertagi kunni oldindan ko'ra olish, hozirjavoblik, samimiyat, qolaversa, rindonalik va javonmardlik shoirga Alloh ato etgan xislatlar edi.

Adabiyotlar ro'yxati:

1. Alisher Navoiy. Mukammal asarlar to'plami, yigirma tomlik. Sakkizinchi tom. Xamsa. Farhod va Shirin. –T., O'zbekiston "Fan" nashriyoti, 1991.
2. Vohidov E. Teran daryo sokin oqar // Shayx Qutbiddinxon Urgutiy. – T., Tamaddun, 2020.
3. G'afur G'ulom zamondoshlari xotirasida. –T., G'afur G'ulom nomidagi nashriyot-matbaa ijodiy uyi, 2003.
4. G'afur G'ulom. Tanlangan asarlar. –T., G'afur G'ulom nomidagi nashriyot – matbaa ijodiy uyi, 2018.
5. G'afur G'ulom. Tanlangan asarlar. –T., O'z.davlat nashriyoti, 1953.
6. Komilov N. Tasavvuf. Ikkinchi kitob. –T., O'zbekiston, 1999.
7. Nazarov B. G'afur G'ulom olami. –T., Fan, 2004.
8. Shukurov N. So'z sehri, she'r mehri. - Samarqand, Zarafshon, 1992.
9. Shukurov N. G'afur G'ulomning lirik poeziyasidagi mahorati. T., fan, 1966.

G'AFUR G'ULOM IJODIGA FOLKLORDAGI KULGIGA ASOSLANGAN DRAMATIK JANRLAR TA'SIRI

***O'rayeva Darmanoy
Buxoro DU professori,
filologiya fanlari doktori***

O'zbek folklorida kulgiga asoslangan askiya va loflar og'zaki badiiy ijoddagi dramatik janr namunalari hisoblanadi. Ulardan yozma adabiyotda ayrim yozuvchilar ijodiy foydalanishgan. G'afur G'ulom ulardan biri bo'lib, adib ijodida real turmush voqealarning askiyanamova lofنامo tarzda, kulgili, beg'araz hazil asosida bayon etgani kuzatiladi. Buning foydasini his etgan adib "Folklordan o'rganaylik" nomli maqola yozib: "Ulug' yozuvchilarning hammasi ham deyarli xalq ijodididan – folklordan foydalangan va o'rganganlar... Xalq ijodi – folklorga ergashib yozish yozma adabiyotimizning xalq o'rtasiga kirishi, ommalashishi, singishi uchun ancha yordam beradi", – degan uqtirishni qilgan. Avvalo, o'zi bunga o'z ijodida qat'iy amal qilgan [1, 75-80-betlar].

G'afur G'ulom "Kechmish va kechirmishlarimdan" nomli avtobiografik asarida hajviy narsalari yozishga qiziqishini, buni u yashayotgan ijtimoiy sharoit talab etayotganini alohida ta'kidlagan [2, 9-16-betlar]. Darhaqiqat, S.To'laganova yozganidek, G'.G'ulom kabi ijodkorlar yashab ijod etgan tarixiy-adabiy jarayonda kulgi yo'li bilan ayovsiztanqid qilish davrning etakchi shioriga aylangan edi" [3, 38-41-betlar].

G'afur G'ulom o'zi yaratgan aksariyat qahramonlar (masalan, "SHu bola"dagi Qoravoy) xarakter-xususiyatiga, nutqiga askiya, lof janrlariga xos kulgini, xususan, Qoravoiy nutqiga yolg'on so'zlarni tabiiy va ishonarli singdira

olgan. Shuningdek, o'zbek adibi Said Ahmad ham G'afur G'ulom haqidagi xotiralaridan tartib bergan "Nazm chorrahasida" kitobida o'zi bilan ustoz o'rtasida turli vaqtlarda kechgan askiyali suhbatlarini eslaydi [4, 3-22-betlar]. Ulardan biri she'r yozish va she'rxonlikka bag'ishlangan. Said Ahmad: She'r qandoq qilib yoziladi?

G'afur G'ulom: She'r yozish uchun avval qo'lni atir sovun bilan yaxshilab yuvish kerak.

Said Ahmad: O'z tenglaringizdan kimning she'ri sizga yoqadi?

G'afur G'ulom: O'z tenglarimdan G'afur G'ulomning she'rlarini yaxshi ko'raman, o'zimdani kichiklardan sening she'rlaringni.

Said Ahmad: Axir men she'r yozmayman-ku?

G'afur G'ulom: G'afur G'ulom yozgan eng yaxshi she'rlar tug'ilayotganda sen yonida turgansan.

Said Ahmad: Kelin yangamga atab qancha she'r yozgansiz?

G'afur G'ulom: Qo'rqqanimdan lagabardorlik qilib yozganman. Shuning uchun Navoiy va Muqumiy bechoralar xotin olishmaganda.

Shu bilan askiya tugatiladi. Said Ahmad ustoz G'afur G'ulomning so'zga chechan va hozirjavobligiga tan berib, boshqa indamaydi, o'zining undan engilganini tan oladi.

G'afur G'ulom fikricha, kulgi, hazil dam olishning eng yaxshi usuli. Kulgi shoirida yaxshi kayfiyat uyg'otadi [4,19-bet]. Shuning uchun u o'z do'stlari, hamkasblariva shogirdlari bilan ko'pincha askiya, lof uslubidashirin suhbatlar qilgan. Ularning ayrimlari G'afur G'ulomga atab yozilgan adabiy portret, xotira va esdaliklar ruhidagi asarlar tarkibiga kiritilgan.

Adibning loflar haqida aytgan fikrlari va munosabati ham e'tiborlidir. U folklordagi kuchli mubolag'aga asoslangan lof janri bilan yozma adabiyotdagi hikoya janri xususiyatlarini mahorat bilan sintezlashtirib (qo'shib) lof-hikoyalar yaratishga erishgan. Adibning shunday hikoyalaridan biri "Yopqichga yamog'liq" lof-hikoyasidir.Unda mashhur qo'qonlik qiziqchi Zokir Gov bilan uning askiyachi o'rtog'ining jajji qizi o'rtasida kechgan lof-suhbat keltirilgan. Zokir Govni shu qizcha mot qilib engadi. Lofni Zokir Gov "Men dadangning o'rtog'i qo'qonlik Zokir Gov bo'laman.

Sizlarni ko'rgani kelib edim, qo'lim quruq emas. Sizlarga bir gilam sovg'a qilmoqchi edim. Gilamning bir boshi Toshkantning O'qchi darvozasiga kirib keldi, etagini Qo'qonda yig'ishtirishyapti. Anashunaqa, qizim" deb boshlaydi. Unga javoban qizcha yoshiga xos chuchuk tilda: "Voy amatidinamdan aylanay! YAqinda tandir yopqichimizga cho'g' tushib o'yilib qolgan edi. Sizning sovg'a gilamingiz shu joyga yamoqqa etar ekan, debdi" [4, 341-bet].

Keltirilgan bu lofda katta va kichik yoshli insonlar bir-biri bilan lof aytishi mumkinligi anglashilmoqda. Ammo ko'pincha lofchilarning yaqin do'st bo'lishi ko'rinadi. Shunga ko'ra G'afur G'ulom ham "Kalta gap ikki do'st"ning lofi haqida hikoya qilgan [4, 340-bet]. Bu hikoyada andijonlik Lom-mimbek bilan qo'qonqishloqlik Ali jimjit degan do'stlarning lof aytishuvi tasvirlangan. Bu ikki do'st ismi jismiga mos emas. Ularning ismiga lom-mim, jimjit singari indamaslikni bildiruvchi so'zlar qo'shib aytilayotgan bo'lsa-da, aslida ular juda so'zamol. SHu

bois Lom-mimbekning “Besh og‘iz gaplashib ketay, deb keluvdim” degan gapiga javoban Ali jimjit: “Senku besh og‘iz so‘zlashamiz, deding. Senu mening besh og‘iz so‘zimiz o‘zimizga ma‘lum. So‘z bora-bora tortishuvga, tortishuv bahsga, bahs janjalga, janjal –kekirdakbozlikka aylanib ketib, suhbat bir oz cho‘zilishi mumkin. Yoz o‘tar, kuz o‘tar, qilichini ko‘tarib qish kelar, gapimiz tugamas, muddao aytilib bo‘lmas, o‘zim sovuqqa ojiz, soyasi yupqa odamlardanman, tag‘in qish chillada tumov-pumov bo‘lib yurmay” deb, qalin kiyimlarini kiyib chiqadi. Hikoyaning ayni shu o‘rnida lof janriga xos xususiyat yoritilgan. Shu joyda favqulodda kulgi hosil qilingan.

Lofchilar, odatda, turli joylardan kelib bir-biri bilan lof aytishgan. Bu holat G‘afur G‘ulomning “Dosh qozon va qizilcha” hikoyasida ham ochib berilgan. Unda Xalilcha Halol degan namanganlik lofchi bilan ohangaronlik Sandonqul Tangatopgan degan lofchi dialogi keltirilgan. Ushbu hikoya lofchilikda an‘anaviy usul – savol bilan so‘zni boshlash shaklida yozilgan. Suhbatni Xalilcha Halol lofchi “Ohangaronda nima yangilik bor?” degan savol bilan boshlaydi. Unga javoban Sandonqul Tangatopgan Ohangaron chilangarlarining bir ming u uch yuz qirq quloqli bitta doshqozon yasashayotgani, uning bir qulog‘ida turib o‘n qadoqli bolg‘a bilan ertalab urganidagi chiqqan ovozini ikkinchi qulog‘idagi chilangar tushdan keyin eshitishini mubolag‘alashtirib bayon etadi. Shunda namanganlik lofchi Xalilcha Halol: “Bu kiroyi degcha bo‘libdi” deb, “Namangandagi G‘irvon dehqonlari bu yil ekan lavlagi – qizilcha Chin-Mochinu qaysari Rungacha etgani, ayniqsa, Shoda so‘takning lavlagisi barglarining soyasida o‘n ming otliq askar salqinlasa bo‘lishini aytib, Sandonqulni so‘zda engadi [4, 339-bet]. Alamiga chiday olmagan Sandonqul: “Voy ahmoq, lof ham evi bilan-da, lavlagi ham shunaqa bo‘ladimi?” desa, Xalilcha Halol: “Sen aytgan haligi qozonchada o‘sha lavlagi qaynamasa, nima qaynaydi?” deb, sherigini yana bir bor lofda mot qiladi. Shu asosda hikoyada lofga xos favqulodda kulgi uyg‘otishga erishilgan. Albatta, bunday lofga xos tasvir va talqinlar adibga o‘z fikrini kuchaytirib ifodalash imkonini bergan.

Yozma adabiyotda lof uslubi va shaklidan, unga xos mubalag‘alashtirish usulidan foydalanish keng tarqalgan adabiy an‘analardan biridir. Aynan G‘afur G‘ulomning o‘zi ham “Xalq ijodi boyligidan” maqolasida bu haqda alohida to‘xtalib: “Hamma xalqlardagidek, bizning klassik adabiyotimiz ham, zamonaviy adabiyotimiz ham loflardan, giperbolalardan xoli emasdir” deb yozgan [4, 339-bet]. Yana u ushbu maqolasida loflardan hayotda, xususan, sovcilikda ayollarning kelin-kuyovlarni maqtashda ko‘p foydalanilishini alohida ta‘kidlab, bunga quyidagi misollarni keltirgan: “Bay, bay, bay... Eralijon tushmagur bu yil baliq yili bo‘lsa, roppa-rosa o‘n to‘qqizga kiradi. To‘yiga atab bitta junqopdagi o‘n to‘qqiz pud bug‘doyni bitta o‘zi ko‘tarib kirdi. Raisimiz: “Qo‘y, belingga shikast etadi”, desa ham “Be!” debdi-da, limmo-lim o‘g‘it ortilgan gruzavoyini botqoqdan elkalab, tosh yo‘lga chiqarib qo‘yibdi.

Kelin bola ta‘rifida: – Shafog‘atoyni ayting... Kim tikilsa kiprigi qayrilib ketadi. Sanamarasta, og‘zi bilan beli bormi, yo‘qmi biz haligacha bilmaymiz... Chumchuqcha ovqat eydi... Suv ichsa tomog‘idan, sabzi esa biqinidan ko‘rinadi...

Shunaqayam pazandaki, yo‘q erdan bunyod qiladi. Suvdan holvaytar, tariq yormasidan palov pishiradi, baraka topgur” degan dialoglari misolida asoslagan.

“Rostini aytganda, – deydi adib bu loflarga munosat bildirib, Eralijon 30 yoshdagi cho‘tir yigit, Shafog‘at bo‘lsa – bir ko‘ziga oq tushgan, yoshligida sandalda bir yonboshi kuygan qari qiz [4, 339-bet].

G‘afur G‘ulom loflardan foydalanar ekan, yo ularni xalq loflari kabi dialog asosida hikoyalashtirsa, ko‘pincha asar qahramonlari yoki personajlari xatti harakatiga yoyinki nutqiga lof elementlarini singdiradi. Loflardan foydalanish adibning “Shum bola” qissasida yanada yorqin ko‘rinadi [5, 49-bet]. Bunga asardagi Tojixon jinni bilan Olim jinni, Omon va Shum bola, Eshon va Shum bola o‘rtasidagi loflar misol bo‘la oladi. Masalan, Tojixon jinni va Olim jinni lofi shunday keltirilgan: Tojixon jinni (bitta ketmon dasta bilan o‘tgan-ketganni quvlab, urib, so‘kib): “Hammang bir tomonga yur, tarqalib yurma! Tartibkerak, intizomkerak.

Olimjinni: Hoy, hoy, nimadeyapsan, jinni?

Tojixon jinni: Nimaga odamlar bir tomonga yurmasdan har qayoqqa tarqalib yuradi? Nikolay poshshozam onida tartib-intizom kerak, birtomonga yursin-da!

Olimjinni: Axmoqsan, Toji, ahmoqsan. Er, axir, taroziga o‘xshagan narsa bo‘ladi. Hamma bir tomonga yursa, er barkashday bir yoqqa og‘ib hammamiz Qurdu daryoga g‘arq bo‘lib ketamizku.

Ularning bu lofi yakuni yozuvchi tomonidan “Zirapchani nina bilan olganday jinnining gapi jinniga maqul tushib, odamlarni urushdan to‘xtabdi”.

Loflarda g‘olib lofchi nutqida ko‘pincha “ahmoq” deb tahqirlovchi so‘z qo‘llanadi. Buni yuqoridagi “Dosh qozon va qizilcha”, “Tojixon jinni bilan Olim jinni” loflarida ham kuzatdik. Yana buni “Shub bola” qissasi qahramonlari Omon bilan Shum bolaning lofga yo‘g‘rilgan dialogida ham kuzatish mumkin. Jumladan: Shum bola: Jiyda solkash ko‘rinadi, bu yil meva qilmabdi.

Omon: Voy, ahmoq. Hozir saraton. Saratonda jiyda mevalaridan agiga alif yozdirish uchun Makkaga ketadi. Bir oydan keyin mevalar qaytib keladi.

G‘afur G‘ulom ijodida adabiy loflar uchraydi. Adib ularni yaratar ekan, bu janrga xos asosiy belgi – mubolag‘ali tasvir va talqindan iborat ifoda uslubini saqlaydi.

Adabiyotshunos R.Barakaev G‘afur G‘ulomning o‘zbek bolalar adabiyotida “Lofchilar – aldoqchilar” yo‘nalishiga asos solgani, bu an‘ana keyingi davr bolalar she‘riyati namoyandalari ijodida yanada yangicha ko‘rinishlarda namoyon bo‘lganini aytadi.

Xullas, G‘afur G‘ulom xalq kulgi usullarini yaxshi o‘zlashtirgan adib sifatida folklordagi kulgiga asoslangan dramatik janrlar bo‘lgan askiya, loflar ta‘sirida kishilar ruhiyatini ko‘tarishga xizmat qiluvchi asarlar yaratgan. Askia va loflar adib asarlarining milliy haroratini oshirishga, o‘quvchilar qalbida samimiy kulgi uyg‘otishga ko‘mak bergan.

Adabiyotlar ro‘yxati:

1.Фулом Ғ. Фольклордан ўрганайлик. Мукаммал асарлар тўплами. 11-том. –Т., Фан, 1989.

2. Ғафур Ғулом. Асарлар. Ўн жилдлик. 1-жилд. Повестлар, пьесалар. – Т., Ғ.Ғулом номидаги Адабиёт ва санъат нашриёти, 1970. – Б.9-16.
3. Тўлаганова Санобар. Тарихий жараён ва бадиий талқин // Ўзбек тили ва адабиёти. – 2018. – 3-сон.
4. Саид Аҳмад. Назм чорраҳасида (Ғафур Ғулом ҳақида ҳикоялар). – Т., Ғ.Ғулом номидаги Адабиёт ва санъат нашриёти, 1993.
5. Ғафур Ғулом. Ёлқичга ямоғлиқ. Танланган асарлар. – Т., Ғафур Ғулом номидаги нашриёт-матбаа ижодий уйи, 2018.
6. Ғафур Ғулом. Шум бола. – Т., Янги аср авлоди, 2013.
7. Баракаев Р. Ғафур Ғулом ижоди ва ўзбек болалар адабиёти тараққиёти // Ўзбек тили ва адабиёти. 2018. 3-сон. – Б. 25-28.

G‘AFUR G‘ULOMNING INTELLEKTUAL SHE’RIYATI

*Quvvatova Dilrabo,
Buxoro DU professori,
filologiya fanlari doktori*

Zamonaviy she’rshunoslikda “intelektual she’riyat”, “falsafiy lirika” singari terminlar faol qo‘llanmoqda. Darhaqiqat, bu yo‘nalishda bir qator tadqiqotlar va dissertatsiyalar ham amalga oshirilgan. Adabiyotshunos O.Sharafiddinovning fikricha: “Chinakam intellektuallik hayot haqidagi mulohazalarning chuqurligi va originalligida ko‘rinadi. Intellektuallikning chuqurlashishi poeziyada falsafiy lirikaning kuchayishiga, o‘tkir umumlashmalarning ko‘payishiga olib keladi” [1].

Darhaqiqat, intellektual lirika ijodkorning hayot haqidagi qarashlari tajassumidan tarkib topadi. Nazariyotchi olim D.Quronovning quyidagi fikrlari buni yanada asoslab turadi: “Shoirning mavjudlikning konkret masalasi – hayot va o‘lim, inson taqdiri yoki fe‘l-atvori, jamiyat va hokazo masalalar haqidagi mushohadasi asosiga qurilgan she‘rlar intellektual lirika namunasi sanaladi. Intellektual lirikada birmuncha sokinlik, aytish mumkinki, birmuncha "sovuqqonlik" kuzatiladiki, bu unda aqlning hisdan ustunligi bilan izohlanishi mumkin” [2]. Demak, intellektual she’rda hissiy tafakkurdan ko‘ra aqliy tafakkur ustunlik qiladi. Yosh adabiyotshunos B.Fazliddinov fikrlari mazkur qarashlarni yanada to‘ldiradi: “Falsafiy-intellektual she’riyat – lirikaning mazmun (problematika) jihatidan alohida turi hisoblanib, u olam va odam munosabatlarining taqdir, hayot, muhabbat, o‘lim kabi abadiy muammolari xususida teran bilimga tayanib mushohada yuritishdan hosil bo‘ladi. Bunda odatda hissiy idrok bilan bog‘liq bo‘lgan estetik zavq aqliy idrok vositasida yuzaga keladi” [3,12-bet]. Binobarin, she’rda hissiy va aqliy idrok uyg‘unlashadi. Bunday she‘rlar, birinchi navbatda, o‘quvchining aqli, tafakkurini boyitishga xizmat qiladi va muayyan hayotiy xulosalar chiqarishiga yordam beradi.

XX asr o‘zbek adabiyotida akademik shoir G‘afur G‘ulom intellektual lirikaning eng yaxshi namunalarini yaratgan. O‘tkir qalam sohibi she‘rlaridagi bu ustuvor jihat muayyan ijtimoiy, adabiy omillarga bog‘liq. Akademiklar B.Nazarov, N.Karimov va adabiyotshunos S.Mamajonovlarning yozishicha: “G‘afur G‘ulom

shoirlik iste'dodining kamol topishida Sharq she'riy maktabi – Navoiy, Bobur, Mashrab, Muqimiy, Hofiz, Shayx Sa'diy, Rudakiy, Firdavsiy, Umar Xayyom, Bedil kabilarning ijodlari katta ta'sir ko'rsatdi. Keyinchalik Sa'diyning "Guliston" asarini, Rudakiy, Firdavsiy, Bedil she'rlarini, Navoiyning Foniylar taxallusi bilan yozgan forsiy g'azallarini o'zbekchaga tarjima qildi. Rudakiy ijodidagi ko'tarinkilik, falsafiylik G'afur G'ulom ruhiga yaqin edi" [2, 226-bet].

Ko'rinadiki, G'afur G'ulom she'riyatida muhim xususiyat sifatida bo'y ko'rsatgan intellektuallik uning Sharq adabiyotiga oshuhtaligi samarasidir. Shu bois uning she'rlarida xayyomona obrazlar, bedilona falsafa ruhi sezilib turadi.

Shoirning bolalarga bag'ishlab yozgan "Yasha, deyman o'g'lim", "Bilib qo'yki, seni Vatan kutadi", maktab bitiruvchilarga uchun bitilgan "Oltin medal" she'rlari bu jihatdan ahamiyatli.

Dada, men osmonga uchar bo'lsam,
Cheki yo'q ko'kni ham quchar bo'lsam,
Yulduzdan-yulduzga ko'char bo'lsam,
Sen tubanda qolib ne deysan?
–Yasha, deyman, o'g'lim!
– Dada, men ketsam agar Moskvaga,
Moskva yo'llasa dushman-yovga,
Savasam men bo'z otimning choviga,
Sen to'zonda qolib ne deysan?
– Yasha, deyman, o'g'lim! [5, 193-bet]

Shoirning "Yasha, deyman, o'g'lim" she'ri ota va bola suhbatiga asosiga qurilgan. Yuqoridagi satrlar bolada Vatanga muhabbat, jasurlik, fidoyilik tuyg'ularini, fazilatlarini kamol toptirishda alohida ahamiyatga ega. Qolaversa, har bir band oxirida takrorlanuvchi "Yasha, deyman, o'g'lim" satrida ruhlantirish, hayotsevarlikka chorlash ruhi etakchilik qiladi. Bola "osmonga uchish", "cheki yo'q ko'kni ham quchish", "yulduzdan yulduzga ko'chish"i uchun ko'p o'qib-o'rganishi kerak bo'ladi. Otaning unga bergan ma'naviy quvvati esa qanot bo'ladi.

G'afur G'ulomning "Bilib qo'yki, seni Vatan kutadi" she'ri o'z davrida ham, hozir ham hayotga mustaqil qadam tashlayotgan yoshlar uchun o'ziga xos shior bo'lib jaranglagan va jaranglamogda:

Sen bu kun sinfda shod yurak bilan
Sinov navbatini kutib turasan.
A'lo mamlakatning a'lo farzandi,
Bilib qo'yki, seni Vatan kutadn! [5, 211-bet]

Yuqoridagi satrlardan fikr cho'g'i baland. YA'ni she'rning lirik qahramonlari o'rta maktab bitirish oldida turgan, "a'lo mamlakatning a'lo farzandi" bo'lgan o'spirin yigit-qizlardir. Shoir "shod yurak" bilan imtihonlarni hayajon bilan topshirayotgan yoshlarga Vatanga xizmat qilishdek yuksak mas'uliyatni yuklaydi.

Jabrda masala qo'sh muammodir,
Xuddi shunda bir ulug' qurilish jodir.
Sen katta injener ertami, indin,
Bilib qo'yki, seni Vatan kutadi!

Darhaqiqat, she'ning keyingi bandlarida intellektuallik mazmuni ortib boradi. Shoir aytmoqchi, o'quvchi algebrani yaxshi o'zlashtirsagina, u ertaga injener, quruvchi bo'la oladi. Shu bois u "jabrdagi qo'sh muammo"da "ulug' bir qurilish"ni ko'radi.

She'rdir, lirika, balki oddiy til,
Xalqlarning tillari bir xil emas, bil!
Diplomat bo'larsan, shu bugun, endi,
Bilib qo'yki, seni Vatan kutadi!

Yuqoridagi satrlar bugun uchun ham ahamiyatli. Shoir o'z davrida yoshlarni tillarni o'rganishga chaqirgan. Binobarin, diplomat bo'lish uchun bu muhim fazilatdir. Dunyoda fanlar ko'p. Ularni o'rganish esa kuch talab qiladi. Erda yurish, suvda suzish, osmonda uchish uchun turli bilimlarni egallamoq darkor. Bunda intellektual lirikaning fan-texnika taraqqiyoti va madaniy yangilanishlar bilan bog'liq jihati yuzaga chiqadi. Chunki shoir yoshlarni dunyoviy bilimlarni chuqur egallashga chaqiradi. Bu Vatanga xizmat qilishning eng muhim shartidir. Umuman olganda, "Bilib qo'yki, seni Vatan kutadi" she'ri nafaqat yosh avlodni Vatanga muhabbat ruhida tarbiyalaydi, balki unga qanday xizmat qilish kerakligini ham tushuntirib beradi. Shu jihatdan bu she'rni yoshlar madhiyasi ham deyish mumkin.

Shoirning "Oltin medal" she'ri ham maktab bitiruvchilariga bag'ishlangan:

Sizsiz kelajak yo'q, siz axir xalqning,
Ming yilni ko'rajak qarog'larisiz,
Sizsiz yorimaydi osmonda Zuhro,
Zamonlar tongining charog'larisiz [5, 83-bet].

Yuqoridagi falsafaga yo'g'rilgan satrlar kelajak bunyodkorlari – yoshlarga ishonch ruhi bilan sug'orilgan. Shu bois shoir ularni "ming yilni ko'rajak qaroqlar", "zamonlar tongining charoqlari" tarzidagi metaforalar orqali ta'rif etadi. "Qaroq" – ko'z, "charoq" esa chiroq. Ya'ni yoshlar kelajakni ko'ruvchi ko'z va uni yorituvchi chiroq, mash'alaga qiyos etiladi. Aytish mumkinki, bu satrlarni ham yoshlar qo'shig'i deb atash mumkin.

G'afur G'ulomning XX asr o'zbek she'riyatida hodisa bo'lgan she'rlari bisyor. Xususan, bular orasida urush davrida yozilganlari alohida ajralib turadi. Shulardan biri "Bizning ko'chada ham bayram bo'lajak" she'ridir. Undagi quyidagi misralar e'tiborni tortadi:

Bog'imiz husnida xazon ofati,
Ko'klam eli bilan chechak otguvsi.
Bu xo'rlik, haqorat, alam kulfati,
Jahannam qa'riga borib botguvchi.
Bizning ko'chada ham bayram bo'lajak [5, 43-bet].

Barcha tinchliksevar xalqlar qatorida G'afur G'ulom ham urushni la'natlaydi. Bunda bog' ramziy ma'noda Vatanni, xazon ofati esa urushni anglatadi. Biroq hayot davom etadi: ko'klam eli tufayli chechaklar ko'z ochadi. "Ko'klam eli bilan chechak otguvsi" satri Fuzuliya tegishli. Bu o'ziga xos iqtibos san'ati bo'lib, mumtoz shoir falsafiy qarashlariga monandlikni va G'afur G'ulomning Sharq adabiyotini chuqur bilganligini ko'rsatib turadi. Shoir

urushning xalq boshiga solgan kulfati bir kun kelib jahannam qa'riga botishiga qalbi, shuuri bilan ishonadi.

“Bizning ko‘chada ham bayram bo‘lajak” hayqirig‘ida esa xalqlarning tinch va osuda yashash haqidagi orzulari mujassam etilgan. Shoirning ayolga bitiklari ham falsafiy ruhga yo‘g‘rilgan. Ayniqsa, “Xotin” she‘ridagi ona haqida yozilgan eng hayotiy satrlar mulohazalarimizni tasdiqlab turadi:

Onam deganimda oqsoch, jafokash
Munis va mehribon chehrang namoyon,
Axir sen bag‘ringda parvarish etib,
Ko‘zimga baxsh etding ko‘zguday jahon [5, 37-bet].

Ma'lumki, shoir faqat onagagina xos bo‘lgan fazilatlarni oqsoch, jafokash, munis, mehribon sifatleri orqali ifoda etadi. Binobarin, farzand ona tufayli yorug‘ jahonni ko‘radi, uning go‘zalliklaridan bahramand bo‘ladi. Shu jihatdan she‘rda “Ko‘zimga baxsh etding ko‘zguday jahon” satri o‘ziga xos leytmotiv vazifasini bajaradi. Inson ko‘zguga boqqanida o‘zini ko‘radi. Ramziy ma’noda murg‘akkina bolaga yorug‘ jahonni hadya etgan zot ona bo‘ladi.

Shoirning tabiat haqidagi she‘rlarida ham hissiy tafakkur, tasviriylilikdan ko‘ra intellektuallik ustunlik qiladi. “Kuz keldi” she‘ridagi quyidagi satrlar bu jihatdan diqqatni tortadi:

Urushdan qaytgan g‘olib otadek,
Qo‘yni-qo‘nji to‘lib saxiy kuz keldi.
Qator tevalarga sepini ortib,
Mardlikning yurtiga etuk qiz keldi [5, 57-bet].

Bu she‘r ham urushning so‘nggi yillarida yozilgan. Shoir qo‘llagan tashbehlarda aql kuchi ustuvorlik qiladi. Mevalarga to‘la saxiy kuz “urushdan g‘olib qaytgan ota”ga qiyoslanadi. YOki turli xil mevalar qizlarning sepiga mengzaladi. Zero. “Kelinni kelganda ko‘r, sepini yoyganda ko‘r”. Shoir kuzni tevalarga ortilgan sepi bilan kelgan qizga o‘xshatadi. B.Fazliddinov fikriga ko‘ra: “Falsafiy-intellektual lirikada fikr va tuyg‘u munosabatini quyidagicha ko‘rsatish mumkin: a) fikr hisga nisbatan etakchi o‘rinda turadi; b) tuyg‘u yordamchi unsur rolini o‘ynaydi” [3, 13-bet]. Shu fikrdan kelib chiqilsa, yuqoridagi satrlarda fikr ustunlik qiladi.

Umuman olganda, G‘afur G‘ulomning deyarli barcha mavzudagi she‘rlari intellektuallik ruhi bilan sug‘orilgan. Ularda hayotning achchiq-chuchugini totgan, uning o‘nqir-cho‘nqirlaridan mardona o‘tgan va tiriklik mazmunini teran anglagan hassos ijodkorning falsafiy mushohadalari, xulosalari aks ettirilgan. Shu jihatdan akademik shoir she‘rlarini aql va his uyg‘unligida yaratilgan o‘zbek intellektual lirikasining yorqin sahifasi, deyish mumkin.

Foydalanilgan adabiyotlar:

1.Шарафиддинов О. Замон. Қалб. Поэзия. –Т., Ўзадабийнашр, 1962. Раҳимжонов Н. Давр ва ўзбек лирикаси. –Т., Фан, 1979. Раҳимжонов Н. Мустақиллик даври ўзбек шеърияси. –Т., Фан, 2007. Фазлиддинов Б. XX аср ўзбек фалсафий-интеллектуал шеърияси (Ғафур Ғулом, Асқад Мухтор, Ранф Парфи ижоди мисолида). Филол. фанл. бўйича фалсафа докт. (PhD) дисс. автореф. –Т., 2019. Шарафиддинов О. Замон. Қалб. Поэзия. –Т.,

Ўзадабийнашр, 1962. Раҳимжонов Н. Давр ва ўзбек лирикаси. –Т., Фан, 1979. –Б.187.

2.Қуроноф Д. Адабиётшуносликка кириш. –Т., Абдулла Қодирий номидаги халқ мероси наشريёти , 2004.

3.Фазлиддинов Б. XX аср ўзбек фалсафий-интеллектуал шеърияти (Ғафур Ғулом, Асқад Мухтор, Ранф Парфи ижоди мисолида). Филол. фанл. бўйича фалсафа докт. (PhD) дисс. автореф. –Т., 2019. – Б.12.

4.Каримов Н., Мамажонов С., Назаров Б. ва бошқалар. XX аср ўзбек адабиёти тарихи. –Т., Ўқитувчи, 1999. –Б. 226.

5.Ғафур Ғулом. Мукамал асарлар тўплами. 12 томлик, 1-том. –Т., Фан, 1983. –Б. 193.

“UMRIMIZ BOQIYDIR, UMRIMIZ BOQIY...”

***Hasanov Shavkat Ahadovich,
filologiya fanlari doktori, professor***

Nuriddin Shukurov 1930-yil 16-mayda Samarqand tumanidagi Turkmanqishloqda ma’rifatli oilada dunyoga keldi. Qur’onni yaxshi qiroat qilganlari uchun otalarini qori Abdushukur deyishgan. Abdushukur Yaxshiev arab, fors, turk tillarini yaxshi bilgan. “O‘zbekistoni surx” gazetasida bir muddat muhbir sifatida ishlagan. Qatag‘on yillari uyidan arab yozuvidagi kitoblar chiqqani uchun 6 oyga qamalgan. U kishi Alham taxallusi bilan g‘azallar yozgan. Bobolari hoji Yaxshi domla ham o‘z davrining ma’rifatli kishisi bo‘lib, muallimlik qilganlar. Nuriddin Shukurov tug‘ilib o‘sgan oilada adabiyotga ayniqsa, mumtoz adabiyotga ixlos baland bo‘lgan, she’rxonliklar, so‘zlar qatida yashiringan nozik ma’no tovlanishlari yuzasidan bahs munozaralar bo‘lib turgani, bu bo‘lajak olimning hayot yo‘lini belgilab bergan. Nuriddin Shukurov 1945-50-yillarda Samarqand davlat universitetining filologiya fakultetida o‘qigan. O‘tgan asrning 50-yillarida uning folklor va zamonaviy she’riyatning dolzarb masalalariga bag‘ishlangan qizg‘in maqolalari chop etila boshlaydi. 1956-yil sobiq Ittifoq yozuvchilar uyushmasining Byulletenida “Samarqandlik tadqiqotchining qiziqarli maqolasi” sarlavhali material e’lon qilingandi. Unda Nuriddin Shukurovning “O‘zbek poeziyasi haqida o‘ylar” maqolasiga katta baho berilgandi.

1960-yil yoqlangan “G‘afur G‘ulomining poetik mahorati” nomli nomzodlik dissertatsiyasida shoir ijodini kompleks o‘rgangan. Bu tadqiqotda boshqa adabiyotshunoslardan farqli o‘laroq, G‘afur G‘ulomning yutuqlari bilan birga ilk ijodiy izlanishlaridagi kamchiliklarni ham ko‘rsatib o‘tadi. Jumladan, shoir asarlarida badiiy mazmun, poetik g‘oya, kompozitsiya, vazn va tildan foydalanishdagi mahorati shunday nozik did bilan detallashtirib o‘rganilganligini, G‘afur G‘ulomning o‘zi ham bu ishni katta qoniqish bilan e’tirof etadi.

1973-yilda yoqlangan “O‘zbek lirikasida metod birligi va uslublar rang-barangligi problemi” mavzusidagi doktorlik dissertatsiyasi adabiyotshunosning zamonaviy she’riyatning bilimdoni ekanligini ko‘rsatdi. G‘afur G‘ulom o‘z she’rlarida qanday so‘zni ishlatmasin, qanday iboradan foydalanmasin ularning

hammasini aniqlik va konkretlik hosil qilishga xizmat qildirishni ta'kidlar ekan, Nuriddin Shukurov "Vaqt" she'ridagi ikki misrani quydagicha tahlil qiladi:

Yigit termiladi qizning ko'ziga,

Kiprik suzilishi, mayin tabassum...

Bu misralarda yigitning qaysi nuqtaga qarashi ("qizning ko'ziga") va qanday qarashi, ("termiladi") qizning o'zini tutishi va holati ("kiprik suzilishi, mayin tabassum") juda aniq va konkret tasvirlangan. Shuning uchun yigitning qizga bo'lgan otashin muhabbati va bu muhabbatdan mamnun bo'lgan qizning butun latofati aniq sezilib turadi. Shoir poeziyasi tilning obrazli va emotsional bo'lib chiqishida maxsus ifoda tasvir vositalarining – tashbihlarning roli g'oyat kattadir.

Nuriddin Shukurov adabiy jarayonda faol ishtirok etib, 200 dan ortiq maqolalar e'lon qildi. Hozirgi she'riyat poetikasiga bag'ishlab yozilgan turkum maqolalari qizg'in bahs-munozaralarga sabab bo'lgan edi. "O'zbek adabiyoti qirq yil ichida", "G'afur G'ulomning lirik poeziyadagi mahorati", "Asrlar poeziyasida Samarqand", "Uslublar va janrlar", "Bu olam sahnida", "O'zbek lirik poeziyasida traditsion janrlar", "Janrning yulduzi", "So'z sehri, she'r mehri" kabi kitoblariga kirgan adabiy-tanqidiy, ilmiy-nazariy kuzatishlari, tahlilning holisligi, xulosalarning teranligi bilan e'tiborni tortadi. Muhimi shundaki, bu asarlardan ayrimlarining chop etilganiga 70 yilga yaqin bo'lgan esada, bugungu kunda ham o'z ilmiy-nazariy qimmatini saqlab qolmoqda, o'sha davrlarda yaratilgan ko'plab ilmiy ishlardan farqli o'laroq, tarixning "arxivi"dan joy olmadi. Bugungi kunda ham ularni filologiya yo'nalishida tahsil olayotganlarga ilmiy nazariy qo'llanma sifatida bimalol tavsiya etish mumkin. Bu esa ikki tuzimni boshdan kechirgan gumanitar sohalar uchun juda katta yutuqdir. Chunki orada ko'p suvlar oqdi, zamon o'zgardi, adabiyotshunosikda tadqiq usullari o'zgardi, adabiy jarayon yangilanib bormoqda, lekin adabiyotshunos o'zbek adabiyoti tadqiqi orqali bayon etgan ilmiy kontseptsiya bugun ham o'z dolzarbligini saqlab kelishi chindan ham muallifning katta iqtidor sohibi bo'lganligini dalillaydi. E'tibor qilinsa, ko'plab olimlarning yutug'i ular tadqiqot olib borgan tor ixtisosliklar hisobiga to'g'ri keladi. Nuriddin Shukurov ilmiy ishlarining qamrov doirasi esa nihoyatda keng edi: she'riyat, nasr, drammaturgiya, adabiyot tarixi, nazariyasi, tanqidi, tarjimonlik...

Nuriddin Shukurov iste'dodining yana bir qirrasini kamtarligi bois tirikligida chop etmagan she'riyati tashkil etadi. "Xushnud" taxallusi bilan ijod qilib, sanoqli she'rlarigina vaqtli matbuotda chop etilgan. Nuriddin Shukurov she'rlarida masalaning mohiyatiga falsafiy yondashish, bugun va kechani parallel idrok etish orqali erta xususida fikr yuritish, arzimasdek tuyulgan kundalik, hayotiy hodisalardan kuchli umumlashma chiqarish jihatlari bilan faylasuf shoir G'afur G'ulom poetik uslubiga yaqinlik seziladi.

Nuriddin Shukurovning Sh.Vohidov, M.Jo'raqulov, B.Valixo'jayev, R.Qo'ng'urov kabi qator tengdosh va safdoshlariga atab yozgan muvashshah she'rlarida do'stlar quvonchini o'z shodligidek qabul qilgan lirik shaxsning xushnudlik kayfiyatlari ko'rinsa, Ulug' Tursun, Vohid Abdullo, Muxtor Vali, Husayn Rizo, Xudoyberdi Doniyorov, Hamdam Berdiyev, Ilhom Hasanlar firoqi lirik "men" qalbidan alamnok misralar ila silqib chiqadi. Shoir o'ylarini poyonsiz

faryod, intihosiz hasrat chulg'aydi. Har bir so'z, har bir misra judolik javridan bo'zlayotgandek, ayriliq alamlaridan so'zlayotgandek bo'ladi:

Tayanchim erdi Ilhomim, tayanchimdan judo bo'ldim,
Quvonchim erdi Ilhomim, quvonchimdan judo bo'ldim.

Jahondin o'tsa ustozlar, qolur shogirdi mumtozlar,
Yupanchim erdi shu so'zlar, yupanchimdan judo bo'ldim.

Dilimni bu o'lim dog'lar, alam tig'i bilan tig'lar,
Ko'zim bo'zlar, ko'nglim yig'lar, ki tinchimdan judo bo'ldim.

Qaddi qomatlari zebo, yigitlar ichra bir barno,
Aqlu idrokda ham yakto, shu ganjimdan judo bo'ldim.

O'tindimki so'zing asra, ko'z tegishdan ko'zing asra,
Falokatdan o'zing asra, o'tinchimdan judo bo'ldim.

Jahonda buncha ofat ko'p, tasodif ko'p, falokat ko'p
Yovuz, ma'shum halokat ko'p, ishonchimdan judo bo'ldim.

Jahondin o'tsa ustozlar, qolur shogirdi mumtozlar,
Yupanchim erdi shu so'zlar, yupanchimdan judo bo'ldim.

Nuriddin Shukurov asos solib ko'p yillar rahbarlik qilgan "Shalola" ijodiy to'garagi turli yillarda O.Matjon, U.Otayeva, R.Otaev, T.Ahmad, D.Saidova, A.Dilmurod, F.Toshev, I.Hasan, K.Bahriyev, Fahriyor, M.Qarshiboyev, D.Ismoilova, O.Hoji, N.Jonuzoq, O.To'xtosh kabi shoir va yozuvchilarni kashf qilgan edi. Tarjimonlik faoliyati tufayli esa o'zbek kitobxonlari R.Hamzatov, A.Bahoriy, M.Qanoat asarlarini o'z tillarida o'qiydilar.

Nuriddin Shukurov 1968-73-yillarda "Lenin yo'li" (hozirgi "Zarafshon") gazetasida muharrirlik qilgan. Farmon Toshevning ta'biri bilan aytganda, jurnalistning noni qattiq, har kim ham bunga chidash berolmaydi. Bunga bir misol. "Muharrir bo'lgan paytlar bir kun amakimnikida tunab qoldim, – deb eslaydi jiyanlari Ilhom Shukurov. – Chamasi soat 2 da redaksiyadan telefon bo'ldi. Amakim apil-atapil kiyinib, ishga ketib, ertalab soat oltida uyga qaytdilar. Bizning nigoh to'la savolimizga "Korrektorning xatosi bilan "kommunistik qurilish"dagi qurilishning "u" harfi "i" bo'lib ketgan ekan, shuni tuzatdik", dedilar. "Agar shu harf o'zgarishi vaqtida bartaraf etilmaganida nafaqat muharrir, boshqa jurnalistlarning boshiga ne ko'rguliklar tushishi mumkinligini tasavvur qilish qiyin emas...

Har qanday ilm kishisining xizmatlari uning kamolga etkazgan munosib shogirdlari bilan baholanadi. Bu borada ham Nuriddin Shukurovning havas qilsa arzigulik xizmatlari bor. O'nlab nomzodlik va doktorlik tadqiqotlariga rahbarlik, opponentlik qildi, yuzlab yoshlarning unib-o'sishida bevosita g'amxo'rlik qildi. Monografiya, o'quv qo'llanma, darsliklari esa minglab ilm-ma'rifatga tashna qalblarga olamda adabiyot degan mo'jiza orligini ko'rsatib berdi.

Hech bir allomayu unvondor rahbarlarni kamsitmagan holda ustoz tabiatida muhim bo'lgan ayrim fazilatlarini e'tirof etish zarur. Nuriddin Shukurov talabchan edi – bu talabchanligi zamirida insonga g'amxo'rlik yotardi, millatparvar edi – bu millatsevarligi o'zga millatlarni hurmat qilish tuyg'usiga payvast edi. Ilmda, ijodda, kundalik hayotda barkamollikka intilardi – bu barkamollik Sharq she'riyati aslar davomida kuylab kelgan komil inson to'g'risidagi orzularga hamohang edi. Tabiatida ezgu niyat, ezgu so'z, ezgu amal ustivor edi. Yurish-turishi, kiyinishi, muomalasi, ichki va tashqi madaniyati bilan ko'plarga ibrat bo'lardi, odamiylik ilmidan saboq berib kelardi. Va shu xislatlari bilan ustozlikning, olimlikning, odamiylikning timsoli bo'lib bizning xotiramizda saqlanib qoldi.

SYUY YUAN G'AFUR G'ULOM TALQINIDA

Musurmanov Erkin Rabbimovich

Sh.Rashidov nomidagi SamDU

“Buyuk ipak yo‘li” markazi direktori

filologiya fanlari doktori,

Achilova Nurxon Normuhammedovna

SamDU mumtoz adabiyot tarixi

kafedrası mustaqil izlanuvchisi

G'afur G'ulom 1955-yili Xitoy tarixidagi rasmiy ilk shoir[1, 687] va mifshunos Syuy Yuan (屈原, Qū Yuán, er.ol.340-278y.y.)ga bag'ishlab 56 misralik madhiya-she'r yozadi. She'ning matni quyidagcha: Syuy Yuan (Bizning eramizdan ilgarigi 340-278-yillarda yashagan ulug' xitoy shoiri)

Insoniy zehning ilk shoiri,

Gomerlar asrining ulug' ustodi,

Ming-ming yillar osha hanuz jaranglar,

O'lmagan-yitmagan shoir ijodi.

Tori uzilmagan yangi soz kabi,

Chala uyqudagi yangn noz kabi,

Yigit sevgilisin sochidan o'pib,

Qulogiga aytgan nim ovoz kabi;

Taxta payrahaga tush-la yozilgan,

Yo marmar lavhaga o'yib qazilgan,

Sening to'rtliklaring o'lim bilmasdir,

Fazoda gul hidi esgan nafasdir.

Og'izdan og'izga ko'chgan qo'shiqlar

Dillardan dillarga solib o'tdi iz.

Taxallus o'rnida nomingni yo'qlar,

Xalq sevgan she'rlar o'lmaydi hargiz.

O'z xalqing dilini demakchi bo'lsang,

Xalqingning ruhiga ko'makchi bo'lsang,

O'z xalqing kuchiga qilsang e'timod —

Ming-ming yil o'tsa ham xalqing qilar yod.

Ulug' xalq orzusini kuylagap shoir,

Xitoylar dil so‘zin so‘ylagan shoir,
Iskandar, Dorolar asriday ko‘hna
Va muhri o‘chmagan oltinday yana,
Yarqirab turguvchi dono fikrni,
Ming yillar erk uchun barpo fikrni
Tug‘dirgan shu xalqdir, ushbu Vatandir,
Avvalo kuylagan Syuy Yuandir.
Filday ulug‘ xalqning filday sabri bor,
Erk uchun kurashda yo‘l uzoq bo‘ldi.
Chudan Chan Kay-Shining asriga qadar
Har qadam qo‘ngan yer bir tuzoq bo‘ldi.

Bu qissa alqissa juda ham uzun
Aytilur dostonning bobi bobida.
Ammo ulug‘ shoir Syuy Yuanning
Kuylari kurashning har xitobida.

Qattol jang kuplari jangchi labida
El kuchin qistovchi shoir bo‘loldi,
G‘alaba kunlari, to‘y-hasham kuni
Ma‘shuqlar qo‘shig‘i-gulyor bo‘loldi.

Shuning-chun Xitoyda har yetuk aql
She‘r yozmoq uchun olarkan qalam,
Avvalgi satrini ulug‘ shoirning
Muqaddas nomi-la qilur mustahkam.

Qardosh ulug‘ xalqning sha‘niga atab
Men ham bir necha so‘z yozmoqchi bo‘ldim.
Murodga yetkazar — murod va talab
Oltin tog‘ bag‘rini qazmoqchi bo‘ldim.

Inju qidirmakka Chinga jo‘nadim,
Xuan-Xe daryosin saxiy qo‘yniga.
Tizgan injularim ziynat bo‘lajak
Chinlik go‘zallarning zebo bo‘yniga.

Ulug‘ Syuy Yuan ijodlaridan
Ilhomim bahramand bo‘lsa — menga bas.
Garchand oramizda ming-ming yil farq bor,
Erk uchun kuylashda jondosh, hamnafas. [2,44-45]

Mazkur she‘rda G‘afur G‘ulom qadimgi xitoy shoiri Syuy Yuan shaxsiyatini ulug‘lab, bejizga shu ijodkor obraziga murojaat qilmayotgani aniq-tiniq ko‘rinib turibdi. Birinchidan, bundan 2200 yil oldin yashagan Syuy Yuan xitoy mumtoz she‘riyatining asoschisi sifatida Osmonosti o‘lkasi tarixidan joy olgan bo‘lsa-da, ikkinchidan, u grajdanlik pozitsiyasi bilan o‘z davrining hukmron tuzum amaldorlariga qarshi tanqidiy fikrlarini bildirgan va buning uchun o‘zini qurbon qilgan vatanparvar, uchinchidan, xitoy folklori namunalarini, turli qahramon va ajdarholar bilan bog‘liq ma‘lumotlarni to‘plab, saqlab qolgan folklorshunos-etnograf olim sifatida ham mashhur bo‘lgan. G‘afur G‘ulom she‘rining dastlabki bandida shunday deydi:

Insoniy zehnniing ilk shoiri,
Gomerlar asrining ulug' ustodi,
Ming-ming yillar osha hanuz jaranglar,
O'lmagan-yitmagan shoir ijodi.

O'zbek shoiri Syuy Yuanning, nafaqat, Xitoy lirik she'riyatining asoschisi, balki, insoniyatning dastlabki shoirlaridan biri bo'lganligini, shoir yashagan davr nihoyatda qadimiy bo'lib, u hatto Gomer izdoshlari davrining ulug' ustozlari ekanligini, oradan ming yillar o'tsa-da, uning tovushi hamon jaranglayotganligini to'liqlanib yozadi. Keyingi bandlarda Syuy Yuan she'riyatining gohida oshiqning muhabbati, yorning kokili kabi mayin bo'lishi, gohida esa to'rtliklardagi mazmun-ma'no eritilgan po'lat kabi toshlar ustiga quyilib, ularni kuydirib so'z shaklini olishi va metindek qudrat kasb etishi nozik bo'yodkorlik bilan chizilgan.

Asar davomida G'afur G'ulom Syuy Yuan she'riyatining manguilikka dahldor bo'lish sababini uning Iskandaru Doro bilan tengdosh yoki ishq-vafoga bag'ishlanganligida emasligida, balki bu she'rlar soddaligi va serma'noligi bilan oddiy xalq ko'nglidan muqim joy olganligi va ularning asosiy muxlislari dehqonu mirishkorlar ekanligida biladi. Xitoy adibining she'riyatidan ilhomlangan G'afur G'ulom Chin shoirining yurtiga borishni va u yerda Xuan-Xe daryosidan ma'nolar injularini terishni, ijodini Xitoy shoriga moslab, sozlab asarlar yaratishini keltirib o'tadi.

O'zbek o'quvchisi G'afur G'ulom madh qilgan qadimgi Xitoy shoiri Syuy Yuan haqida yetarlicha ma'lumotga ega bo'lasligi mumkin. Shu nuqtai nazardan biz xitoy mumtoz shoiri haqida muxtasar to'xtalib o'tishni lozim topdik. Eng qadimgi Xitoy adabiyoti "Shijing" (诗经, qo'shiqlar kitobi) [3] el qo'shiqlari to'plamidan boshlanadi. Asar xitoy adabiyotining ilk nishonasi bo'lib, til, mafkura, etika va el turmushi haqida ma'lumot beruvchi nodir manba hisoblanadi. Uning ahamiyatini hindlarning Rigveda va zardushtiylikning Avesto kitobi bilan qiyoslash mumkin [4,6].

Muallifi (yaratuvchisi) bor bo'lgan xitoy she'riyati janubdagi **Chu** saltanatida (er.ol.722–481y.y., bu saltanat haqida G'ulom yuqoridagi she'rda keltirib o'tgan: *Chudan Chan Kay-Shining asriga qadar*) yaraldi. "Shijing" ta'sirida yozilgan "**Chu she'riyati**" nomini olgan lirik to'plamdagi ko'pgina she'rlar Syuy Yuanga tegishli ekanligi manbalardan ma'lum. El qo'shiqlarini ijodiy o'zlashtirgan birinchi xitoy shoir Syuy Yuan "**Lisao**" dostonida o'zi haqida shunday ma'lumot beradi:

*Marhum otamning nomi Bo-yu edi,
Osmon o'g'loni Chjuan bobom edi.
Yilning yettinchi kuni tug'ildim,
Bu kun eng baxtli kun bo'lib qoldi.*

(E. Musurmanov tarjimai)

Syuy Yuan nomi Xitoyda turli rivoyatlarga burkangan va chuqur ehtiromga sazovor bo'lgan. Chu xonligining bosh vaziri sifatida Syuy Yuan mamlakatning tarqoqligi va bo'linishining oldini olish uchun ko'p harakatlar qilgan. Biroq dushmanlari tomonidan ig'vo va tuhmatlarga uchragan shoir Chu xoni tomonidan barcha amal va mansablaridan ayrilib, surgun qilingan. To'g'rilikning qaror

toptirishga ko‘zi yetmagan va koyishlarga chiday olmagan yozuvchi o‘zini Yanszi daryosiga tashlagan. Shundan beri Xitoyda har yili “ajdar qayiqlarining bayrami” o‘tkazilib, ishtirokchilar qayiqlarini turli chiroqlar bilan bezab, suvga g‘arq bo‘lgan shoirning tanasini izlashga tushadilar. Syuy Yuanning adabiy merosi quyidagilardir: “Lisao”[5] ba “Osmonga savollar” [6,192–208] dostonlari, “To‘qqiz elegiya (mungli she’r)” turkumidagi she’rlar, “to‘qqiz yalla” maqomidagi o‘n bir qo‘shiq va “Yurak chaqirig‘i” nomli qo‘shiqlar.

Yozuvchi ijodining cho‘qqisi “Lisao”dir. “Li” iyeroglifining ma’nosi – ayriliq, “sao” – adabiy termin bo‘lib, “elegiya” ma’nosini anglatgan. Asarning bir qancha tushunchalari mavjud bo‘lib, ular “Motamga g‘arq bo‘lgan”, “G‘amga botgan”, “Ayriliq azobi” shaklida keltiriladi. Qadimgi Xitoy qo‘shiqlari to‘plami bo‘lgan “Shijing”ga ergashib yozilgan “Lisao” poetikasi va ramzlar tizimi jihatidan folklor janriga juda yaqin turadi. Dostonda o‘simliklar olamidan olingan ko‘plab obrazlar keltiriladi. Chechaklarni ezgulik timsoli sifatida talqin qilgan shoir iflos va so‘qir davrining muhitiga sira mos kelmasligini, go‘zallik va nafislikning bu dunyo uchun begona ekanligini tasvirlaydi. Mazkur falsafiy dostonning lirik qahramoni shoirning o‘zi bo‘lib, u nafaqat davlat va jamiyat qurilishi masalalari bilan, balki oxirat, qarilik, yolg‘izlik haqida ham o‘y suradi. Syuy Yuan asariga davlat taqdirida ma’lum o‘rin tutgan tarixiy va afsonaviy qahramon obrazlarini olib kirdi. Ular Yuy, Yi, Yao kabi o‘rnakka sazovor obrazlar, shuningdek, Sze, Jou, Go Szyao singari davlatni halokatga olib kelgan zolim xon va amaldorlardir. Bulardan tashqari asarda jamiyat uchun ko‘p foydali ishlar qilgan va el nazariga tushgan qahramonlar Fu Yue, Lyuy Van, Nin Si olqishlanadi. “Osmonga savollar” asarida afsonaviy mergan Yi haqida Syuy Yuan shunday deydi:

Sya yerini maxluqlardan poklashga
Yuborilgan edi Hou Yi mergan.
Xebo (suv ajdarhosi) ni o‘q bilan urib, boz nega,
Daryo parisiga to‘shagidan joy bergan?

(E. Musurmanov tarjimai)

Syuy Yuan mazkur she’rida xitoy miqlari orasida eng mashhuri “Xitoy Herakli” nomini olgan ko‘k mergani Xou Yi (后羿) haqidagi asotirdan parchaga sha’ma qilgan. Unda keltirilishicha, qadim Xitoyda odamlarga kulfatlarni keltiruvchi yovvoyi jonivorlar ko‘payib ketgan. Osmon imperatori maxluqlarni yo‘q qilish uchun yerga mergan Xou Yini yuboradi. Mergan go‘zal xotini Chan-eni yoniga olib yerga tushgan va ko‘plab yovuz maxluqlarga qiron keltirgan. Yi ulkan Fin-si to‘ng‘izini o‘ldirib, qurbonlik qilgan, Xuan-xe daryosining hukmdori, qirg‘oq yaqinida suzib yurgan oq ajdarho Xeboning so‘l ko‘zini urib chiqargan. Xeboning osmon hukmdoriga qilgan shikoyati esa yuqorida qabul qilinmagan. Mergan Yi Xeboning go‘zal xotini, Loshuy daryosi malikasi Lopinni o‘ziga kanizak qilib olgan... Shoir afsonaviy imperator Chun-xuoga murojaat qilib, qasidani shunday xulosalaydi:

O‘tmish kelajakni birdek ko‘raman,
Insonlarning istaklarin tuyaman.
Yurtga sadoqatsiz xizmat bo‘lurmu?

Yolgʻon eʼtiqoddan hurmat boʻlurmu?
Taqdir qoʻrqitsa-yu, keltirsa qazo,
Men ezgu oʻyimdan qaytmasman aslo.
Buyuklar toʻgʻrilik va adolat uchun,
Jon taslim qilganlar qoldirib ochun.

(E. Musurmanov tarjimai)

Xitoyda Syuy Yuan vafoti bilan bogʻliq Duan-u degan bayram juda mashhurdir [7, 576—577]. Yuqorida keltirganimizdek, haqsizlikka uchragan shoir oʻzini Yanszi daryosiga tashlagan. Dehqonlar shoirni qutqarib qolish uchun koʻp harakatlar qilgan, biroq barchasi samarasiz ketgan. Soʻngra ular shoirning vujudini baliq va suv jinlaridan omon saqlash uchun nogʻoralarni va qayiq eshkaklari bilan suvni uradigan odat chiqarishdi. Ularning talqinida, bunday shovqindan turli suv yirtqichlari shoir tanasiga yaqinlasha olmas ekan. Biroq rivoyatda keltirishlaricha, bunday tadbir marhum Syuy Yuan ruhiga maʼqul kelmaganligi bois, shoir arvohi doʻstlarining qoshiga kelib, uning oʻlimiga daryo ajdarhosi sababchi boʻlganligini aytib, qaytib ketgan. Shundan keyin Syuy Yuan muxlislari suvdagi shoirni tinch quyishi uchun daryo ajdarhosiga qurbonlik va nazir tariqasida guruch bilan toʻldirilgan shoyi xaltachalarni daryoga tushiradigan odat chiqardilar. Keyinroq bu odat biroz oʻzgartirilib, unga koʻra qaynatilgan guruchni doʻlmaga oʻxshatib, nilufar barglariga urab, nazir qilib suvga soladigan boʻlishdi. “Tanani daryodan izlash” marosimi, keyinchalik, “ajdar qayiqlarining bayrami” deb ataluvchi qayiqlar musobaqasiga oʻzgardi. Bellashuvning shartiga koʻra, poygada qatnashuvchi qayiqning tumshuq qismi, albatta, ajdarho koʻrinishiga ega boʻlishi kerak, buni koʻrgan suv ajdarhosi uning saltanatidagi shoirga mehribonlik koʻrsatar ekan. Xitoyda, anʼanaga koʻra, har yili, qamariy beshinchi oyning beshinchi kuni Syuy Yuanning vafot etgan kuni nishonlanib kelinmoqda.

Syuy Yuanning gʻaroyib taqdiridan tashqari uning asarlari ham butun dunyoda katta qiziqish bilan oʻrganilmoqda, shoir asarlari koʻplab tillarga, jumladan, rus tiliga ham tarjima qilingan. Bu sheʼrlarning rus oʻquvchilari orasida tanilishida Anna Ahmatovanning xizmati katta boʻlgan. Shoira qadimgi shoir Szya I [8, 202.] (賈誼, эр.ав. 201—168 й.й.) ning “Syuy Yuan marsiyasi”ni ham rus tiliga tarjima qilgan. Ajab emaski, rus tili va adabiyotini yaxshi bilgan Gʻafur Gʻulom bu asarlardan ilhomlanib, mazkur mavzuni tanlagan va salmoqli boʻlgan oʻziga xos, sheʼrni maydonga keltirgan. Oʻzbek adibi oʻtmish Xitoy shoiri haqida sheʼr yozishdan oldin qadimgi Chin tarixi va adabiyoti bilan yaxshigina tanishganligi koʻrinib turibdi. Shu sababli shoirga bagʻishlangan ushbu madhiyada Xitoy adibi yashagan davr, ijtimoiy muhit va shoirning oʻziga xos uslubi haqida loʻnda va aniq fikrlar chiroyli tashbehtar orqali koʻrsatilib berilgan. Maqolamizning soʻnggini Syuy Yuanning tarjima sheʼridan olingan ushbu parcha bilan yakunlaymiz:

Oʻz xalqing dilini demakchi boʻlsang,
Xalqingning ruhiga koʻmakchi boʻlsang,
Oʻz xalqing kuchiga qilsang eʼtimod -
Ming-ming yil oʻtsa ham xalqing qilar yod.

Foydalanilgan adabiyotlar

- 1.История Китая с древнейших времён до начала XXI века : в 10 т / отв. ред. Л.С. Переломов. – М.: Наука–Вост. лит, 2016. –Т. II. Эпоха Чжаньго, Цинь и Хань (V в. до н.э. –III в. н.э.).– 687 с. – ISBN 978-5-02-039775-0.
- 2.Ғулом. Цюй Юань. Ўзбекистон. –Т., “Фан”,1984. 44-45.
- 3.Шижинг // Энциклопедический словарь Брокгауза и Ефрона: В 86 томах (82 т. и 4 доп.). – СПб., 1890 – 1907.
- 4.Musurmanov . E. X itoy adabiyoti tarixi. Samarqand: SamDU, 2016. – 160 b. B.-6
- 5.Лисао. – СПб.: ООО "Издательский Дом "Кристалл", 2000. – (Б-ка мировой лит. Восточная серия). OCR Бычков М.Н. <mailto:bmn@lib.ru> .
- 6.Mair, Victor H. “Heavenly Questions”, in The Columbia Anthology of Traditional Chinese Literature, ed. Victor H. Mair (Columbia University Press), pp. 371-386, also in The Shorter Columbia Anthology of Traditional Chinese Literature, ed. Victor H. Mair (Columbia University Press), pp. 192–208.
- 7.История Китая с древнейших времён до начала XXI века : в 10 т / отв. ред. Л.С. Переломов. – М.: Наука–Вост. лит, 2016. –Т. II. Эпоха Чжаньго, Цинь и Хань (V в. до н.э. – III в. н.э.). – 687 с. –ISBN 978-5-02-039775-0. с. 576—577.
- 8.Антология китайской поэзии / Перевод с китайского под общей редакцией Го Мо-Жо и Н. Т. Федоренко. – М.: Государственное издательство художественной литературы, 1957. – Т. 1. –С. 199-202.

G‘AGUR G‘ULOM SHE’RIYATIDA SAMARQAND MADHI

*Nasirov Azimidin Normamatovich,
SamDU professori, filologiya fanlari doktori*

Uzoq tarixga nazar tashlar ekanmiz, dunyoning go‘zal joylarini mad etish, uning poetik obrazini yaratishga bo‘lgan intilashlarni ko‘plab uchratish mumkin. Chunki har bir xalqning uyg‘oq tafakkurli insoni, tabiat mo‘jizalaridan, uning go‘zalligidan bahra olishga intilishi, o‘z sizimlariga tayangan holga qalbigida ezgulikka intilishi ham his etish mumkin. Dunyoning turli o‘lkalari mahd etilar ekan, uning o‘ziga xos fazilatlari, makoniy belgilari, inson kechinmalariga singdirilashi, tabiiy. Shuning uchun ham go‘zal va qadimiy, navqiror Samarqandni poetik obrazini yaratishga doimo katta e’tibor qaratishgan. Bularning zamirida insonni anglash, bu asosida uning tafakkur dunyosiga ta’sir etish an’anasi ham kuzatish mumkin.

Jahon adabiyoti xos bunday an’analarning o‘ziga xosligini Sharq mumtoz adabiyotimizning turli janrlarida ham kuzatish mumkin. Chunki mauroz adabiyotimizning go‘zal namunalarida bunday poetik obraz yaratishi etakchilik qiladi. G‘azal mulking sultoni Mir Alisher Navoiy, Zahiriddin Muhammad Bobur, Abulfath Muhammad Shayboniixon kabi yuzlab ise’dod sohiblarining asarlarida bunday talqinlar, poetik obrazlar mukammalik darajasiga ko‘tarilganligini ta’kidlash mumkin.

XX asr adabiyoti ham bu an'analar izchillik bilan davom ettirib, badiiyat tarkibiga singdirib keldi. O'tgan asrning ikkinchi yarmiga kelib, bir qator iste'dod sohiblari ijodiy an'analarni izchillik bilan yangilanishiga inkon yaratdi. Chunki o'tgan asr boshlarida Turkiston birligi yaxlitlini kuylash an'ana hisoblangan bo'lsa, 70-80-yillarga kelib bu mavzu ijodiy jarayonda yanada teranror o'rin oldi. Rauf Parfi, Shavkat Rahmon kabi ijodkorlar, Cho'lponning bu mavzudagi ijodiy an'analarni davom ettirdi. Ana shunday bir davrda she'riyatda rang-barag mavzular, metoforik talqinlar etakchilik qilidi.

XX asr o'zbek she'riyatining yorqin namoyondalaridan bir, qomusiy ijodkor G'afur G'ulomning turli janrlar va tarjimachilik taraqqiyotida o'ziga xos o'rni mavjudligini alohida ta'kidlash joizdir. Buyuk adibning qarashlari, tahliliy maqolalari, nasr va nazmdagi badiiy mahorati, tarjimachilik taraqqiyotidagi ulkam izlanishlarining zahirida etuk salohiyat, ijodga bag'shida umrni kuzatish mumkin.

Mumtoz adabiyotimizning etuk bilimdoni bo'lishi bilan birgalikda, mumtoz an'analarni izchillikda, mantiqiylikda o'ziga xos uslubda lirik qahramon kechinmalariga singdirilganligini kuzatish mumkin. G'afur G'ulomning falsafiy qarashlarida insonni aglash, uning tuyg'ularini lirik qahramonga singdirish kabi talqinlarda shoirning poetik mahorati yanda teranlashadi. Shoir she'riyatidagi yuksak falsafiylik, mukammal obrazlilik, teran fikrlilik etakchilik qiladiki, bu esa uning, poetik obraz yaratish jarayonidagi mahoratini namoyon qiladi. Shoirning bu talqinlari o'z navbatida, uning she'riyatidagi milliy ruhni yuksak darajaga ko'tarilishini ta'minlashga xizmat qilgan.

Iste'dodli yozuvchi Odil Yoqubov ustoz G'afur G'ulom haqidagi xotiralarini jonlantirar ekan, quyidagilarni alohida qayd etgan edi: "Men bilgan G'afur aka nihoyatda quvnoq, xushchaqchaq bir odam edi. Lekin millon-millon kishilarning qalbiga larza slogan, odamlarning dilini yorug' nur bilan to'ldirgan bu tiniq she'rlarni xushchaqchaq bir holatda yozib bo'lmaydi" [1, 18-bet]. Odil Yoqubov qayd qilayotgan bu tushunchalarda G'afur G'ulomning "Xalq otlandi", "Sen etim emassan" kabi she'rlari haqida so'z bormoqda.

To'g'ri, o'tgan asrning o'rtalarida xalqimiz boshiga tushgan og'ir kunlarni, uning istiroblari onlarini, she'riy misralarga singdirar ekan shoirning ham qalb kechinmalaridagi dardni, istirobni anglash mumkinligi ta'kidlanmoqda. Shuning uchun ham shoirning qalbi shu darajada ummonki, ba'zan hijron alamni kuylasa, ba'zan esa tabiatning go'alligidan bahra olayaogan lirik qahramonini tuyg'ularga singdiradi. Shoir likikasiga singdirilgan milliy ruh, milliy an'analar badiiyatga singdiriladiki, bu esa shoirning nasr va nazmda birdek ijod qilganligini asoslaydi.

Adabiyotshunos olim N.Karimov qayd qilganidek: "O'zbek xalqining shoiri bo'lishligi bilan faxrlanishi bejiz emas. Zeroki, u sevgan, uning bir zarrasi bo'lgan xalq jahondagi eng qadimiy, madaniyatga ega xalqlardan biridir. G'afur G'ulom Sharq she'riyati tarixini ham, rus va Evropa poetik madaniniyatini ham mukammal bilgan va o'zlashtirgan shoir edi. Ammo uning ijodida Jambulga xos soddalik bilan Umar Xayyomga xos falsafiylik va teranlik ko'proq bo'rtib turadi" [2, 23-bet].

Asosli ta'kidlanganidek, G'afur G'ulom nafaqat Shaqr adabiyotini, shu bilan birgalikda rus va Evropa adabiyotini, uning tasvir usullarini mukammal

o'rgangan iste'dod sohibi edi. Uning har bir asarida o'ziga xos talqinlar bilan birgalikda ijod, uning mashaqqatli jarayoni ufruf turgandek, bu esa ijodkorning poetik mahoratidan dalolat edi. Shoirning lirik tuyg'ularga, chuqur va mukammal hissiyotlarga, falsafiy-poetik umumlashmalarga ega ekanligi uchun ham milliy an'analarni, qadriyatlarni, o'zlikni anglashga xisimat quluvchi badiiylik funksiyasidan unumli foydalangan. Shoir ijodida ona-vatanni ulug'lash, do'stlik va tinchlikni mag'rurona kuylash jarayonida betakroe asarlar yaratdi.

Shoir qaysi mavzuni qalamga olmasin, o'zining uslubi, jarangdor ovozi bilan ajralib turadi. Bu xususiyat odamlar orasiga kirganda ham yaqqol namoyob bo'lgan, chunki uning hissoyot bilan ovqigan she'rlarini kitobxon butun vujudi bilan tinglagan. Bu esa shoirni yangi-yangi she'rlarini paydo bo'lishiga zamin hozirlar edi.

Niliy gumbazlari ko'k ichida ko'k,
Lojuvard osmonda chiniy kabutar.
"Samarqand sayqali ro'yi zaminast"
Sharqning ko'rki bo'lgan tarixiy shahar.

Misralari bilan boshlanuvchi she'rida Sharqning mash'ali bo'lgan Samarqand va undagi bilim maskanlarini ulug'lab, O'zGUning tarixi, uzoq tarixga borib taqalishini, bu davrda ham ulkan salohiyatga ega bilm maskani ekanligini alohida qayd etadi. Universitetning tarixi ko'hna tarix bilan tutshishini misralarga singdiradi:

Ishqu vafolarning "Xamsa"sin yozgan,
Jomiy, Navoiyning asriy nidosi.
Hali gumbazidan gvo'ng'urlab kelur
Olimlar bahsining aksi sadosi.

Haqiqatdan ham, bu Ona-Zaminga Alisher Navoiy, Mirzo Ulug'bek, Muhammad Shayboniyxon, Muhammad Boburlar qadami tekkanligini, ularning ma'rifat nuri taratuvchi asarlarida ham Samaqqand alohida qayd etilganligi, uning ovziga xos sabablari mavjudligi haqidagi tushunchalarni uyg'otadi.

O'z davlat tug'roli, hur O'zbekiston
Mazlum Shrq xalqiga bo'lolur ko'zgu
Yash, ey, xalqimning dorilfununi
Ilmu fan manbai barhayot O'zGU.

Iste'dodli shoirning bu misralarida mujassamlashgan falsafiy umumlashmalarning zamirida asl haqiqat mujassam edi. "O'z davlat tug'roli, hur O'zbekiston" misrasida mujassamlashgan lirik kechinmalarning mazmundorligi, uning asosidagi tarix haqiqatlari, bularning barchasi shoir qalbini titroqqa soladi, asl haqiqatni kuylashga, metoforik talqinlarga singdirishga intiladiki, bu esa shoirning poetik mahorati edi. Misralar mantiqiy izchillikda davom etar ekan, o'z davrining buyuk mutafakkiri Mirzo Ulug'bek siymosiga, uning ziddiyatli davriga, ammo ilm ma'rifat taraqqiy etganligini alohida qayd etadi:

Ulug'bek yulduzlar sirin fosh etib,
So'niq sham oldida taqdim etdi bosh.

Shoirning lirik qahramoni davrning barcha murakkabliklarini engishga intilgan shaxs siymosini, uning kechinmalarini juda teran anglaydiki, bu esa

“yulduzlar sirin”, “so‘niq sham”, “taqdim etdi bosh” birliklarida o‘manosini yanada kuchaytiradi. Lirik qahramonning Samarqandga mehri o‘zgacha, uning kechinmalari, tuyg‘ularida be ko‘na, qadimiy shahar Shrqning mash‘ali ekanligini qayd etilishida ham metafoqik talqinlar, qolaversa tarix haqiqati mujassamlashagan edi. Shunimg bu ko‘hna shahar, Shrq ilmining “beshigi” bo‘lganligini, ilm-fanning manbaiy bo‘lgan, Mirzo Ulug‘bekkning izdoshiga aylangan O‘zGUga alohida diqqat qiladi. Samarqandi hur O‘zbekistonni ilm-fan ahllarini etkazib beruvchi beshik sifatida e’tirob etadiki, buning tarixiy ilk ildizlari uzoq ovtmishga borib taqaladi.

Chunki, Samarqand bu O‘zGU demakdir,
Shoirning joni ham unga payvasta.

Darhaqiqat, bu ko‘hna makonga o‘z jonini payvasta qilishga ham lirik qahramon rozi ekanligini urg‘ulaydi. Qadimiy shaharga kimlar kelib, kimlar ketmadi, kimlar hukmronlik qildi, kimlardir uni orzu qilib o‘tdi, ammo shunday bo‘lsa-da, bu makon ilm-ma‘rifat joyi bo‘lib qolaverganligiga ishora beradi. Ma‘rifatning beshigi bo‘lgan bu makonda ne-ne zotlar etib chiqmadi, ularning barchasi turli sohalarda ma‘rifat nurlarini mash‘ala qilib, yuksaklik sari intildi va shuning uchun ham, jahonga ma‘lum va mashhur bo‘ldi. Shoirning lirik qahramini O‘zGUsiz Samarqandni, hattoki jahonni ham tasavvur etish qiyinligini ta’kidlaydi. Talqinlardan shu narsa anglashiladiki, istedod egasi bo‘lgan G‘afur G‘ulom ana shu murakkab zamonda ham bor haqiqatni kuylashga intilganligidan dalolat beradi.

Adabiyotshunos Nuriddin Shukurov buyuk ijodkorning asarlarini, uning poetik mahoratini juda teran ilg‘agan va tahliliy xulosalar chiqarganligini alohida qayd etish lozim: “G‘afur G‘ulom Samarqandga kelganida vaqti-vaqti bilan Sadriddin Ayniyni ziyorat qilar, u ulug‘ zotning ahvolidan xabar olardi. Keyin esa Vohid Abdullo, Ismoyil akram kabi do‘stlari bilan tabiatning go‘zal maskanlaridan bahra olar, kunlarni ijodiy munozara va muloqotlar bilan o‘tkazardi. G‘afur G‘ulomning “Samarqand sayqali”, “Samarqand uchun”, “Samarqandlik paxtakor do‘stlarimga”, “O‘ttiz yoshli O‘zGU”... kabi bir qator she‘rlari bevosita Samarqand tassurotlari asosida tug‘ilgan asarlardir” [4, 26-bet].

Adabiyotshunos olim ta’kidlaganidek, Samarqand G‘afur G‘ulom uchun ijodiy bahra oladigan makonga aylanganligi, buning zamirida esa qadimiy Samarqandning betakror mo‘jizalari, unga madad bo‘lganligini his etish mumkin. Shoirning lirik qahramoni qadimiy Samarqandning ma‘rifat beshigi sifatida e’tirof etishida ham ayni haqiqat mujassamlashgan. Uning she‘riyati rang-barang mavzularni o‘zida mujassamlashtirgan, shuning uchun falsafiylik, metoforik talqinlar, shoir she‘riyatining yashavchanligini ta’minlab kelmoqda. Mavzu rang-barangligi shoir ijodining muhin va asosiy xususiyatlaridan biridir. Shoirning lirik qahramoni doimiy uyg‘oq insonlar ruhiyatini, kechinmalarini o‘zida mujassamlashtirgan, chunki lirik qahramon yuz berayotgan voqealarga, xalqning kechmishiga, yangilanishlarga, uning qalb kechinmalariga befarq emas edi. Shuning uchun ham, har bir voqelik va talqinlar zamirida hayotiylik, insonni anglash, his etish tushunchalari o‘z ifodasini topgan.

Xullas, shoir she‘riyatidagi turfa tasvirlar, talqinlar uning etuk iste’dod sohibi ekanligidan dalolat berishi bilan bir qatorda, odddiy inson qalbi va

kechinmalarini, davr ruhiga singdiradiki, bu esa zamonaviylik, hozirjavoblilik, dolzarblik kasb etishiga imkon bergan.

Foydalanilgan adabiyotlar:

1. Ёқубов О. Сўз. Мақолалар, суҳбатлар, интервьюлар, нутқ ва маърузалар, мактублар. Биринчи китоб. –Т., Шарқ, 2019.–Б.496.
2. Каримов Н. Шоирнинг эстетик принциплари. Қаранг: Ғафур Ғуломнинг бадий олами. Мақолалар тўплами. –Т., Фан, 1984. –Б. 168.
3. Мамажонов С. Ғафур Ғулом прозаси. Монография. –Т., Фан, 1966. –Б. 227.
4. Shukurov N. Gʻafur Gʻulomning lirik poeziyadagi mahorati. – Т., 1966. – Б. 220.

GʻAFUR GʻULOM IJODI VA SHARQ ADABIYOTI

*Qobilov Usmon Uralovich,
SamDU dotsenti,
filologiya fanlari doktori*

Biz ilm ahliga maʼlumki, oʻzbek milliy adabiyoti taraqqiyotining yangi davrini ustoz ijodkor, SHarq Gʻarb adabiyotining teran bilimdoni, tarjimon va shoir, tabdilchi va atoqli yozuvchi Gʻafur Gʻulom oʻz qalami, siymosi, shaxsiyati bilan baland bir rutbaga koʻtarilishiga xizmat qildi. U oʻz vaqti oʻzbek adabiyotining mashhur namoyondasi sifatida badiiy tafakkur olamining keyingi kamoloti uchun ham hissa boʻlib qoʻshiladigan asarlar yaratdi. Ayniqsa, abadiy masalalar talqiniga bagʻishlangan qator sheʼrlari, inson taqdiri va qismati fojealarini ochib beruvchi nasriy asarlari bilan adabiyot deb ataladigan muqaddas dargohga oʻz nomini muhrlab ketdi. Gʻafur Gʻulom sobiq ittifoq mafkurasi bilan sugʻorilgan zamonda yashadi, ijodida ham oʻz davri chaqiriqlariga binoan ish koʻrdi, zamonasining bayroqdor ijod sohibi sifatida tanildi, sobiq ittifoqning qator mukofotlariga sazavor boʻldi. Biroq shuni aytish lozimki, adabiyot singari uni yuzaga keltiradigan ilhom ham, ijod tugʻyoni ham muqaddas hisoblanadi. SHuning uchun ijod kabi ijodkor ham ayni tugʻyonijarayonlararo doimiy suratda haqiqatlar qoshida maʼsullikda umr kechiradi. Shundan boʻlsa kerakki, Gʻafur Gʻulom qalamiga mansub lirik va epik asarlarda ham hayotning chin haqiqatlari, hech qanday siqiq va tor manfaatlarga sigʻmaydiganpoetik kashfiyotlar aks etib turadigan satrlar, epizodlar bot-bot koʻzga tashlanadi. Gʻafur Gʻulomning atoqli ijod sohibi boʻlib shakllanishida ikki qutb taʼsirini koʻrishimiz mumkin. Birinchisi yozuvchi yashagan muhit va qadimiy sharqona anʼanalargatayangan, sobiq ittifoq taʼbiri bilan aytilganda, “eski maktab” taʼlimi boʻlsa, ikkinchisi zamon taqozosiga koʻra kirib kelgan “yangi maktab”(shoir rus-tuzem maktabida ham tahsil oladi)dir. Mana shu taʼlim jarayonlariga binoan keyinchalik mashhur yozuvchi va maqbul shoirga aylangan Gʻafur Gʻulom siymosining ijodiy-ilmiy qarashlari ildiz otib boradi. Uning faoliyatida murabbiylik, va ayniqsa, muharrirlik muhim rol oʻynaydi, bir qator gazeta-jurnallarda ish olib boradi, rang-barang ijtimoiy-madaniy masalalar tahliliga bagʻishlangan maqolalar yozadi, ilk ijod mahsulotlarini nashr etib boradi. Adabiyotshunoslar Gʻafur Gʻulom ijodiyotini

sobiq ittifoq davlat tizimining tiklanishi, ikkinchi jahon va Vatan urushi hamda yuksalishi kabi davrlar mezonlari bilan baholashadilar. Birinchi davr asarlari sirasiga “Dinamo”, “Tirik qo‘shiqlar”, “Ko‘kan”, “To‘y”, “Ikki vasiqa”, “Netay”, “Yodgor”, “Tirilgan murda” kabilarni kiritishsa, ikkinchi davrga “Kuzatish”, “Vaqt”, “Sog‘inish”, “Sen etim emassan”, “Qish”, “Bizning ko‘chada ham bayram bo‘lajak”, “Onalar” singari asarlarini kiritadilar (hatto urush yillarida yaratilgan asarlari to‘plami bo‘lgan “Sharqdan kelayotirman” asari uchun davlat mukofotiga sazavor bo‘lgan). Keyingi davr ijodi ham ancha salmoqdor bo‘lib, ularda shoir va yozuvchi zamonning tinch-osuda damlarini, ittifoq xalqlarining birdamligini tarannum etuvchi asarlar yaratganligi tadqiqot ishlarida qayd etiladi.

Shunday qilib, G‘afur G‘ulom hayoti va ijodi sobiq sho‘ro davlati kechmish-kechirmishining qariyb murakkab qirq yilini o‘z boshidan o‘tkazib umrguzaronlik qildi, davlat va hukumat tomonidan qator mukofotlar bilan taqdirlandi. Shuni alohida ta’kidlash lozimki, G‘afur G‘ulom birinchi navbatda asl o‘zbek farzandi o‘laroq Sharq madaniyati, an‘analari, qarashlari zaminida voyaga etgan shaxs edi. Shu bois uning qonida va jonida sharqona shuur, milliy zakovat mujassam edi. Bu esa G‘afur G‘ulom ijodida har doim o‘z nuqsini ko‘rsatib turadi. Yozuvchi Sharqning buyuk ijod ahli asarlaridan bahra oladi, Hofiz Sheroziy, Sa’diy, Jomiy, Navoiy, Fuzuliy, Mashrab, Bedil singari ulug‘lar asarlarini qunt bilan o‘rganadi, ularga o‘z ijod namunalarida ba’zan oshkora, ba’zan pinhona izdoshlik qiladi, Hazrat Alisher Navoiy dostonlaridan ayrimlari matnini joriy o‘zbek tilidagi nashrlarini tayyorlaydi.

Misol uchun “Hayrat ul-abror”ning shoir tomonidan amalga oshirilgan zamonaviy o‘zbek tilidagi tabdili muayyan qisqartirishlar bilan bo‘lsa-da, o‘z davri va hozir ham ilmiy qimmatini yo‘qotgan emas. Chunki, birinchidan, bu davrda besh asr ilgarigi til va uslubda yaratilgan asar mohiyatini anglash o‘zgargan tafakkur, til nuqtai nazaridan murakkab bir jarayon edi, ikkinchi tomondan, “Hayrat ul-abror” dostoni butun Sharq falsafasi, badiiy-estetikasi, axloqiy-tarbiyaviy jihatlari ifodasi o‘laroq vujudga kelgan yodnomaligi bilan ajralib turar edi. Bundan tashqari G‘afur G‘ulom O‘zbekiston Fanlar akademiyasi akademigi sifatida “Navoiy va bizning davrimiz”, “Fol’klor – qimmatli manba” kabi fundamental tadqiqotlar, “Jaloliddin haqida drama”, “Muqimiy” singari ilmiy maqolalar ham yaratgan edi. Bundan ko‘rinadiki, shoir va yozuvchi bir vaqtda ilm va ayni ma’noda SHarq adabiyoti durdonalari tadqiqi bilan ham mashg‘ul bo‘lgan. Bu esa uni sharqona milliy an‘analar talqinini o‘z ijod olamiga singdirishga, yangicha ruhda tavsif etishiga olib kelgan.

O‘zbek adabiyoti taraqqiyotining yangi davri, ya’ni XX asrdagi jarayonida eng faol namoyondalaridan bo‘lgan atoqli ijodkor G‘afur G‘ulom shaxsiyati va ijodiyoti haqida gap ketganda yana bir hodisaga alohida urg‘u berib o‘tish lozimdir. Ma’lumki, G‘afur G‘ulom ham o‘z zamondoshlari singari badiiy ijod olamida Sharq va G‘arb adabiy an‘analariniboshidan kechirgan asr o‘zbek adabiyoti vakilli sanaladi. Gap shundaki, bu asr o‘zbek adabiyoti uchun adabiy shakl, vazn, uslub g‘arbona bo‘lib kelgan esa-da, asliy mazmun sharqonaligini ham muayyan ma’nolarda saqlab qolgan edi. Bu o‘rinda biz dramatik, epik va yangi lirik janr-shakllarning g‘arbona ko‘rinishlarini nazarda tutib fikr

yuritmoqdamizki, ular yangi davr o'zbek adabiyotida asr boshlaridan boshlab yangi bir milliy qiyofa kasb etib borayotgan edi.

O'zbek adabiyoti, xususan, she'riyatida mumtoz lirik janrlar tinimsiz davom etib kelgan bo'lsa-da, davr voqeligini aks ettirayotgan ayni turlardagi aksariyat asarlar yangi shakllarda namoyon bo'lmoqda edi. Bunda G'afur G'ulom dunyo va G'arb adabiyoti, badiiy tafakkur tarzi bilan chuqur tanish bo'lgan ijodkor sifatida o'zini ko'rsatadi, antik davrlardan XX asrlargacha bo'lgan adabiyot merosi an'alarini yaxshi anglaydi va hattoki, jahon adabiyoti durdonalari bo'lgan Shekspirning "Otello", "Qirol Lir" asarlarini o'zbek tiliga o'giradi. Bu kabi jahoniy tafakkur, ya'ni Sharq va G'arb adabiyoti, madaniyati bilimdoni bo'lib shakllanish G'afur G'ulom ijod poetikasi jozibadorligini ta'minlashga xizmat qiladi.

Masalan, G'afur G'ulomning "Vaqt", "Sen etim emassan", "Shum bola", "Netay" singari asarlarida o'sha Sharq va G'arb an'analari ko'zga tashlanadi. Bu asarlar bir tomondan ijodkorning milliy pozitsiyada turib jahoniy va abadiy mavzularni taftish etish tajribalari namunasi sifatida namoyon bo'ladi. Bu asarlarda ijodkor bashariyat muammosi bo'lib kelayotgan vaqt falsafasi, bolalik psixologiyasi kabi inson timsoli bilan bog'liq abadiy masalalarni qalamga oladi. Ayni damda bu kabi masalalar talqini har doim murojaat etiladigan va umrning tark etib bo'lmaydigan jamiki xalqlarga daxldordir. Ayniqsa, shoir qalamiga mansub "Men yahudiymen" she'ri g'oyaviy jihatlardan fashizm zulmi ifodasi bo'lsa-da, badiiyat va shoir idroki nuqtai nazaridan sharqona tarix, insoniyatning kechmishi hamda ma'naviy-ruhoniy qarashlari bilan bog'langanligi bilan kitobxonda chuqur hissiyot uyg'otadi. Unda keltirilgan qadim muqaddas kitoblar Tavrot, Injil mazmuni bilan vobasta satrlar yoki Bani Isroil qavmi tarixiga tegishli qarashlar shoir dunyoga qarashidagi cheklanmagan jihatlarni ochib beradi.

Xullas, XX asr o'zbek adabiyotining yorqin namoyondasi G'afur G'ulom uzoq sharqona an'alar ruhida yashab, yangi zamon adabiy shakllarida ijod qilgan adib sifatida milliy adabiyotimizda o'ziga xos o'ringa egadir.

Foydalanilgan adabiyotlar:

1. Sobir Mirvaliev. O'zbek adiblari. –T., "Fan" nashriyoti, –1993.
2. G'afur G'ulom. Tanlangan asarlar. –T., "Fan" nashriyoti, 2021.
3. Shukurov N. Bu olam sahnida... –T., "Fan" nashriyoti, 1983.

G'AFUR G'ULOMNING ALISHER NAVOIY IJODI HAQIDAGI QARASHLARI

**Murtazoev Bobonazar,
Termiz DU dotsenti**

Akademik G'afur G'ulomning Alisher Navoiy (1441–1501) hayoti va ijodiy yo'liga bag'ishlangan turfa maqolalari hozirda ham, bundan keyin ham o'z ahamiyatini zinhor yo'qotmaydi. G'afur G'ulomning "Xoki Musallo", "Taxti Safar", "Buyuk ustoz", "Navoiy va zamonamiz" [1, 94-126-betlar], "Sharq nazmi osmonining ikki porloq quyoshi" [2, 182-196-betlar] nomli maqolalarida Alisher Navoiy badiiy ijodi bilan mavlono Lutfiy (1366–1465), hazrat Abdurahmon Jomiy (1414–1492), shoh Husayn Boyqaro (1438–1507) va boshqa shoirlarning ham ijod

bisotiga nazar tashlab o'tiladi. "Xoki Musallo" [1, 94-99-betlar] maqolasida Hirot shahrining Sulton Shohrux Mirzo (1377–1477) va Sulton Husayn Boyqaro davrida ancha obod bo'lgani xususida so'z yuritiladi. Alalxusus Hirotning Muxtor tog'i etaklarida joylashgan Xiyobondagi Musallo (Namozgoh) maydonida qad ko'targan Gavharshodbeginning(1379–1457) masjidi jomesi, Husayn Boyqaroning madrasasi va xonaqohi, Alisher Navoiyning masjidi jomesi, "Doril-xuffoz" (Qorilar madrasasi), "Dorish-shifo" (Sog'ayish uyi), Ixlosiya madrasasi, Xalosiya xonaqosi shular jumlasidandir. SHu tariqa Hirotning Injil anhuri bo'ylab o'tgan Xiyobon ko'chasi shaharning chiroyiga chiroy qo'shgan bo'lsa, Alisher Navoiy bino qilgan masjid, xonaqo, madrasa, shifoxona, ko'prik, hammom, karvonsaroy, rasta, bozor, rabotlar shaharga yanada zebolik baxsh etgan.

G'afur G'ulom Hirot shahri tarixi haqida gapirar ekan, shaharning Husayn Boyqaro vafotidan keyingi hodisalariga ham e'tibor qaratadi, avvaliga Hirotni Shayboniyxon (1451–1510)ning bosib olishi, undan so'ng shoh Ismoil Safaviy (1486–1524) zabt etishiga urg'u beriladi. Bular Hirotni xarobaga aylantiradi, ulusni mushkul ahvolga giriftor qiladi, xalqni zabun aylaydi, qolaversa, shoh Ismoilning Abdurahmon Jomiyga nisbatan hurmatsizligini "Adabiyot tarixi hali ham unutmaydi" [1, 96-bet], deydi G'afur G'ulom. Bu o'rinda sunniy va shi'a mazhabi bog'liq voqealar girdobi tufayli shoh Ismoil negadir Jomiydan intiqom olish g'azabida yonadi. Bu borada shoh Ismoil qasam ichkan ekan: "Agar Hirot mening qo'limga kirsam, Jomiy tiriklay tutolsam, o'tda kuydiraman, o'lgan bo'lsa, go'rdan chiqarib, ustixonlarini kuydiraman" [1, 96-bet], –degan. Ismoil Safaviy Hirotga kiringach, birinchi galda Jomiy qabrini toptiradi, ammo qabrda jasad yo'q edi, shoh amriga ko'ra maqbaraga o't yoqiladi, u vayron etiladi. Voqea bunday bo'lgan ekan, shoh Ismoilning rejasidan Hirot ahli voqif bo'lib, ular Hirotga kelmasdan burun Jomiyning farzandi azizi Ziyovuddin Yusuf rahnamoligidagi muxlislar Jomiy va Jomiyning ustozini arjumandi Sa'didin Koshg'ariy suyaklari (so'ngaklari)ni qabrdan qazib olib, shahardan chetroq joyga pinxona ko'mib qo'yadilar.

"Taxti Safar" maqolasida ham tag'in Muxtor tog'i, undagi tepaliklar, Hiri rud va Injil nahrlari, buloqlari, irmoqlari tilga olib o'tiladi, bu er Navoiy davrida shoirlar mushoirasi, sozanda, xonanda va bozandalarning musobaqasi o'tkaziladigan maskan ekan. G'afur G'ulom 1964 yil kuz faslida Hirot bo'ladi, ayni "Taxti Safar"ni kezib tomosha qiladi va ushbu joyning tarixi bilan qiziqadi. Hikoya qilinishicha, "Taxti Safar" tepaligining etagi keng o'tloq joy bo'lib, "Mavzui govcharon" – (ho'kiz boqiladigan erlar) deyilar ekan. Ana shu yaylov – o'tloqda Safarvoy otli cho'pon qoramol boqar ekan, cho'ponning go'zallikda tengsiz bir etim qizi bor ekan, ana qizga Husayn Boyqaro sovchi qo'yadi. Shunda Safar podabon shohga bir shart qo'yadi: "Shu sahroga qizimga atab, ... kichkina bir saroy qursinlar. Keyin qizimni shariat bilan nikohlab xotinlikka olsinlar, kanizaklikka emas! –Mana so'zim" [1,103-bet]. Safar cho'pon shu o'rinda Alisher Navoiyning mashhur ruboiysini keltiradi:

G'urbatda g'arib shodmon bo'lmas emish,
El anga shafiqu mehribon bo'lmas emish.
Oltin qafas ichra gar qizil gul butsa,

Bulbulga tikandek oshiyon bo‘lmas emish.

G‘afur G‘ulom Hirotga borgan safari haqida so‘zlar ekan, “Gumbazi govcharon” (ho‘kiz boqar gumbazi) degan gumbazning o‘zi emas, surati saqlangan, xolos” [1,103-bet] deyдилar. G‘afur G‘ulom, shuningdek, cho‘pon Safarboy va uning etim qizining (onasi vafot etib ketgan) taqdiri nima bilan tugaganiga qiziqadi va “tarix indamaydi” [1,103-bet] deb yakun yasaydilar. Ammo shuncha davr o‘tishiga qaramay o‘sha joyning nomi hozir ham (1964-yil) Taxi Safar bo‘lib qolgan ekan.

G‘afur G‘ulomning “Buyuk ustoz” nomli maqolasi [1,104-109-betlar] kichik hajmga ega bo‘lib, Alisher Navoiyning 525-yilligi munosabati bilan yozilgan va xalqimizni ulug‘ shoirning tavallud ayyomi bilan muborakbod etadi.

Maqolada Alisher Navoiy ijodiga umumiy nazar tashlanib, o‘zbek navoiyshunos olimlarining qo‘lga kiritgan muvaffaqiyatlari qaydini topgan. Ayniqsa, ko‘zga ko‘ringan olim Porso Shamsievning “Xamsa” tarkibidagi dostonlarning, professor Hamid Sulaymonning to‘rt devondan iborat “Xazoyin ul-maoniy”, olima Suyima G‘anievaning “Majolis un-nafois” tazkirasining, adabiyotshunos Sh.Eshonxo‘jaevning “Lison ut-tayr” asarining ilmiy-tanqidiy matnini tayyorlab, nashr ishlarini amalga oshirganliklari qaydini topgan. G‘afur G‘ulom “Bu o‘rinda adabiyotshunos A.Hayitmetovning Navoiy ijodiy metodini o‘rganish sohasidagi tadqiqoti katta ahamiyatga ega ekanligini ta’kidlash zurur”ligini alohida eslatilishi muhim jihatlardan biridir [1, 109-bet].

Navbatdagi maqola “Navoiy va zamonamiz” haqida bo‘lib, hajman ancha katta, unda ko‘proq Alisher Navoiy va Husayn Boyqaroning o‘z davri hayot yo‘lida davlat tuzumi hamda uning xalq turmushida o‘rni masalalariga munosabat izhor etiladi. “Alisher Navoiy Temuriylar davlatining inqirozidan xavfsirar edi” [1,112-bet], Temuriy shahzodalarning o‘zaro kelishmovchiliklari, ular o‘rtasidagi turli-tuman iddaolar, ziddiyatli anglashilmovchiliklar tufayli mavjud davlatning parchalanib ketishi muqarrarligiga shaxsan Alisher Navoiyning ko‘zi etib bo‘lgan edi. G‘afur G‘ulomning bu xil rostakam xulosalari bor haqiqatning dangal aytishiga qaraganda, tarixni o‘ta chuqur anglashidan dalolat beradi. Akademik shoir Alisher Navoiy davri ijtimoiy muhitini, ichki va tashqi holatini, umumiy ahvolni chinakam anglagani bois dangal xulosalar yasamoqda. Shu bilan bir qatorda Alisher Navoiy asarlarida ilmga, umuman, ilm-ma’rifatga munosabat va ilmning iqboli tufayli “Jahonda baxtiyor bo‘lmoq, saodatmand bo‘lmoq, “har ikki dunyoda aziz va mukarram” bo‘lmoq ilm va ma’rifat bilangina muyassar bo‘lishi” [1,119-120-betlar] baralla ta’kidlanadi. Alisher Navoiy asarlaridagi xotin-qizlar obrazlari masalasiga ham diqqat qaratilib, G‘afur G‘ulom shu o‘rinda Nizomiy Ganjaviy (1141–1209)ning “Iskandarnoma” bilan Alisher Navoiyning “Farhod va SHirin” dostonlaridagi ayol shohlardan Nushoba va Mahinbonulardagi mushtarakliklar qiyoslab o‘tiladi.

G‘afur G‘ulomning “Sharq nazmi osmonining ikki porloq quyoshi” maqolasi Abdurahmon Jomiy va Alisher Navoiy ijodiga bag‘ishlangan bo‘lib, quyidagi jumla ila ibtido topadi: “Men – Sharqning shoiriman. Shu tufayli Sharq nazmining hamma klassiklari mening qarindoshlarim-aqrabolarim, desam xato bo‘lmaydi”[2,182-bet].

Darhaqiqat, Gʻafur Gʻulom bu boradagi fikrlarini davom ettirib, chaqaloqlik va beshikdalik davrlari haqida soʻz yuritib onasi Hofiz (1320–1389), Jomiy, Navoiy va Fuzuliy (1494–1556) gʻazallarini aytib uni allalaganligi voqealarini xotirlaydi. Abdurahmon Jomiy ijodiy bisoti haqida soʻzlayotgan Gʻafur Gʻulom bir holatni, yaʼni Jomiy sheʼriyatining sanʼatkorlik darajasi, toʻgʻrirogʻi, uning ulkan va oʻlmas merosini “...ilmiy tahlil qilishni oʻzimning kuch-qudratim doirasidan tashqari deb bilaman” [2, 183-bet] deya dangal tan oladi. Gʻafur Gʻulom buning isboti uchun Zahiriddin Muhammad Boburning insof yuzasidan aytgan eʼtirof soʻzlarini keltiradi: “mulloning janobi andin oliyroqdirkim, taʼrifqa ehtiyoji boʻlgʻay” ([2, 183-bet]).

Gʻafur Gʻulom ana shu maqola doirasida Lutfiy, Jomiy va Navoiyni voyaga etkazgan Hirot adabiy muhiti borasida soʻz yuritishga jazm etib, oʻz mulohazalarini bayon etadi. Hirotida bir vaqtning oʻzida ham forsiy tilli va ham inchunin turkiy tilli adabiyotning yonma-yon ravnaqi, ayniqsa turkiy ijodkorlarga nisbatan ehtirom va eʼtirofning kuchayishi taʼkidlanadi. Ayni zamonda hali hanuz ijodda fors tili etakchi maqomga egaligi ham uqtirib oʻtiladi, shu bois bu boradagi Alisher Navoiy “Devoni Foni”sining ahamiyati kabilar ham nazardan soqit etilmaydi. Shu kabi malikul kalom Lutfiy bilan Jomiy oʻrtasidagi atrofdagilarga namuna boʻluvchi ustoz va shogirdlik munosabatlari atroflicha yoritilishi diqqatga sazovor hodisadir. Lutfiy umrining oxirlarida forsiyda yozgan bir baytini davom ettirib, tugal gʻazal shakliga keltirib, Jomiy oʻz devoniga kiritishni vasiyat qiladi, darhaqiqat bu vasiyat oliy darajada bajo etiladi. Muhimi ushbu maʼlumotlar “Majolis un-nafois” tazkirasida oʻz aksini topgan, maqolada esa Jomiyning shu gʻazali matni toʻkis keltirilishi yanada maroqli hodisadir.

Alisher Navoiy “Xamsa” dostonlarining barchasida Jomiy madhida alohida boblar ajratib ustozning xamsanavislikdagi xizmatlarini eʼtirof etadi. Oʻz navbatida Jomiy ham oʻzining “Sabhat ul-abror”, “Yusuf va Zulayxo”, “Layli va Majnun” va boshqa dostonlarida Alisher Navoiy madhida maxsus soʻz yuritib, Navoiyga xos turli jihatlar tilga olib oʻtiladi. Ularda Navoiyning olijanob sifatleri toʻkis ardoqlanadi, uning maʼrifatparvarligi, insonparvarligi, vatanparvarligi, doʻstparvarligi, nozik fahmli, nuktaddonligi vasf etiladi. Alisher Navoiyning Abdurahmon Jomiyga bagʻishlangan “Xamsat ul-mutahayyirin” asarida har ikki ulugʻ siymolarning oʻzaro doʻstona munosabatlari chinakam tasvirini topgan. Asarda har ikki siymoga taalluqli oʻn ettita hikoyat, oʻttiz uchta maktublari (oʻn ettita maktub Jomiyniki, oʻn oltitasi Navoiyniki), shu kabi Navoiy ustoz Jomiyning oʻttiz ettita asarining nomlarini keltirib oʻtadi. Bu ikki ulugʻ ajdod ustozlarimizning doʻstligi, ijoddagi hamkorligi, bir-birlariga boʻlgan hurmatona munosabatlari kelgusi avlodlarga namuna va ibrat boʻlishini istab qolamiz.

Adabiyotlar:

1. Ғулом Ғ.Адабий-танқидий мақолалар. Т.1. Масъул муҳаррир филолог. фан. докт. С.Мамажонов. –Т., “Фан”, 1971. – 432 бет.
2. Ғулом Ғ.Адабий-танқидий мақолалар. Т.2. Масъул муҳаррир С.Мамажонов. – Т., “Фан”, 1973. – 232 бет.

GʻAFUR GʻULOM IJODIDA FOLKLOR MOTIVLARI

**Soatova Nodira, JDPU professori v.b.,
Turopova Parizod, JDPU dotsent v.b**

G‘afur G‘ulom badiiy ijod bilan ilmiy ijodni birgalikda amalga oshiradigan nodir zotlardan biri edi. Uning o‘zbek adabiyotshunosligi rivojiga qo‘shgan ulushi ulkandir (A.Qayumov).

XX asr o‘zbek adabiyotining yirik namoyandasi, O‘zbekiston xalq shoiri, akademik, hikoyanavis, felyetonchi, ocherknavis, publitsist va tarjimon G‘afur G‘ulom ijodiga O‘zbekistonning birinchi Prezidenti Islom Karimovning o‘z vaqtida “bugungi hayotimizda va kelajak avlodni o‘stirishda G‘afur G‘ulomning ijodi, albatta, beqiyos ahamiyatga ega. Shuning uchun mening tilagim shundayki, G‘afur G‘ulomning ijodini faqat O‘zbekistondagina emas, avvalom bor, har tomonlama butun dunyoga mashhur qilishimiz kerak” degan so‘zlari bugunda ham ijodkor adabiy merosini chuqur o‘rganish kerakligini naqadar muhimligini ko‘rsatib turibdi.

To‘g‘ri, XX asr adabiyotshunosligida G‘afur G‘ulomning ijodining turli qirralari, xususan uning she‘riy va nasriy asarlarining poetik tuzilishi, obrazlari xususida H.Yoqubov, S.Mamajonov, N.Shukurov, A.Akbarov, J.Tursunovlar [1;2;3;4;5;6;7] tomonidan chuqur o‘rganilib, ko‘plab asosli ilmiy fikrlar bildirilgan. Biz esa quyida G‘.G‘ulomning adabiy merosida xalq og‘zaki ijodi folklorni tutgan o‘rni haqida to‘xtalamiz. Avvalo, shu o‘rinda ijodkorning “Folklordan o‘rganaylik” maqolasini keltirish joiz. Ushbu maqolada qadim zamonlardan xalq ijodiyoti omma orasida keng yoyilgani, oddiy kishilarning undan ma‘naviy oziq olgani, folklor ijodkorlari va ijrochilari haqida so‘z boradi. Shuningdek, xonlar, amirlarning saroyida saqlangan maxsus baxshilar hamda ularning taqdiri haqida to‘xtalar ekan, G‘.G‘ulom aslida folklorning yaratuvchisi oddiy xalq ekanligini ta‘kidlaydi va uni xalq hayotidan ajratib o‘rganish aslo mumkin emasligini e‘tirof etadi.

G‘.G‘ulom maqolasining nihoyasida folklor va yozma adabiyot masalasiga to‘xtalar ekan, Alisher Navoiy, Gulxaniy, Hamza ijodining xalqchilik negizi haqidagi har bir qarashlarini ilmiy dalillar bilan asoslab beradi. Jumladan, Alisher Navoiy ijodida folklorni tutgan o‘rni haqida gapirar ekan: “Ulug‘ adib shoir va olim Alisher Navoiyning shoh asarlari bo‘lgan “Farhod va Shirin”, “Layli va Majnun”, “Sab‘ai sayyora”dagi yetti musofir hikoyalari xalq ijodidagi kuchli fantaziyaning aqlarni shoshirar darajadagi uydirmachilik san‘atining, kam-ko‘stsiz so‘z boyligining jamuljamida adabiyot san‘atining tojidagi gavhari serobiday porloq namunasidirki, Navoiy bu asarlari bilan xalqning ulug‘ ijodkori bo‘lib qoladi. U o‘z syujetlarini xalqdan olgani kabi, ikkinchi navbatda xalq uchun syujet beradi”. Ko‘rinib turibdiki, ijodkorlarni folklordan unumli foydalanishini maqsadga muvofiq o‘ylagan G‘.G‘ulom ijodkorlar oldiga shunday ulug‘ bir vazifani qo‘yadi: “Yozma adabiyotimizning kadrlari folklordan o‘rganish bilan birgalikda, ikkinchi navbatda og‘zaki adabiyotning bundan so‘nggi o‘lishiga yo‘l-yo‘riq ko‘rsatishlari kerak. Og‘zaki adabiyotni yangi syujetlar bilan boyitishda, o‘sha syujetni ifoda qilar ekan, har bir satrgacha bizning dunyoqarashimiz bilan sug‘orilganligini ta‘min qilishda yozma adabiyot kadrlarimiz folklorchilarga yordamda bo‘lishlari kerak”. G‘.G‘ulom ijodini kuzatganimizda, uni o‘zi ham shu

vazifaga to'liq rioya qilgani, natijada xalq ijodi an'analaridan, xususan xalq maqollaridan foydalanish bilan birga o'zbek she'riyatida original tasviriy usullarni kashf qilganligini shohidi bo'lamiz:

Ertasini o'ylagan-indin bo'lmas pushaymon,
Fursat kasal emaski o'tganiga suyunsang [8;76]/

Xuddi shunday holatni "Ko'kan" poemasida ham kuzatish mumkin:

"Yakka otning yo'rg'asidan chiqarmi chang...
Oziqlik ot horimaydi...
Sayil ham sayil, sargardon ham...
Katta xirmon qizillansa, chiqmas chori..."[8] kabi.

Shoir she'riyatida folklorga xos iboralar, metafora va istioralar ko'plab uchraydi. Ayniqsa, uning bolalar uchun ijod qilgan shye'rlarida bu xususiyat juda ustun. U "Turg'un va o'rdak" she'rida yalqovlik va erinchoqlikning zararini xalqona tafakkur yordamida ochib byeradi.

Shuningdek, G'afur G'ulom o'zining hikoyalarida xalq ijodiyotiga xos tasvir usullari, obraz yaratish xususiyatlari, folklorga xos motivlardan foydalanish masalalariga jiddiy e'tibor qaratadi. Hikoyalarida ko'proq xalq ijodiga xos obrazlarni tanlab oladi. Ana shunday hikoyalardan bittasi "Mulla Nasriddin Afandi va shayton Alayxullaqna"dir. Ushbu hikoyada adib voqeani ham afsonalar asosida tanlaydi. Ushbu afsonani real hayotga yaqinlashtirib tasvirlaydi. Shu bois hikoya shakl va mazmun jihatidan afsona va latifalarga juda yaqin keladi. Ayniqsa unda qo'llanilgan badiiy tasvir vositalari o'zining originalligi bilan o'quvchi e'tiborini tezda o'ziga jalb etadi. Xuddi shuningdek, adibning "Hasan Kayfiy" hikoyasi ertak usulida yozilgan bo'lib, muqaddimasi ertaklardagi an'anaviy boshlanmalar bilan to'la mos keladi. Uning qahramonlari ham ertaklardagi singari o'ziga xos obrazlardir.

Binobarin, buyuk adib xalq og'zaki ijodi va mumtoz adabiyotni mukammal bilgan ijodkordir. U har bir asarida xalqqa xos bo'lgan iboralar va o'z navbatida turli motivlardan mohirlik bilan foydalanadi, ularga ijodiy ishlov beradi. Mumtoz adabiyotdagi motivlarni qayta ishlab, sayqallashtiradi. Natijada asarning badiiy-estetik saviyasi yuksak darajaga chiqib, o'qimishlilik ortadi. Bu holat adib asarlarining umrboqiyiligini ta'minlaydi.

Adabiyotlar ro'yxati:

- 1.Akbarov A. Shoirning hayoti. –T.: Adabiyot va san'at. 1978.
- 2.Yoqubov H.G'afur G'ulom (hayoti va ijodi) T.: Adabiyot va san'at 1959.
- 3.Mamajonov S. Shoir va zamonaviylik. –T.: 1963.
- 4.Mamajonov S. G'afur G'ulom prozasi. –T.:1966.
- 5.Mamajonov S.Uslub jilolari. –T.: 1972.
- 6.Shukurov N.G'.G'ulomning lirik poeziyasidagi mahorati. –T.: 1966.
- 7.Tursunov J. Shum bola bilan yangi uchrashuv // "Sharq yulduzi" jurnali, 1963.
- 8.G'afur G'ulom. Asarlar.-T.: Adabiyot va san'at", 1972.

G'AFUR G'ULOM VA ABDULLA ORIPOV SHE'RIYATI

Davronova Maxfuza Isroilovna

SamDU dotsenti, filologiya fanlari doktori
Kurbanova Charros Botir qizi
SamDU tadqiqotchisi

XX asr o'zbek she'riyatini yangi bosqichga olib chiqqan ijodkorlardan biri G'afur G'ulomdir. U yaratgan she'riyat keyingi davr adabiyoti uchun shtamp vazifasini o'tadi. Ayniqsa, she'riyatidagi falsafiylik yuqori darajaga ko'tarildiki, natijada o'zbek she'riyatiga kirib kelayotgan ko'pgina shoirlar uchun ilhom manbaiga ham aylandi. G'afur G'ulom falsafiy she'riyatining Abdulla Oripov ijodidagi o'rni xususida ham xuddi shu kabi fikrlarni ta'kidlash mumkin.

G'afur G'ulom barcha tuyg'ulardan ustunroq tuyg'uni Vatan sarhadlari bilan belgilagan bo'lsa, shu kabi belgi Abdulla Oripovda ham ko'zga tashlanadi. U ustoz G'afur G'ulom (To'qqan Vatan ekan – jahonda go'zal!) singari Vatan uningchun yagona xilqat (Siylangan joyida azizdir inson) ekanligini baralla kuylay boshladi. Shoirning badiiy tafakkuri mazmunga chuqur yondashadi. U obrazlarni tanlashida ham shu xususiyat aniq namoyon bo'ladi. Shoirning "Tush" she'ri fikrimizga misol:

Yaxshi tushlar ko'rsin har kim ham, biroq
Bu bilan ham bitmas dunyo ishlari.
Yaxshi tush ko'rganlar g'am bilmay mutloq,
Baxtli yashar edi ehtimol bari. [2; 20]

Tush – Abdulla Oripov uchun bir vosita. U ta'kid etgan dunyo talotumlari-yu, o'zgarishlari aslida real voqelik bilan bog'liq. Real voqelikdagi jarayon akslantirilgan, xolos. Abdulla Oripov uslubidagi tardu aks san'ati dunyo, hayot tushunchalarni ifoda etishda qo'l keladi. Shu bois bu badiiy san'atdan unumli foydalanib, uslubining asosiy pozitsiyasiga olib chiqadi. To'g'ri, G'afur G'ulom ijodida bu san'at uslub bilan belgilanmaydi. Biroq G'afur G'ulom ham o'z falsafiy fikrlarini berish maqsadida mazkur badiiy san'atni keng doirada qo'llashga erishgan. "Agar Abdulla Oripov ijodidagi falsafiy yo'nalishni kuzatadigan bo'lsak, bu yo'nalish uning ijodida G'afur G'ulom ilhomi bilan to'yingan holda paydo bo'lgani ayon ko'rinadi. Agar shoirning tug'ilish va shakllanish jarayonida Hamid Olimjonga xos lirizm yetakchilik qilgan bo'lsa, she'riyatining katta xiyobonga chiqishi bilan g'ofurona fazilatlar yal-yal tovlana boshladi. Va bora-bora shu fazilatlar XX asr o'zbek she'riyatining cho'qqilaridan biri o'laroq maydonga kelgan Abdulla Oripovning ustuvor ijodiy tug'iga aylandi.

Shoirning "Yupanch" she'ri bizga ustoz G'afur G'ulomning "Sen etim emassan" she'rini yodga soladi. Biroq Abdulla Oripov lirik qahramoni bugungi zamondosh. Shu bois o'z qarashlarini zamon miqyosidan kelib chiqqan holda ifoda etadi. Yer deb nom olgan sayyoraning kattagina qismida insonlar bir parcha non uchun hatto o'z qonini ham berishga tayyor. Shu bois shoir chiqargan haqli hukmi bugungi kunning bir ko'rinishi, xolos.

G'afur G'ulom o'zining falsafiy qarashlarida barcha davrlarga, zamonlarga tegishli fikrlarni berib, shu fikrlar asosida ma'naviy xulosalar chiqara olgan. Biz Abdulla Oripovning falsafiy she'riyati ham shu xususiyatga egadir. Shoir o'z falsafiy qarashlarini insoniyatning aqli, tafakkuri bilan bog'laydi. Inson aqli, tafakkurini faqat yaxshilik yo'lidagi xizmatlar bilan bog'lashni har bir satrida

takrorlaydi. Shu bois ham shoir she'riyati uning ziynati va tiynati bo'lmish tafakkur sarhadlarida mujassam etiladi. Biroq bu tafakkur tasviri oddiy emas. Uni qarshilantirish orqali zamon va hayot kamchilik va illatlariga bog'laydi. Shu asosda uning falsafiy she'riyati yaraladi.

Umuman, A.Oripov falsafiy she'riyatida inson shaxsiyatida zuhur topgan xislat va illat ko'rinishlari muxtasar ifodasini topgan. "Abdulla Oripov kichik bir hayotiy detaldan, olis o'tmish xotiralaridan falsafiy mazmun kasb etuvchi badiiy umumlashmalar chiqaradi" [2,42]. Abdulla Oripovning teran falsafiy tafakkuri "Yuzma-yuz" to'plamidan boshlangan. Bu haqda M.Qo'shjonov ham fikr yuritib, bu to'plamda joy olgan she'rlarini eng mukammal va poetik jihatdan mahorat darajasida yozilganligini qayd etib o'tadi [3,259].

Munaqqid shoir she'riyatidagi dinamikaga to'xtaladi. Bu dinamikani o'ziga xos (keskin rivojdagi) dinamika deb ataydi. Adabiyotshunos shoir dinamikasini ta'riflar ekan, kichik tuyg'ulardan ulug' hislarga ulanadigan, turg'un bayondan jo'shib, dalilli mushohadalarga tutashadigan, ma'yus fikr izhor qilinadigan yangroq ovoz bilan chaqiriqlarga ko'tarilgan dinamika sifatida e'tirof etadi. Shoirning "Ogohlik" she'rida xuddi shunday dinamika kuzatiladi:

Kimdir boshqalarga tilar omonlik,
Kimdir sog'inadi faqat yomonlik.
Bir qarasang o'xshash rang-u ro'ylari,
Biroq tamom boshqa fikr-u o'ylari.
Sirtdagisin ko'rib turibsan har on,
Ichdagi olangdan ogoh bo'l, inson! [1, 35]

Shoir xalqning azaliy qarashlari asosida misralarini bitar ekan siyrat va surat tushunchalari orqali uning mazmun-mohiyatini yanada oydinlashtiradi. Siyrat va surat tushunchalari omuxtalashgan insonlardan nima kutish mumkinligi aniq. Biroq siyrati boshqa-yu, surati boshqa insonlar qachon va qaysi vaqtda zarba berishi mumkinligi aniq emas. Shu bois shoir mana shu inson xilqatlarining tomonlarini birlashish va INSON tushunchasiga monand tarzda ish yuritishga chorlaydi. She'ning ilk misralarini o'qish zamirida shoir bir kichik tuyg'uni olib chiqayotgandek taassurot uyg'otadi.

Biroq she'r xulosasida bu fikr xitobga aylanganligi bois fikr almashinadi. His-tuyg'ular kattalashadi. She'r xulosasi kishini o'yg'a cho'mdirib, o'zi uchun hukm chiqarishga majbur etishi ham yoki she'ning ritmik dinamikasi ham xuddi xotima o'zingizdadir tushunchasini beradi. Lirik qahramon ko'nglidagi ma'yuslik va mahzunlik she'rxon qalbiga ko'chadi. Zero notqlik singari jaranglagan yuqoridagi misradagi murojaat bizni shunday fikrlashga majbur etadi. Bu kabi xususiyat G'afur G'ulomning uslubi bilan belgilanadi.

Ibrohim G'afurov yozganidek G'afur G'ulom barcha she'rlarini notiq bo'lib yozadi. Albatta, bu juda yuksak darajadagi shoirona notqlikdir (ta'kid o'zimizniki). Adabiyotshunos ta'kidlashicha, notqlikning muhim bir belgisi va xususiyat bu – murojaat. G'afur G'ulom o'z she'rlarida va dostonlarida va hatto prozasida ham doim kimgadir murojaat qiladi. Va doim kimlar bilandir – o'z o'quvchisi, keng omma bilan muloqot yuritadi. Abdulla Oripov ham ana shu

xususiyatni o'z uslubiga singdirib yuboradi. U ham Sharqning donishmand farzandidek murojaat etadi.

“Abdulla Oripovning xoh miniatyur, xoh katta she'rlarida bo'lsin, bo'laklararo uzviylik hech buzilmagan yaxlitlik, bir butunlik, sistema bor. Shoir empirik emas, ya'ni barcha ko'rganlarini yig'maydi, naturalistik tasvirlash yo'lidan bormaydi. Bil'aks, hayot haqiqatlari oldida beli sinib qoladigan falsafalar ham to'qimaydi. U kundalik hayotning har bir lahzasi, har bir hodisasida har ne mutaffakirlar to'qib chiqarolmaydigan katta falsafalar yotganini shoyon ko'radi. Iste'dod va me'yor bilan o'z ko'rgan-bilgan, his etganlaridan eng yorqinlarinigina tanlab, nuktadonlik bilan badiiyat ipiga marjondek tizadi. Yoki boshqacha aytsak, turmush changlariga ko'milib yotgan gavharlarni topib, tozalab, ming bir jilolarini jilvalantirib bizga taqdim etadi. Bu usul esa o'z-o'zidan fikrda portlash, zarbni ta'minlash barobarida o'zgalarda tabiiy bir hayrat, munosabat, o'zi va atrofiga tanqidiy nazar ruhini uyg'otadi, tuyg'u va hislarni qo'zg'aydi, fikrlashga undaydi” [4,6].

Sharqda o'zini ota deb bilish, ota maqomida turish, hayotga otalardek munosabat azal-azaldan donishmandlikning belgisi, nishonasi deb qaraladi. Sharq va G'afur G'ulom bu – bepayon mavzu. G'afur G'ulom yurak-yurakdan o'zini Sharq shoiri deb atashlarini, Sharq shoiri kabi tanishlarini sevar va orzulardi... G'afur G'ulom Sharq shoiri bo'lib yozganda ulkan tarixiy qamrovga intiladi. Uning ijodkor tasavvuri behad keng quloch yozadi. O'zini ko'hna Sharqning farzandiday tutadi va serilhom, serzavq shoir butun turfa Sharq o'lkalari manzaralari, o'ziga xosliklarini ko'z o'ngida tutadi va o'ta hayajonli timsollarda gavdalantiradi” [5, 362-363].

G'afur G'ulom Sharq mumtoz adabiyotini qay darajada mukammal o'rgangan bo'lsa, Abdulla Oripov ham alohida mehr bilan o'rganadi. Chunki Sharq mumtoz adabiyoti har bir ijodkor uchun ijod maktabidir. Abdulla Oripov har bir misrasida bashariyatning turli rakursleri tasvir etadi. Shu bois she'riyatining mazmun-mohiyati siyrat tushunchasida tajassum topadi:

Yuksaklarda charx o'rib aylan,
Ruhing mangu tursin yorishib,
O'lganda ham vujuding bilan
Ketmagaysan yerga qorishib [1, 119].

Bashariy qadriyatlar xususida so'z yuritar ekan, shoir juda yuksaklikni ko'zlaydi. Unda mayda gap-so'z, ig'voga joy qoldirmaydi. Chunki inson ko'ngli ham ana shu kabi kengdir. Adabiyotshunos N.Rahimjonov ta'biri bilan aytganda, A.Oripov lirik qahramoni bugungi voqelik xossalarini, turmushdagi noqusliklarni estetik baholar ekan, ularga bashariy qadriyatlar nuqtai nazaridan yondashadi. Shoir o'z ijodi orqali ko'ngil sofliğini barcha bashariyatga taqdim etishga shoshiladi. U sof samo singari ko'ngil sofliğini saqlab qolishga chorlaydi. Shu bois ham she'rning sarlavhasi “Chorlash” deb nomlangandir.

Xullas, G'afur G'ulom ijodi Abdulla Oripov uchun maktab vazifasini o'tadi. Shoir falsafiy mushohada etish yo'llarini aynan G'afur G'ulom misralaridan o'rgandi. Sharqning donishmanddona qarashlarini G'afur G'ulom she'riyati orqali singirdi. Natijada, Abdulla Oripov uslubi G'afur G'ulom uslubiga hamohang

tarzda yuzaga chiqdi. Shoir o'zining falsafiy mushohadalarida bashariyatga ko'proq murojaat etdi. Natijada Inson deb atalmish xilqatning siyrat va surat tushunchalari ijodining asosiy kredosiga aylandi.

Foydalanilgan adabiyotlar:

- 1.Karimov N. Muattar shamollar / Milliy tiklanish gazetasi, 2021. 20-mart.
- 2.Abdulla Oripov. Shoir yuragi.—Toshkent: Ma'naviyat, 2003.
- 3.Qo'shjonov M. Tanlangan asarlar. —Toshkent: Sharq, 2018.
- 4.G'aniyev I., Afokova N. Ozod ruh falsafasi. – Toshkent: Fan, 2007.
- 5.G'afurov I. Tanlangan asarlar. —Toshkent: Sharq, 2017.

G'AFUR G'ULOM IJODIYOTINING PSIXOBIOGRAFIK TALQINI

Matyoqubova Tozagul Rajapovna
Alisher Navoiy nomidagi ToshDO'TAU
dotsenti, filologiya fanlari nomzodi

G'afur G'ulom ijodiyoti poetikasini belgilashda adib shaxsiyatiga xos jihatlarning o'rnini tayin etish, muammo mohiyatiga kompleks yondashish biografik metoddan foydalanishni taqozo etadi. Chunki har bir yozuvchi ijodi o'z tarjimai holi bilan ba'zan ko'rinmas, ayrim hollarda ochiq-oshkor rishtalar orqali tutashgan bo'ladi.

Muayyan so'z san'atkori ijodini talqin etishda uning "individual taqdiri o'ziga xos kalit vazifasini o'taydi" [1,56-bet]. Adabiyotshunos Islomjon Yakubov ta'kidlaganiday, "...biografik metod yozuvchi va badiiy asar juftligiga asoslanadi. Bu metodda muayyan adib shaxsi va qiziqishlari, ijtimoiy-adabiy muhiti, tadqiq qilinayotgan asar yozilgan paytdagi ruhiy-psixologik holati, ijodiga turtki bergan omillar, badiiy matnning yaralish onlari – yozuvchi hayot va ijod tarziga daxldor tarixiy-individual masalalar hamda ijod laboratoriyasiga oid barcha vaziyat-hollar badiiy ijod mohiyatini belgilovchi faktorlar sanaladi" [11,145-bet]. Darhaqiqat, chinakam badiiy asar ijodkor shaxs intellekti va san'at hodisasining tabiati bilan bog'liqlikda yuzaga keladi.

Adabiyotshunoslikda biografik metod tamoyillari ishlab chiqilishi va bu metodning badiiy asarlarga tadbiq etilishi masalasini mutaxassislar fransuz munaqqidi va shoiri Sharl Ogyusten Sent-Byov (1804-1869) nomi bilan bog'lashadi. Adabiyotshunos B.Karimov, to'g'ri ta'kidlaganidek: "Yozuvchi psixobiografiyasi qaysidir ma'noda uning badiiy asarlaridagi voqea-hodisalar bayoni, yaratgan obrazlari tizimida o'z ifodasini topadi. Bunday individuallik san'at asarining originalligini, o'ziga xos tabiatini namoyon qiladi" [5,20-bet].

G'afur G'ulom qalamiga mansub asarlarni tarixiy-genetik, madaniy-tarixiy, psixologik, sotsiologik, biografik metodlar asosida tadqiq etish ularni san'at hodisasi sifatida o'rganish imkonini beradi. Ijodkor shaxsi shakllanishida oila, ijtimoiy muhit, davr muhim rol o'ynagani bilan bir qatorda, shoir va nosir siyratini uning badiiy asarlari bag'ridan – ruhiy biografiyasidan izlash, ijodining ma'naviy-ruhiy jihatlarini o'rganishga yo'l ochadi.

Zotan, G'afur G'ulom yaratgan badiiy obrazlar uning odam va olam bilan aloqasi ta'sirida paydo bo'lgan fikr-kechinmalarini ifoda etadi. Ularda G'afur

Gʻulom maʼrifatiga xos belgilar: shoirni qiynagan dardlar, oʻy-hislar aks etgan. Bu hol kontekstual tahlil asnosida ijodkor shaxsi, dunyoqarashi, insoniy qiyofasi masalasiga jiddiy eʼtibor qaratish, “kechinma”ni markaziy oʻringa qoʻyish va shoir asarlarini uning hayot yoʻli, koʻp qirrali biografiyasi, davrining ijtimoiy, madaniy, maʼrifiy shart-sharoitlari bilan chambarchas bogʻlab hayotsevar shoir hamda ulugʻvor inson sifatida oʻrganishga yordam beradi.

Shoirga daxldor boʻlgan manbaalarni tadqiqotga faol jalb etish, uning hayot yoʻlini oʻz bitiklari negizida yoritishda quyidagilar nazarda tutiladi:

birinchidan, shoir ijodini maʼrifiy-biografik kontekstda oʻrganishni, **ikkinchi jihatdan**, Gʻafur Gʻulom yashab ijod qilgan ijtimoiy-adabiy muhit fojialari, yakkahokim mafkura siyosati zalvarini tarixiy-ijtimoiy aspektida olib qarashni taqozo qiladi.

Umuman, biografik metod shaxs qismatiga real qarashni, muammoni sabab-oqibat munosabatlari negizida kuzatishni taqozo etadi. Chunki badiiy matn – shoir va adibning koʻngil suvrati. Unda ijodiy niyat, estetik ideal va poetik mahorat aks etadi. Shunday ekan, Gʻafur Gʻulom asarlarini kontekstual tahlil qilishda uning shaxsiyati, iqtidor va salohiyatiga xos tabiiylik va biografiyasini oʻzi yashab ijod qilgan davr ijtimoiy-madaniy, maʼrifiy-adabiy muhitidan ajratmaslik [13,74-75-betlar] quyidagi masalalarga oydinlik kiritish imkonini beradi:

Shoir poetik tafakkuri shakllanishi va yuksalishiga taʼsir etgan genetik va ijtimoiy omillarni aniqlash;

ijodkor shaxsini inkishof etish orqali asarlariga muallif yuklagan mazmunni oydinlashtirish;

dunyoqarashi va ruhiyat-holatiga kirib borib, asarlarida ifodasini topgan davr muammolariga munosabatini oydinlashtirish;

ayrim asarlari yaratilishiga turtki boʻlgan omillar, obrazlar va syujet chiziqlarining real ildizlari, unda ifodalangan gʻoyalar mohiyatini oʻrganish;

Gʻafur Gʻulom hayotiga oid dalillarga munosabat bildirish, biografik maʼlumotlarni toʻliqlashtirish va poetikasining yangi mazmun qiralarini ochish.

Gʻafur Gʻulom Toshkentda tugʻilib oʻsdi. SHu azim shaharda tahsil oldi, yashadi va ijod qildi. Qomusiy allomalar Tabariy, Istaxriy, Juvayniy, Firdavsiy, Beruniy, Mahmud Qoshgʻariy, Bobur, Mahmud ibn Vali keltirgan maʼlumotlarga koʻra shahar tarixi ikki ming yillikdan ortiq moziyga tutash boʻlib, Xoja Ahror Valiy, Shayx Umar Bogʻistoniy, Abu Bakr Shoshiy, Abu Sulaymon Banokatiy, Hofiz Koʻhakiy kabi ulugʻ allomalar ham shu maskanda yashab, ijod etishgan. SHu bois Toshkentning har qarich eri, adir hamda irmoqlari Gʻafur Gʻulom uchun gʻoyatda aziz va qadrdon edi. Ijodkorning ayrim sheʼru hikoyalarida bu shaharning soʻlim tabiat manzaralariga xos goʻzallik muhabbat va samimiyat bilan ifoda etilgan. Shoir mehnatkash va sahovatli Toshkent dehqonlarni hamisha tiniq va yorqin ranglarda koʻradi: “Toshkent paxtakorin ochiq chehrasi. Salor suvlaridek tiniq, yarqiroq” [15, 214].

Anglashiladiki, Tyanshan togʻlari etaklari va Chirchiq daryosi vodiysida joylashgan bu azim shahar boʻylab oʻtadigan Boʻzsuv, Salor, Anhor, Qorasuv, Oqqoʻrgʻon, Boʻrijar, Oqtepa, Qoraqamish kabi koʻplab kanallar shaharning mikroiqlimi kontinentalligini taʼminlash barobarida, shoir uchun ilhom manbai

ham bo'lgan. Ona tabiatga yaqinlik, undan o'xshatish va qiyoslar olib inson obrazini ochishda shoirga juda qo'l kelgan. G'afur G'ulom bir o'rinda qish mavsumida ham shahar osmonida firuzarang tiniqlik va shaffoflikni ko'rib mislsiz hayrat tuyadi. "Ko'm-ko'k tiniq osmon Dekabr oyida ham, Har nafasi bir jahon Toshkent munchalar ko'rkam! [15, 285-bet].

Demak, go'zallikni qadrlash, yurt jamolidan ko'rkamlik axtarish shoir tabiatiga xos muhim fazilatlar bo'lib, ularning shakllanishi va kamol topishida u tug'ilib o'sgan azim yurtning shu mo'jaz go'shasi, tarixi, tabiati va bag'rikeng, fidoyi odamlariga bo'lgan mehru ixlos muhim rol o'ynagan.

G'afur G'ulomning ota-bobolari nasl-nasabi toza, adabiyot va san'atga ixlosmand zotlar edi. Bu hol: "*So'zi ishiga o'xshash, qalbi fe'liga monand*" [15, 248-bet] bo'lajak shoir iste'dodi ro'yobga chiqishida rag'batlantiruvchi ma'naviy-ruhiy kuch vazifasini o'tagan.

G'ulomda adabiyot va san'atga bo'lgan mehr juda erta uyg'ongan. Uning otasi "Mirza" va "G'olib" taxalluslari bilan, amakisi Mirza Abdulla esa "Mirza" taxallusi bilan she'rlar bitishgan. Amakisining "Bayozi Mirza" kitobi (1913) "G'ulomiya" bosmaxonasida chop etilgan. Bo'lajak shoir xonadonida Muqimiy, Toshxo'ja Asiriy, Furqat, Muhyi, Xislat, Shomurod kotib singari o'z zamonasining shoiru ziyolilari bot-bot mehmon bo'lishgan [14, 13-bet]. Shoirning onasi Toshbibi Yusuf qizi xalq og'zaki ijodi termalari vaznida uncha-muncha she'rlar aytib yuruvchi havaskor ijodkorlardan biri bo'lgan. Shoirning xotirlashicha, otasi o'limiga bag'ishlab Toshbibi aya to'qigan marsiya anchagina ta'sirchan chiqqan. Shu ma'noda onasining ham durustgina ta'bi nazmi bo'lganligini taxmin qilish mumkin. G'afur G'ulom 1912-yilda, ya'ni 9 yoshida Navoiy, Hofiz, Sa'diylarni bemalol o'qishi, chiroyli husnixat sohibi bo'lishi birinchidan, uning tezfaahmligini, ikkinchidan savodli va xatli bo'lishida ota-onasining kuchli ta'sirini ham ko'rsatadi.

G'afur G'ulomning dehqonu bog'bon, chorvadoru hunarmand, ishchiyu ziyolilarni behad sevib ardoqlashida ham qaysidir ma'noda o'ziga xos genetik belgilar mavjud. Shoir insoniy tabiatiga xos: oddiylik, samimiyat, hazilkashlik, hozirjavoblik, bag'rikenglik, bolajonilik, mehmondo'stlik kabi o'nlab go'zal fazilatlar shahriston hunarmandlari qalbiga ham birday yaqin edi.

Darhaqiqat, G'afur G'ulom do'st-birodarlari orasida shoir, adib, dramaturg va tarjimonlardan tashqari, qalbiga yaqin bo'lgan talay boshqa soha vakillari ham majud edi. Jumladan: Mahmudxon Fayzullaxonov (aptekachi), Jo'ra G'oyibov va Zuhurjon (polvon), Iskandar G'ulomov (grafik rassom), Usta Mo'min (rassom), Abdulla Hayitov (sangtarosh), Ahmad Shorahmedov (jurnalist), Yunus Rajabiy (bastakor), Jo'raxon Sultonov va Ortiqxo'ja Imomxo'jaev (hofiz), Abror Hidoyatov va Etim Bobojonov (aktyor), To'lagan (nosfurush), Ahmadjon va Inoyat (zargar), Yo'ldosh (aravakash), To'lagan (kavishdo'z), Mustafo (shofyor), Ergash (bog'bon) va hokazo.

Ko'rinadiki, G'afur G'ulom uchun odamning hunarmand, to'quvchi, temirchi, ko'nchi, kosib, kulol, dehqon, bog'bon, cho'pon singari kasbi-kori, ijtimoiy holati kabi tashqi belgilar emas, balki oddiy, sodda, samimiy, dilkash, bag'rikeng inson ekani muhim sanalgan. Yuqorida ta'kidlanganiday, shoir kamol

topishida oilaviy-genetik, milliy-estetik, ma'rifiy-madaniy va ijtimoiy omillar muhim o'rin tutadi.

G'afur G'ulom qo'liga qalam olarkan, hamisha o'z yurtining qadim tarixi, ardoqli eli ma'naviy-ruhiy qudrati, fazlu kamoli va go'zal jamoli haqida olam ahliga xushxabar etkazishni tilagan. Shoir buni yaxshi anglagani uchun istiqbolga umid nazari bilan boqib: "Men shoir kishiman. Qalbim qay anordek istiqbol umidlari bilan tiqin. Umid qilaman, ishonaman, 2060-yilda ham, 2517-yilda ham mening she'rlarimni avlodlarim o'qiydi. Garchand mening yozganlarim kelajak avlod nazarida ifoda texnikasi, mazmun soddaligi bilan dag'al ko'rinib tursa ham o'qiydi" [17, 274-bet], deb yozgan edi. G'afur G'ulom 1960-yil kuzida aytgan bu fikrda nainki yuz yil, balki besh yarim asrdan ortiqroq davr nazarda tutilgan. Ta'kidlanayotganiday, bu shoirona umidgina emas, balki qat'iy ishonch ham edi. Qiyoslash noo'rin bo'lsa ham, ijod psixologiyasi bilan bog'liq bo'lgani uchun Navoiy shaxsiyatiga daxldor bir muhim holatni eslash o'rinlidir. Jumladan, hazrat Navoiy yigirma uch yoshlik paytida ustoz Sayyid Hasan Ardasherga yozgan maktubida o'zining buyuk ishlarga qodir, "Xamsa" yozishga haqli ekanini bildirib, qat'iy ishonch va jur'at bilan: "Falak ko'rmadi men kibi nodire", degan satrlarni bitgan edi. Darhaqiqat, ulug' so'z san'atkorlarining o'ziga bo'lgan ishonchi hamisha atrofida qilarni hayratga solib kelgan.

Demak, G'afur G'ulom ham zinhor o'ziga katta baho berayotgani yo'q. Aksincha, shoir bizga o'z qalbini ochmoqda. U istiqbol adabiyoti ifoda uslubi va mazmun mukammalligi jihatidan tobora sayqallashib borishiga nekin ishonch bilan qaragan. Shunday ekan, o'z-o'zini olis kelajak o'quvchisining tiyran nigohi, jahoniy miqyoslarga yuksalishi aniq tasavvur etilgan adabiyoti tosh-tarozusi bilan tanqidiy baholay olgan. Ayni paytda, bizga "*anordek istiqbol umidlari bilan tiqin*" qalbini anglatmoqchi bo'lgan. Binobarin, Uvaysiy aytganiday, anor donalari yuzini to'sgan nafis pardani ochib, ular holidan xabar olish – G'afur G'ulom qalb biografiyasini kashf etmoqdir.

G'.G'ulomning bolaligi birinchi jahon urushi va 1916-yil dolg'ali voqealari davrida, qo'l uchi bilan kun ko'radigan oilada o'tdi. Otasining ayni qirchillama qirq to'rt, onasining esa o'ttiz to'qqiz yoshida tutday to'kilay deb turgan hovlida vafot etgani, besh etim iqtisodiy ahvolidan darak beradi. Adabiyotshunos olim A.Rasulov "Tolereantlik va ruhiy poklanish" nomli maqolasida: "G'afur G'ulom she'riyatida: "Voy, bechora jonim!" degan nido hamisha jaranglab turadi... G'.G'ulom she'riyatida mantiq uzra mantiq etakchilik qiladi. Lirik qahramon etim o'sganini, bir mehribon qo'lga, nondek aziz so'zga intiq yashaganini eslaydi. Mana, uning o'zi urushda etim qolgan bola tepasida mijja qoqmay tunni tongga ulaydi, hayolida turli voqealar jonlanadi. "Sen etim emassan" she'rining xotimasini hayot qo'shig'i, istiqbolga havas deyish mumkin" [8,158-bet],-deb yozadi. Darhaqiqat, "yozish-azoblarni qayta tuyish, qalbni qayta qiynash, dardni yangilash"dir. Binobarin, shoir ma'naviy-ruhiy tasavvurlari uning mudom izlanishdagi fikrini to'ldirib borgan. Ijodiy xayolining faolligi o'tmish xotiralarini tiklash va zamonasi bilan qiyoslash imkonini bergan. G'afur G'ulomning analitik-sintetik xususiyat kasb etgan ijodiy va tiklovchi xayol parvozlari tasavvurlar olamini yanada kengaytirgan. Shaxsiy tajribalari, qalb haroratini ijtimoiy-tarixiy

taraqqiyot tendensiyalari bilan bog'lashi, jafokash va samimiy inson sifatida hodisalar mohiyatini teran poetik anglashiga ko'maklashgan.

G'afur G'ulom oila a'zolari (xotini, singlisi, farzandlari) ga atab yozilgan maktublari ham uning ijodini o'rganishda alohida ahamiyatga egadir. Shoir 1950-yil 5-avgustda Kislovodskdagi "O'zbekiston" sanatoriyasidan rafiqasi nomiga bitilgan maktubida: "Toshkent professorlari hamisha vahima qilib meni qo'rqitgan kasallarim, bu erdagi doktorlarning so'zicha hech gap emas ekan"[19, 157-bet], degan satrlar bitilgan.

G'afur G'ulom 1965-yilning 8-17-sentyabr kunlarida Toshkentda bo'lib o'tgan kengash-seminarda so'zlagan nutqida yosh yozuvchilarga qarata shunday deydi: "Shoirlik xalqning umumiy ishiga aralashish bilan bo'ladi, shoirlik xalq bilan bo'ladi". [19, 70-bet]. Bu fikr qirq yildan ortiq davrning ijodiy tajribasidan kelib chiqib aytilgan. Chunki, G'afur G'ulomning hayot va ijod yo'li sho'rolar davrining barcha hodisalari, xato va nuqsonlari ichida kechdi. Madrasa tahsilidan so'ng, atigi 8 oylik muallimlar kursida o'qigan shoir hayot universitetlarida chiniqdi va toblandi.

G'afur G'ulom mansub bo'lgan avlod shoirlik a'molini ijtimoiy jarayonlarning qaynoq markazida turish deb tushungan. Jumladan, shoirning 1950-yil 5-noyabrida yozilgan "Tinchlik nashidasi" she'rida:

Har tongning lirikasi, har nafasning o'z fayzi,

Har kunning qayd etarlik mazmuni, tarixi bor.

Bu kunning lirikasi, fayzi, mazmun, tarixi

Er yuzida tinchlikning qudrati-la barqaror [15, 221-bet],

degan misralarni o'qiymiz. Zohiran qaralsa, bu yillarda G'.G'ulom bir jihatdan, kurashchan proletar butun dunyo mehnatkashlariga ozodlik olib keladi, degan soxta va'dalarga ergashganday tuyuladi. Ammo, ikkinchi bir jihat ham borki, shoir insoniyat tarixi – bu intilish va kurashlar tarixi, degan g'oyat asosli tezisni ilgari surgan. Uchinchidan, G'afur G'ulom jahondagi har bir xalq erkin va adolatli jamiyatda yashashga haqli. Ular o'z vatanida, tinch va osuda umrguzaronlik qilish, halol mehnati samaralaridan bahramand bo'lishni istaydilar, degan fikrni ham ilgari surgan.

1966-yil 26-aprel kuni soat 5 dan 22 minut o'tganda Toshkentda yuz bergan 8 ballik kuchli zilzila natijasida shahar jiddiy shikastlandi. Shahar aholisi dahshatli fojialarni boshidan kechirdi. A.Qahhorning "Toshkent jamoli", G'afur G'ulomning "Vatandoshlarimga tasalli", Maqsud Shayxzodaning "Javobgarlik" singari publitsistik maqolalari xalq dardiga sherik bo'lish, mashaqqatli kunlarda uning ko'nglini ko'tarish va ruhiy madadkor bo'lish ruhi bilan sug'orilgan edi.

G'afur G'ulomning "Vatandoshlarimga tasalli" maqolasida Er yadrosidagi beqarorlik sabablari fizik, geologik va seysmologik qonuniyatlar asosida ilmiy asoslanadi. Eramizning 79-yilida Vezuvey yonar tog'i harakatga kelishi oqibatida qadimiy Pompeya (Neapol yaqinida) shahri ahli boshiga yog'ilgan dahshatli fojialar, 1023-yili Tokio, 1556-yili Xitoy, 1868-yili Toshkent, 1883-yili Yava va Sumatra orollari o'rtasida vujudga kelgan Kraktau vulqoni, 1902-yili Andijon, 1927-yili Namangan, 1948-yili Ashxabodda yuz bergan shiddatli zilzila oqibatlari haqida keltirilgan aniq ma'lumotlar ham buni tasdiqlaydi.

Biz maqolada shunday satrlarni o'qiymiz: "Ikki oydan buyon Toshkentda er qimirlab turibdi. SHunisiga shukurki, borgan sari kuchi ketib, dahshati pasayib, yaxshi kunlar yaqinlashayotganidan dalolatlar berib turibdi. Shoyad..." [17,415-bet].

Anglashiladiki, publitsist silkinishning dahshati borgan sari susayib, yaxshi kunlar yaqinlashayotgani bilan ikki oydan beri tinchi buzilgan shahar aholisiga tasalli berish, vayronalik va talofatlar endi bo'lmasligiga ishontirishga intilgan. Muhimi, ayni lahzalarda uning qalbida: "shunisiga shukurki" tarzidagi shukronalik va "shoyad" qabilidagi ilohiy mo'jizaga umidvorlik tuyg'usi ham yaqqol ko'zga tashlanadi.

Akademik N.Karimov haqli ta'kidlaganidek, "G'afur G'ulom maqolasini "Vatandoshlarimga tasalli" deb nomlagan bo'lsa ham, aslida uning o'zi tasalliga muhtoj edi"[6, 273-bet]. Shu ma'noda, G'.G'ulom ushbu falokat vahimasidan qattiq tashvishga tushib norasida oila a'zolari uchun panoh izlashini ham to'g'ri tushunish lozim.

Darhaqiqat, uzluksiz davom etayotgan va hatto qachon to'xtashi ham noma'lum bo'lgan silkinish G'afur G'ulomning botinida ulkan zilzila qo'zg'agan, asab torlarini o'ynatib yuborgan edi. N.Karimov ta'biri bilan aytganda: "Zilzila uning ko'ziga farzand va nevaralarini tiriklayin yutib yuborajak ajdaho bo'lib ko'ringan edi" [6,273-bet].

Demak, shoirning o'z oilasini olib, ukrain yozuvchilarining Odessadagi Ijod uyiga borishi bejiz emas. O'sha kezlarda G'afur G'ulom qalbida cheksiz hadik hukmron bo'lgan. Odessa – Qora dengiz shimoliy-g'arbiy sohilida joylashgan shahar bo'lib, Ukrainaning yirik sanoat, madaniyat, ilm-fan markazidir. Qadimiy "Xajibey" turk qal'asi o'rnida qad rostlagan bu shahar atrofi va chekkalarida Arkadiya, Luzanovka singari kurort markazlari joylashgan. G'.G'ulom ukrain xalqini ijtimoiy, diniy-milliy zulmga qarshi ozodlik kurashiga boshlagan, o'z yurtini Polsha hukmronligidan ozod qilishda muhim rol o'ynagan mustaqillik kurashchisi – Bogdan Xmelnitskiy (1595-1657)ga bag'ishlab yozgan bir she'rida: "Uzoqlarni ko'rgan otaxon o'g'il", deya ko'ngil ardog'ini ifoda etgandi. Shoir zohiran mutlaqo bog'lanmaydiganday tuyulgan XVI-XVII asr tarixi bilan zamonani genetik kod negizida o'zaro tutashtirgan:

Ota-bobolarning etuk idroki,

Farzandlik umriga ming yillik rahbar [16. 357]

deb yozgan edi. G'.G'ulom 1966-yilning 26-iyun kuni Qozon shahrida so'zlagan nutqida qardosh do'stlarga dastavval zilziladan jafo chekayotgan Toshkent ahlining salomini etkazgan. Tabiiy ofat oqibatlarini bartaraf etishda ishtirok etayotgan Qozon ahliga qizg'in tashakkurlarini izhor etgan. Bu bir el va uning ziyolilari nomidan ikkinchi bir xalqqa ko'rsatilgan ehtirom edi. G'afur G'ulom tatar xalqiga bo'lgan ehtiromini shu voqea bilangina bog'lamaydi. U o'z odatiga ko'ra muammoning tarixiy ildizlariga murojaat qiladi.

Shoir o'zini xasta sezgani uchun uning Qozon safari uzoq davom etmagan. U yubiley tantanalaridan so'ng yana Odessaga qaytib kelgan. Bir jihati, farzandlari va nevaralarining ayrimlari Toshkent shahrida ekani, eng asosiysi esa, sog'ligi jiddiy

yomonlashayotganini ichki bir tuyg‘u bilan sezgani bois, Muharram ayaga sezdirmay Toshkentga oshiqqan.

Aslida, G‘afur G‘ulom jisman qandaydir surunkali kasalliklardan ozor chekib kelgan. Bu fikrni shoir turli yillarda yozgan xatlar va ayrim nutqlar – e’tirfu iqrorlar asosida tasdiqlash mumkin. Jumladan, G‘.G‘ulom 1940-yil 1-iyulida turmush o‘rtog‘i Muharram G‘ulomova nomiga Tbilisidan jo‘natgan maktubida: “– Kurort davri 5-iyuldan boshlanadi. Eng avvalo, “bor-ey”, deb kurortdan ham kechib qaytmoqchi bo‘lgan edim. O‘rtoqlar maslahat bermadilar: “– Sog‘ayishing kerak, bir oygina sog‘inishdan o‘lib qolmassan. Oilang och qolmas”- dedilar. Men ham ko‘ndim...Siz istaganday, bolalarimning tolei talab qilganday o‘ng‘olib qaytaman” [19, 136-bet], deb yozadi. Ushbu xatdagi xabarning ikkita muhim nuqtasiga e’tibor qaratish lozim. Bu birinchidan, G‘afur G‘ulomning qaerda bo‘lmasin, tezda o‘z oilasi, farzandlariyu nevaralarini sog‘inib, jonajon uyiga qaytish istagi bilan yonishidir. Ikkinchi jihat shundaki, G‘afur G‘ulom 1940-yildayoq bemor bo‘lgan va astoydil davolanishga etarlicha qunt qilmagan. Har ikkala jihat nafaqat turmush o‘rtog‘i, balki yaqin o‘rtoqlari uchun ham sir bo‘lmagan. Shuning uchun ular shoirni qo‘yarda-qo‘ymay davolanishga ko‘ndirishgan.

G‘.G‘ulom sohir yuragi urushdan to‘xtagan 1966-yil 10-iyulgacha o‘tgan 75 kunlik fursatda uzluksiz zilzilalar shoirning qalbida davom etgan. SHubhasiz, uning eng kuchli qasirg‘alari va vayronalari ham o‘sha nuqtadon, donishmand inson fikri hamda ruhini uyg‘unlashtira olgan muhtasham qal‘ada edi. Shoir bir o‘rinda chinakam ijod haqida so‘zlarkan, aql va yurak yagona aktga evrilib, hissiy va fikriy idrok uyg‘unlashuvi lozim ekani xususida quyidagi misralarni bitgan edi: “Kattakon qudratni Chamalash uchun kattakon idrokning Markazi kerak” [17, 410-bet].

G‘afur G‘ulom chindan ham mislsiz ulkan ma’naviy-ruhiy va ijodiy kuch-qudrat sohibi edi. Shoir: “She‘r yozmoqqa farang G‘afur G‘ulom nomim mening”, deya e’tirof etganidek, undan bizga dillardan o‘chmas ulug‘ nomi va bebaho ijod namunalari meros bo‘lib qoldi. Buni anglamoq uchun haqiqatan ham fikr va tafakkurni yagona nuqtada uyg‘unlashtira olishdan tashqari, behad miqyosli botiniy nigoh ham kerak.

Umuman, poetik matn ijodkor shaxs va davr uchligini o‘zaro uyg‘unlikda o‘rganish G‘afur G‘ulom ijodiy merosini psixobiografik tadqiq etishga zamin yaratadi. Bu esa G‘afur G‘ulom ijodi va qismatidan ibratli xulosalar chiqarish imkonini beradi.

Adabiyotlar ro‘yxati:

- 1.Борев Ю. Искусство интерпретации и оценки. – М.: 1981.
- 2.Жабборова Д. Истикол даври ўзбек адабиётшунослигида Чўлпон ижоди талқинлари (шеърияти ва насрий асарлари мисолида)” Филол.фанлари бўйича фалсафа д-ри (PhD) илмий даражасини олиш учун ёзилган дисс... – Самарқанд, 2018.
- 3.Жирмунский В. М. Введение в литературоведение. – СПб.: Изд. СПбГУ, 1996

- 4.Зенкин С.Теория литературы. Проблемы и результаты. – М.: Новое литературное обозрение, 2018.
- 5.Каримов Б. Адабиётшунослик методологияси. – Филолог магистрлар учун ўқув қўлланма. –Т., Мухаррир, 2011.
- 6.Каримов Н. Мақсуд Шайхзода. –Т., Шарқ НМАК Бош таҳририяти, 2010.
- 7.Назаров Б.А.Ижоднинг жон томири.”Tafakkur tomchilari”, – Т., 2022.
- 8.Расулов А. Толерантлик ва руҳий покланиш // Шарқ юлдузи, 2011. 3-сон. – Б. 158.
- 9.Саид Аҳмад. Биллур сиёҳдон // Жаҳон адабиёти. 2003. № 5.
- 10.Шота Руставели. Йўлбарстерисинисёпинганспаҳлавон. –Т., Фан, 1959.
- 10.Якубов И. Мустақиллик даври романлари поэтикаси. – Филол.фан. докт. дисс. –Т., 2018.
- 11.Ўзбекистон Миллий энциклопедияси. 8-жилд, –Т., Ўзбекистон Миллий энциклопедияси, 2004.
- 12.Қуронов Д., Мамажонов З., Шералиева М. Адабиётшунослик луғати. – Т.: “Академнашр”, 2010.
- 13.ҒафурҒулом. Мукаммал асарлар тўплами. 12т.Т.1. –Т., Фан, 1983.
- 14.Ғафур Ғулом. Мукаммал асарлар тўплами. 12т. Т.2. – Т., Фан, 1984.
- 15.Ғафур Ғулом. Мукаммал асарлар тўплами. 12т. Т.3. –Т., Фан, 1984.
- 16.Ғафур Ғулом. Мукаммал асарлар тўплами. 12т. Т.7. –Т., Фан, 1987.
- 17.Ғафур Ғулом.Мукаммал асарлар тўплами.12т. Т.11. –Т., Фан, 1989.
- 18.Ғафур Ғулом. Мукаммал асарлар тўплами. 12 томлик. Т.12. – Т., Фан, 1990.
- 19.Matyokubova T. &Yakubov, I. (2020).Laboratory works of GafurGulam: poetic imageand imagery. Journal of critical reviews,№ 7,pp. 28-37.
- 20.Matyokubova T. Poetic imagery of nature // Theoretical & Applied Science, 2023. 02 (118), 521-524
- 21.Yakubova S. The issue of «way» in cholpon's poetry. ISJ Theoretical & Applied Science. . 2023. 02 (118), 490-492
- 22.Yakubov, I. Boburnoma” - o‘zbek nasrining nodir yodgorligi. Zahiriddin Muhammad Boburning Sharq davlatchiligi va madaniyatida tutgan o‘rni mavzusidagi xalqaro ilmiy-nazariy konferensiya materiallari, Toshkent, 2023. pp.174-179.
- 23.Yakubov I. Artistic interpretation of the drama of moral and spiritual problems in the tragedy “Romeo and Juliet”. ISJ Theoretical & Applied Science. . 2023. 02 (118), 517-520

G‘AFUR G‘ULOMNING BAG‘ISHLOV SHE‘RLARI

Yuldashev Normat, TerDU, f.f.n., dots.

Xo‘janova Nasiba, TerDU magistranti

G‘afur G‘ulom XX asr milliy she‘riyatimizning cho‘ng qoyalaridan biri edi. Uning she‘riy va nasriy ijodi o‘zbek adabiyotining oltin fondini tashkil qiladi. Shoir ijodini o‘qir ekanmiz, unda o‘zbekona ruh, milliy mentalitet butun borlig‘i

bilan namoyon bo'ladi. Ustoz adabiyotshunos Ozod Sharafiddinov ta'biri bilan aytganda "U vujudidagi har bir hujayrasi bilan, tomirida gupirib oqqan har tomchi qoni bilan, yuragining tepishi bilan o'zbek edi. O'zbekning bag'ri kengligi, tantiligi, mehmondo'stligi, jinday chapaniligi, jinday tavakkalchiligi, lafzi halolligi, yolg'ondan hazar qilishi, bolajonligi, ayolmandligi va yana allaqancha fazilatlari bu insonda musajjam edi" [1, 262-bet].

G'afur G'ulom ijodi sho'rolar tuzumining nihoyatda qizillashgan davriga to'g'ri keldi. Zamonga yon bermaslikning imkoni yo'q edi. SHunga qaramasdan yuksak iste'dod sohiblari zamon va muhit haqiqatlarini badiiy matnlarning tagqatlamlariga joylab ketishgan. G'afur G'ulomning ham she'rida zamonasozlik ohanglari uchrasada, u hech qachon o'zligini yo'qotmagan shoir edi. "Zamonning nazari nechog'lik sinchkov va yovuz bo'lmasin, G'afur G'ulom deyarli har bir she'rida o'zbek xalqining manfaatiyu obro'sini o'rta qo'yib gapirar edi. U zot xalqlar o'rtasidagi beg'araz do'stlikni kuylaganda ham, "men o'zbek shoiriman", "o'z xalqimning tiliman" degan o'tli iqroriga sodiq qoldi" [2, 7-bet].

G'afur G'ulom XX asr o'zbek she'riyatida xayol dunyosi nihoyatda keng, ijodiy fantaziyaga boy, juda katta intellektual salohiyatga ega faylasuf shoir edi. Afsuski ijodkor o'zining butun umrini, ijodini, iste'dodini istibdodga qurbon qildi. Mafkuraviy-siyosiy tazyiq ostida yozilgan asarlarining asosiy qismini zamonabop she'rlar tashkil etadi. U o'z davrida zamondoshlariga yoki biror voqea-hodisa sabab ko'plab bag'ishlov she'rlar yaratib qoldirdi. Ammo ushbu bag'ishlov she'rlarning aksariyati bugungi kun talablariga javob bermaydi. Shu boisdan, shoirning davr sinovlariga dosh bergan bag'ishlov she'rlarini tahlil e'tiboriga tortishga harakat qildik.

Bag'ishlov – poetik janr, lirik she'r, katta asarlarning biror shaxsga bag'ishlanganini anglatuvchi muqaddima qismi. Bag'ishlovda shoir o'zining munosabatini aniq bir shaxsga yoki o'z his-tuyg'ularini tushunadigan noma'lum adresatga qaratadi [3,219-bet]. Badiiy adabiyotda bag'ishlovlar biror bir shaxsga yoki biror bir voqea-hodisa munasabati bilan yoziladi. "Bag'ishlov u yoki bu kishiga bag'ishlanuvchi she'r janri, ammo qasida yo xat emas. V.G.Belinskiy tomonidan uning adabiy tur va janrlarga oid asarida janr, deb eslab o'tilgan, u janr sifatida o'zbek adabiyotida Ovrupa va rus adabiyotidan o'tdi" [4, 163-bet].

Sharq mumtoz adabiyotida ham bag'ishlov janrining o'ziga xos ko'rinishlari mavjud. "Qutadg'u bilig"ning Bug'raxonga, "Muhabbatnoma"ning Muhammadxojabekka bag'ishlangan madhiyalar bag'ishlovning ham Sparq adabiyotida qadimdan adabiy an'anaga aylanganini ko'rsatadi. Bag'ishlovlar birorta real shaxsga, biror voqea, predmetga qaratilgan bo'lishi mumkin. "Zamonaviy adabiyotda bag'ishlov-asarning muallif hurmati, e'zosi, minnatdorchiligi, muhabbati va hokazo ifodasi sifatida biror bir shaxs, uning xotirasi, muayyan biron joy, muassasa, voqea-hodisa va shu kabi voqealarga bag'ishlanishi mumkin" [5, 31-bet].

G'afur G'ulomning bag'ishlov she'rlarini quyidagicha tasnif qilish mumkin: 1.Real tarixiy shaxslarga bag'ishlangan bag'ishlov she'rlar: "Vaqt" (Menga soat taqdim etgan jiyanim Hamidulla Husan o'g'liga), "Ona qizim Jamilaga", "Muharram", "Kulol va Zargar" (Mirmuhsinga), "Ikki she'r" (Rafiqasi

Muharramga), “Samad Vurg‘unga”, “O‘rtoqlik hazillari” (Q. Muhammadiyga, G‘ayratiyga, S.Abdullaga, Mirtemirga, Oybekka, Shayxzodaga, M.Boboevga), “Olim do‘stimga”, “Zulfiyabegimga”, “Kuzatish” va hakoza.

2.Biror voqea-hodisa sababi bilan yozilgan bag‘ishlovlar: “San‘atim” (O‘zbek san‘atining nishonli o‘g‘il qizlariga), “Yigitlarga”, “Sizga” (O‘rta Osiyo davlat universiteti filologiya fakultetida o‘tkazilgan kechada o‘qilgan), “Onaxonlarga”, “Hamza teatriga”, “Yosh o‘qituvchilarga”, “Ulug‘ hind xalqiga”, “O‘ttiz yoshli O‘zGUga”, “Ipakchi qizlarga”.

Real tarixiy shaxslarga bag‘ishlangan she‘rlar orasida “Vaqt” alohida ajralib turadi. “Vaqt” shoir she‘riyatining gultoji sanaladi. She‘r shoirning jiyani Hamidulla Husan o‘g‘liga bag‘ishlangan bo‘lsada, mazmun mundariyasi jihatidan sof falsafiy she‘r. She‘rda olam va odam, zamon va makon, zamin va koinot, mohiyat va hodisa, hayot va o‘lim kabi falsafiy tushunchalar mushohada qilinadi:

G‘uncha ochilguncha o‘tgan fursatni,
Kapalak umriga qiyos etgulik.
Ba‘zida bir nafas olgulik muddat,
Ming yulduz so‘nishi uchun etgulik.

Faylasuf shoir inson umrini kapalak umriga qiyos qiladi. Darhaqiqat, bu olamda “yarim soat ichida tug‘ilib, yashab, o‘lib, umr ko‘rib o‘tguvchilar bor”. SHu jihatdan, inson o‘zining qisqa umrida ezgu amallar bajarishi, umr daftarini yaxshi nomlar bilan bezashi lozim. She‘rning oxirgi bandida inson umrining qaytarilmasligi haqidagi falsafiy xulosa mujassamlashgan:

Hayot sharobidan bir qultum yutay
Damlar g‘animatdir, umrzoq soqiy.
Quyoshku falakda kezib yuribdi
Umrimiz boqiydir, umrimiz boqiy [6, 60-bet].

G‘afur G‘ulomning biror voqea-hodisa sabab yozilgan bag‘ishlov she‘rlari orasida “San‘atim” alohida ajralib turadi. She‘r o‘zbek sahna san‘atining nishonli o‘g‘il-qizlariga bag‘ishlangan. Ma‘lumki, o‘zbek sahna san‘ati juda katta yo‘qotishlar va qurbonlar evaziga oyoqqa turgan. O‘sha mustabit zamonlarda xotin-qizlarning sahnaga chiqishi taqiqlangan edi. Ular to‘rt devor orasida ranglari za‘faron, bag‘irlari qon, erksiz, huquqsiz, qanotlari qayrilgan edi. Shoir o‘zbek san‘ati haqida yozar ekan, uning ko‘z o‘ngidan “asrlar asirasi, zulmat qurbon”lari birma - bir o‘ta boshlaydi:

Isyonlarning sut emizgan onasi-qoni,
Kishilikning teng yarmi, sherigi, joni,
Odamlikning bir bo‘lagi, mazmuni-joni,
Yuragimning Gulsarasi bo‘lgan san‘atim [6, 33-bet].

She‘r davomida o‘zbek san‘atining tarixiga bir qur nazar tashlanadi. Bu tarixda ozod o‘zbek qizlarining baxtdan kulgan yuzlari – Gulsarasi, Halimasi ham Sorasi faxr va iftixor bilan qalamga olinadi. SHoir ushbu bag‘ishlov she‘rida o‘zbek san‘atiga bo‘lgan samimiy tuyg‘ularini yuksak mahorat bilan ifodalay olgan.

Umuman olganda, shoirning har bir bag‘ishlov she‘ri bir tarix. SHu boisdan, G‘. G‘ulomning bag‘ishlov janriga oid she‘rlari uning poetik olamini, ijod

biografiyasini yoritishda, ijtimoiy muhit va davr manzaralarini o'rganishda muhim manba bo'lib xizmat qiladi.

Adabiyotlar ro'yxati:

1. Озод Шарафиддинов. Ижодни англаш бахти. –Т., Шарқ. 2004.
2. Орипов А. Ўзбекнинг ўз шоири. /Ғафур Ғулом. “Танланган асарлар” китобига сўз боши. Тошкент. Ғ.Ғулом номидаги НМИУ. 2018.
3. Квятковский А. Поэтический словарь. –Москва, Изд. Сов. энциклопедия, 1966.
4. Адабий турлар ва жанрлар. Икки жилдлик. 2-жилд. –Т., 1992.
5. Куронов Д ва бошқ. Адабиётшунослик луғати. –Т., Akademnashr, 2010.
6. Ғулом Ғ. Танланган асарлар. –Т., Ғафур Ғулом номидаги НМИУ, 2018.

G'AFUR G'ULOM IJODIDA MILLIY QADRIYATLAR TALQINI

**Raximova Gulbahor, O'zbekiston-Finlandiya
pedagogika instituti dotsenti,
Obidjonova R., O'zbekiston-Finlandiya
pedagogika instituti talabasi**

G'afur G'ulom ijod yo'lini hayol ummonidan kuzatadigan bo'lsak, albatta bu ummon tubidan chiqolmasak kerak. Ushbu maqolada nafaqat G'afur G'ulom ijod yo'lini balkim, uning ijod mahsuli bo'lmish asarlarida tarixiy haqiqatni ochib berishga va milliy qadriyatlarimizning qanchalik ulug'langanligi va ulug'lanib kelinayotganligining guvohi bo'lamiz. Sho'rolar davridagi xalq hayoti, mazlumlar bilan kurashgan xalqning o'z milliy qadriyatlari, bugungi kunda tarixga aylangan, ayni paytda hayotiy haqiqatga aylangan ushbu qadriyatlarning barchasi buyuk adib ijodida yaqqol namoyon etilgan.

G'afur G'ulomning bu darajada yetuk yozuvchi va shoir bo'lishiga ham uning ayni urush payti tug'ilganligi, nomi o'chgan urush tufayli xalqning qiynalganligi, o'z o'g'lidan erta ayrilganligi ham sababchi bo'lgan bo'lsa ajab emas. Sho'rolar hukumati davrida, ayni urush paytida tug'ilgan bo'lg'usi adib o'zining qator asarlarida xalqimizning og'ir ahvolini qalamga oladi. Shu o'rinda takidlash joizki, xalq va uning hayoti sho'rolar hukumati davrida qay tarzda kechganligi, ayniqsa, urush paytlari xalqning og'ir hayotidan darak beruvchi, achchiq va alamli haqiqatdan so'z ochuvchi “Shum bola” qissasida “Qoravoy” obrazidagi bola va uning hayoti orqali butun bir xalq dardi go'yo suv ostida gullay olmasdan, suv yuziga qalqib chiqib gullagan “Nilufargul” misoli ochib berilgan.

Xalqimiz shunchalik rahmdilki, ulardan bir burda non so'rasangiz uyida nima bo'lsa borini berishga tayyorligi urush paytlarida ham o'z aksini topgan. Garchi urush bizning makonimizdan yiroqda bo'lib o'tgan bo'lsada, xalqimizning bir soniya tinch uxlab orom olishiga imkon bo'lmagan. Erkaklar urushga, ayollar ishga jalb qilingan. Boquvchisidan ayrilgan xalqning ahvoli og'irlashgan, o'z mehnati bilan yetishtirgan aksariyat noz-u ne'matlar va urushga yaroqli bo'lgan kerakli buyumlarning hukumatning ayrim razil shaxslari tomonidan turli

bo'htonlar va yolg'onlar bilan tortib olinganligi ham ayni haqiqatdir. Bolaligi urushning shunday g'avg'olari bilan o'tgan alamli kechalarni, tunlarni o'z boshidan kechirgan adib shularni qalamga olmasdan qo'ymadi. O'zining ichki kechinmalarini, xalqning toshga o'yilgan qadriyatlarini yo'qota olmagan sobiq hukumatning hayotini, shu hukumatga qo'shilib o'z iymonidan ham kechgan ayrim mazlumlarning haqida so'z ochishga qaror qilgan adib o'tgan asrimizning o'rtalarida ushbu asarni yozishga bel bog'laydi.

Uning shogirdlaridan biri bo'lgan Said Ahmad ham o'zining "Yo'qotganlarim va topganlarim" asarida ham G'afur G'ulomning ushbu asari haqida ham ayrim malumotlarni aytib o'tgan. "Shum bola" asarini tahlil qiladigan bo'lsak, ushbu asarning obrazlari bilan tanishib chiqamiz. Asarning bosh qahramoni bo'lgan "Qoravoy" ismli bola va uning onasi, sinlisi va yaqin do'sti Omon bilan boshidan kechirgan g'am tashvishlari-yu o'ynab yurgan paytlari, Sulton o'g'ri bilan kissovlarga qo'shilib o'tkazgan tunlari, pochchasi avaylab boqqan qimmatbaho qushlarini qattiq, suzma berib o'ldirib qo'ygan paytlari, ko'chmanchilar ovulida o'lik yuvib sharmanda bo'lganligi, masjid imomining og'ilxonasida o'sallab qolgan ho'kiz o'rniga soppa-sog' eshakni so'yib qo'yganligi va ayniqsa, Sariboyning hovlisida qilgan sho'xliklari orqali xalqning hayoti ochib berilgan. Biroq, shunisi qiziqki, shoir qiynalgan xalqning dardini, qiyinchiligini mazlumlarning qabohatga to'la nopok ishlarini shunchaki so'z bilan ifodalab qolmagan balkim, bolaning rango-rang marvaridlarga to'la beg'ubor hayotidan olib turib badiiylikka bog'laganligi ham adibning mahoratidan so'z ochadi. Asarning hammamizga tanish bo'lgan qiziq joyidan biri bo'lgan, Sariboy bo'lis degan kata yer egasining qo'lida xizmat qilgan Qoravoyning sho'xliklari orqali ham xalqimizning hayot tarzi, milliy qadriyatlari va ayrim tarixiy haqiqatlarni ko'rishimiz mumkin.

Shum bolaning Sariboyga aytgan yolg'onlari va uning oqibatlarini tahlil qiladigan bo'lsak, ayni paytda bolaning bu tarzda yolg'on gapirishiga ham ijtimoiy muhit sababchi bo'lganligining guvohi bo'lamiz. Sabab shundaki, o'sha paytda Sariboyning yoniga hech kim yurak yutib borolmaganligi, uning "Indan keyinchi"- degan iborasiga hamma ham javob bera olmasligi, ayni paytda shig'il pishib yotgan olmalarning nobud bo'layotganligini xasis boyga aytadigan odam yo'qligi shum bolani borishga majburlaydi. Shum bolaning yolg'on gapirganligiga ham boyning o'zi ham sababchidir. Tahlil qilib ko'ringchi, boyning bog'dagi ishlarini tartibga solish maqsadida borgan bolaning aybi nima? Xo'sh, nega boy qolgan savolga javob berolmagan bolani jazolashi kerak? Shularni o'ylab, ishini puxta qilgan shum bola oldindan o'z aybini, ya'ni yolg'onchilik odati borligini boyning oldiga qo'yadi. Xuddi ana shu yerda unga berilgan tarbiya, oila muhitini ham shoir yuksak mahorat bilan yashirincha ochib bergan. Shum bolaning bu tarzda yolg'onchi bo'lib qolishiga kim sababchi?

Shum bola Sariboyni o'z yolg'onchiligiga laqqa tushirgandan so'ng boy uni kaltaklashga tushdi, lekin mullalardan biri kelib boyga: "Yosh bolani urmang, ayniqsa, yetim bolani urish gunoh ish"- degan so'zlarni aytgandan keyin boy shum bolaning jazosini kamaytirdi va yarim qop qurt yegan olmalarni ish haqqi o'rniga berib yubordi. Xuddi ana shu yerda xalqimizning dinga bo'lgan ishonchining

yo‘qolmaganligi ham ro‘yobga chiqarilgan. Sho‘rolar davridagi bunday tizim natijasida o‘z dinini unutmasdan mardonavor kurashgan xalqning sabri ham yuksak darajada ochib berilgan.

Milliy qadriyatlarimiz bu bizning ong-ongimizga singib ketgan, ruhimizga o‘rnashib olgan bizning hayot yo‘limizni tartibga solib turgan urf-odatlarimizdir. Ming afsuslar bo‘lsinkim, sho‘rolar hukumati davrida va ayni urush payti bu urf-odatlarimizdan anchagina yiroq bo‘ldik. Ammo shunday qora kunlarda ham o‘z diniga va urf-odatlariga, milliy qadriyatlariga sodiq qolgan xalq matonatiga tan bermaslikning iloji yo‘q albatta. Kechalari farzandini bedor kutib yig‘lagan onalarning dardi-yu, otasini kutib yashagan, ana dadam keladi deb kun sanagan bolalarning uyg‘oq yuragi ayni ana shu urush oqibatlarining bir parchasi xolos. Biz-u siz urushni oddiygina tasvirlab beramiz-u lekin uning vahshatidan totib ko‘rgan odamlardek urush degan tushunchani qo‘rquv bilan tilga ololmaymiz. Lekin G‘afur G‘ulom o‘zining “Sen yetim emassan” she‘rida bu vahshatlardan qo‘rqqan bolalar-u, ota-onasidan yetim qolganlarga shunday dalda beradiki, bunday iliq va samimiy so‘zlarni eshitgan har bir qalbi o‘ksik bolaning dili yayraydi. Ushbu so‘zlarimizning yana bir isboti sifatida she‘rdan bir parchani tahlil qilamiz;

Ko‘zimga uyquning mudroq ovchisi
To‘rin solmasdan 1-gudokka 2 soat bor,
Otalik hissining bebaho, laziz,
To‘lqinlar ichra g‘arq bo‘lib ketib,
Aziz boshing ustida termulmoqdaman,
Sen yetim emassan, uxla jigaram.

Ushbu she‘rni tahlil qiladigan bo‘lsak, she‘rda nafaqat otaning bolaga bo‘lgan mehri, balkim, butun bir xalqning yetimlarni boqib olishi, ularga mehrini bera olishi va hatto o‘z farzandidan ham ortiqroq ko‘rishi kabi xalqimizning odamparvar xususiyatlari to‘liq ochib berilgan. She‘riy parchada berilgan “jigaram” so‘ziga esa alohida urg‘u berilgan, ya‘ni yetim qolgan bolalarga; “Sening ota-onang o‘lgan bo‘lsada biz sening oldingdamiz, hech qachon sendan voz kechmaymiz, sen bizning ham jigargo‘shamizsan, sening kelajaging bu bizning hayotimizdir” – degan g‘oyalar ilgari surilgan.

Adabiyotlar ro‘yxati:

1. G‘afur G‘ulom. Saviya uz.com.
2. G‘afur G‘ulom. Ziyo uz kom.
3. G‘afur G‘ulom. “Shum bola”. Qissa. –Toshkent: “Ma‘naviyat”. 2016.
4. Rahimova G. Ona tili va adabiyot (bolalar adabiyoti). O‘quv qo‘llanma. – Samarqand, 2020. SamDU nashri. 303-b.

REALIKKA EVRILGAN AFSONALAR

**Toshpo‘latov Akram Haydarovich,
SamDU dotsent, filologiya fanlari
bo‘yicha falsafa doktori (PhD)**

G‘afur G‘ulom o‘zining bir qator falsafiy she‘riyati, yumoristik ruhdagi nasriy asarlari, uslubiy o‘ziga xosliklari, adabiy-tanqidiy qarashlari bilan o‘zbek

adabiyotida egallab turgan mavqeyini hamon hech kimga berib qo'yayotgani yo'q. U hamon qoya kabi mustahkam, sobit. U hamon adabiy oqimlar hosil etgan bo'ronlarga ko'krak kerib, o'z salobatini saqlab qolmoqda. Yosh iste'dodlar hamon mustahkamlikni, mukammallikni undan o'rganishmoqda.

XX asrning birinchi choragi tugayotgan bir paytda ham G'afur G'ulom kashf etgan adabiy-badiiy obidalar turfa talqin va tahlillarga boy material berishda davom etayotir. Uning birgina xalq og'zaki ijodi an'analari ko'rinishida yozilgan diniy-falsafiy ruhdagi "Hasan Kayfiy" hikoyasida yashiringan g'oyaviy mazmun va ramziy xarakterdagi obrazlar mohiyati ham shoirning yuksak mahoratidan darak beradi.

Hikoya sho'rolar hukumatining avjga chiqqan XX asrning oltmishinchi yillaridan bahs yuritadi. G'afur G'ulom bu hikoyasini umr faslining so'nggi kunlarida, 1965-yilda qog'ozga tushirgan. Bu paytda G'afur G'ulom o'zi ko'pda adashgan jamiyatning asl basharasini anglab etgan, o'zbekning keksa bir aql-zakovati to'lishgan, chin ma'nodagi ziyolisi sifatida ma'lum va mashhur edi. Ijodkorning folklorga, diniy mavzuga e'tibor qaratishida ham uning sharq kishisi sifatidagi tavba-tazarrusi, ma'rifatparvar, ziyoli maqomidagi vazifasi, qolaversa xalqi oldidagi shoirlik burchi ustinlik qilgan bo'lish ehtimoli yuqoriroq bo'lgan, deb o'ylayman. Zero, bu tazarru Mirtemirning "Majnuntol tagiga o'tqazing meni" she'ri ifodalagan badiiy-estetik g'oya bilan uyg'unlik kasb etadi.

Mashhur amerikalik adabiyotshunos Edvort Olvert Fitratning "Qiyomat" va "Shaytonning Tangriga isyoni" asarlarida ifoda etilgan har bir badiiy unurning muayyan maqsad, ya'ni mustamlakachilik siyosati orqali O'rta Osiyoga kirib kelgan "Zamonaviy hayotning ichki hamda tashqi tartibsizliklari oxirzamon – qiyomatdan darak berishi, bundan musulmon xalqlarning ogoh bo'lishi zarurligini" kitobxonga etkazishga yo'naltirilganligini ta'kidlagan edi. Taniqli nemis adabiyotshunosi Zigrig Klaymixel Fitratning diniy asarlari tahliliga bag'ishlangan tadqiqotida ham asosiy e'tiborni matndagi ichki ma'no qatlamlariga qaratib, "Qiyomat", "Shaytonning Tangriga isyoni" asarlarida inqilobning Markaziy Osiyo xalqlari hayotidagi o'rni, uning xalq turmushiga ijobiy yoki salbiy ta'siri haqdagi shubha-gumonlarini jannat va do'zax motivi vositasida ifoda etganligini, ya'ni to'ntarish millatga Jannat beradimi yoki Do'zax?! degan so'roqqa javob qidirishga urinish borligini qayd etgan edi" [1,43-44-betlart] mazkur talqin xorijlik adabiyotshunoslar tomonidan sotsiologik tahlil metodi asosida o'rganilgan.

G'arbda badiiy asarlar ko'proq shu metod asosida o'rganiladi. Bu holat demokratik davlatlarda jamiyatda sotsiologik tadqiqotlar olib borishda qo'l keladi. G'afur G'ulom hikoyasi ham shu yo'nalishda tahlilga tortilsa, davr haqida qimmatli ma'lumotlar bera oladi. Nazar Eshonqul "Yangicha talqin va tasavvur, yangicha yo'nalish, yozma adabiyotdagi yuksalishlar, avvalo, xalq og'zaki ijodi namunalariga o'zgacha yondashuv tahlillardan boshlanadi" [2,91-bet],-deb yozadi. Bu asar sirtdan qaraganda, zamonaga muvofiq dahriylikning adabiyotdagi bir nusxasi bo'lib ko'rinsa-da, ijtimoiy-siyosiy mazmunning teranligi bilan alohida ajralib turadi.

Hikoya ertaklarga xos va mos ravishda "ertagona kirish" va "ertagona xotima" maqomiga ega. Asar "bir bor ekan..." deb boshlanib, "uzoq yillar baxtli

hayot kechiribdi”deb tugallanadi. Yozuvchi davr ruhini berishda “xalq og‘zaki ijodi” namunalaridan unumli foydalanadi. Bu bilan sho‘rolar tuzumi ijtimoiy hayotda allatovur xatti-harakatlari, chiqargan qarorlari bilan ertakmonand jamiyat ekanligiga ishora qiladi. “Sol tog‘oraga ketingni, sig‘sa ham bir tanga, sig‘masa ham, bir tanga” solig‘ining bema‘niligi haqidagi afsonalar asar yozilgan davr shohlarining xurmacha qiliqlariga o‘xshatiladi. O‘tgan asrning oltmishinchi yillarida N.S.Xrushchayovning bir qancha buyruq, qarorlari qo‘shni davlatlarda, aqlli, ziyoli bo‘lgan o‘z fuqarolari orasida kulgiga sabab bo‘lganligini tarixni bilgan, o‘qigan odamlar yaxshi eslashadi.

Aslida, podshoning eski salla, to‘n kiyib kechalari qishloqlar kezib, oddiy fuqarolar hayotidan xabar olishi, yaxshilik alomati sifatida qaralishi kerak. Podsho xalqning nochorligini, zolim amaldorlardan aziyat chekayotganini, o‘zining podsho sifatidagi chiqargan noto‘g‘ri qarorlarini tushunib etishi, shu orqali jamiyatga qandaydir yangi islohatlar zarurligini, muhtoj va nochorlarga yon bosadigan farmonlar chiqarish lozimligini anglash yo‘lidagi xatti-harakatlar deb baholanishi maqsadga muvofiqdir. G‘afur G‘ulom hikoyasida esa biz tamoman boshqa holat guvohiga aylanamiz. Podsho Hasan Kayfiy hayotidagi sokin turmushni sarobga aylantirishga harakat qiladi. Hasan Kayfiyning ikkita nutq detali bor. Biri Xofizninig “Kemamiz sinib, daryo o‘rtasida qolganlarmiz, e yoqimli shamol, tezroq esib bizga qirg‘oqqa chiqishga yordam ber. Koshki o‘sha oshnolarimizni qaytadan ko‘rolsak” mazmunidagi she‘ri bo‘lsa, ikkinchisi “aql va mehnat salomat bo‘lsin” jumlasidir.

Xalqning mustamlakaga aylanib qolishi “kemaning sinishi” – qilich va qalqonning sinishiga o‘xshatilsa, “shamoldan boshqa yordamchisi yo‘q”-xudodan o‘zga panohi bo‘lmagan xalqning bir a‘zosi Hasan Kayfiy xarakterini juda yorqin ochib beradi. “Aql va mehnat” uni o‘ldirib ham qo‘ymaydi, bo‘ldirib ham yubormaydi. O‘lmas nonini topadi, boriga shukur qilib yashaydi. O‘tgan kunidan xursand. Biroq Hasan Kayfiyning ertasi, kelajagi kafolatlanmagan. Chunki uning avlodini davom ettiradigan farzandlari, xotini, xullas qurg‘oni yo‘q. Qo‘rg‘on sho‘raviylarga boy berilgan. Sho‘rolar yaratgan mavjud tuzumga nihoyatda o‘xshash manzaralar... Podshoh shunday beg‘am, beparvo odamning ham yashash halavatini bezovtalikka, oromini azobga, yaxshi kasbini kosodga uchratishga urinib ko‘radi. Hasan Kayfiyning “aql va mehnati”, ya‘ni uning aqli – Ollohg‘a ishonchi, mehnati – qo‘l mehnati, qat‘iyligi sinib qolishdan, xonavayron bo‘lib qolishdan asraydi. Hasan Kayfiy botinidagi idrok, iroda har narsaga tayyor.

Zero, zamon talotuplari uni hushyor, balo yog‘ilib kelganda ham ruhini tushib ketishiga yo‘l qo‘ymaydi. Uni “aql va mehnati”ga ishonchi asraydi. Undagi ilohiy halavat, insoniy talofotdan ustun turadi. Shuning uchun ham u har xil qiyofalarga aylanavermaydi. Tilanchilik qilmaydi, yaltoqilik qilmaydi, birovga narsa so‘rab bormaydi. “Hazrati xizir”dan imdod kutmaydi. Insoniy xislatlari, fazilatlariga sodiq, unga qarshi borishni xayoliga ham keltirmaydi.

Podshoning tutgan yo‘li – ya‘ni bandasining sinovlaridan juda oson o‘tib olishga o‘zida kuch, chidam topa oladi. Yashash uchun bo‘lgan kurashlarda yanada toblanadi. “Hazrati Xizir” sharobdan totinib, boshi qizib, Hasan Kayfiyni so‘roqqa tutadi: “Xush bu mamlakatning podshosi kim? U adolatli

podsholardanmi?” Hasan Kayfiy to‘g‘ri, uning bir xotnining oti Adolat emish, deb eshitganim bor, deb javob beradi. Bu bilan adolatning faqat og‘izda ekanligi, amalda esa hech ahamiyatsiz so‘z ekanligiga ishora qilinadi. – Siz, Hasan Kayfiy, hadeb: “Aqlim bilan mehnatim bor bo‘lsin”, deyaverasiz. Biron marta na xudo, na podshohingizni eslamaysiz. Podshohimiz omon bo‘lsin, boshimizga soyabon bo‘lsin, xudo yor bo‘lsin, degan duolarni ham gapingizgp qo‘shib qo‘ysangiz bo‘lmaydimi?

– Be-e, - dedi Hasan Kayfiy, - shu kichkina ro‘zg‘orimga ularni aralashtirib nima qilaman? Xudo ham tekinga ish qilmaydi. Unga ham qurbonlik, zakot-ushr kerak, men ularni qaerdan olaman?! Podsho bilan xudoning tili bir. Bir-birini suwaydi, fuqaro bilan qanchalik ishi bor? Podshoga bo‘lsa turli-tuman o‘lpon, soliq, dahyak, u bu kerak. Innaykeyin, podsho degan maxluqqa – doim bo‘yin egish yoqadi. Mening soliq to‘lashga bisotim – badalim yo‘q. Siz taqsir bizning podshoning tog‘ora solig‘ini eshitmagan ko‘rinasiz, - hiringlab kulib qo‘ydi. Shunig uchun mening sig‘inadigan narsam – o‘z aqlim, o‘z mehnatim, taqsir. Boshqasidan hech qanday ilinjim yo‘q” [3, 313-bet].

Hasan Kayfiy nazarida, podsholardagi dinsizlik, diyonatsizlik sherikchilik deb atalmoqda. Mustamlakachilikning azobi ikki yoqlama bo‘lishini, ya‘ni ruslar va mahalliy amaldorlar xalqning tinkayu madorini quritganligini yuqoridagi so‘zlari bilan isbotlamoqda.

– Unday demang, podshoni maxluq demaydi. U xudoni erdagi soyasi bo‘ladi.

– Men ham shuni aytamanda, soyadan biror narsa umid qilish ahmoqlik bo‘ladi, deb podshoni tang qoldiradi. Jahli chiqqan “Hazrati Xizir” uni jazolamoqqa bel bog‘laydi. Uni e‘tiqodidan qaytarishga, odamiylik qiyofasini boshqa bir qiyofaga – qiyofasizlikka aylantirishga bel bog‘laydi. U har doimgidek yamoqchilik asbob uskunalarini ko‘tarib bozorga otlanadi. CHunki u bugun ham an‘anasiga sodiq qolib ikki tanga ishlashi kerak. Qo‘shimchasiga uning bugun qo‘nog‘i – “Hazrati Xizir” yana tashrif buyuradi. Kutilmaganda podshodan Farmoni Oliy e‘lon qilindi: “Kimda kim yamoqchilik kasbi bilan shug‘ullansa, bugundan e‘tiboran uning boshi dorda”.

Ha, Xizirning aytgani bo‘libdi-da. “Aql va mehnatim omon bo‘lsin”. Hasan Kayfiy otasidan qolgan arra, o‘tin yoradigan temir pona, bitta tobar – boltasini olib bozorga otlandi. Har doimgidek ikki tanga ishlab kulbasiga qaytdi. Podshohi olam Xazrati Xizir qiyofasiga aylanib kirib keldi. Yana o‘sha ahvol. Hasan Kayfiyning sho‘rvasi pishgan, non ushatilgan, mehmonga muntazir xotirjam bir kayfiyatda o‘tiribdi. SHunday hol uch bora takrorlanadi. Har gal Hasan Kayfiy bu nomuvofiqlikdan, “Hazrati Xizir” ning sovuq nafasidan “aql va mehnati bois” oson qutuladi. “Hazrati Xizir” har tashrifida podsholikni tilidan bol tomib maqtaydi. Hech bir o‘rinda bu kabi maqtovlarga Hasan Kayfiy munosabat bildirmaydi. Mavjud tizim shunday. O‘zlarini o‘zlari maqtaydi. Birovlarning maqtashiga arzirli biron tayinli ishning o‘zi yo‘q. To‘rt devor ichidagi fuqarolar esa asosan befarq, chunki maqtay desa barchasi yolg‘on, vijdoni borni vijdoni qiynaladi. Tanqid qilsa, qamashadi, o‘ldirishadi. “Tinch qulog‘im-och qornim” deb o‘tirish eng to‘g‘ri yo‘l.

“Hazrati Xizirning” muborak nafaslari sabab Hasan Kayfiy oxir oqibat podshoga navkar bo‘lishgacha boradi. Uning maoshi bir marta oylik ko‘rinishida berilishiga kelishiladi. Hasan Kayfiy o‘ylanib qoladi. Endi u Xizirni qanday kutib oladi. Qilichini yarmini kesib temirchi o‘rtog‘iga sotadi. Kesilgan joyini taxta bilan yamab bilintirmay qo‘yadi. Evaziga oylik olguncha har kuni ikki tangadan berib turishga kelishib olishadi. Bu qilgan ishini ham tabiiyki, podsho bilib oladi. Kunlardan bir kun podsho bilan vazir nizoga borib qoladi. “Hazrati Xizir” endi buni tutdim deb o‘ylab, vazirni boshini tanasidan judo qilishni buyuradi. Hasan Kayfiy xudoga nola qiladi. –E xudoyim, podshohimiz haq bo‘lsalar, qilich qilichligicha, agar vazir haq bo‘lsalar qilichimni tig‘ini taxta qilib qo‘y, deb munojaat qiladi. Qilich sermaydi.

– Adolatli xudoyimdan aylanay, vazir haq ekan, mana podshohim o‘zingiz ko‘ring. Hasan Kayfiy bunday burilib qarasa, taxtda “Hazrati Xizir” o‘tiribdi.

– E, ha, - dedi Hasan Kayfiy, - Xizir ham o‘zim, podshoh ham o‘zimman, desangiz-chi, tilimiz bitta deng, qo‘sha-qo‘sha karomatlaridan sezingiragan edim-a, taqsir.

Shunday qilib, podshohi olam Hasan Kayfiyni e‘tiqodidan judo qila olmaydi. Uni beburt, yaloqchi, tobe odam qiyofasiga aylantiraolmay, saroydan quvib soladi. Hikoya Hasan Kayfiy umrini oxirigacha o‘z aqli, o‘z mehnati soyasida farovon hayot kechirmoqda, deb xotima topadi.

Hikoyada barcha sun‘iy evrilishlar soxtaligi ayon bo‘lib izza bo‘lishadi. O‘z e‘tiqodiga sobit Hasan Kayfiy esa har qanday og‘ir, murakkab vaziyatlarda ham o‘zligini saqlab qola biladi. Mening nazarimda, mazkur hikoya tag matnida xudo ham o‘zim, payg‘ambar ham o‘zim, deb xudosizlar jamiyatini qurgan sho‘rolar saltanatiga o‘qilgan qat‘iy hukm yotadi.

Adabiyotlar ro‘yxati:

1. Мирзаева З. Фитрат асарларининг хорижда ўрганилиши. Ўзбек тили ва адабиёти. 2013. №2. 43-44-бетлар

2. Эшонкул Н. Мендан “мен”гача. –Т., Академнашр. 2014.

3. Ғ.Ғулом. Танланган асарлар. –Т., Ғафур Ғулом номидаги нашриёт матбаа-ижодий уйи, 2012.

G‘AFUR G‘ULOM SHE‘RIYATIDA AN‘ANAVIY MOTIVLAR TIPOLOGIYASI

**Xursanov Dilshod Baxtiyorovich
SamDU dotsenti**

Adabiyotshunoslikda motiv tushunchasini XX asr boshlaridayoq o‘rganish va tahlil qilish boshlangan. Epik asarlar ko‘lamida motiv tushunchasini sujet takrori va obrazlarning ketma-ket bir xil ma‘no ifodalashi orqali aniqlash holatlari ko‘p uchraydi. Xalq og‘zaki ijodiyoti afsona va rivoyatlarda, ertaklar va masallarda, dostonlarda motivlar asosiy ahamiyat kesb etadi.

Demak, motiv - bu folklor yoki badiiy adabiyotning ma‘lum bir hikoya qilish an‘anasi doirasida olingan semantik jihatdan o‘xshash voqealarning, obrazlarning umumlashtirilgan shakli. Motivning semantik tuzilishi markazida sujetni harakatlantiruvchi aniqlik, obrazlar tizimi hamda badiiy zamon va badiiy

makon xususiyatlarini tartibga soluvchi bir turdagi predikat turadi. S.Yu. Neklyudov folklorshunoslikda motiv nazariyasi bo'yicha tadqiqotlar olib boradi. U motivni "filologik tadqiqotning eng qiyin o'rganiladigan mavzulari qatorida" deb hisoblaydi. Shu bilan birga, muallif "bu tushuncha folklorshunoslar va umuman, an'anaviy adabiyot tadqiqotchilari uchun mutlaqo zarur bo'lib qolayotganini, na semantik, na sujet-kompozitsion tahlillarni usiz amalga oshirib bo'lmashligini" ta'kidlaydi. Olim motiv va sujetni "bir qism va bir butun (shu jihatdan qaralganda, motiv sujetning ajralmas elementi hisoblanadi)" – deb o'zaro bog'laydi. Uning fikricha, sujet bir motivga emas, balki o'zaro bog'liq bo'lgan bir qator motivlarga mos kelishini, motivning sujetga aylanishi va aksincha, sujetning motiv orqali harakatlanishi ta'kidlab o'tadi [1.236-247]. Yana bir rus adabiyotshunosi B.N. Putilovning fikricha "Motiv epik hikoyalar tizimining elementidir. Motiv ana shu tizimning bir qismi sifatida ko'rinadi hamda motivning sujet tarkibida konkret mazmuni to'liq namoyon bo'ladi. Boshqa motivlar (va boshqa tipik elementlar) bilan birgalikda bu motiv ana shu tizimni tashkil qiladi.

Demak, sujet motivlar tizimi bo'lib, bu tizimning elementlari sifatida u ham o'ziga xos tuzilishga, o'ziga xos xususiyat va funksiyalarga ega mikrotizimlarni ifodalaydi" [2. 141-155]. Umuman olganda olimning fikrlariga qo'shilmasdan iloj yo'q. Sababi har qanday epik hatto dramatik asarlarni sujet va kompozitsion jihatdan o'rganishda sujetni harakatlantiruvchi kuch bu motiv ekanligini anglaymiz. Yoki, mavzu va badiiy g'oya atrofida fikr yuritilishida xohlamasangiz ham motivlar bilan to'qnash kelasiz.

Shu o'rinda, epik asarlardan farqli ravishda lirik asarlarda ham motivlarni o'ziga xos xususiyatlarini tahlil qilishda uch asosiy jihatga, xususan, voqelikka (voqeband she'rlar uchun), obrazlarga (bir davrda yashagan shoirlar ijodida takrorlanuvchi) hamda mavzu bilan bog'lashga e'tibor qaratish lozim deb hisoblaymiz. Lirikadagi motivning o'ziga xosligi ko'p jihatdan lirik kechinmaning mavzusi bilan bog'liq bo'lib, epik asar sujeti va kompozitsiyasidagi motivdan farq qiladi. Epik asarlarda motivlar biroz kengroq tushunchalarni anglatadi. Shu bilan bir qatorda yozuvchida motivlarni kengaytirish yoki chegaralash imkoniyati yuqoriroq bo'ladi. Jahon adabiyotshunosligida ko'p hollarda mazmun mohiyatan lirik kechinmaning asosi epik voqea hisoblanishini ta'kidlashadi. Chunki unda tanlangan mavzu orqali lirik qahramon hissiy holatini dinamik o'sib boruvchi kechinma ifodalashi bilan bog'lashadi [3. 159.].

M.M.Baxtin epik voqea hikoya qilingan voqea hisoblanib, hikoya orqali ob'ektivlashtirilgan va shuning uchun o'quvchi yoki tinglovchidan ajratilgan voqea ekanligini ta'kidlab o'tadi. Ya'ni, bo'layotgan voqea kitobxonning yoki aynan asar muallifining boshidan kechirgan hodisalari emas, badiiy makon va zamon ham bir maromda davom etmaydi, u bevosita kitobxon va muallifdan ajratilgan, to'g'rirog'i ob'ektivlashtirilgan voqea hisoblanadi. Lirik kechinma esa sub'ektivlik kasb etib, lirik mavzu orqali to'g'ridan-to'g'ri o'quvchini ayni payt zamoni bilan bog'laydi. Bu holatni quyidagicha ifodalash mumkin: lirik mavzu (yoki matn kontekstida) orqalilirik qahramon o'y-kechinmalari kitobxonni junbushga soladi, kechinmalar birlashib ketib, bir butunlik hosil qiladi. Kitobxon ayni payt lahzasida

go'yoki uning dardini aytayotgandek, uning kechinmasi haqida so'z borayotgandek his qiladi.

Boshqacha aytganda, lirik hodisa bevosita aktuallashtirilgan kechinmada sodir bo'ladi. O'zining elementar shaklida bu o'ziga xos kechinma lirik asar janrlarida namoyon bo'ladi. Atrofdagi ro'y berayotgan hodisalar (ham keng ma'noda, ham tor ma'noda) lirik mavzuni idrok etishda aktuallashtiriladi va muallif tomonidan sub'ektivlashtiriladi. Bunda qaysidir ma'noda har ikki tamonning dialogik uchrashuvi mavjud. Lirik sub'ekt va muallif tomonidan sub'ektivlashtirilgan idrok ob'ekti. Shoir lirik sub'ektning o'zi. Umuman olganda, she'riy matn yordamida kechinmaning mohiyatini oxirgi formulaga qo'yish mumkin: qisqartirish bu lirik sub'ekt holatining o'zgarishi bo'lib, lirik sub'ektning o'zi uchun ekzistensial ma'noga ega va o'quvchi uchun estetik ma'noga ega.

Ko'rinib turibdiki, lirikadagi motiv tabiati mohiyatan bir xil. Shu bilan birga, yuqorida aytib o'tilganidek, lirika va dostonidagi voqea-hodisalar tabiati tubdan farq qiladi. Lirik kechinmaning o'zi ham epik voqelikdan farq qiladi. Lirik matndagi shoir kechinmasi voqelikning sintagmatik maydonidan tashqarida yuzaga keladi va shuning uchun tashqaridan qaraganda tartibsizdek ko'rinadi. Shuning uchun ham lirik asarlar har qanday hodisa haqida ma'lum bir qoliplarga tushadigan voqelikni yoritadi.

Lirik asarlar ma'lum bir voqelikka emas, hissiy kechinmaga asoslanadi. Shuning uchun she'riyatga xos bo'lgan takrorlar lirikani buzmaydi, aksincha, ohangdorlik, ritmni yuzaga keltiradi, lirik mavzuning originalligini saqlaydi. Motiv va mavzu ortasidagi munosabat ham lirikada aynan shu uchun bir-biri bilan chambarchas bog'liqdir. Lirikaning har bir motivi faqat tematikdir va har qanday motivga ma'lum bir mavzu berilishi mumkin. Lirik mavzu faqat motivistik xususiyatga ega va motivlar mavzuning o'ziga xos predikati sifatida uni rivojlantiradi. Shu bilan birga, lirik mavzu o'zining asl motiviga ko'ra retrospektiv hikoya mavzusidan farqli o'laroq, kelajak vaqtini ham ifodalay oladi.

Lirik asarlarda motiv sifatida takrorlanuvchi obrazlar ham alohida ahamiyatga ega hisoblanadi. Epik asarlardagi takrorlanuvchi obrazlardan lirik asarlardagi takrorlanuvchi obrazlar o'zining chegaraviyligi bilan bir-biridan farq qiladi. Lirik asarlardagi obrazlar torayish va kengayish xususiyatiga ega. Unda muallifning aynan nimaga urg'u berishiga bog'lanadi. Masalan, lirik hodisaning lirik mavzu bilan bog'liqligi hamda lirik qahramon bilan bog'langan ya'ni shaxslashtirilgan lirik kechinma ifodasi hisoblanadi. Uchinchisi, lirik kechinma shoirning pozitsiyasi bilan bog'liq bo'lganda, bu ko'pincha matn tahlili orqali ko'rinib turadi. Motivlar doirasida takrorlanuvchi poetik obrazlar hamda tagma'noga ega motivlarni yuqorida sanalgan jihatlar orqali tahlil qilish biroz qulaylik tug'diradi.

Ana shunday takrorlanuvchi motiv doirasidagi obrazlardan yo'l obrazi shoir G'afur G'ulom she'riyatida ham keng qo'llanilgan. Shoirning "Turksib yo'llarida" she'rida yo'l obrazi erk ozodlik motivlarini ifodalab kelishi bilan bir qatorda kengayish hodisasi orqali tarixni ham ifodalab keladi.

Bu yo'llar

ko'p qadim yo'llardir..

Jahonning fotihi Iskandar,
Rum qaysari,
qotil Chingiz,
Botu, Jo'ji,
Temur ham
qoldirib kimsasiz iz,
Chindan mo'g'ul o'chi
borliqni
jonliga qilib tang:
- Qon! - deya,
- Qon! - deya

bosaroq kechmishdir [5. 14].

Shoir she'riyatidagi yo'l motivi semantik jihatdan bir necha qo'shimcha motivlarga ham yo'l ochib beradi. Matnda anglashilgan nechalab sultonlar o'tdi, nechalab xonlar o'tdi. Ularning hech qaysi abadiy qolmadi. Faqat ular bosib o'tgan yo'l abadiydir degan ma'no kelib chiqsa, ikkinchi talqinda bu yo'llardan har kim yurishi mumkin, fitnalar, qonxo'rlar, qullar, olimlar o'tdi. Bu yerda obrazlar bir-biriga qarama qarshi qo'yilmoqda.

Anteteza orqali she'r mazmuni asta-sekinlik bilan ochib beriladi. Matnlarida amalga oshirilgan motivlar ham ma'lum darajada qarama-qarshi ekanligini ko'rishimiz mumkin. Qisqartirish g'oyasi bilvosita majburiy to'xtash, harakatni yo'qotish ma'nosini o'z ichiga oladi va bunda shohlar bosib o'tgan yo'l faqirlar bosib o'tgan yo'l g'oyasiga qarama-qarshidir. She'rning so'nggi bandida shoirning asl g'oyasi ifoda etiladi va yuqorida sanalgan ko'plab obrazlarning harakat denamikasi bir maqsadni ifodalash uchun xizmat qiladi.

Bu yo'llar,
bu qadim yo'llar
Ustiga bu izdan obida,
abadiy xotiraki, bundan
to'xtamay bir nafas,
Qon -
Qatron hidimas,
Ozodlik

shamoli esajak... [5. 19].

Oxirgi band poetik g'oya uchun asos vazifasini o'taydi. O'zbek adabiyotshunoslik lo'g'atida lirik motivlarga quyidagicha ta'rif berilgan: "Lirikada ham motivlar keng o'rin tutadi. Xususan, an'anaviy tarzda ishlatiluvchi "oshiq – yor – ag'yor", "kutayotgan oshiq – kelmagan yor", "borlig'ini tutgan oshiq – beparvo yor" singari qator lirik syujet motivlari turli variantlarda qo'llanib, lirik qahramonning turfa o'y-hislarini lo'nda va ta'sirli ifodalashga xizmat qiladi. Shuningdek, bir shoir ijodi yoki bir davrda yashagan shoirlar ijodi MOTIV doirasida takrorlanuvchi poetik obrazlar motiv-obrazlar sanaladi. Masalan, Cho'lpon she'riyatida "yo'lchi", "yo'l", "yulduz" poetik obrazlari juda ko'p qo'llangan bo'lib, ular Elbek, Botu, Oybek, U.Nosir asarlarida ham tez-tez uchraydi. Shu o'rinda motivlarning tagma'noga ishora qilish funktsiyasini ham

ta'kidlash joiz. Jumladan, "yo'l", "yo'lchi", "yulduz" motivlari ijtimoiy mazmunga ("yo'l" – kurash, "yo'lchi" – kurashchi, "yulduz" – maqsad) ishora qiladi. Poetik motivlar mazmun jihatidan muayyan "uya"ni tashkil qiladi, "uya"dagi motivlar matnda aksar hollarda birga qo'llanadi yoki nazarda tutiladi (masalan, "qush" motivi hamisha "parvoz"ni nazarda tutgan holda anglanadi). Tildagi so'zlar kabi motivlar ma'no jihatidan kengayib yo torayishi, ba'zan esa tamomila o'zgarib borishi mumkin. masalan, mumtoz she'riyatda "yor" – Haq, "oshiq" – Haq yo'lidagi so'fiy, "visol" – Haqqa yetish ma'nolarini bergan bo'lsa, Cho'lpon she'riyatida ular ijtimoiy mazmun kasb etadi: "yor" – erk, istiqlof, "oshiq" – erk va istiqlof yo'lidagi kurashchi, "visol" – maqsadga erishish [4. 180-181].

Shoirning "Sog'inish" she'ridagi sog'inch motivida ham ma'no kengayish hodisasi kuzatiladi. Lirik qahramonni ruhiy qiynaydigani farzandi urushga ketgani. O'z farzandini sog'ingan ota obrazida gavdalanadi. Biroq, bandlar ketma-ketligida ijtimoiy mavzular bir-bir ochiladi. Sog'ich motivi uchun har bir misra asos vazifasini o'taydi.

Zo'r karvon yo'lida yetim bo'tadek,
Intizor ko'zlarda halqa-halqa yosh.
Eng kichik zarradan Yupitergacha
O'zing murabbiysan, xabar ber, Quyosh!
Uzilgan bir kiprik abad yo'qolmas,
Shunchalar mustahkam xonai xurshid,
Bugun sabza bo'ldi qishdagi nafas,
Hozir qonda kezar ertagi umid.
Xoki anjir tugab, qovun g'arqpishgan
Baxtli tong otar chog' uni kuzatdim,
Bir mal'un gulshanga qadam qo'ymishkan,
Joni bir jondoshlar qolarmidi jim! [5. 47].

Yuqoridagi she'rni motiv nuqtai nazardan tahlillarida faqatgina semantik jihatiga e'tibor qaratmaslik kerak. Aks holda asosiy ifoda mazmuniga putur yetishi mumkin. Motiv faqat matnning bir qismi emas, balki sujet tuzuvchi birlik ekanligiga oydinlik kiritish uchun morfologik tahlil qilish zarurati ham yuzaga keladi. Bu kabi hollarda ichki va tashqi jihatlarini hisobga olamiz.

Birinci vosita uning hajmi submodallikning spetsifikatsiyasining eng yuqori darajasi sifatida mikromotiv tanlanadi. Matnlarni modellashtirishda asosiy birlik sifatidagi motivning sujet xilma-xilligi bilan qanday bog'langanligini aniq ko'rsatish uchun motiv va sujetning bir-biri bilan qisman va yaxlit aloqadorligi aniqlanadi. Motivlarni tanlashda og'zaki matnlarda syujet turlarini tizimlashtirish muhim hisoblanadi. Bunday tahlilni qilishda Polsha maktabi vakillarining folklor tajribasi hisobga olinsa maqsadga muvofiq bo'ladi. Ular "motiv va syujet" muammosining jahon miqyosidagi fundamental nazariy ishlanmalariga asoslanib, motivning bir nechta funktsiyalarini ajratib ko'rsatadilar. Qomusiy, informativ-qidiruv, eksplikativ, modellashtirish. Takror obrazlarning qaysi qismlarini aniqlash imkonini beruvchi matn variantlarini taqqoslash ajralmas integral tuzilmalar hisoblanadi. Bu matnning kompozitsion tuzilishini anglatadi. Tahlilning ikkinchi usuli matn qismlari o'rtasidagi ichki munosabatlarni o'rganishga asoslangan bo'lib,

bu mavzuning rivojlanishidagi o'zgarishlar, niyat, nutq kabi sub'yektlarining o'zgarishini o'rganishni bildiradi.

Tadqiqotchining ta'kidlashicha, matnning ichki tahlili matnning matn morfemalari deb atalishi mumkin bo'lgan qismlarini ajratib ko'rsatish, belgilash imkonini beradigan motijumlalardir. Ular turlicha bo'lishi mumkin. Masalan, eng pastdan (barqaror mantiqiy bo'lgan matndagi so'z va gaplardan foydalanish) eng yuqori mavhumlikkacha olinadi. Shoirning "Sog'inish" she'riga nisbatan aynan morfologik tahlilni qo'llashda bizga metamotiv va motiv tushunchalarini aniqlash imkonini beradi.

Umuman olganda, G'afur G'ulom she'riyatidagi motivlar xilma-xillikni tashkil qiladi. Undagi mavzu ko'lamdorligi orqali bir necha motivlar orqali amalga oshirilganligini ko'rishimiz mumkin.

Adabiyotlar:

1.Мотив и текст // Язык культуры: семантика и грамматика. К 80-летию со дня рождения академика Никиты Ильича Толстого (1923—1996). М., 2004. – С. 236-247.

2.Путилов Б.Н.. Мотив как элемент сюжета. [В:] Типологические исследования фольклора. Сборник статей, посвященный памяти В.Я. Пропп (1895-1970). Москва: Наука, 1975. – С. 141–155.

3.Чумаков Ю.Н. Сюжетная композиция в русской литературе, 1980. – С. 159.

4.Quronov D., Z.Mamajonov, M.Sheralieva. Adabiyotshunoslik lug'ati – Toshkent: Akademnashr, 2013. – 408 b.

5.G'afur G'ulom. Tanlangan asarlar. Nazm va nasr. — Toshkent: G'afur G'ulom nomidagi nashriyot-matbaa ijodiy uyi, 2012. –352 b.

BADIIY ASARLARDA SHAXS ADABIY PORTRETINI YARATISH

**Ubaydullayev Normuhammad,
pedagogika fanlari bo'yicha falsafa
doktori (PhD)**

O'quv jarayonida material tanlashda o'quvchilarning yoshini, ularning tafakkur doirasi va tanlangan adabiy matnning bola tarbiyasidagi rolini hisobga olish muhim ahamiyat kasb etishi ma'lum. Umumta'lim maktablarining 6-sinf o'quvchilariga mo'ljallangan "Adabiyot" darsligida G'afur G'ulom hayotiga doir avtobiografik ma'lumotlar sifatida Said Ahmadning 2000-yilda nashr qilingan "Yo'qotganlarim va topganlarim" [Said Ahmad, 2000:42] nomli xotiralar kitobidan olingan parcha keltirilgan. Unda Said Ahmad va G'afur G'ulomning munosabati, "Shum bola" asarini yozilish jarayonidan bir lavha hikoya qilingan. Adibning hayot yo'li haqidagi qo'shimcha manbalarning keltirilishi o'quvchi bilimi va tafakkuri doirasini kengaytirishga xizmat qiladi.

O'zbek yozuvchisi va shoiri G'afur G'ulomning "Shum bola" qissasi avtobiografik xarakterga ega. Muallif asarni 1936-yil yozgan. Qissa bir necha marta nashr qilingan. Qissada ijodkorning bolaligi, XX asr boshidagi ijtimoiy hayot tasvirlangan.

Qissa o'tkir hajviy asar bo'lib, haqiqiy voqealar va shaxslar taqdiriga asoslangan. Asar markazida yozuvchining hayotidan olingan ko'p faktlar turgan bo'lsa-da, uni to'liq avtobiografik asar, deya olmaymiz. Unda haqiqiy tarixiy faktlarga nisbatan badiiy to'qima, fantaziya kuchli.

Qissada shum bola Qoravoy haqida hikoya qiladi. Qoravoy uyidan ketib qolib, o'zining topqirligi, zukkoligi, sho'x-shaddodligi tufayli turli sarguzashtlarni boshidan kechiradi. Yozuvchining yetimlikda o'sgan bolalik xotiralarini shum bola obrazida namoyon bo'ladi. To'g'ri, asarda to'qimalardan ham o'rinli foydalanilgan, biroq asosiy voqealar adibning ko'rgan-kechirganlari asosida bayon qilinadi. Asarda bolaning o'y-xayollari bilan birga o'sha davrning eng qorong'u kunlari tasvirlangan.

Adabiyotshunos O.Toshboyev Oybekning "Bolalik xotiralarim" asarining yaratilishini quyidagicha talqin qiladi: "Bolalik xotiralarim" – Oybekning bitmagan, bitolmagan asarlari, shonli tarixdan hikoyalar so'ylab bergan ardoqli insonlar ruhi oldidagi uzrxohligi, so'ngsiz armoni, tazarrusi... Bu uzrxohlik "Ulamolarni izzat qiling, shariatni, oxiratni o'ylang, ahli ulamo – xalqning yolg'iz rahbari" deya o'git bergan domlari; ko'zini ochgan Tavalloyu Behbudiylar, Cho'lponu Munavavvarqorilarga izhor etilgan. Ha, bunday iztirobli hol qalbini imon nuri tark etmagan har bir insonda, ayniqsa, ijodkorda ro'y berishi shubhasiz. Adib yarim asrlik umrini sarhisob etar ekan, Mirahmad sarbozlar alamini, yurtda muqimboy bo'lib qolgan mochalovlar kirdikorini, qinda qolib ketgan qilichlar armoniyu shimolda jon taslim etgan mardikorlar dodini bita olmaganiga o'kingan. Mana shu o'kinch va qarzdorlik hissi fursati yetib "Bolalik xotiralarim"ga aylanadi [Toshboyev, 2020:22].

Olimning bu qarashlari to'g'riligini Abdulla Qahhorning avtobiografik bitiklar borasidagi fikrlari ham tasdiqlaydi. "Ko'pchilik kabi men ham, – deb yozadi A.Qahhor, – "yozuvchilik" nimaligini, shaxsiy tajriba, taassurotlar adabiy asar uchun nihoyatda qimmatli material bo'lishini tushunib olgunimga qadar ancha ovora bo'lganman. Buni bilib olganimdan keyin bolalik chog'imda ko'rganim, odamlar, yoshligimda sodir bo'lgan voqea-hodisalar boshqacha bo'lib ko'rindi. O'tmish chuqur yerto'lalardagi sharob singari xotirada tiniydi, oradan qancha vaqt o'tsa, sharob shuncha tinik, va kuchli bo'lganiday, yoshlikda ko'rgan-kechirganlar eng sof va kuchli xotiralar bo'lib, umrbod esdan chiqmaydi. O'tmishdagi ana shu taassurotlarim keyinchalik, ko'pgina hikoyalarim uchun asos, yirik asarlarimga epizodlar bo'lib xizmat qildi".

"O'tmishdan ertaklar" yozuvchi ijodining o'ziga xos yakuni, so'nggi cho'qqisi bo'ldi. "O'tmishdan ertaklar" muallifning bolalikda ko'rgan-kechirganlari haqidagi avtobiografik asar, biroq o'zbek adabiyotidagi mavjud avtobiografik asarlardan, ya'ni Oybekning "Bolalik" qissasidan keskin farq qiladi. Bola obrazi Oybek qissasida birinchi o'rinda tursa, "O'tmishdan ertaklar"da bola Abdulla obrazi orqa o'rinda turadi, u asosan "kuzatuvchi", "guvoh", "xolis hikoyachi" tarzida beriladi; yozuvchining asosiy diqqat-e'tibori bola guvohligida oilada, oila tevaragida yuz bergan voqyealarni chizishga qaratilgan. Qissada yozuvchi hikoyanavisligicha qoladi, oxirgi "Qo'qon xarobalari orasida" bobini mustasno etganda, qissaning sarlavhalangan deyarli har bir bobi tugal hikoyadir,

fojeali ruhdagi voqyeiy novellalardir. Qissada inson sha'ni, qadri bilan bog'liq alamli o'y-tuyg'ular, jaholatga qarshi isyon bu qissada adibning so'nggi faryodi kabi yangradi [A.Qahhor, 1973:196].

O'zbekiston xalq shoiri Anvar Obidjon o'zining "Ajinasi bor yo'llar" qissasida bolalik xotiralari, turmush kechinmalari haqida yozayotib, otasini eslaydi: "Dadam arab, lotin, kirill imlolarida bemalol o'qib-yoza olsa-da, dunyoviy ilmlarga, siyosatga o'ta befarq edi. Ayniqsa, eshonlar sulolasidan bo'la turib, diniy ilmda ham oqsoqligi ko'plarni taajjubga solardi"[Anvar Obidjon, 2014:1-2-sonlar].

Olima Qunduzoy Husanboyevaning "Tahlil – adabiyotni anglash yo'li" kitobida maktab darsliklaridagi avtobiografik xarakterga ega bo'lgan asarlar haqida to'xtalib, shunday deydi: "Oltinchi sinf "Adabiyot" darsligida ulug' yozuvchi Odil Yoqubovning hayoti va ijodi haqida ixcham ma'lumot berilgan. O'rganilishi lozim bo'lgan "Muzqaymoq" hikoyasi ham xuddi Erkin Vohidovning "Nido" dostoni singari qaysidir darajada avtobiografik xarakterga ega. Shuning uchun ham bu maqolani o'qib kelish avvalgi darsning oxirida uy vazifasi sifatida topshiriladi. Birinchi darsda adib shaxsini ochishga, uning og'ir bolalik yillari haqida tasavvur paydo qilishga ozgina vaqt ajratiladi. O'quvchilar e'tibori "Muzqaymoq"da aks etgan tarixiy sharoit, adibning bolaligidagi qatag'on yillarida yuz bergan adolatsizlik va yovuzliklar uning shaxsi shakllanishiga, yozuvchilik taqdirida qanday iz qoldirganiga qaratilishi maqbul bo'ladi" [Husanboyeva, 2013:200-201].

O'zbek adabiyotida xotira tarzida bitilgan avtobiografik bitiklar ko'p. Xotiralar va avtobiografik asarlarni o'zaro taqqoslaganimizda ular orasida quyidagi farqlar mavjudligi aniq bo'ladi.

Avtobiografik asar tuzilishi, asar kompozitsiyasi xotiralardan tubdan farq qiladi. Ularda muallif hayoti bilan bog'liq voqealar ma'lum bir tizim asosida bayon qilinadi. Xotiralarda esa ma'lum shaxs hayotining so'zlovchi xotirasida qolgan qisqa bir davri hikoya qilinadi. Avtobiografik asarda voqealar muayyan yakuniy tugallikka ega bo'ladi. Xotiralar esa qisqa voqealarni qamrab oladi. Ularni yirik hajmli asardan uzib olingan parcha deyish mumkin. Avtobiografik asarlar asosan badiiy ijod bilan shug'ullanuvchi kishilar tomonidan yaratiladi. Xotiralar esa turli kasb egalari tomonidan yozilaveradi. Avtobiografik asarlarda badiiy uslubga xos bo'lgan xususiyatlar kuchli bo'ladi. Ularda ifoda tasvir vositalari, badiiy san'atlar ko'p qo'llaniladi. Xotiralarda esa so'zlashuv uslubi ta'siri yaqqol sezilib turadi, bayon yetakchilik qiladi. Avtobiografik asarlarda muayyan shaxsning adabiy portreti yaratiladi. Xotiralarda esa asosan bu haqda qisman ma'lumot beriladi.

Avtobiografik asarda hujjatlarga tayanib ish ko'riladi. Tarixiylik, aniqlik, hujjatlilik unga xos belgilardan hisoblanadi. Garchi real borliq va aniq shaxs hayotini aks ettirishga bag'ishlangan bo'lsada, avtobiografik asardan badiiy mukammallik, estetik butunlik talab etiladi. Bu tipdagi asarlarning badiiyligi borasida so'z ketganda prof.D.Quronovning quyidagi fikrlarini keltirish o'rinli bo'ladi: "Biografik material (yozuvchi hayoti va faoliyati bilan bog'liq hujjatlar, u harakat qilgan muhit va shu muhit kishilari bilan o'zaro aloqalari haqidagi ma'lumotlar, uning yozishmalari, u haqdagi xotiralar va b.) qancha boy bo'lsa, metodni qo'llash shuncha samarali natijalar beradi. Albatta, biografik material mutlaq to'liq bo'lmaydi, ya'ni yozuvchining hayotini kunma-kun hujjatli asosda

tiklash mahol. Shuning uchun biografik material muallif hayotiga oid faktlarni jonlantirish, yetishmagan o‘rinlarni to‘ldirishni ham taqozo etadiki, bu hol unga gipotetik unsurlarni ham olib kiradi” [Quronov, 2013:72].

O‘qituvchi ijodkorning tarjimai holi haqida o‘quvchilarga ma’lumot berishda u haqda darsliklarda qayd etiladigan barchaga ma’lum ma’lumotlarni takrorlash o‘rniga yozuvchi to‘g‘risida bolalarda hayrat uyg‘otadigan, taqlid qilishga chorlaydigan o‘ziga xos xatti-harakat, tutum, odat singarilarni bildirishi maqsadga muvofiq bo‘ladi. Buning uchun o‘qituvchi o‘z ustida tinimsiz ishlashi, mustaqil izlanib, ijodkor hayotiga doir o‘quvchilar e’tiborini tortadigan ma’lumotlarni topib, yig‘ib borishi lozim bo‘ladi.

Bu borada, ayniqsa, ijodkorning zamondoshlari tomonidan u haqdagi xotiralar yoki ijodkorning o‘zi haqida yozganlari, turli maktub va yozishmalardan foydalanish mashg‘ulotlarning mazmunli chiqishini ta’minlaydi. Yaratgan asarlari ham ijodkorning shaxsiyatiga doir muayyan ma’lumotlar berishi mumkin.

Foydalanilgan adabiyotlar:

1. Анвар Обиджон. Ажинаси бор йўллар. –Т., // Шарқ юлдузи. 2014. 1-2-сонлар.
2. Қаххор А. Ҳаёт ходисасидан бадий тўқимага: Адабиётимиз автобиографияси. – Т., 1973, -Б.196.
3. Quronov D., Mamajonov Z., Sheraliyeva M. Adabiyotshunoslik lug‘ati – Toshkent: Akademnashr, 2013.-B.72.
4. Саид Аҳмад. Танланган асарлар. III жилдлик. III жилд. –Т.: “Шарқ” нашриёт-матбаа концерни, 2000. Б.42-45.
5. Toshboyev O. Kitobga sig‘magan haqiqatlar. – “Tafakkur” jurnali, 2020. 3-son.
6. Ҳайитметов А. Адабий меросимиз уфқлари. –Т.: Ўқитувчи, 1997.-Б.235.
7. Husanboyeva Qunduzoy. Tahlil – adabiyotni anglash yo‘li. – Toshkent: Muharrir, 2013.-B.200-201.
8. <http://library.ziyounet.uz/uz>
9. <https://www.google.com/search.q=utmishdan+ertaklar+asari+haqida>

“SHUM BOLA” QISSASIDA BEGONALASHUV

**Umrzoqov Rustam,
FarDU katta o‘qituvchisi, filologiya fanlari
bo‘yicha falsafa doktori (PhD)**

Adabiyot tarixida bola obrazlari ko‘p. Ularning aksariyati ismsizligi, oddiygina Bola nomi ostida atalishi bilan umumiy xarakterga ega. Lekin badiiy obraz yaratishda ramz va sifatlashlardan ustalik bilan foydalanuvchi G‘afur G‘ulom o‘z qahramonini shunchaki bola emas, SHum bola deb ataydi. Qissa yaratilgunga qadar o‘zbek adabiyotida SHum kampir obrazi bor edi, Shum bola o‘z nomi bilan yangi obraz sifatida gavdalanadi. Asarda Shum bolaning aniq ismi yo‘q, aynan uning turdosh nomda bo‘lishidan muallif ma’lum badiiy maqsadlarni ko‘zlagan. Bunga keyinroq to‘xtalamiz. Qissa davomida Shum bola so‘zi bor-yo‘g‘i ikki marta aytiladi. Birinchisi bozordagi sartarosh tilidan:

“ – Pulini berib ket, bu er Salmon pokning dastgohlari, u kishini aldab bo‘lmaydi, bolam, kal bo‘lish, boshga moyxo‘rak toshish, temiro‘tki – hammasi, Salmon pokning haqlarini eganlikdan bo‘ladi, dedi.

–Ustara, qayroq, lungining iflosligidan emasmi? – dedim.

–Til tekkizma, shum bola!

Sartaroshning haqi – bir paqirni berib, shosha-pisha olomon ketidan sarrochlik tomonga yugurdim” [1,252-bet]. Ikkinchi marta Shum bola o‘z tilidan aytadi: “Har galgidek sho‘x-shatir “shum bola” bu erda yo‘q edi. Bu holatimdan Hoji bobo anchagina tashvishga ham tushdi shekilli, hindi bo‘lsa, undan beshbattar” [1, 267-bet]. Ko‘rinadiki, qissa qahramoniga Shum bola nomini sartarosh bergan.

Qissada “qaerga boraman”, degan savol ko‘p qo‘llangan. Yuzaki qaraganda Shum bola bu savolni boshpanasiz, pulsiz, chorasiz qolganda o‘z-o‘ziga beradigandek tuyuladi. Aslida bu savol negizida ertangi kunni, kelajakni ko‘ra olmaslik, katta turmush arafasidagi o‘spirinning mustahkam e‘tiqodi va hayotiy rejasi mavjud emasligi fojiasi bor. E‘tiqod emirilishi, davr va ruhiyat mutanosibligini ifodalovchi ushbu ritorik so‘roq ko‘p shum bolashunoslar e‘tiboridan chetda qolgan. Bizningcha, bu savol asar o‘qildizini tashkil qiladi.

Ijtimoiy-siyosiy hayotdagi muammolar bola e‘tiqodining emirilishiga olib keladi. Shum bola sarguzashtlari davomida ijtimoiy hayotning bir qancha illat va kirdikorlarini fosh etadi. Voqealar davomida fosh etish uning asosiy quroliga aylanadi. Ana shu fosh etish jarayonida unda jamiyatga nisbatan nigilistik negativ qarash shakllanadi. Qissa avvalida faqat kuzatuvchi maqomida turgan Shum bola tanishtiruv orqali bosqichma-bosqich dinamik faollikka kirib boradi. U o‘z uyidan ham masofa jihatdan, ham ruhiy jihatdan qadam-baqadam uzoqlashadi. Ammasining uyi Shum bola uchun katta sarguzashtga bosqich vazifasini o‘taydi. Onalik, ammalik – oila, qarindoshlik iplari sekin-astalik bilan uzib boriladi. Haqiqatan ham bolaning to‘satdan katta begona muhitga otilib chiqib ketishi to‘g‘ri bo‘lmasdi.

Real hayotda ham shunday. Uzoqlashuv, begonalashuv birdaniga emas, bosqichma-bosqich bo‘ladi. Oiladan uzoqlashgan, ota-ona tarbiyasidan chetda bo‘lgan Shum bola sekin-asta shumliklar ko‘rsata boshlaydi. Lekin biror o‘rinda o‘g‘irlikka, jinoyatga qo‘l urmaydi. Bu jihatni muallifning sharqona qarashi bilan izohlash mumkin. Shum bola qaerga bormasin, uning psixologik holati frustratsiya (omadsizlik, maqsadga etolmaslik) bilan yakunlanadi. Natijada unda fosh etishdan tashqari zo‘ravonlikka yaqin bo‘lgan qasd olish tuyg‘usi ham shakllanadi. Tandir ichida yotib, jazman yigitdan pul talab qilishi, takyaxona ahlini manqaldonda shishada suv qaynatib qo‘rqitishi epizodlarida unda o‘ch olish istaklari shakllangani ko‘rinadi. Bolalar ongida voqelikdan nusxa ko‘chirish qobiliyati rivojlangan bo‘ladi. G‘afur G‘ulom qissada bundan ustalik bilan foydalanadi. SHum bola harakatlari orqali kattalar dunyosi aks ettiriladi.

Etim o‘sganlarning ruhiyatidagi saktalikning ildizi aynan mana shu erda ko‘rinadi. Bola onaga ojizona ibtidoiy bog‘langanlik davridan, otaga itoatkorona bog‘lanish orqali balog‘at pallasiga qadam qo‘yadi. Bu davrda u ham ona, ham ota shaxsiyatidan xalos bo‘ladi. Agar oiladagi muhit, ota-onaning o‘z vazifasini to‘la

ado etmasligi yohud etimlik sabab bo'lsa, bolaning tasavvurlari o'zgaradi va bu undagi ishonchni emiradi. Aynan Shum bolada mana shu ishonch bosqichma-bosqich yo'qolib boradi. Uning uydan chiqib ketishi, ijtimoiy hayot ichida darbadar kezib yurishi, avvalo, unga, o'z-o'ziga va odamlarga bo'lgan ishonchsiz munosabati sabablidir.

Garchi Shum bola darbadar hayoti davomida ko'p bor o'ziga va yaqinlariga "uyga quruq qo'l bilan borishni ep ko'rmagan"ligini aytsa-da, asl masala qaytishga bo'lgan ishonchning emirilganida edi. Ayrim "Shum bola" tadqiqotchilari buni iqtisodiy qiyinchilik bilan bog'lashadi. Aslida katta hayotga qadam qo'yish arafasida turgan o'spirin yigitning pulsiz, muqim ishsiz, darbadar kezishiga davrning moliyaviy inqirozi emas, balki ma'naviy tanazzuli sababdir.

Zero, Andre Morua ta'kidlagandek, moliyaviy qiyinchiliklar hech qachon fojiona bo'lmaydi [2, 201-bet]. Hamma gap ma'naviy qashshoqlik, insonga, xususan, bola shaxsiga bo'lgan ishonchsiz munosabatda. Shum bolaga ishonchsiz munosabat, avvalo, oilada mavjud edi. Unga singlisi ham "-ha, ...o'lgur", deb murojaat qiladi [1,164-bet]. Ikki o'rinda nutqi keltirilgan onasining so'zlari ham "juvonmarg, zumrasha", degan faqat qarg'ish va tergashdan iborat. Mana shunday haqorat va kamsituvchi murojaatlar butun asar davomida uni tark etmaydi. U jamiyat a'zolari tomonidan "etim, etimcha, haromi" kabi so'zlar bilan kutib olinadi. Masalan, Shum bola butun qish bo'yi xizmatini qilgan Hoji boboning munosabatida o'sha davr ulug'larining bolaga bo'lgan tipik qarashlarini ko'rish mumkin.

Shum bolaning etimligi Hoji boboni ajablantirmaydi. U sovuqqonlik bilan ota-ona topiladi, deydi: "Hay, zararsiz. "Yaxshi buzoq ikki onani emibdi", degandek o'zing epchil bo'lsang, ota topib olasan. Otaki topiladi, ona degan o'z oyog'i bilan keladi". [1, 240-bet]. Qancha xizmat qilmasin, Shum bolaga Hoji bobo dargohida yaxshi munosabat bo'lmaydi. Xatto, Hoji boboning Shum boladan ko'ngli to'lib, kayfiyati chog' bo'lgan paytlarda ham "etim toylog'im", deb "erkalatib" qo'yadi, xolos. SHunday bo'lsa-da, Shum bola hech qachon umidsizlikka tushmaydi. U kurashuvchan, intiluvchan, hazilkash o'smir sifatida gavdalanadi. Bu bolalarga xos xususiyat bo'lib, obrazga ham ishonarli tarzda ko'chirilgan.

Qissadagi bola shaxsiga munosabatda o'sha davr jamiyati a'zolarining ma'naviy qiyofasini ko'rish mumkin. Shum bola qaerga bormasin, "kelgindi, sig'indi" sifatida qarshi olinadi. Tabiiyki, bunday munosabat shakllanayotgan bola xarakteriga salbiy ta'sir ko'rsatadi. Qissadagi qahramonlar xarakterida davr ruhi, o'sha toifa darajasi bilan birga bolaga, jumladan, etim bolaga bo'lgan munosabat real ifodalangan. Biz uchun qahramonlar xarakteridagi bolaga bo'lgan munosabat muhim. Chunki, bu munosabatlar muallifning bolaligi bilan bog'liq. Bolaning kelajakda ulg'ayib, ma'lum motivatsiyaga ega bo'lishi yoki xarakteri va taqdiri o'zgarishiga sabab bo'lgan munosabat uning ong ostida, ya'ni shuurida butun umr yashab qoladi. Natijada bolada jamiyatga nisbatan yumor vositasidagi fosh etish, o'ch olish hislatlari himoya quroli sifatida shakllanadi.

G'afur G'ulomning olamni badiiy idrok etishida muhim o'rin egallagan bolalik va o'spirinlik kategoriyalari ham alohida personajlar xarakterini yaratishda,

ham umumiy asarlarining badiiy konsepsiyasi uchun asos hisoblanadi. Yozuvchining bolalik va o'spirinlik haqidagi tasavvurlarini butun tafsilotlari bilan ko'rib chiqish, adibning badiiy olamiga yana-da chuqurroq kirib borishga yordam beradi.

Yuqorida qissaning turdosh nom bilan atalishida muallif ko'zlagan badiiy-g'oyaviy maqsadlar borligini aytgan edik. Odatda qissa janrining bosh talabi asar syujetidagi yagona qahramon hayotining drammatizmiga boy, lirik talqinga moyil lahzalarini tasvirlashga asoslanadi. Qissa voqelikni ask ettirishda yagona qahramon sarguzasht va kechinmalariga asoslanishi bilan ma'lum darajada sub'ektiv janr hisoblanadi. Shuning uchun ham ko'pchilik qissalarning nomi bosh qahramon ismi bilan atalib, syujet chizig'ida konkret personajlar bosh qahramon atrofida birlashadi. "Shum bola"da nisbatan turdosh ism va nomlar ko'p. SHulardan biri bosh qahramon nomidagi "bola" so'zi. Tilshunoslik ilmidan ma'lumki, "bola" bilan "farzand" so'zining qo'llanish o'rni va uslubida farqlar bor. "Bola" sof turkiycha so'z bo'lib, Mahmud Koshg'ariyning "Devonu lug'oti-t-turk" asarida "bala" tarzida umumiy ma'noda qush bolasiga nisbatan qo'llanadi. Shuningdek, bu so'z yirtqich va boshqa hayvonlarning yosh bolasiga ham istiora tarzida ishlatilishi aytiladi [3, 161-bet].

Ko'rinadiki, "bola" so'zi faqat inson bolasigagina qo'llanilmaydi. "Farzand" esa, tojikcha so'z bo'lib, "ota-onaning bolasi", degan ma'noni anglatadi [4, 232-bet]. Ya'ni farzand ota-onaning zurriyoti hisoblanadi. Shuning uchun ham badiiy asardagi bola va farzand obrazlarini farqlash kerak. Avtobiografik asarlarda qahramon ko'pincha farzand maqomida turadi. Bu esa, badiiy maqsadni amalga oshirishda qandaydir cheklovlarni keltirib chiqarishi mumkin. Bola obrazida umumiylik, badiiylik jihatlari ko'proq ta'minlanadi.

Qahramonni farzanddan bolaga aylantirish uchun uni ota-onadan, oiladan ajratish kerak. Shum bola ham qissa davomida farzanddan bolaga aylanadi. Farzandning ota-ona, jamiyat, davr oldida o'z burchlari bo'ladi. Bolada esa, bu tuyg'u bo'lmasligi mumkin. Natijada bola aniq maqsad va qadriyatlarga ega bo'lmay, o'z kelajagini yarata olmasligi mumkin. Shuning uchun ham aksariyat qissalardagi bola obrazlarining qismati fojia bilan tugaydi. O'zbek nafosatshunosi Abdulla Sher bola va farzandlik hissini davr nuqtai nazaridan shunday ta'riflaydi:

Nolimayman hayotimdan va lekin,
Umr, asli, davr bergan qarz ekan.
Davr uchun, bildim, yashash neligin:
Bola emas, farzand bo'lmoq farz ekan.

E'tiqod masalasida ham bola va farzand tenglikka ega emas. Ota-onaning borligi, ularning ta'siri, oilaviy muhit ostida farzandning e'tiqodi aniq va shu bilan birga cheklangan bo'lishi mumkin. Bolada esa, e'tiqod o'zgarishi, emirilishi, xatto, yo'qolish ehtimoli kuchli bo'ladi.

XX asr yozuvchilarining ko'pchiligida aynan bola obraziga murojaat kuchli. Buning sababi, bizningcha, muallif o'z qahramonini etim qilib tasvirlash orqali o'zini siyosiy muammolardan soqit qilishga urinadi. Bu yo'l adabiy qahramonni tarixiy o'tmishdan ajratadi. Ya'ni, qahramon sho'ro kishisi vakiliga aylanadi. Shu orqali mafkuraviy yukdan xalos bo'lingan.

“Shum bola”da bola e’tiqodiga ta’sir qilgan manzaralardan yana biri bozor, mahalla, ko‘cha-ko‘y jinnilari edi. Qissa avvalidagi jinnilar tasviri ko‘pchilik tadqiqotchilar tomonidan tahlil qilingan. Jumladan, professor Umarali Normatov jinnilar tilidan aytilgan latifanamo gaplarda Nikolay poshsho zamoni emas, balki barchani bir yo‘ldan bir tomonga zo‘rlab yurgizish siyosati ketayotgan sho‘rolar zamoni kulguga olinayotganini ta’kidlaydi [5,149-bet].

Tadqiqotchi Salima Babaevaning qarashlari ham U.Normatov fikrlariga hamohang [6]. Jinnilar tasviriga yana shuni qo‘shimcha qilish mumkinki, ularning barchasining ismi turdosh otdan yasalgan. Bu orqali muallif o‘sha davr ma’lum qatlamining umumiy manzarasini ko‘rsatib bergan. Qissada jinnilarning har biriga alohida ta’rif berilgan: Malla jinni, Olim jinni, Eshon jinni, Xol parang jinni va hokazo [1,158-bet]. Jinnilarning nomidan ularning har biri jamiyatdagi ma’lum bir qatlamning badiiy umumlashmasi ekanligini anglash mumkin.

Masalan, Olim jinni ilm ahlini, Eshon jinni dindorlar toifasini ifodalasa, Xol parang jinni savdo ahlini umumlashtiradi. Uning nomidagi “parang” so‘zi farang – fransuz so‘zining so‘zlashuv shakli bo‘lib, “farang” urfbop, bashang kiyinib yuradigan odamga nisbatan qo‘llangan. Xol parang jinni tagi qo‘qonlik bo‘lib, baxmal bilan savdo qilgan. G‘afur G‘ulom birinchi jinni sifatida Malla jinnini sanaydi. Malla jinnini ruslarga ishora sifatida bilish mumkin. “Toshkentda jinni ko‘p edi” iborasi ikki o‘rinda qo‘llanadi va jinnilarning ko‘payishi besabab emasligi ko‘rsatiladi. Muallif umumiy qilib “O‘sha yillarda Toshkentda shunaqa ham jinni ko‘p ediki, sanab sanog‘iga etolmaysiz”, deyish bilan “o‘sha yillar”, ya’ni ruslarning Turkistonga kirib kelishiga ishora qiladi hamda Malla jinnini birinchi sanaydi. Sovet davlati tenglik kerak, deb insonlarni itoatgo‘ylik vositasida qolip-andozaga tushishini, ijtimoiy taraqqiyot uchun standartlashuv kerakligini uqtirmoqchi bo‘lgan. G‘afur G‘ulom jinnilar tasvirida buni yumor vositasida ochib tashlagan.

Xullas, qissa avvalida olamga hayrat bilan qaragan Shum bolaning 5-6 oylik sarguzashti mobaynida bu hayratlari muhit sabab nafratga, undan keyin fosh etish va o‘ch olishga, yakunda esa, sarosimaga olib keladi. Natijada u birorta suyanchig‘i yo‘q, hech kimga va hech nimaga ishonchi qolmagan shaxsga aylanadi. Shum bolaning uyga qaytolmasligiga sabab, uning bolaligi tugagan, qaytishga bo‘lgan ishonch emirilib bo‘lgandi. Badiiy adabiyotdagi bola obrazlarining asar so‘ngida boshi berk ko‘chada qolishi, taqdiri to‘liq hal etilmasligi xarakterli xususiyat hisoblanadi. Mazkur holat “SHum bola” qissasi yakunida ko‘rinadi. Bu orqali yozuvchi kelajak xavf ostida qolayotganini badiiy maqsad sifatida amalga oshiradi.

Adabiyotlar ro‘yxati:

- 1.Фулом Ғ. Танланган асарлар. Шум бола. –Т.:Ғ.Фулом номидаги нашриёт матбаа ижодий уйи, 2012.
- 2.Моруа А. Чоршанба учун бинафшалар. –Т.:Янги аср авлоди, 2015. –Б. 201.
- 3.Кошғарий М. Девону луғоти-т-турк. III жилд. –Т.:Мумтоз сўз, 2016. – Б. 161.

4.Раҳматуллаев Ш. Ўзбек тилининг этимологик луғати. III жилд. – Т.: Университет, 2009. –Б. 232.

5.Норматов У. Ижод сеҳри. –Т.:Шарқ, 2007. –Б-149.

6.Бабаева С. Ўзбек ва АҚШ адабиётида болаликнинг бадиий талқини (Ғ.Ғулом ва М.Твен ижоди мисолида). Филолог.ф.н. дисс. автореф. – Тошкент, 2012.

“HOKI MUSALLO”DA MUALLIFNING SAFAR TAASSUROTTLARI TALQINI

**Ne'matova Hulkar Abdulbakiyeva,
filologiya fanlari bo'yicha falsafa
doktori (PhD), JDPU o'qituvchisi**

O'zbek adabiyotining peshqadam vakillaridan yana biri G'afur G'ulom ijodida safarnoma xarakteridagi, hajman kichikroq, ikki qismdan iborat yo'l ocherki bor. “Hoki Musallo”, “Taxti Safar” deb nomlangan bu bitiklar “Sovet O'zbekistoni” gazetasining 1966-yil 30-yanvar sonida bosilgan. Shoirning o'n ikki tomlik “Mukammal asarlar to'plami”ning o'n birinchi tomidan joy olgan. Akademik Naim Karimov shunday yozadi: “G'afur G'ulom 60-yillarda esa boshlagan “yangi hayot” shabadasidan umidvor bo'ldi... U 1964-yilda vafotidan atigi ikki yil avval orzu qilgani Afg'onistonga borib, ulug' o'zbek shoiri Alisher Navoiy qabrini ziyorat etish sharafiga erishdi. “Dilim ravshanligin hissini yo'lida oftob aylab, Mazoring boshida turmakdudurman sarhisob aylab...” – deb yozdi u Navoiy qabrini ziyorat qilgandan so'ng” [1,268-bet].

Muhtaram olimimizning ma'lumotlari G'afur G'ulomning “Hoki Musallo”, “Taxti Safar” ocherklari syujetining shakllanishida safar, sayohat marshrutining ahamiyatini yana bir bor tasdiqlaydi. Rus olimasi V.A.Shachkova o'zining “Safarnoma badiiy adabiyotning janri sifatida: Nazariy muammolar” nomli maqolasida: “Muallif tomonidan safar marshrutini tanlashda ob'ektiv va sub'ektiv sabablar: muallif maqsadi, qiziqishlari, ishtiyoq va intilishlari asos bo'ladi. Tanlangan marshrutga muvofiq asar u yoki bu faktlar bilan to'ladi. Bu faktlarni tanlash, ularning u yoki bu qirrasini urg'ulash muallifning xulosa va baholashida oydinlashadi. Bir so'z bilan aytganda, faqat marshrut (sayohat yo'nalishi)gina butun asar syujetini shakllantiradi” [2, 280-bet], – deydi.

Ma'lumki, G'afur G'ulom Navoiy asarlarini insoniyatni kamolotning katta yo'liga olib chiqadigan “yo'lchi yulduzlar” ekanligini o'zining qator tadqiqotlarida ilmiy asoslagan. Katta zahmatlar evaziga “Farhod va Shirin” dostonining nasriy bayonini yaratgan. Buyuk mutafakkir yaratilgan qomusiylik, umumbashariy mazmun va mohiyat, mavzu ko'lamdorligi teran insonshunoslik, tadqiq va talqin yo'sini G'afur G'ulom uchun bir umrlik mahorat saboqlari bo'lib kelgan.

Akademik Naim Karimov ta'kidlagandek, G'afur G'ulom qalbidagi Navoiy dahosiga buyuk muhabbat, cheksiz ehtirom uni Afg'oniston safarini tanlashiga sabab bo'ldi. Safar yo'nalishi aniq: Afg'oniston, Hirot, maqsad esa Navoiy qabrini ziyorat qilish. Buyuk mutafakkirning tug'ilgan, nazari tushgan, qadami etgan maskanlarni borib ko'rish.

Rus olimasi Shachkova ilgari surgan nazariy fikr Gʻafur Gʻulomning har ikki asari “Hoki Musallo”da ham, “Taxti Safar”da ham oʻz isbotini topgan. “Hoki Musallo” Oʻrta Osiyoning qadim shaharlaridan sanalgan Hirotning geografik oʻrni taʼrifi bilan boshlanadi. Kaspiy dengizidan Hind daryosigacha, Eron koʻrfazidan Amudaryosigacha choʻzilgan yoʻllar aynan Hirotga bir-birini kesib oʻtadi, deydi muallif. SHahar joylashuvining bunday strategik oʻziga xosligi sayyoh-muallifning taʼkidlashicha, hamma davrlarda ham bosqinchi zoʻravonlarning tamai-hirsini qoʻzgʻab kelgan.

“VII-VIII asrlarda arab-islom istilochilari, 1222-yilda Chingizxon qoʻshini tomonidan egallab olingan va xarob qilingan. Chunonchi, Chingiz qoʻshinlari bosib olishdan ilgari Hirotga bir milliondan ortiq xalq yashaganligini rivoyat qiladilar. Chingiz qoʻshinlari bu katta aholini qilich damidan oʻtkazgan, qatli om qilgan edi. 138-yilda Temur uni bosib oldi. U ham oʻzidan ilgarigi arab, moʻgʻul bosqinchilaridan qolishmadi. Hirotni buzdi, yordi, taladi, xalqini qirgʻin qildi. Lekin koʻp qatli omlarga uchragan Hirot Temurning oʻgʻli Shohrux va Husayn Boyqaro (1408-1507) davri saltanatlarida xiyla tuzgunlikka, qayta obod boʻlishga yuz tutdi. Butun Osiyoning koʻrkam shaharlaridan biriga aylandi” [3, 378-bet].

Shu oʻrinda Bobur Mirzoning Hirot bilan bogʻliq maʼlumotlariga eʼtibor bersak. “Boburnoma”da shunday deyiladi: “Sulton Husayn Mirzoning zamoni ajab zamone edi, ahli fazl va benazir eldin Xuroson, bataxsis Hiri shahri mamlu erdu. Har kishiningkim bir ishga mashgʻulligʻi bor erdi, himmati va gʻarazi ul erdikim, ul ishni kamolga tegurgay... yana Hiriylkim rubʻi maskunda andoq shahr yoʻqtur va Sulton Husayn mirzoning zamonida mirzoning tasarrufidin va takallufidin Hiriyning zeb va ziynati birga oʻn, balki yigirma taraqqiy qilib edi” [4,159-bet].

Zero, Gʻafur Gʻulomdek nuqtadon, qomusiy shoir “Boburnoma”ni oʻqimasligi mumkin emas edi. Undagi maʼlumotlarda yuqorida guvohi boʻlganimizdek: Xuroson, xususan, Hirot Sulton Husayn Boyqaro zamonida gullab-yashnab er yuzining odamlar yashaydigan qismining beqiyos koʻrkam shahriga aylangani, Hirot fazl ahli, isteʼdodli sanʼatkorlarga Vatan boʻlgani, har bir inson oʻzi mashgʻul boʻlgan hunarini kamolot choʻqqisiga chiqarmasa, tinib-tinchimasligi haqida alohida zavq bilan soʻylar ekan, Bobur Mirzo Sulton Husayn Mirzoning saʼy-gʻayrati va takallufidan Hirotning zeb-ziynati bilan birga oʻn, balki yigirma baravar obod boʻlganligini eʼtirof etadi.

Gʻafur Gʻulom “Hoki Musallo”da bu tarixiy haqiqatlarni keltirish u yoqda tursin, “Boburnoma”ni ham, uning muallifini ham eslashdan oʻzini cheklaydi. Chunki yuqorida eslatganimizdek milliy tariximizning burilish nuqtalarida turgan Amir Temurga ham, Bobur Mirzoga ham mavjud mafkura oʻgay munosabatda edi. Endi shu joyda XXI asr safarnomasi: Qamchibek Kenjaning “Buyuklar izidan” nomli sayohat xotiralariga eʼtibor qaratsak: “Shahar (Hirot–N.H.) dastlab Mironshohga, keyin Shohrux, Abu Said, Sulton Husayn Boyqaro va boshqa temuriy hukmdorlarga poytaxt boʻlib xizmat qilgan, shu paytlarda yanada taraqqiy etgan. Oʻrta Sharqning yirik savdo, hunarmandchilik va madaniy shahriga aylangan. Salobatli, koʻrkam imoratlar, inshootlar qurilgan. Hirotning eng gullagan davrlarida Abdurahmon Jomiy, Alisher Navoiy, Hofizi Abru, Mirxond, Behzod kabi mashhur shoir, mutafakkir olimlar, musavvirlar yashab ijod qilishgan.

Afsuski, Sulton Husayn vafotidan so'ng Hirot yana qo'ldan-qo'lga o'tib, o'z obro'-e'tiborini yo'qota boshlaydi" [5, 81-bet] – deb yozadi sayyoh-muallif.

Mustaqillik sharofati bilan juda ulkan ma'naviy-ma'rifiy-ilmiy maqsadda tashkil etilgan Bobur nomidagi xalqaro ekspeditsiyaning Afg'oniston bo'ylab qilgan 3-safari taassurotlari yoritilgan bu asarda Qamchibek Kenja qalam ozodligiga, ijod erkinligiga, tafakkur mustaqilligiga erishgan adib pozitsiyasida tura olgan. Qamchibek Kenja birgina Kamoliddin Behzod misolida Bobur Mirzoning Hirot ahli fazllari, benazir eli haqida aytganlari naqadar haqligini isbotlab shunday yozadi: XV asrda Hirotida yashagan kambag'al hunarmand farzandi Kamoliddin etimlikda o'sgan. Sulton Husayn Boyqaro kutubxonasining kitobdori Mirak Naqqosh undagi musavvirlik iste'dodini payqab o'z tarbiyasiga oladi. Behzod Ozarbayjon (Tabriz), Xuroson (Hirot) va asosan Movarounnahr (Buxoro) musavvirlik maktablarining an'ana va ijodiy yutuqlarini o'rgangan va o'ziga mujassamlashtirgan.

Sulton Husayn Boyqaro va Alisher Navoiy rahnamoligi va g'amxo'rligida tasviriy san'atning piri komili darajasiga erishdi. Zero, ul ikki shaxs (Sulton Husayn Boyqaro va Alisher Navoiy – N.H.) san'at, badiiyatning, ma'naviyat va ma'rifatning beg'araz va bemsil homiylari, murabbiylari edilar"[5,83-bet].

Qamchibek Kenja o'z safarnomasida Sharqda "Moniy soniy", G'arb san'atshunosligida "Sharq Rafaeli" deya ulug'langan Kamoliddin Behzod haqida ma'lumot bera turib, 70 yil davomida sho'ro siyosati aytishga yo'l qo'ymagan, mafkuraning qora qutisida saqlangan shoyon haqiqatni: Sulton Husayn Boyqaro va Alisher Navoiy hamkorligi, buyuk do'stligining xayri, fayzi haqida ham katta bir qoniqish, faxr bilan fikr yuritgan. Shu o'rinda rus olimi V.M.Guminskiyning: "Asosan bilish va o'rganishdan tashqari, qo'shimcha ravishda safarnomalar estetik, siyosiy, publitsistik, falsafiy va yana boshqa bir vazifalarni ilgari surish mumkin" [6,314-bet], – degan fikrlarini eslash joiz. Chunki biz tahlilga tortayotgan "Xoki Musallo" qatida ham, "Buyuklar izidan"da ham o'quvchi intellektini boyitadigan ma'lumotlar ayni paytda rus olimi sanagan bir qator: estetik, siyosiy, falsafiy mushohadalarga ham yo'l ochib, safarnoma janrining boshqa bir qator vazifalarini ham yuzaga chiqarishga xizmat qiladi.

Ming afsuski, "o'zingdan chiqqan baloga" deganlaridek, 1887-yilda ikki afg'on shahzodasi sardor Do'stmuhammadxon bilan sardor Ahmadxon o'g'li Shahnavezxon o'rtasidagi toj-taxt talashishida zamonasining eng dahshatli to'plaridan biri – "Zilzila" zambaragi orqali vahshiylarcha Musalloni to'pga tutadilar. Sayyoh-muallif chuqur alam, katta bir achinish bilan o'zak qirqqan bu yovuz, jaholatparastlarga qarata Hirot boshiga kelgan bu xarobalikni hech qaysi bosqinchi: na arab, na mo'g'ul, na Temur qilolgan emas, deydi. Mana shu joyda safar taassurotlari, asar syujeti yana Navoiy bilan bog'lanadi.

"Hoki Musallo" safarnomasidagi bu la'natnamo satrlarni o'qir ekansiz, beixtiyor Abdulla Oripovning "Aytishuv" she'ridagi "dunyoni porox to'la xum ustiga o'tqazgan" yovuz avlod qiyofasi ko'z oldingizga keladi. Ma'lumki, Afg'oniston obrazli qilib aytganda, shoir ta'kidlagandek, hali-hamon porox to'la bochkaning ustida. G'afur G'ulomdan keyin 36 yil o'tib Afg'onistonda, Hirotida bo'lgan Qamchibek Kenjaning "Hind sorig'a" safarnomasida shunday satrlar bor:

“Tarixda Musallo ansambli deb atalgan bu qutlug‘ maskanni “o‘rab” Hirotni go‘yo dunyoga ko‘z-ko‘zlanayotganday ko‘kka bo‘y cho‘zgan salobatli, naqshinkor minoralar ham insonlar “talashuvi”dan qattiq ozor chekkan – zambarak o‘qlari ayrimlarini teshib o‘tgan, ba’zilarining uch qismini yulib ketgan, bittasi esa umuman yo‘q – er bilan yakson qilib tashlangan edi. Ansambl tarkibidagi go‘zal va rang-barang obidalarsiz minoralar yonib ketgan uylarning mo‘rilariday fayzsiz so‘ppayib turadi” [7, 46-bet].

G‘afur G‘ulomning “Taxti safar” hamda “Hoki Musallo” safarnomalari muallifning Hirot safari, Alisher Navoiy va Husayn Boyqarolar himmatidan bahra topgan Xoki Musalloning keyingi taqdiri bilan bog‘liq xotira bitiklarigina bo‘lib qolmay, bu asar o‘z davri navoiyshunosligida ham katta ahamiyatga ega bo‘ldi. G‘afur G‘ulomning “Taxti safar”ida sayyoh-muallif tarafidan asar syujetiga kiritilgan Safar podachi va Boyqaro afsonasi safarnomaning badiiy-estetik ta’sirini oshirgan va ayni paytda Navoiyning ijtimoiy faoliyati haqida to‘liq tasavvur uyg‘onishiga sabab bo‘lgan.

Adabiyotlar ro‘yxati:

- 1.Каримов Н. XX аср адабиёт манзаралари. –Т., Ўзбекистон, 2008. – Б. 268.
- 2.Шачкова В.А.“Путешествие” как жанр художественной литературы: Вопросы теории. Вестник Нижегородского университета им. Н.И.Лобачевского. 2008, №3. – С. 280.
- 3.Гулом Ғ. ҲокиМусалло. Мукаммал асарлар тўплами. 12 жилдлик. 11-жилд. – Т., Фан, 1989. – Б. 378.
- 4.Бобур З.М. Бобурнома. –Т., Юлдузча, 1989. – Б.159
- 5.Қамчибек Кенжа. Буюклар изидан. (Сафарнома-3). –Т., Шарқ, 2006. – Б. 81.
- 6.Гуминский В.М. Путешествие // Литературный энциклопедический словарь. – Москва, Сов.энциклопедия, 1987. – С. 314-315.
- 7.Қамчибек Кенжа. Ҳинд сориға. – Т., Шарқ, 2000. – Б. 46.

G‘AFUR G‘ULOM ASARLARINING TADQIQOTCHISI

(professor Nuriddin Shukurov nigohida)

Tugalov Toshpo‘lat

Xalqimizning akademik shoiri G‘afur G‘ulomning serqirra ijodi bilan tanishmagan, uning nazm va nasrdagi asarlarini mirqib o‘qimagan kitobxon topilmasa kerak. Falsafiy teranlik, romaantik jo‘shqinlikka boy, badiiy yuksak asarlari bilan o‘zbek adabiyotida munosib o‘rin egallab turgan ijodkorning voqelikni poetik idrok etish mahorati, falsafiy qarashlari haqida muxlislaridan tortib taniqli adabiy tanqidchi va adabiyotshunoslarimizgacha ko‘p va xo‘b yozishgan.

Ular orasida G‘afur G‘ulom she’riyati, uning pafosi, mazmun-mundarijasini besh qo‘ldek yaxshi bilgan, o‘zoq yillar shoir bilan hamnafas holda ilmiy ish olib

borgan samarqandlik olim O'zbekistonda xizmat ko'rsatgan fan arbobi, professor Nuriddin Shukurovdir.

G'afur G'ulomning ijodi, ayniqsa, xalqona she'riyati Nuriddin SHukrovni talabalik yillaridayoq o'ziga rom qilgan edi. O'qishni bitirgach ilmiy faoliyatini oqsoqol shoirning ijodiy olamini kompleks tadqiq etishga qaratdi. Olim shoir asarlarini g'oyaviy-badiiy xususiyatlarini tahlil etib "G'afur G'ulom poeziyasida O'zbekiston taraqqiyot tarixining yorqin sahifalari o'zining olamshumul ahamiyati va mazmuni bilan, falsafiy asoslari va tarixiy ildizlari bilan ifodalanadi" degan xulosaga keladi. "G'afur G'ulomning poetik mahorati" mavzuidagi nomzodlik dissertatsiyasini muvaffaqiyat bilan himoya qiladi. Nuriddin Shukurov sevimli shoir ijodi bilan umr bo'yi shug'ullandi, desak mubolag'a bo'lmaydi. Doktorlik ishida ham bu mavzu markaziy o'rinni egalaydi.

G'afur G'ulomning ijtimoiy hodisalardan, romantik tasvirlar, tarixiy qiyoslar, falsafiy qarashlar yarqirib turadigan she'rlarini hozir ham hamyurtlarimiz maroq bilan yod o'qishadi. "Kuzatish", "Sog'inish", "Vaqt", "Kuz keldi", "Xotin", "Sen etim emassan" "Bizning ko'chada ham bayram bo'lajak" kabi aksariyat she'rlar shular jumlasidan.

Mahoratli ijodkorni iqtidorli munaqqid tadqiq etsa, ijod olami ko'zga yanada teran, yorqinroq ko'rinadi. Satrma satr asarning mazmuni va mohiyati ochilib, muallif muddaosi ochilib boraveradi. O'tgan asrning 70-80 yillarida olim tomonidan yozilgan betakror qalamkash ijodiga doir ilmiy maqolalar bugun ham ahamiyatini yo'qotgan emas. Biz ana shu munaqqid qalamiga mansub ba'zi nozik kuzatuvlar e'tiroflarga, G'ulomona valiylikka diqqatingizni tortmoqchimiz.

G'afur G'ulomshunos olim nafaqat shoirning she'riyatdagi mahorati va uslubiy o'ziga xosligi balki, uning falsafiy qarashlari, she'r orqali nafaqat bugunning voqeligi, kelajakni ham bashorat qila olish xislatiga e'tibor qaratadi. Munaqqidning shoir qalamga olgan ijtimoiy voqeliklarning oqibati va kelajagi, istiqbolni kitobxon ruhiyatida gavdalanitira olishi haqida quyidagi so'zlariga diqqat qiling:

"G'afur G'ulom bashoratlari qanchalik romantik bo'lmasin, ular konkeret realistik asosga ega ekanligi bilan alohida kuch-qudrat va hayotiylik kasb etadi. Shoir 1939 yilda "Istasak nur minib yarim sekunda ucharmiz fazoning burchdan burchiga" ("Ko'k bo'sag'asida" she'ri) deb yozgan edi. Oradan yigirma yildan ko'proq vaqt o'tib YUriy Gagarin birinchi marta komosga parvoz qildi. Guyo shoir bashorati tasdiqlangandek bo'ldi. 1941 yilda "Zamin tarbuzidan fashizm illat yo'qolur juda tez, mutlaq, abadiy." deb yozdi. 1945 yilda Germaniya fashizmining uyasi uzil-kesil tor-mor qilindi...

1948 yilda ingliz mustamlakkachilarining taqdiri haqida "SHarqning azamat fili zalvardor xartumila to'ymas qari arslonning belini bukajakdir" ("Insoniyat bayrami" she'ri) deya bitgan misrasi ijobat bo'lib 1949 yilda Hindiston o'z mustaqilligini qo'lga oldi. Jazoirning qahramon qizi Jamilaga bag'ishlangan she'rida "Sen o'lmaysan, yashaysan, qotilning qo'li qisqa, ozodlikning boshini zulmat qirqolmagandek" deb yozgan edi. Jazoir ham keyinchalik fransuz mustamlakachilaridan ozod bo'ldi". Jamilaning orzusi amalga oshdi. Bunday

umumbashariy xulosalar, publitsistik ruh, idrok G‘afur G‘ulomning ulkan ijodkor, donishmand insonligidan ham darak beradi.

Shoir ijodining zukko tadqiqotchisi professor Nuriddin Shukurov muallifning hech bir satri va uning mohiyatini nazardan qochirmaydi: “G‘afur G‘ulomning o‘ziga xos jihatlaridan biri shundaki, tanlangan mavzu g‘oyat keng masshtabda falsafiy-poetik nuqtai nazardan yoritiladi... Shoir kerak bo‘lganda konkret fakt va obrazlarga, hayotiy detallarga murojaat qiladi. Ba‘zan qahramonga tasalli beradi.”

Endi ko‘ribmizmi bu og‘ir kunni,

Yig‘loqi o‘z baxtin dushmani axir (“Xotin” she‘ri”).

Bunday hayotiy xulosalar, xalqchil tasalli, yashash, yaratish va shijoatga undovchi murojaatlar akademik shoirning qalb prizmasi, hayotiy tajribasidan o‘tgan, haqiqatlar bo‘lib, G‘afur G‘ulom she‘riyati tilining jonli, serjiloligini ta‘minlagan. Misol uchun: “Supurgi tegmagan xonumon xarob”, “Ikki do‘st qiyinni engas olmas, hayotning chippakkka chiqar omadi”, “Saodat garovi har qanday yumush” kabi misralar bugungi kun uchun ham dolzarb va ahamiyatlidir. Quyidagi misralarni ham shoirning kelajak, uning shitobi haqidagi bashorati deyishsh mumkin. Akademik ijodkor zamon va davrlar oshib hazrati insonlarga yashash, ezguliklar, yangilik qilish uchun shoshiling deyayotganday.

Yashash soatining oltin kapgiri,

Har borib kelishi bir olam zamon.

Koinot shu damda o‘z kurrasidan

Yasab chiqa olur yangidan jahon. (“Vaqt”)

G‘AFUR G‘ULOM IJODINI YANGICHA O‘RGATISH

Sariboyeva M., GulDU dotsenti,

Turdimurodov M., GulDU, 3-bosqich talabasi

Ta‘lim-tarbiya sohasining to‘xtovsiz takomillashib borishi va yangi imkoniyatlarning yuzaga kelishi umumta‘lim muassasalari oldida turgan vazifalarni muvaffaqiyatli amalga oshirish uchun o‘qitish usullarini muttasil yangilab turishni taqozo etmoqda.

Prezident Sh.M.Mirziyoyev ta‘kidlab o‘tganidek, “Ta‘lim va tarbiya, ilmfan, sog‘liqni saqlash, madaniyat va san‘at, sportni rivojlantirish masalalari, yoshlarimizning chuqur bilimga ega bo‘lishi, chet tillarini va zamonaviy axborot-kommunikatsiya texnologiyalarini puxta egallashini ta‘minlash doimiy ustuvor vazifamiz bo‘lib qoladi” [1, 16-bet].

Zamonaviy pedagogik amaliyotda shunday ta‘lim modellari yaratildiki, ular ma‘lum sharoitlarda va belgilangan vaqt ichida ko‘zlangan ta‘lim maqsadlariga erishishni kafolatlash bo‘yicha keng imkoniyatlarga egadir. Chuqur kuzatishlar natijasida aytilgan quyidagi fikrlarga e‘tibor beraylik. Ta‘limdagi innovatsiyalar chetniki bo‘lgani uchun emas, balki samarali bo‘lgani uchun o‘qitish amaliyotida qo‘llanishi kerak. Hozirda innovatsion yondashuvlarning samara berishidan ko‘ra qo‘llanish faktining o‘zi muhimday bo‘lib turibdi [3, 16-bet].

Muammoli ta‘lim texnologiyalari insonning aqliy qobiliyatini yanada rivojlantirishga xizmat qiladi. Dars jarayonida o‘qituvchi va o‘quvchi faoliyatining

turi, usuli o'rgatiladigan ma'lumotning xarakteriga qarab belgilanadi. Aynan mana shu holat ta'lim jarayonida muayyan maqsadni amalga oshirishga qaratilgan yangi-yangi usullarni keltirib chiqaradi [7, 24-bet].

Muammoli ta'lim usulining yutuq va yetishmovchiliklari haqida muayyan xulosaga kelish mumkin. Muammoli ta'limning yutuqlari: o'quvchilar bilimni o'z harakatlari bilan mustaqil egallashadi; ularda mahsuldor tafakkur o'sadi; o'qishga qiziqish kuchayadi; mas'uliyat tuyg'usi ortadi. Bu tizimning yetishmovchiliklari esa o'quvchilar bilish faoliyatini boshqarish imkoniyatining ozligi; ko'zda tutilgan o'quv maqsadiga erishish uchun ko'p vaqt sarflanishi; birvarakayiga barcha o'quvchini nazorat qilish imkoniyati yo'qligi kabilarda ko'zga tashlanadi [2, 106-bet].

Respublikamizda zamonaviy usullarning ta'lim jarayoniga tatbiq etilishi muammoli ta'limni dolzarb pedagogik masalaga aylantirdi. Jumladan, Q.Husanboyevaning [4,262-bet] tadqiqot ishida asosiy e'tibor adabiy ta'lim jarayonida o'quvchilarda mustaqil fikrlash ko'nikma va malakalarini shakllantirishga qaratilar ekan, ushbu maqsadga erishish yo'llaridan biri sifatida darslarda muammoli vaziyatlarni yaratish asosida qo'yilayotgan masalaning yechimini topishga yo'naltirilgan o'quv faoliyatini tashkil etish alohida e'tirof etiladi.

Hozirgi kunda faol hamda o'quvchi shaxsiga yo'naltirilgan o'quv muhitiga erishish uchun muammoli, hamkorlikdagi, modulli va masofadan turib o'qish kabi ta'lim shakllari eng samarali hisoblanadi. Masalan, muammoli ta'lim o'quvchining mustaqil, ijodiy va faol o'zlashtirishini ta'minlash bilan birga, uni keng qamrovli fikr yuritib, o'zi uchun yangi bilimlarni kashf etishga odatlantiradi. O'quvchi muammoning yechimi ustida izlanish orqali o'zi uchun muhim bo'lgan kashfiyotlarni amalga oshiradi. Ushbu tadqiqiy faoliyat o'quvchida o'z kuch va bilimiga ishonch uyg'otadi.

Muammoli ta'lim o'qitish jarayonida ijodiy metodlarning qo'llanilishini taqozo etadi. O'quvchilar o'z bilim va ko'nikmalarini turli holatlarda amaliyotga tatbiq etishga o'rganadilar. Masalan, adabiyot darslarida muayyan mavzuga oid bir muammo-topshiriqni bajarish jarayonida o'quvchilarning yakka hamda o'zaro faol ishlashini tashkil qilish quyidagicha olib borilishi mumkin:

1.Muammoli vaziyat hosil qilish (asar va uning g'oyasiga oid savollar tashlanadi).

2.G'oyalar (takliflar)ni shakllantirish (savollarga berilayotgan javoblar yozib boriladi).

Muammoning yechimi uchun eng maqbul g'oyalarni tanlash va baholashdan (tanlash imkoniyatini o'quvchilarga berish maqsadga muvofiqdir) iborat. Adabiy ta'lim oldida turgan malakali kitobxonni tarbiyalashday vazifani bajarish, ko'pincha, o'rganilayotgan badiiy asarni ikkinchi marta o'qishni taqozo etadi. Bunda asarning birinchi o'qilishi mustaqil ravishda amalga oshirilgan bo'lishi ham mumkin. Shunda o'quvchilarning mustaqil o'quv topshiriqlarini bajarishi yoki lavhalar ustida ishlay olishi o'quvchining kitobxonlik darajasini belgilaydi, keyingi ish jarayoni esa asar ustida ishlash hisoblanadi.

Masalan, maktabda “Shum bola” asari muammoli yo‘l bilan tahlil etiladigan bo‘lsa, o‘qituvchi o‘quvchilar oldiga: “Shum bola” qissasidan olingan quyidagi parchada qaysi timsol tasvirlangan? Obbo bachchag‘ar-ey, quv ko‘rinasan-a, ha, mayli-mayli. Lekin ko‘p yolg‘onlamagin! tarzida savol qo‘yadi va o‘quvchilardan o‘z fikrlarini badiiy matnga tayangan holda asoslashlarini talab etadi.

Ushbu dostonni an’anaviy yo‘sinda o‘quv tahlili orqali o‘rganish kutilgan samarani bermasligi mumkin. Chunki qissa o‘z mazmun-mohiyati bilan kishida har xil tuyg‘ularni qo‘zg‘aydi. Qalb qa‘rida og‘riq paydo qiladi, alam, iztirob uyg‘otadi. Doston mutolaasidan so‘ng o‘quvchi qalbida paydo bo‘lgan tuyg‘ularga uning o‘zi ism topishi, ularni bir-biridan ajratib olishi uchun asar matni ustida mustaqil ravishda ishlashi kerak.

Darslikda matn yuzasidan taqdim etilgan o‘ndan ortiq savol-topshiriqlar bilan ishlaganda ham asarning qudratini, ta’sir kuchini, ilgari surilgan, o‘quvchiga singdirilishi kerak bo‘lgan fikrlar mohiyatini o‘quvchilarga ma’lum darajada yetkazish mumkin. Lekin asarda ko‘tarilgan masalalarni muammoli o‘rganish undagi g‘oyalar har bir o‘zbek farzandining shuuridan o‘tishi, qalbida og‘riqlar, alamlar, iztiroblar paydo bo‘lishini ta’minlaydi. Muammoli dars jarayonida o‘quvchi qalbidagi tuyg‘ularning paydo bo‘lish sabablarini o‘zi aniqlaydi, ularning ismini o‘zi kashf qiladi. Mazkur mavzuni muammo shaklida o‘rganishdan maqsad o‘quvchi ko‘nglidan kechgan shu alam, og‘riq, iztiroblar o‘quvchirni bezovta qilishiga, milliy g‘ururini uyg‘otishiga erishishdan iboratdir.

Asar mutolaasiga bunday nazar bilan yondashgan o‘quvchi o‘qish davomida har bir fikrga, har qanday jumлага e’tibor bilan qaraydi. Keyingi darsga har biri o‘zining darajasida ishtiyoq va tayyorgarlik bilan kelishi, tabiiy. O‘qituvchi keyingi darsda muammoli savollarni doskaga yozib qo‘yib, o‘quvchilarga eslatadi. So‘ng har bir fikrini, o‘ziga yoqishi yoki yoqmasligidan qat’iy nazar, diqqat bilan eshitadi. Chunki o‘quvchilar asosan o‘qituvchi uchun gapiradi.. O‘qituvchi buni nazorat qilib turishi kerak.

Qissa qahramoni Shum bolaning nechog‘lik ziyrakligini, qanchalar «topqir»ligini bolalar o‘z munozaralari davomida o‘zlari kashf etsinlar. Uni asardagi boshqa o‘brazlar bilan va o‘zlari bilan qiyoslasinlar. Muammoli vaziyatda ba’zan shunday holatlar ham bo‘ladiki, bolalar suhbat jarayonida tortisha-tortisha bir-birlari bilan kelishmay qoladilar, yoxud masala hal bo‘lmay munozara to‘xtab qoladi. Shunda o‘qituvchi Shum bolaga xos xarakterni ochish uchun, muammoni kengaytirish maqsadida darslikdagi ayrim savollardan foydalanishi mumkin. “Sariboyning Shum bola to‘qigan yolg‘onlarga chippa-chin ishoninshining sababi nimada?”, “Matndan Shum bola bilan Omonning sigirni so‘yib qo‘ygan o‘rinlarini toping. Sizningcha, buning sababi nimada?”, Shum bolaning fikr-mulohazalari ilk bor uydan chiqib ketgan paytidagidan ancha o‘sganligi, hayot uni ulg‘aytirib qo‘yganligi sarguzashtlari, turli fantastik uydirmalar, ertaklarga xos voqealarning yuksak badiiyati bilan yo‘g‘rilgan tasvirlar kishini hayajonga soladi. «Matnga asoslanib asar matnida xalqimizning qadimiy, boy tiliga xos fazilatlar, xalqona ibora va ifodalar, yorqin namoyon bo‘lgan o‘rinlarga o‘z munosabatingizni bildiring.

Omonni “boylik orttirish tashvishidagi nazari past, ma’naviy qashshoq obraz” deb o‘ylaysizmi? Shum bola bilan Omonning qilmishlariga qanday baho berasiz? Ularning o‘ziga xos asl sabablari to‘g‘risida o‘ylab ko‘ring. – Shum bola qayerga bormasin, kim bilan to‘qnashmasin, hamma joyda kattalarning o‘ziga bepisand qarashi, qo‘pol muomalasiga duch keladi. “O‘zlarini go‘yo yetimning boshini silaydigan himmatli kishilar qilib ko‘rsatadigan turli noinsof kimsalar uning navqiron kuchidan tekin foydalanib qolishga urinadilar. Siz uning o‘rnida nima qilgan bo‘lardingiz?”, Shum bolani turli qing‘ir yo‘llarga boshlovchilar bilan munosabatini batafsil tasvirlashga urinib ko‘ring.

Matndan misollar keltirgan holda Shum bolaga tengdosh sifatida tavsif bering. Odamzod uchun do‘st bilan dushmani, yaxshi bilan yomonni ajratish qanchalar qiyin ekani haqida o‘ylab ko‘ring, “fikr ayting”, “Siz asardagi Eshondan nafratlanasizmi, Sariboydanchi?” kabi savol-topshiriqlarni vaziyatga qarab zarurini o‘rtaga tashlash mumkin bo‘ladi.

Xulosa sifatida shuni aytish mumkinki, pedagogik jarayon muammoli ta’lim texnologiyalar asosida amalga oshirilishi kutilgan natijani beradi.

G‘AFUR G‘ULOM VASLIY SAMARQANDIY FAOLIYATI HAQIDA

Badia Muhiddinova

SamDU dotsenti

XIX asrning oxiri XX asr boshlarida Samarandda yashab ijod etgan va o‘zining sermaxsul ijodi bilan adabiyotimiz, xususan, tasavvufiy adabiyot taraqqiyotiga salmoqli hissa qo‘shgan Saidahmad Vasliy Samarqandiy ishqiy, ijtimoiy, axloqiy, ma’rifiy mavzularda ko‘plab asarlar yaratdi.

Sayidahmad Vasliy Samarqandiy o‘z davrida keng qamrovli, iste’dodli adib sifatida tanilgan, asarlari vaqtli matbuot va turli-tuman nashrlar, qo‘lyozma nusxalar orqali el orasiga yoyilib, e’tibor qozongan edi. U garchi asosan mudarrislik bilan shug‘ullangan bo‘lsa-da, biroq faol ijodkor inson bo‘lgan. Toshkent, Qo‘qon, Buxoro, Kattaqo‘rg‘on kabi shaharlarga safarlar uyushtirgan, hur fikrli ziyolilar, shoirlar bilan uchrashib, do‘stona munosabat o‘rnatgan. Natijada, bir tomondan, Vasliyning o‘zi bu safar va muloqotlardan bahramand bo‘lgan bo‘lsa, ikkinchi tomondan, ilg‘or ijodkorlar va aholining Vasliy haqidagi ijobiy fikrlari shakllanishiga sabab bo‘lgan. Shuni ham qayd etish kerakki, Vasliy nafaqat shaxsan tanish ijodkorlar bilan iliq munosabatda bo‘lib, maktublar yo‘llagan, balki o‘zlarini tanimasa ham kitoblari, she’r yoki maqolalarini o‘qish orqali ham ayrim mualliflar bilan g‘oyibona do‘stlashganiga guvoh bo‘lamiz.

Shu tariqa, Vasliy Samarqandiy o‘z zamonasining mashhur shoir va olimlari, ko‘zga ko‘ringan ziyoli va ma’rifatparvar shaxslari bilan yaqindan tanish bo‘libgina qolmay, balki ular bilan vaqtli matbuot orqali maktublar yozishib, devonlar va boshqa turdagi asarlar taqdimoti munosabati bilan ijodiy hamkorlik qilgan, davr adabiy jarayonida faol ishtirok etgan. Bu esa, bevosita Vasliy Samarqandiyning o‘z davri taniqli shoiri, olimi, mutafakkiri va o‘ziga xos yo‘riqdagi namoyandasi bo‘lib etishuviga sabab bo‘ldi. U Milliy uyg‘onish

davrining ma'rifatparvar shoirlaridan Hamza Hakimzoda Niyoziy bilan ham yaqin do'stona aloqada bo'lganligi haqida ma'lumotlar bor. Shu o'rinda Vasliy haqida ma'lumot beruvchi yana bir adabiy-tanqidiy maqola bo'lib, bu maqola Vasliy Samarqandiy ijod etgan mutafakkirlar quvg'in qilingan sovet hokimiyati hukmronligi yillarida shoirning kichik zamondoshi Fafur Fulom tomonidan yozilgan. Maqolada Vasliyning o'z davri adabiy muhiti bilan bo'lgan aloqasiga doir ba'zi ma'lumotlar ham bor.

Sharq poeziyasining yirik bilimdoni G'afur G'ulom Vasliy Samarqandiy kabi o'z davrining taniqli olimi, fozili, shoiri, mudarrisi hayoti va faoliyatidan yaxshi xabardor bo'lgan. Ammo shoir o'zi yashagan davr sho'rolar tuzumi ideologiyasi ta'sirida bo'lsa kerak, Vasliy ijodi haqida qisqa ma'lumot berish bilan cheklanadi. G'afur G'ulomning mukammal asarlar to'plami XII tomligining XI tomidan «Sayid Ahmad usta Sayidazimboy o'g'li Vasliy» deb nomlangan maqola o'rin olgan [1; 36-38 b]. Hajman kichik bo'lgan bu maqolada shoir Vasliy hayoti va faoliyati haqida muxtasar ma'lumot beriladi. Biroq shunga qaramay, samarqandlik shoir va mudarris haqida ushbu maqolada qimmatli ma'lumotlar keltirilgan.

G'afur G'ulom Vasliyning tarjimai holidan yaxshi xabardor bo'lganki, maqolasida shoir oilaviy hayoti va maishiy turmushi, dars olgan ustozlari va madrasalari, taraqqiyparvar publitsistik faoliyati haqida aniq fikrlar bildiradi. G'afur G'ulom «Vasliy o'z zamonasining taraqqiyparvar mullalaridan hisoblanar edi», deb yozadi. U Vasliyning «1903 yildan ochila boshlagan usuli jadid maktablari birinchi topqir o'qish kitoblari yozganlardan biri» va «... bunday maktablardan bir-ikkisining ochilishiga sabab ham bo'lgan»ligini alohida ta'kidlab o'tadi.

G'afur G'ulom Vasliyning o'z zamonasi vaqtli matbuotida «Sadoi Turkiston», «Oyna», «Sadoi Farg'ona» gazeta va jurnallarida ham shoir, ham jurnalist sifatida ishtirok etib, bahsu munozaralarga sabab bo'lguvchi maqolalar e'lon qilganligiga e'tibor qaratadi.

Maqolani sinchiklab o'qir ekanmiz, G'afur G'ulom vatanparvarligining yorqin bir qirrasini ko'zga tashlanadi. Shoir o'z vatandoshining barchasi islom ahkomlari va shariati targ'ibiga, tariqat masalalari va tasavvuf falsafasiga, mashhur diniy allomalarga bag'ishlangan asarlari ro'yxatini keltirishdan avval zamonasi siyosiy hokimiyati egalari bo'lmish xudosizlar nazarini chalg'itish maqsadida muallif haqida «til uchi»dagi fikrlarni ham bayon etadi. Ya'ni: «Vasliy shaxsan taraqqiyparvar va jadidnamo bir kishi bo'lsa ham, uning she'ri yana eski feodalizm adabiyoti g'azalxonligidan uncha nari ketmagandir. Yangicha yozgan narsalari maktabga targ'ib, bir undan qochish va hokazolar singari jadid adabiyotining ibtidoiy shakllaridandir».

Bu fikrlarning nosamimiy, asosiy gapni aytib olish uchun bir bahona ekanligi yaqqol namoyondir. Agar shunday bo'lmaganda, haqiqiy ilm hikmatini chuqur idrok etgan G'afur G'ulom maqolada keltirilgan mazkur fikrlardan keyin: «U o'zbekcha, tojikcha, arabcha mukammal bilar edi. Har uch tilda ham yozgan asarlari ko'pdur» tarzidagi iftixor va maqto'v to'la satrlarni yozmas edi. Chunki Vasliyning nashrdan chiqqan va nashr etilmagan asarlari haqida ancha

to'liq ma'lumot bergan G'afur G'ulom ushbu asarlar mazmunini juda yaxshi bilgan, ularni o'qigan. Shoir «Vasliy o'z kitoblarini chop ettirishni juda sevar edi. Shuning uchun ham uni, ko'pincha, G'ulom Hasan matbaasi atrofida o'ralashib yurganini ko'rar edilar», deb yozar ekan, Vasliy asarlarining o'z davrida ommalashib ketganiga, o'zining ham bu asarlarni o'qiganligiga ishora etadi.

Vasliy asarlari ro'yxatida «Nazmus-silsila» asarining keltirilishi ham diqqatga loyiq. Ma'lumki, bu asar islom dinining birinchi targ'ibotchisi, hotam ul-anbiyo Muhammad alayhissalomning ruhoniy-ma'rifiy shajaralari bayoniga bag'ishlangandir. Bu kitobni G'afur G'ulom, albatta, o'qigan edi. Qadimiy Sharq ilmi va islom dinining «sobit ixlosmand» vakillaridan biri bo'lmish G'afur G'ulom o'zining chin e'tiqodini dahriylar jamiyatida sir tutishga majbur edi, uni o'z ijodida faqat bilvosita ifoda eta olar edi. Vasliy Samarqandiy haqidagi maqola ham shoirning ana shunday bilvosita tadqiqotlaridan biridir. G'oyat ehtiyotkorlik, favqulodda g'urur va jasorat bilan yozilgan bu maqola shoir «Adabiy-tanqidiy maqolalar» ikki tomligining II tomi [37-39 b.]da ilk bor e'lon qilingan.

Shoir o'z jamiyati siyosiy hokimiyatining o'lim hidi anqib turgan ta'qiqlaridan hayiqmay, hukmron mafkuraning umuman barcha dinlarga bo'lgan munosabatini yaxshi bila turib, o'z vatani ilm fanining yirik namoyandasi haqida haq gapni aytdi va o'ziga xos tarzda uni targ'ibot etdi. Vasliy Samarqandiy haqida G'afur G'ulomdan bo'lak biror shaxs «sovetlar» davrida biror ijobiy yoki xolis ma'lumot bergan emas. Xolis fikr va samimiy e'tiqod biroz pardalab ifoda etilgan bunday maqolalar G'afur G'ulom ijodida talaygina. Hurriyat shabadalari esib turgan bugungi davrda o'z o'zanidan toshib ketayotgan bu umrboqiy ijod va undagi tag ma'noli maqolalarni ham chuqurroq o'rganmoq lozimdur. Chunki, «Ular ayni chog'da G'afur G'ulom ijodxonasiga, ruhiy olamiga kirish u uchun bir kalit vazifasini o'taydi» [2].

Adabiyotlar:

1. G'afur G'ulom. Mukammal asarlar to'plami. 11-tom. – Toshkent, Fan, 1989. – 196 b.
2. Mamajonov S. G'afur G'ulom. MAT. XII tomlik. XI tom – Toshkent, Fan, 1989. – 394 b.

“SHUM BOLA”DA SONDA SHAKLLANGAN FRAZEOLOGIK BIRLIKLAR

**Mardiyeva Mahbuba Shavkatovna,
SamDCHI o'qituvchisi**

O'zbek xalqining sevimli yozuvchisi G'.G'ulom ijodi nafaqat, adabiyotshunoslikda, balki tilshunoslikda o'ziga xos o'rin egallaydi. Yozuvchi qo'llagan tasviriy so'zlar, frazeologik birliklar tilshunoslik ilmida chuqur tahlil qilinishi lozim. O'zbek tilshunosligida G'. G'ulom tili va uslubiga bag'ishlangan bir qancha ilmiy asarlar mavjud. Professor Hamdam Abdullayevning “G'afur G'ulom va Xorazm” risolasi adibning Xorazm mavzusidagi asarlarida keltirilgan e'tiroflar, uni ko'rgan va muloqotda bo'lgan kishilarning xotiralaridan tartib berilgan. Farg'ona Davlat universiteti ilmiy-nazariy anjuman materiallari “G'afur G'ulom – shoir, yozuvchi va olim” deb nomlandi. Zahiriddin Muhammad Bobur

nomidagi Andijon Davlat universitetida o'tkazilgan konferensiya natijalari "O'zbek filologiyasining dolzarb muammolari" nomi bilan chop qilindi. Ularda G'afur G'ulomning adabiy-ilmiy merosi, ijtimoiy faoliyati, o'zbek adabiyotida tutgan o'rni, asarlarining til xususiyatlaridan tortib, ijod mahsullarini ta'lim tizimida o'rganish muammolari, shoir haqidagi ayrim xotiralargacha qamrab olishga harakat qilingan. Biz ushbu maqolada G'.G'ulomning "Shum bola" qissasida son so'z turkumi asosida shakllangan frazeologik birliklarni semantik jihatdan tahlil qilishini maqsad qildik.

Frazeologik birliklar tilda bir so'zga teng yaxlit birlik hisoblanadi va nutqimizni badiiy jilodorligini boyitib beradi. Tilshunos Sh.Rahmatullayevning "O'zbek tilining frazeologik lug'ati"da iboraga quyidagicha ta'rif berilgan: "Ibora til birligi bo'lib, kamida ikkita mustaqil turkum leksemasidan (so'zlardan) tashkil topadi. Shunga ko'ra ifoda plani deb leksemalar va ularni bog'lash uchun xizmat qiladigan morfemalar ko'zda tutiladi".

Sevimli va o'quvchilar ardog'idagi yozuvchimiz G'.G'ulomning asarlarida iboralardan juda keng tarzda qo'llanilgan va o'z o'rnida badiiy va uslubiy bo'yoqdorlikni oshirishda xizmat qilgan. "Shum bola" qissasida son so'z turkumi asosida quyidagi frazeologik birliklar uchradi: "bir yoqadan bosh chiqarmoq", "to'rt tomonimiz qibla", "birimiz o'n bo'lib", "ikki dunyong obod bo'ladi", "nomi yetti iqlimda yoyilgan", "yetti pushtidan tortib, astar-avrasini ag'darib", "ta'rif-tavsifi yetti iqlimga ketgan" kabi ko'plab iboralarni uchratishimiz mumkin.

To'rt tomonining qibla iborasi tarkibidagi qibla so'zi asli forsha bo'lib O'TILda uning ko'p ma'noli ekani ta'kidlangan: 1. Musulmonlar namoz o'qiyotganda yuz tutadigan tomonni aytmok; sajda qilish paytida ular har qanday muqaddas joyga murojaat qilishadi. 2. G'arb, kun botish tomon [O'TIL, V, 79].

Ma'lumki, Ka'baning ichida istalgan tomonga qarab ibodat qilish mumkin. Sababi bu yerda to'rtala tomon ham qibla sanaladi. Xalq orasidagi «To'rt tomoning qibla», deyiladigan joy – ana shu yer. Ichkarida na xazina, na sirli bilimlar olami, na boshqa olamga yetaklovchi yo'l yoki g'ayritabiiy hech narsa yo'q. "O'zbek tilining izohli lug'ati" [O'TIL]da mazkur ibora "qayoqqa ketsang ketaver, ixtiyoring o'zingda" degan ma'noni anglatishi ko'rsatilgan. Tilimizda qibla so'zi ishtirokida "to'rt tomoning qibla", "beti qibladan qaytsin" iboralari shakllangan. "To'rt tomoning qibla" iborasi tarkibiga kiritilgan "to'rt" so'zi bilan bog'liq tilimizda yana "to'rt ko'z tugal", "to'rt ko'z bo'lib kutmok", "to'rt muchasi sog'" kabi iboralar qo'llanadi.

"Shum bola" qissasida mazkur ibora Qoravoy va domla o'rtasidagi dilogda domla tilidan qo'llangan:

- Xo'sh, qayoqqa qochamiz, taqsir?

-Xudoyi taoloning dargohi keng, to'rt tomonimiz qibla. Yuqoriga, Qing'iroq tepaga qochamiz (37-b).

Qissa so'nggida yozuvchi asarning tugallanmada Qoravoy tilidan "to'rt tomonim qibla" iborasini qo'llaydi va shu bilan bilan yakunlaydi: Qora-qurum bosgan sassiq takyaxonadan tashqariga chiqib, ko'kragimni to'ldirib nafas oldim. Endi men pok-pokiza, qushday yengil, ko'nglim tongday tiniq. To'rt tomonim qibla. Lekin qayoqqa qarab yo'l olsam ekan?..(185-b)

O‘n o‘zbek tiliga mansub so‘z. Bu so‘z o‘n raqami bilan ifodalangan son va miqdorni anglatadi [O‘TIL, V, 23]. Tilimizda o‘n so‘zi bilan shakllangan “biri o‘n bo‘lmoq”, “o‘n gulidan bir guli ochilmagan” iboralari mavjud.

Qissada Qoravoyning pullarni sarf qilmay ularni o‘ziga keltirib berganidan suyungan Hoji bobo tilidan biring o‘n bo‘lsin iborasi duo qilaman, puling ko‘paysin mazmunini ifoda etish maqsadida qo‘llangan: Barakalla, odam bo‘lasan, bolam. Har bir narsani tejash, bugungini ertaga zaxira qilib qo‘yish yaxshi fazilat. Shunday qilgan odam tez boy bo‘lib ketadi. Ha, shunaqa, bor, biring o‘n bo‘lsin. (153-bet)

Qissada biri o‘n bo‘lmoq iborasining biri ikki bo‘lmoq varianti odamlarni aldab, pulini olib boyib borayotgan, salbiy obraz hisoblangan domla tomonidan qo‘llangan: Dalayi dashtlarda odamlarni kuf-suf qilib, ezib ichki yozib berib, issiq-sovuq qilib binoyidek tirikchilik qilib yuribman. Ota kasbida gap ko‘p ekan, birim ikki bo‘lib boryapti. (39-bet)

Badiiy asarlarda “biri ikki bo‘ldi iborasining “kosasi oqarmadi” iborasining sinonimi bo‘lgan “biri ikki bo‘lmadi” tarzidagi bo‘lishsiz shakli ham qo‘llaniladi. Xalqimiz orasida ikki soni bilan bog‘liq “bir boshini ikki qildi”, “ikki dunyosi obod bo‘lmoq”, “bir kesak bilan ikki quyonni urmoq”, “ikki qo‘lini og‘ziga tiqmoq”, “bir to‘ni ikki bo‘lmadi”, “bir ish ikki bo‘ldi” iboralari mavjud. “Bir boshini ikki qildi” iborasi Sh.Rahmatullayevning O‘TFLda ya’ni uylantirmoq ma’nosini anglatishi ta’kidlangan [O‘TFL, 74].

Ikki soni orqali shakllangan, hadislarda mavjud “ikki dunyosi obod bo‘lmoq” iborasi “Shum bola” asarida Eshon tilidan “bir gapni ana shunday ziyraklik bilan anglab olsang, xor bo‘lmaysan, har qanday vaziyatda ishing oson bitadi” ma’nosini ifodalash maqsadida Qoravoyga nisbatan qo‘llangan: «Bo‘ladigan bola ekansan. Xudo nazar qilgan ekan. Ishqilib, hech kim ko‘rmadimi, balli, o‘g‘lim, balli, bo‘tam. Bir gapni ana shunday ziyraklik bilan anglab olsang, xor bo‘lmaysan, har ikki dunyong obod bo‘ladi...», deb ko‘p maqtadi.

Yetti soni bilan shakllangan “nomi yetti iqlimga yoyilmoq”, “yetti pushtini aniqlamoq” iboralari shakllangan. Yetti iqlim tarixiy-geografik tushuncha. Yerni yunon va O‘rta asr Sharq fanida mintaqalarga bo‘lish usuli. Keng ma’noda yerning tabiiy, siyosiy va ma’muriy bo‘linishlari tarixiga ham aloqador. Qadimda Yer sharini yaxlit tasavvur etish bilan birga, uni ma’lum qismlarga ajratib ham o‘rganganlar. Rivoyatlarda Nuh payg‘ambar Yer yuzini uch qismga ajratib, uch o‘g‘liga-shimoldagi o‘lkalarni Yofasga, o‘rtadagi mamlakatlarni Somga va janubdagi joylarni Homga bergan deyiladi. Qadim zamonning afsonaviy qahramoni Afridun esa, Yer yuzini sharq-g‘arb yo‘nalishida taqsimlab, uni o‘g‘illariga belgilabdi: sharqiy yerlarni Turga, o‘rtadagi joylarni Erajga va g‘arbiy qismni Salimga. Abu Rayhon Beruniyning “Geodeziya” asarida qadimgi eronliklar Yerni yetti qismga bo‘lib, har bir qismni “kishvar” deb ataganliklari qayd etilgan. Yerni yetti kishvarga bo‘lish siyosiy-geografik uslubga asoslangan edi. Ularning tasavvurida yetti kishvar yetti doirada: 1 doira markazda, qolganlari uning atrofida tutash joylashtirilgan. Markaziy doira (to‘rtinchi kishvar)dan Iroq, Fors, Jabal, Xuroson, Sijiston, Zabuliston, Tohariston o‘lkalari o‘rin olgan.

Qissada yetti iqlim bilan aloqador “yetti iqlimda nomim yomonlikka yoyilgan”, “ta’rif-tavsifi yetti iqlimga ketgan” iboralari qo‘llangan. Bu viloyatlardan umidim uzilgan, kimsan Ko‘kterak, Eshonbozor, Qoplonbek, Sharobxona kabi shahri azimlarda (ko‘p voqealarni ushbu sarguzashtda yozganim yo‘q) qilmagan ishim qolmagan, yetti iqlimda nomim yomonlikka yoyilgan, mazkur mamlakat va viloyatlarga qaytishim mumkin emas (112-bet); Bu bozorlar ichida, menimcha, ta’rif-tavsifi yetti iqlimga ketgani «Bit bozor» deb nomlangan rasta bo‘lsa kerak. Bu yerda joningizga orom beradigan hamma narsa topiladi: salloti shim deysizmi, poyma-poy sag‘ri kavush deysizmi, biror yetti yilgina kiyilgan, asli matoi nima ekanligi ma’lum (72-bet).

Xulosa qilib aytganda, G‘.G‘ulom har bir so‘zni, iborani o‘z o‘rnida qo‘llagan. Yozuvchi iboralarni shunchaki qo‘llamaydi, balki ular tarkibini qisqartiradi, kengaytiradi. Xalq og‘zaki ijodini yaxshi bilgan yozuvchi xalqona iboralarni qo‘llash orqali asarlari tilining o‘qimishli bo‘lib yillar davomida o‘quvchi xotirasida saqlanishiga zamin yaratgan. Biz yozuvchining “Shum bola” qissasi tilida qo‘llangan tarkibida son ishtirok etgan ayrim iboralarni tahlilga tortdik, xolos. Keyingi ishlarimizda qissa tilida qo‘llangan iboralarni kengroq tahlil qilamiz.

Foydalanilgan adabiyotlar:

1. G‘.G‘ulom. Shum bola. –T., “Adabiyot uchqunlari”, 2018.
2. N.Karimov. G‘afur G‘ulom. –T., G‘afur G‘ulom nomidagi nashriyot - matbaa ijodiy uyi, 2003.
3. T.Matyoqubova. G‘afur G‘ulom badiiyati. –T., Fan va texnologiya, 2006.
4. Rahmatullayev Sh. O‘zbek tilining frazeologik lug‘ati. –T., 1992.
5. O‘zbek tilining izohli lug‘ati. V jildlik. 1-jild. Qomuslar bosh tahririyati. –T., 2006.

BADIIYAT VA SHAXS TALQINI

**Jabbarova Dlafro‘z
SamDu dotsenti**

Har bir ijodkor hayotning malum bir qirrasini, ziddiyatlarini, inson ruhiyatidagi o‘zgarishlarni badiiyat mezonlari asosida talqin etadi. Yozuvchi Odil Yoqubov 80-yillardagi xalqimiz hayotini, ijtimoiy qarama-qarshiliklarni tasvirlovchi “Adolat manzili” romanini yaratdi. Asar “o‘zbek ishi”, “paxta ishi” muammolarini talqin etuvchi romandir. bizda “o‘zbek ishi” to‘g‘risida yozmagan, fikr bildirmagan birorta ham yozuvchi, shoir qolmadi, desak mubolag‘a bo‘lmas. Bu mavzu yirik jiddiy asarlarda ham aks sadosini topdi” [1].

To‘g‘ri, turg‘unlik davri voqealarini, ijtimoiy muhitning salbiy illatlarini, shaxsga sig‘inishning fojiali tomonlarini badiiy talqin etuvchi O‘tkir Hoshimovning “Tushda kechgan umrlar”, Tog‘ay Murodning “Otamdan qolgan dalalar” kabi epik asarlar ham yuzaga keldi. Ammo “Adolat manzili” romanida hayotdagi qarama-qarshiliklar bilan bir qatorda, emirilib borayotgan imperiyaning ko‘z o‘ngimizda yuz berayotgan salbiy qirralarini badiiy tasvir orqali yoritib beradi. Chunki yozuvchi hayotdagi salbiy illatlarga har qanday davrda o‘z munosabatini bildirib kelgan.

Shu nuqtai nazardan, yozuvchi romanlaridagi ijodiy o'sishga nazar tashlasak, «Diyonat»da Normurod Shomurodov, Otaqo'zi, Quدراتxo'ja, «Oq qushlar, oppoq qushlar»da Shorahim, Fotih Muzaffarov, Shoqosim, Mehriniso kabi obrazlar orqali «o'zi yashayotgan zamon, zamondoshlari» haqidagi o'y-mulohazalarini talqin etsa, «Adolat manzili»da Suyun burgut, Vetran bobo (SHerbo'ta Norbo'taev), Marjonoy, Sharanovskiy, Mirjalolov kabi obrazlar orqali davr fojealarini, hayotda ro'y berayotgan voqealarning asl mohiyatini, xalqimiz boshiga tushayotgan zarbalarning sabablarini o'z fantaziyasi orqali ochib tashlaydi.

Totalitar tuzum vujudga keltirgan sotsial muhit, xalq manfaati yo'lidagi sai-harakatlar shaxs fojiasiga olib keladi. Sherbo'ta Norbo'taev o'z yurtida yuz berayotgan barcha yaramasliklarni, adolatsizliklarni, nohaqliklarni anglab etadi, yurakdan his ham etadi, ammo bu holatga qarshi kurashsa-da, haqiqatni yuzaga chiqara olmasligiga ishonch hosil qiladi. "yozuvchining niyati adolatni, adolat uchun kurashni ko'rsatish. Shuning uchun u qiziqarli hayotiy qissalardan faqat o'z ijodiy maqsadi uchungina zarur bo'lgan voqealarni tanlab oladi" [2]. Davrning murakkab muammolarini, inson taqdirini, adolatsizlik qurboniga aylanib borayotgan shaxs fojialarini badiiy asar uchun asos qilib oladi.

Romanda davr va tuzumning salbiy tomonlarini asoslash uchungina hayotiy real voqelikka murojaat etish orqali, xalqimiz boshiga tushgan og'ir kunlarni, o'z erkini tamoman yo'qotib borayotgan inson qiyofasini, haq va haqsizlik, adolat va adolatsizlik, baxt va baxtsizliklarning shaxs fojiasi orqali ko'rsatishga intiladi. YOzuvchi romanlarining barchasida adolat izlab, haqiqatni yuzaga chiqarish uchun, o'z haq-huquqini talab etuvchi obrazlar galeriyasini kuzatamiz. Bu xususiyat romanda yanada go'zalroq o'z ifodasini topganligiga kitobxon ishonch hosil qiladi.

Roman markazida asosan Suyun Burgut obrazi etakchilik qiladi. U o'z manfaatidan xalq manfaatini ustun qo'yadi. Halol, kamtarin, adolatli inson sifatida gavdvlanadi. Asarda insonni faqat ulug'lash emas, uning mag'rurona holati bilan bir qatorda, ojiz tomonlarini ham yoritib beradi. Ijtimoiy muhitdagi shaxs fojeasining sabablari yoritilar ekan, bunga muhitni harakatga keltiruvchi shaxslarning sezilarli ta'siri mavjudligi asoslanadi.

Asar bosh qahromoni Suyun Burgut halol, vijdonli, tadbirkor, bilimli, xalq ko'ngliga yo'l topa oluvchi shaxs sifatida talqin etiladi. Bu xislatlari orqali charvador savxozlaridan biriga direktorlik darajasiga ko'tariladi. U o'z davrining shaxsi sifatida bunyodkorlik ishlarini amalga oshiradi. Marjonoy esa Suyun Burgutdagi shijoatdan, undagi qobiliyatdan mag'rurlanib yuradi. Hatto umri tog'u toshda qo'y ketida o'tgan pok, soddadil cho'pon Darvesh duduqning qo'rasiga o't ketganda ham, Suyun Burgut unga yordam qo'lini cho'zadi: "Nima qilib bo'lsayam bu ikki cho'ponni qamoqdan asrab qolmoq kerak. Qamab qo'yishsa, paloponlarini kim boqadi? Hamasi osh deb, non deb chirqillab yotgan jo'jachalar... Ammo-lekin... cho'ponlarni asrab qolish uchun qirilgan qo'ylarni tiklash lozim! Hukumatning bitta ham qo'yiga tegib bo'lmaydi. Men hozir xalqqa murojaat qilaman. Ammo xalqdan yordam so'raydurg'on odam avval o'zi ibrat ko'rsatmog'i darkor",- deya yuz bosh qo'yini beradi [3]. Bu yaxshiligi evaziga keyinchalik boshiga og'ir kulfatlar tushadi, ammo shunda ham o'z insoniyligini

saqlab qolishga intiladi. Odamlarning ham Suyun Burgut desa ogʻzidan bol tomadigan boʻladi. Biroq Suyun Burgut mudhish tuhmatga uchraydi: «Moskvadan «haqiqat qilgani», «adolat oʻrnatgani» kelgan Sharanovskiyy boshliq bottol desantchilar uni koʻzboʻyamachilik poraxoʻrlikda ayblab hibisga oladilar» [4]. Oʻz taqdirini xalq hayotiga baxshida qilmoq ilinjida harakat etayotgan Suyun Burgut adolatsizlikning qurboniga aylanadi.

Asar voqealari rivojida Mansur mesh obrazi ham etakchilik qiladi, Marjonoyning ichki monologi orqali uning xarakteri namoyon boʻladi: «Bu meshqorinning sassiq gaplariga qarang! Emagan emish, ichmagan emish! Bir qoʻyni oʻn, oʻn qoʻyni ming qoʻy qilaman deb, umri oʻtgan emish! Ayron ichib meshqorin boʻlgandirsan! Odamlarga yomonlik qilmagan emish! Odamni odam qatori koʻrmaganlaring-chi? Birov qarshi gapirsa goʻrga tiqquncha quvganlaring-chi? Arz qilganlarning etti pushtigacha qorakuya surganlaring-chi?» (39-bet). Bu oʻrinda ichki monolog orqali badiiy xarakterlarni tavsiflash holatini kuzatamiz. Bu monolog orqali oʻsha davr shaxslarining qiyofasi jonlantiriladi. Mansur mesh kabi shaxslarning maʼnaviy qiyofasi ochib tashlanadi. Badiiy asarda monologlar ham etakchi rol oʻynaydi. «Manolog personajlarning dialogidagi nutqidan tashqi jihatdan ham farq etadi: qahramon oʻz ichki dunyosini keng ochib berar ekan, ancha uzoq gapiradi, shu sababli monologlar uzun boʻladi» [5].

Marjonoy monologi orqali halol, mehnatsevar Suyun Burgutga qarama-qarshi boʻlgan, mansur mesh holati yoritiladi: «Insofu adolat yoʻq emish odamlarda! Qishloq qurgan boʻlsang... oʻzingni ham esdan chiqarmading. Xudayorxonning saroyidan qolishmaydigan saroy qurding oʻzingga!.. YOshing etmishga bordi! Endi senga mansab ne kerak, qari boʻri?..»(39-bet). Voqealar rivojida Suyun Burgut va Lochin dialogik nutqi orqali esa davrning bazi qirralari ham yoritiladi: «- Hozir Toshkentdan televizorchilar, shoirlar, muxbirlar kelishadi... Biz ular bilan bahs qilmoqchimiz, ota!.. Hayot toʻgʻrisida... Boʻlayotgan nohaqliklar, boʻhtonlar qama-qamalar toʻgʻrisida... YO sizga toʻhmat qilishmadimi, ota?.. – Oʻgʻlim!.. –Maboda yoshlik qilib, har xil xomxayollarga borib yurmanglar. Hukumat bilan hazillashib boʻlmaydi... - Bilaman!.. Quloq qilib otishgan! Dushmansan deb chopishgan! Oʻz elini, Xotin bola- chaqasini himoya qilgan oʻgʻlonlarni «bosmachi» deb osishgan!.. –Siz bilmaysiz!.. Butun oʻzbek xalqi poraxoʻr emish, oʻgʻri emish!.. Bu shoʻrpeshona elni kim himoya qiladi? Kim bu boʻhtonlarni rad etadi! Kim haqiqat qiladi!..» (44-45-betlar)

Xalqimiz boshiga ne-ne ogʻir kunlar tushmadi? Asrimiz boshidagi ayanchli kunlar, millat gullarini qirgʻin qilishlar, Vatan uchun, oʻz erki va ozodligi uchun kurashganlarning ayanchli qismati kitobxon koʻz oʻngida haqqoniy jonlanadi. Asar qahramoni Lochin tilidan yozuvchi yillar davomida qalbidagi armonli gaplarni oʻquvchiga etkazadi. Hayotning shafqatsizligini, xalqimizning porakandalik sari ketayotganligini badiiy tasvirlar orqali koʻrsatadi. Kitobxon esa saksoninchi yillar hayotidagi bir yoqlama qarashlar bilan oʻrtoqlasha boshlaydi. Xalqimiz boshiga tushayotgan bu musibatlarning sabablarini izlay boshlaydi. Lochin bayon qilgan fikrlarning qay darajada haqiqat ekanligini, nima uchun malum bir davrda faqat oʻzbek xalqi boshiga ayanchli kunlar tushish sabablarini, totalitar tuzumning qay darajada salbiy iz qoldirganligini asardagi voqealar rivojidan aglab oladi:

“To‘g‘risini aytsam... gap faqat bizning sovxozda emas, shoir aka! Butun elimiz oyoqosti bo‘ldi-ku, axir? Yochiqayotgan maqolalarni o‘qimayapsizlarmi? Chin poraxo‘rlar, chin yulg‘ichlar emas, butun o‘zbek xalqi poraxo‘rlik kasaliga muhtalo bo‘lgan emish!.. Yo‘q, el emasmiz biz!.. Na g‘urur bor bizda, na izzat-nafs!.. Qani... guruzinlarga tegib ko‘rsin-chi o‘sha bo‘htonchi jurnalistlar, allaqachon qo‘zg‘alon qilib yuborardi bu xalq!” - degan so‘zlaridan fig‘oni ko‘kka chiqardi. Suyun Burgut adolatning qaror topishiga ishonch hosil qilgan. Veteran bobo haqsizlikka qarshi kurashdi, ammo hayot o‘zgardimi yoki odamlar hayotga, oqimga moslashdimi? Anglab, iztirob chekib oxiriga eta olmas edi.

Yozuvchi badiiy asar orqali o‘sha davr va shaxs fojiasini badiiy bo‘yoqlar orqali haqqoniy ko‘rsatib beradi. Saksoninchi yillarning ikkinchi yarmidagi adolatsizliklar, nohaqliklar badiiy tasvir orqali o‘z ifodasini topadi.

Foydalanilgan adabiyotlar:

1. Normatov U. Burgut shijoati / O‘zbekiston ovozi, 1995yil, 28 yanvar.
2. Ali Muhammad. Bu – hayot qonuni / O‘zbekiston adabiyoti va san‘ati, 1996-yil, 11-oktyabr.
3. Yoqubov O. Tanlangan asarlar. Birinchi jild. Adolat manzili (roman). –T., «Sharq», 2005, 31-32-betlar (Bundan keyingi asardan olingan iqtiboslarning sahifasi qavs ichida beriladi).
4. Mirzaev S. So‘nggi qatog‘on talqini. O‘zbekiston adabiyoti va san‘ati, 2001 yil, 27iyul.
5. Sulton I. Adabiyot nazariyasi. –T., «O‘qituvchi», 1996, 221- bet

IJODKOR “MEN”I IZTIROBLARINING BADIY IFODAGA KO‘CHISHI

**Isabaeva Gulhayo Farhod qizi,
Alisher Navoiy nomidagi Toshkent
davlat o‘zbek tili va adabiyoti
universiteti tayanch doktoranti**

Badiiy asar ijodkor dunyoqarashi, milliy an‘ana, makon va zamon, uzluksizlik singari kategorial tushunchalarga chambarchas bog‘liqligi uchun adabiy tadqiqotchining yondashuv yo‘sinlari ham shunga mutanosib tarzda yuzaga chiqadi. Zotan munaqqid obraz tasviridagi nainki adabiy an‘ana va shajaraviy aloqadorlik, balki muallifning o‘z-o‘zini taftish etish jarayonlari, asar yozilayotgan vaqtdagi kayfiyat-hollari, xususan Ona obrazi yaratilgan qissalarda yozuvchining o‘z onasi mo‘‘tabar ruhi oldidagi qarzdorlik hislarini ham nazardan qochirmaslikka intiladi. Masalan, O‘tkir Hoshimovning “Dunyoning ishlari” qissasini olaylik. Aksariyat adabiyotshunoslar shu paytgacha asardagi Ona obraziga ahamiyat qaratishdi. Ona xarakterining milliy-mental qiyofasi, fidoyiligi, sabr-bardoshi, xokisorligi, farzandlari uchun butun borlig‘ini baxshida eta olish qudrati haqida gapirishdi.

Shubhasiz, bunday xususiyatlarni kuzatish muhim. Biroq ularni faqat o‘zbek va hatto muazzam Sharq onalarigagina xos fazilatlar, deb belgilash bir tomonlamalik bo‘lmasmi? Axir, Momo Havvodan tortib aynizamongacha bo‘lgan barcha Onalar zaminu zamonidan qat‘iy nazar farzandu arjumandini

ardoqlab, unga o'z jonini nisor qilishga hamisha hoziru nozir bo'lishgan emasmi? Ha, shunday.

Ma'lumki, san'at psixologiyasi barcha badiiy faoliyat turlarining eng umumiy qonuniyatidir. Zotan u psixologiyaning bir tarmog'i sifatida san'at, xususan so'z san'atining kitobxonga ta'siri bilan bog'liq turli shakllarini tahlil qilish, ijodkor inson shaxsining shakllanish mexanizmlarini teran ochib berishga imkon beradi. Psixologiyani o'rganadigan boshqa fanlardan farqli o'laroq, obrazlilik asosida ish ko'ruvchi badiiy so'z san'ati lirik qahramon hissiy kechinmalari, muallif va personajlarning mulohaza-mushohadalari, poetik matn doirasidagi sinchkov kuzatuvchanlikka asoslanadi. Yaxlit adabiy jarayon kontekstida o'z izohini topadi.

Binobarin, yuqoridagi masalaga miqyosliroq nazar tashlansa, boshqa bir haqiqat ham ochiq-oshkor bo'y ko'rsatadi. Bu oliyjanob qalb sohibi bo'lgan Onani yo'qotgach, ko'ngilda tug'iladigan burchdorlik hissi, kundalik hayot tashvishlariga sho'ng'ib o'z vaqtida onaizorga lozim darajada mehr-muruvvat ato eto eta olmaganlikdan keluvchi ulkan qarzdorlik tuyg'usidir. Ya'ni ijodkor "Men"ning o'z-o'zini taftish etish va "qilmish"larini kechira olmaslik hissidir. Xuddi ana shu iztirob va armonlar badiiy ifodaga ko'chadi. Zotan yozuvchi o'z onasi obrazini xotirasida qayta tiklar ekan, o'sha qarzdorlik va burchdorlik hissidan xalos bo'lish niyatida qo'liga qalam oladi. Dard-iztiroblarini qog'ozga tushiradi.

Tabiiyki, adib estetik niyatidan ibtidolangan Ona timsolini yaratish istagi birinchi navbatda, xotira siniqlarida sochilib yotgan parchalardan o'z onasi mukammal obrazini, xarakter sa'jijasini qayta tiklashga qaratiladi. Ayni paytda, Ona obrazida u barcha onalarga xos ezgu fazilatlarni ham mujassamlashtirishga intiladi. Natijada bu obraz muayyan ma'noda milliy-mental tip maqomini oladi. Chunki, badiiy asar dastavval, keng kitobxonlar ga mo'ljallangani bois, adibning o'quvchiga aytar so'zi, ogohlikka da'vatini ham tashiydi. SHunday ekan, bizningcha, O'tkir Hoshimov "Men"i badiiy voqelikni his qiluvchi, o'z-o'zini taftish qiluvchi, qarzdorlik hislari zalvaridan qutulishga bo'lgan botiniy ehtiyojini qondirish istagida harakat qiluvchi, o'zining hol izhorlari bayoni orqali bizni ogohlikka da'vat etuvchi qahramon darajasiga yuksaladi. Binobarin, "Dunyoning ishlari" qissasi poetik matni va badiiy ijod psixologiyasi yutuqlariga tayanish bizga umuminsoniylik tipik ifodasi va muallif obrazini turli rakurslardan kuzatish imkonini beradi.

Ko'rinadiki, Ona obrazi yaratilgan qissalarni birgina milliy madaniyat doirasida emas, balki umuminsoniy mohiyatda va so'z san'ati psixologik tabiatiga xos motivatsion jarayonlar rakursida o'rganish mumkin. Jumladan, "Dunyoning ishlari" qissasi va uning ijodkori bo'lgan O'tkir Hoshimov o'rtasidagi o'zaro bog'liqlikni nazardan qochirmaslik lozim. Chunki bu munosabatning turli aspektlarini tahlilga tortish orqali biz yozuvchi dunyoqarashi, estetik idroki, obraz tasvirida milliy adabiy an'analarga nechog'lik yaqinligi, ijodiy uslubi va poetik mahoratiga xos individuallikni kashf etamiz. San'at asari semantik mazmuni bilan muallif tiynati, kechinmalar dunyosi hamda kitobxon hissiyotlari orasida mustahkam rishtalar mavjud. Ayni shu hol ijodkor inson siymosini birinchi planga olib chiqadi. Bizdan tizimli-tipologik munosabatni talab etadi.

Ma'lumki, ratsional tizimlarda sub'ekt va ob'ekt o'rtasidagi munosabatlarga alohida haq beriladi. Tizimli yondashuv modellari o'zaro ta'sirning turfa tarxlarini o'z ichiga qamrab oladi. Ob'ekt va sub'ektning bir-biriga ta'siri bilan bog'liq jarayonlarning barcha tarkibiy qismlarini batafsil o'rganishni nazarda tutadi. L.YA.Dorfman, V.P.Morozov, E.A. Golubeva, A.L. Gotsdiner, L.L. Bochkarev va boshqalarning asarlarida bunday tizim shakllari keltirilgan. Masalan, inson badiiy obrazni ulug'vorlik, tubanlik, kulgulilik moduslari negizida idrok etadi va ifodalaydi.

Psixologik turlar tizimi: ratsional, irratsional va aralash shakllarda namoyon bo'ladi. Sharqona badiiy adabiyot insonni koinot farzandi sifatida olib qaraydi. Badiiy asar ijodkori kitobxonni ham o'z botinidagi samoviy yuksaklikka ko'tarmoqni tilaydi. Uning "Men"ligiga ta'sir etib, hayrat vodiysiga olib o'tishni ko'zlaydi. Kitobxon ongini transsentel yuksaklikka olib chiqish, "Men"ligini borliqning muazzam ohanglariga oshno etish, imkon qadar uyg'un bir garmoniya hosil qilishga harakat qiladi. Fenomenologik yondashuvda o'sha uyg'unlikni tashkil qiluvchi turfa unsurlar o'rtasidagi murakkab bog'lanishlarning tabiati va o'zaro ta'siri o'rganiladi.

Anglashiladiki, har bir psixologik turning o'ziga xos yondashuv uslubi va ijodiy-estetik maqsadi mavjuddir. Zotan, so'z san'ati ijodkorning o'z-o'zini anglash, o'zligini topish va nafis so'z vositasida namoyon qilish shaklidir. Shu ma'noda, Ona obrazi yaratilgan asarlar teran avtobiografik xarakter kasb etadi. Ijodiy jarayon va uning tarkibiy qismlari va dinamikasini kuzatish shuni ko'rsatadiki, badiiy ijodiy faoliyat nihoyat darajada individual hodisadir.

Adabiyotlar ro'yxati:

- 1.[Аллахвердов В.М. Психология искусства. Эссе о тайне эмоционального воздействия художественных произведений. – СПб.: ДНК, 2001](#)
- 2.Анастасьев Н. Владимир Набоков. Одинокий король. – М., 2002
- 3.Арнаутов М. Психология литературного творчества. – М., 1970;
- 4.Арнхейм Р. Новые очерки по психологии искусства. – М., 1994
- 5.Беляев И. А.[Творчество как форма становления индивидуальной целостности человека](#) / И. А. Беляев // Вестник Оренбургского государственного университета. – 2010. – № 10 (116), октябрь. – С. 57-61.
- 6.Бердяев Н. Самопознание. – М., 1991.
- 7.Сапаров М. А. Понимание художественного произведения и терминология литературоведения // Взаимодействие наук при изучении литературы. – Л.:Наука, 1981. – С.214-243.
- 8.Matyoqubova, T., & Yakubov, I. (2020). Laboratory works of Gafur Gulam: poetic image and imagery. Journal of critical reviews, № 7, pp. 28-37.
- 9.Yakubov, I. (2021). Real and artistic truth in the poem "Black sun" / Aktualnye problem tyurkologii: Rossiya i tyurko-musulmanskiy mir. (pp.211-213). Kazan.

G'AFUR G'ULOM VA SHAYXZODA

**Ramazonova Go'zal,
mustaqil tadqiqotchi**

O'zbek xalqining unitilmas, benazir, jonkuyar farzandi, xalqlar do'sligining otashqalb kuychisi, badiiy ijodning deyarli barcha turlarida sermahsul ijod qilgan G'afur G'ulom adabiyot olamida takrorlanmas asarlar yaratgan. Yetti pushti ilmi va savodxon bo'lgan adibning savodi 5-6 yoshlarida onalari Toshbibi so'ng otalari G'ulom Orif o'g'li yordamida chiqqan ekan. G'afur G'ulomning otasi ham ilm-ma'rifatli, adabiyot, tarix, she'riyatni yaxshi tushungan va shu bilan birga o'zi ham she'r yozib turgan. U kishining she'r g'azallari "G'ulom", "Mirzo" nomi bilan mashhur bo'lgan. Onasi Toshxonbibi shu davrning old ayoli sifatida savodli bo'lgan. Shu tufayli bo'lsa kerakki shoir ham kitobga juda mehr qo'yadi.

Yo'qchilik yillarida to'qqiz yoshida yetim qolgan G'afur G'ulom o'z kunini ko'rib, singillarini parvarishlashni ham o'z gardaniga olgan bo'lsa hamki, kitob o'qishni aslo tark etmaydi. "Dadam kitob yo'q joyda, o'qish intilish yo o'q joyda ma'naviy yuksalish va barkamollik yo'q", – der edilar deb eslaydi adibning qizi Olmosxon.

G'afur G'ulomning uyida tez-tez Sobir Abdulla, Habibiy domla, Sayfiy, Boqiy va boshqalar bilan suhbatlar uyushtirilar, qo'lyozma kitoblarni o'qishar, ulardagi voqea hodisalarni muhokama qilib bahslashar edilar. Bunday ma'naviy ozuqa beradigan kechalar ko'plab o'tkazilib turardi. O'zga mamlakatlar, ularning turmush tarsi, urf-odatlariga juda qiziqqanligi sababli sayyohlarning kitoblarini ham yaxshi ko'rib o'qiganlar, ayniqsa, Bedilni sevib mutoolaa qilgan. U kishining qadrdon do'sti Maqsud Shayxzoda shunday yozadi: "G'afur G'ulomning birinchi va asosiy adabiyot o'qituvchisi – kitob, hayot muallimi esa – matbuot" yana aniqrog'i gazeta bo'ldi". G'afur G'ulom shoirlar ichidan juda yaqin do'stona aloqada bo'lgan Maqsud Shatxzoda Bedil, I. A. Brodskiylar kabi bir joyda ekilib, boshqa bir joyda meva bergan shoirlardan. Asli Ozarboyjonlik bo'lgan. Shayxzoda qismatning achchiq taqozasi bilan 1928-yilda Toshkentga keladi va bu xalqning qalbidan tanti, oliyjanob farzand sifatida makon topadi.

1929-yildan buyon ya'ni 21 yoshdan buyon bu ikki ijodkor tez-tez oilaviy bordi-keldi qilib turishgan. Bora-bora esa jondosh aka-ukalardek bir-birlariga yaqin bo'lib qoldilar. Bu haqda Olmosxon: "Maqsud amakini men tug'ilganimdan buyon oilamning a'zosi, otamning ukalaridek yaqin odam deb bilganman", "bularning hazil mutoyibalari, tarix haqidagi suhbatlari hech ado bo'lmasdi, hech bir-birlaridan zerikmasdilar", "dadam biror kun badbinroq hayolga borsalar yoki yozuv-chizuvlar vajidan ba'zan siquvlar bo'lganida, albatta, "Shayxga ayting, tezlikda uyga kelsin" – derdilar", deya o'z esdaliklarida xotirlaydi.

Maqsud Shayxzodaning adabiy ijodi G'afur G'ulom ijodidan bir muncha vaqt keyin boshlanadi. Shayxzodaning ijodiy lirikasi mazmunan o'z davri uchun, jamiyat uchun xizmat qildi. O'z kitobxonlarida samimiyatni, ezgu niyatlarni uyg'otgan bu she'rlar mazmun jihatdan G'afur G'ulom she'rlari bilan uyg'unlashib ketardi. Sababi ular faqatgina zamondosh bo'lib qolmasdan, ko'pgina voqea-hodisalarni birgalikda boshdan kechirib, bir xil mushohada qilishar edi. Shu

sababli bo'lsa kerak, albatta, bu ikki qalb sohibining she'rlarida baynalmilallik va xalqlar do'stligi yuqori pardalarda kuylangan.

Afsuski, bu yerda ham ta'qib ostida qolgan Maqsud Shayxzodani 50-yillarda tuxmat bilan qamoqqa oladilar. Bu hol G'afur G'ulomga juda yomon ta'sir qiladi. Shunday vaziyatda Adib Shayxzodaning Oilasini ham tashlab qo'ymadi, turmush o'rtog'i – Sakinaxonga, ularning asrab olgan farzandlari Rosim va Olimalardan yordamini ayamadi va ruhan dalda berib turdi. Ular bu tanti, oliyjanob insonning uyiga tez-tez kelib turishar va otasi haqida suhbatlar qurib, bu oiladan ruhan madad olardilar. Sakinaxonga ham bu uy o'z uyidek bo'lib qolgan edi, chunonchi, Shayxzoda bu ayolni bokudan kelin qilib ilk bor shu ostonaga olib kelgan edi.

Oradan ikki yil o'tib ozodlikka chiqqan Shayxzoda ancha o'zini oldirib, kasallikka chalinib qolgadi. Shu sababli o'zining ham qizidek bo'lib qolgan Olmosxonning (bu ismni unga M. Shayxzoda qo'ygan) nikoh to'yiga ham boorish nasib qilmaydi. Ming afsuski, shavqatsiz taqdirning barcha ko'rgiliklariga dosh bergan taqdir endi o'zining yelkadoshi, eng yaqin insonidan ayrilishdek juda ham og'ir musibatga duchor qildi. Bu voqeadan so'ng Shayxzoda uchun kunlarning o'tishi yanada qiyinlasha boshladi.

O'zbek xalqining yuragidan o'z asarlari bilan o'chmas joy olgan, bolalar va kattalar uchun ham birdek sevimli bo'lgan, o'z asarlarida mehnatkash insonni bosh obraz qilib olgan G'afur G'ulom xalqimizning faxri va oqsoqol otaxon shoiri sifatida kitobxonlar qalbidan joy oldi. Shoirning oxirgi she'ri G'afur G'ulom vafotining 100 yilligiga bag'ishlab yoziladi. Bu kunlarga uzoq bardosh qila olmagan Shayxzoda ham ko'p o'tmay bu olamdan ko'z yumadi.

BADIIY IJODDA FOLKLOR AN'ANALARI

(G'afur G'ulom va Omon Muxtor ijodi misolida)

Xo'jamqulov Anvar Jozilovich,

SamDU tayanch doktoranti,

Badiiy adabiyot tadqiqi xususida so'z borar ekan, avvalo, uning ikki xil namoyon bo'lish shakli – og'zaki va yozma adabiyotni bir-biridan alohida o'rganish urfga kirganligini ta'kidlash joiz. Xalq og'zaki ijodi ildizlarining yozma adabiyotga nisbatan qadimiyligi o'z-o'zidan yozma adabiyotning xalq o'g'zaki ijodidan sug'orilishini mantiqan dalillaydi. Shuni inobatga olib, so'z yuritmoqchi bo'lganimiz ijodkorlar – G'afur G'ulom va Omon Muxtor asarlarida ham xalq og'zaki ijodining bevosita ta'sirini sezish mumkin.

G'afur G'ulom ijod namunalarini mutolaa qilar ekanmiz, uning she'riy asarlarida ham, nasriy asarlarida ham zamonaviy mavzular bilan bir qatorda xalqning o'tmish tarixi, madaniyati, ijtimoiy-maishiy hayoti va unda aks etgan orzu-armonlari – folklor namunalaridan ustalik bilan foydalanganligini ko'ramiz. Ayniqsa, nasriy asarlarida milliylik ruhi ufurib turadi. Jumladan, "Shum bola" qissasini olaylik. [1:1-133] Qissada xalq og'zaki ijodiga xos hikoya qilish usuli tanlangan. Asar boshidayoq Ilhom samovarchining choyxonasidagi grammafondan yangrayotgan Farg'ona yallachi xotinlarining maqom, yalla va ashulalari o'quvchini beixtiyor xalq qo'shiqlari, yalla va laparlarni eslashga undaydi. [1:3]

Shuningdek, asar personajlarining nomlari va laqablarida, masalan, Malla jinni, Karim jinni, Xol parang jip-jinni, Tojixon, Juft kaptar, Eshonoyi, Shohidoyat xoji, Orifxo‘ja eshon, Olim qozi, Sharifjon Duma, Oysha yallachi kabilarda og‘zaki ijodga xos bo‘lgan oddiylik, jaydarilikni kuzatish mumkin.

Qissada xalq ertaklari syujetiga xos bo‘lgan o‘rinlar ham uchraydi. Asar qahramoni Qoravoy (shum bola)ning tarificha xo‘jayinlarining ichida “eng xudo urgan badbaxti, ziqnasi” Sariboy bo‘lis bilan bo‘lgan dialog – yolg‘on sahnasi “Uch yolg‘onda qirq yolg‘on” o‘zbek xalq ertagini esga soladi.[2:3-13] Bundan tashqari, qissada ko‘plab xalq maqollari, xalq qo‘shiqlari, lapar va yallalar uchraydi:

Xom terini iylasang, ulton bo‘lur,

Nafsini tiygan kishi sulton bo‘lur. [1:103].

G‘afur G‘ulom ijodiga xos folklor an‘analari mustaqillik yillarida ham munosib davom ettirildi. Jumladan, yozuvchi Omon Muxtorning “Xotin podshoh” romani fikrimizga dalildir. Romanda tarixiy faktlar, tarixchilarning yozib qoldirgan ma‘lumotlari, muallifi aniq bo‘lgan she‘riy parchalar bilan birga, qadimiy rivoyatlar, afsonalar, latifa-askiyalar, roviylar tomonidan aytilgan hikoyalar – folklor na‘munalarini uchratish mumkin.

Romanning

“O‘zi beku o‘zgalarga qul bo‘lgan yurt meniki,

Qancha-qancha bosqinlarda yo‘l bo‘lgan yurt meniki,

Yig‘lay-yig‘lay ko‘ksi mudom ho‘l bo‘lgan yurt meniki...”

(Jumaboy)

she‘riy jumlati epigraf bilan boshlanishi o‘quvchi-kitobxon uchun asar mavzusining yo‘nalishini belgilab beradi, deyish mumkin[3:3] Romanda Buxoro va butun Turkiston o‘lkasiga arab xalifalarining bosqinlari, islom dinining targ‘ib etilishi va ayni damda, mahalliy hukmdorlarning arablarga qarshi goh birlashib, goh tarqoq holda olib borgan urush-isyonlari haqida so‘z boradi.

Roman uch qismdan iborat bo‘lib, birinchi qismi “Turkiston” deb nomlangan va unda Turkiston o‘lkasining paydo bo‘lish tarixi, Buxoro va uning atrofidagi shahar-qishloqlarning qanday yuzaga kelganligi, hududni ikkiga bo‘lib turgan Omul (Amudaryo) daryosining ikki qirg‘og‘ida joylashgan Xuroson va Turon mamlakatlari turmush tarzi yoritilgan. Asar bosh qahramoni – Xotin podshoh. Bu nom arablardan chiqqan. Uning asli ismi Oynur bo‘lib, o‘n olti-o‘n yetti yoshdagi xivichdek nozik, yoshlik-beg‘uborligi, chiroyiga to‘lg‘in qizaloq-kekinchak. Turmush o‘rtog‘i Bidun Buxorxudot Buxoro mudofaasi chog‘idagi jangda xalok bo‘lib, hali emizikli bolasi bilan Oynur taxtga o‘tirishga majbur bo‘ladi. Asar voqealari Oynur – Xotin podshohning Omul daryosidan dushmanning sol orqali kechib o‘tayotganligi haqidagi xabarni eshitib, buning tashvishida kechasi bilan uxlayolmay, xalovatsiz tunni bedor, o‘ychan o‘tkazishi tasviri bilan boshlanadi. Yozuvchi Xotin podshoh o‘y-xayollari bahonasida dushmanning kim ekanligini oydinlashtiradi: Makka shahrida johiliya davrining eng avjiga mingan davrida Islom dinining yuzaga kelishi, payg‘ambarimiz Muhammad (s.a.v.) hayoti va u zotdan keyin musulmonlarga bosh bo‘lgan xalifalar (“xulafo ar-roshidin”, ya’ni “to‘g‘ri yo‘ldan borgan xalifalar”) Hazrat Abu Bakr,

Hazrat Umar, Hazrat Usmon va Hazrat Alilarning xalifalik davrlari, ulardan so'ng xalifa Muoviya va aynan, uning hukmronligi davrida Xuroson va Turon, jumladan, Xotin podshoh hukmronlik qilayotgan Buxoroga hujumga shaylanayotgan dushmanning arablar ekanligi ma'lum bo'ladi. Shuningdek, asar ekspozitsiyasida Buxoro va uning atrofidagi shahar-qishloqlarning iqlimi, sharoti, hayvonot va o'simlik dunyosi haqidagi fakt-ma'lumotlar o'quvchida memuar asar o'qiyotgandek taassurot uyg'otadi, beixtiyor "Boburnoma" uslubi xotirada uyg'onadi. Bu haqida muallifning o'zi quyidagilarni bayon qiladi: "Bu asarni kim tarixiy, kim ma'rifiy deyishi mumkin. U – shu kungi roman, qolgani adabiyotshunoslar ishi... Asar ustida ishlayotib, uzoq tarixga tegishli yozuvlar, eski xalq rivoyatlari va qo'shiqlari, Narshaxiy, Vamberi kitoblari, ustod Sadriddin Ayniyning tarixiy maqolalari, akademik Ibrohim Mo'minovning ayrim kuzatuvlarini ham o'rganishimga to'g'ri keldi..." [3:4-5] Haqiqatdan ham, asar mutolaasi jarayonida kitobxon estetik zavq olish barobarida muallif aytgani kabi "ma'rifiy" ozuqa ham oladi. Shu bilan birga, xalq og'zaki ijodiga mansub ko'plab rivoyat va afsonalar bilan ham tanishadi. Ushbu afsona va rivoyatlarning asar syujetiga mohirlik bilan singdirilishi asarning ortiqcha zo'riqishlarsiz, ertakdek yengil o'qilishini ta'minlagan. Voqealar rivojida Xotin podshohning afsonaviy To'mariga qiyoslanishi [3:10, 25], Shiroq jasorati tavsifi orqali buxorxudot shaxzodalarining jur'atsizligi [3:10], roviy obrazi bilan donishmand hikoyanavis – xalq ertakchisi tasviri [3:5] ifoda etilgan. Bundan tashqari, Buxoroning Alp Er To'nga (Afrosiyob) tomonidan bunyod etilganligi to'g'risidagi rivoyat [3:12-16], Eron shaxzodasi Siyovushning Alp Er To'nga (Afrosiyob) ishonchiga kirib, uning qiziga uylanishi va oxir-oqibat Alp Er To'nga (Afrosiyob)ga xiyonat qilishi oqibatida qatl etilishi, unga atab xalq tomonidan marsiyalar to'qilishi [3:12], turli urf-odatlar (masalan, xo'roz so'yish kabilar)ning hikoya qilinishi tarixiy va ma'rifiy oziq olish bilan bir qatorda, o'quvchini xalq og'zaki ijodiga yetaklaydi. Romanning birinchi qismi, asosan, shular haqida bo'lib, asar g'oyasi, mavzusini o'quvchi to'la anglab yetmaydi.

Xotin podshohning "harakatga kelishi" ikkinchi "Qanotsiz qushlar" deb nomlangan qismida kuzatiladi. Unda arab xalifasi Muoviyaning sharq o'lkalari noibi, Xuroson amiri Sayyid ibn Usmonning Buxoroga yurishi, o'rtada bo'lib o'tgan jang tafsilotlari, Xotin podshohning Sayyid ibn Usmon bilan sulh tuzishga majbur bo'lishi, buning uchun uning qabuliga borishiga to'g'ri kelganligi, uchrashuv davomida o'rtada iliq munosabatlarning paydo bo'lishi va bora-bora uning muhabbatga aylanishi, biroq bu muhabbatdan hech bir ma'no yo'qligi sababli oshiq-ma'shuqlarning dardli iztiroblari haqida so'z boradi. Bu munosabatlar natijasida Xotin podshohning nafaqat jasoratli hukmdor, balki ayollarga xos his-tuyg'ulari, ojizliklari, bir so'z bilan aytganda, ichki ruhiy olami namoyon bo'ladi. Bu o'rinda o'quvchi-kitobxon Xotin podshohni o'zi uchun qaytadan kashf etadi. Ikki o'rtadagi iliq munosabatlar ikki xalqqa ham ko'chib, urush barham topadi. Sayyid ibn Usmon tuzilgan sulh sharti sifatida Buxoroning eng obro'li 80 nafar amaldorini keyinchalik qaytarish evaziga o'zi bilan olib ketadi. Amirlik g'ururi yoki boshqa sababdanmi o'quvchiga tushunarsiz bir holatda Sayyid ibn Usmonning va'dasini bajarmasligi Xotin podshohni ranjitadi. Bu orada

bir fitna chiqib, asirlikdagi 80 kishi Sayyid ibn Usmonga suiqasd uyushtiradi hamda u bilan birga o'zlarini ham qatl etishadi. Bu voqealar sodir bo'layotgan paytda Buxoroda mahalliy urf-odatlariga xos bo'lmagan bir ish – Farg'onadan masxaraboz va dorbozlar kelib, Xotin podshoh xisor (saroy)ida tomosha ko'rsatishayotgan edi. Tomosha avjiga chiqqan vaqtda, Xotin podshohga bo'lib o'tgan voqea haqida noxush xabarni yetkazishadi. Ushbu o'rinlarda xalq og'zaki ijodiga yana murojaat qilinganligining guvohi bo'lamiz. Masxarabozlig-u latifago'ylik qizigan bir paytda 40 kun motam e'lon qilinadi. Bizningcha, kontrast usuli orqali bayon qilingan ushbu tasvirlar orqali yozuvchi o'quvchini yaxshilik va yomonlik, ezgulik va yovuzlik, shodlik va qayg'u har doim yonma-yon yurishidan ogohlantirmoqchiday bo'ladi. Bir paytning o'zida ham sevgilisidan, ham 80 nafar qardoshidan ayrilgan Xotin podshoh iztiroblar girdobida qolib, taxtni ulg'ayib qolgan o'g'li Tag'shodaga topshiradi. O'g'li o'zi o'ylaganidek hukmdor bo'lib yetishmaydi. Vatani – Buxoroni Sayyid ibn Usmondan keyingi Xuroson amiri Qutayba ibn Muslimga jangsiz qo'sh qo'llab topshiradi. Hatto uning sharafiga birinchi farzandi – o'g'lining ismini Qutayba deb qo'yadi. Bu kabi holatlar taxtdan tushgan bo'lsa-da, xalq orasida “ena”, “momo” deb nom olgan Xotin podshohni battar iztirobga soladi va qirq yoshida sochlari oqarib, keksayib, kundan kunga cho'kib borishiga sabab bo'ladi. Ayni shu damlarda bir xil tushlar uni qiynay boshlaydi. Tushida zanjirband tarzda xalqining sahroda sudrab ketilayotganligi, o'zining ham qo'l-oyoqlariga kishanlar solinganligi, oldinda esa yarador Sayyid ibn Usmonning borishi uning xalovatsizligini yanada oshiradi. Bu orada arab amiri Qutayba ibn Muslim ham tush ko'rib, unga ham shu kabi ishoralar bildiriladi va Xotin podshoh bilan iliq munosabat o'rnatishiga turtki bo'ladi. Ushbu voqealar tasviri orqali xalq og'zaki ijodida ko'p uchraydigan holat – muammoning tush unsuri bilan bartaraf etilishiga guvoh bo'lamiz. Ko'rgan tushlari tasirida ikki hukmdor uchrashib, o'zaro muzokara o'tkazishadi. Qutayba ibn Muslim Xotin podshohning salohiyatiga, donishmandligiga guvoh bo'ladi. Muzokaradan so'ng o'zining xobxonasiga kirib uyquga ketgan Xotin podshoh qaytib uyg'onmay, vafot etadi. Unga hurmat bajo keltirilib, garchi zoxiran islomni qabul qilmagan bo'lsa-da, juma namozida janoza namozini shaxsan Qutayba ibn Muslimning o'zi o'qib beradi.

Asarda ba'zi o'rinlarda muallifning o'zi ta'kidlab o'tganidek, Alisher Navoiy, Boborahim Mashrab, Muqimiy, Hamid Olimjonlarning she'rlaridan satrlar keltiriladi[3:5]. Lekin ushbu parchalar o'quvchiga qo'shimcha estetik zavq berishdan ko'ra asosiy fikrdan chalg'ishiga sabab bo'lgandek, nazarimizda. Umuman, ushbu o'ziga xos uslub yozuvchining boshqa asarlari, masalan, “Ko'zgu oldidagi odam”, “Ming bir qiyofa”, “Muhabbat o'limdan kuchli” kabi romanlarida ham uchraydi. Ushbu romanlarda va ko'rib o'tganimiz “Xotin podshoh” romanida ham folklar an'analari, xalq og'zaki ijodi namunalaridan sermahsul foydalanish yozuvchi poetik uslubidan dalolat beradi.

Adabiyotlar ro'yxati:

1. G'afur G'ulom. Shum bola. – T.: G'ulom nomidagi Adabiyot va san'at nashriyoti, 1983-y.
2. Uch yolg'onda qirq yolg'on. – T.: “Yosh kuch” nashriyoti, 2022-y.

3. Omon Muxtor. Xotin podshoh. – T.: “Sharq” nashriyoti, 2010.
4. Normatov U. Ijod sehri. – T.: “Sharq” nashriyoti, 2007.
5. Omon Muxtor. To‘rt tomon qibla: uch romandan iborat Sharq daftari: (trilogiya). – T.: “Sharq”, 2000.

BADIIY ASAR TILI VA YOZUVCHI USLUBI

Saymuratova Ijobat Tursunqulovna
GuLDU katta o‘qituvchisi

O‘zbek adabiyotining atoqli vakili G‘afur G‘ulom nasri o‘tgan asrning 30-yillaridan e‘tiboran milliy til elementlaridan mahorat va ustalik bilan unumli foydalanishga badiiy tasvirni individual o‘ziga xos bo‘yoqlar va ko‘chimlar asosida badiiy matnni konkret detallar bilan berishga erisha olgan edi. Uning bu davrda yaratilgan “Netay”, “Tirilgan murda”, “Yodgor”, “Shum bola” kabi qissa va boshqa bir qator nasriy asarlaridagi obrazlilik, real tasviriylilik, poetik mahorat, asar tili va yozuvchi uslubi kitobxonni o‘ziga jalb etadi. Yozuvchi nasriy asarlarida har bir so‘z va uning ma‘nosiga mas‘uliyat bilan yondashib, asar voqeyligi, qahramonlar hatti-harakati va tafsilotlarini xalqning oddiy, jonli so‘zlashuv tili asosida badiiy gavdalandirgan.

G‘afur G‘ulom asarlari tili tili xususida akademik Sh.Shoaabdurahmanov shunday yozadi: “Badiiy asarga xos bo‘lgan bu tasviriylilik, obrazlilik va boshqa xususiyatlar umumiy til materialiy yordami bilangina emas, balki G‘afur G‘ulom sayqal bergan til va so‘zning kuchi, qudrati bilan yaratilgan. U ishlatgan so‘zlar, iboralar, alohida olganda oddiygina so‘z, ammo asar to‘qimasidan purma‘no so‘z va iboralar, ularning turli jilolanishidan yaratilgan” [1,15]. Darvoqe, istiqlol yillarida yaratilgan romanlarning badiiy tili, yozuvchi uslubi va mahoratida ham xuddi shu kabi holatlar kuzatiladi.

Badiiy asar tili badiiylikning asosiy omillaridan biri bo‘lib, matnda uning estetik vazifasi yetakchi o‘rinda turadi. O‘ziga xos uslubiy vazifani bajarib, ifodaning ravonligi va tushunarlilikini ta‘minlaydi. Bu jarayonga adibning so‘z tanlash mahorati va qo‘llashda individual, o‘ziga xos yondashuvi, ya‘ni uslubi katta ta‘sir ko‘rsatadi. Zero, “Badiiy asar, xususan, romanda ijodkorning betakror uslubi uning poetik nutqi, rivoya tarzi, badiiy detallari funksionalligi, syujet qurilishi va b.q. orqali ifoda etiladi. Har bir shakl unsurining estetik butunlik tarkibidagi mohiyati va funksiyasini belgilash, ularni muayyan qonuniyat asosida yaxlitlikka birlashtirish ham uslub orqali ta‘minlanadi” [2,199].

Isajon Sultonning “Genetik” romani tilini tadqiq etar ekanmiz, eng avvalo, muallifning qarashlari birgina hikoyachi qahramon nutqida ifodalanganligi bilan o‘quvchi diqqatini tortadi. Yozuvchi badiiy til vositasida obraz, portret, peyzaj yaratish, mohiyatni yoritishda zarur so‘z va iboralarni, badiiy tasvir vositalarini qo‘llay bilishi, inson tasavvurida konkret voqea-hodisalarni gavdalandira olishi lozim. Badiiy asar tili badiiyatning muhim jihatlaridan biri bo‘lib, uning vositalari orqali yozuvchi mahorati yuza chiqadi. Bundan tashqari “Badiiy asar tili, so‘z san‘atining asosiy quroli, badiiy adabiyotning obraz yaratish vositasi; poetik til, badiiy adabiyot tili kabi shakllarida ham ishlatiladi. Ya‘ni badiiy adabiyot

birlamchi belgilar sistemasi sanaluvchi til vositasida ikkilamchi belgilar sistemasini – badiiy voqelikni tashkil qiluvchi obrazlar tizimini yaratadi” [3, 52].

Yozuvchining uslub mahoratini to‘laqonli ochib berish uchun roman tilidagi ayrim jihatlar va tasvirning badiiy ifodasiga e’tibor qaratish lozim. Chunonchi, “Badiiy uslubda muallif asarning estetik ta’sirini kuchaytirish maqsadida tilning tasviriy vositalaridan unumli va ijodiy foydalanadi, shuningdek, o‘zi ham yangi so‘z va ifoda shakllarini yaratadi” [4, 23]. Asar tili usluban sodda, xalqona va milliy ruhni in’ikos etgan holda oddiy tilda bayon qilingan. San’atkor so‘z vositasida nafaqat inson zohiri-yu botini, balki milliy qiyofa, o‘zlikni bus-butun, asosli, mantiqiy fikrlar va dalillar bilan talqin etadi. Romanda juda katta global muammolar to‘g‘risida so‘z boradi. Yozuvchi o‘z ijodiy niyatidan kelib chiqib, o‘quvchi ongi-shuriga “Bobom kim? Ajdodim kim? Xalqimning kelib chiqish ildizlari qay genlar bilan tutashadi?” kabi savollar mohiyatini singdirishni maqsad qiladi. Bunday muammolarni kitobxon qalbiga yetkazish uchun yozuvchi asar voqeligini o‘ziga xos bayon uslubini yaratishi yoki bo‘lmasam kitobxon qalbidan chuqur o‘rin oladigan obrazlar yaratishi kerak bo‘ladi. Yozuvchi shunga muvofiq tarzda roman markaziga taniqli genetik olim Ibrohimjon Abdurahmonovni prototip sifatida olib kiradi.

Roman arxitektonik tuzilmasiga ko‘ra to‘rt qismdan iborat bo‘lib, muqaddima, birinchi qism, ikkinchi qism va xotimadan tashkil topgan. “Genetik” romanida ham yozuvchining boshqa romanlariga xos shakl bo‘y ko‘rsatgan, ya’ni qahramon (roviy) tilidan hikoya qilinayotgan har bir tafsilot alohida sarlavha bilan atalgan. Muallif hikoyachiga roman mohiyatini va undan anglashiladigan ma’noni kitobxonga yetkazib berishdek ulkan mas’uliyatni yuklagan. Uning syujet yaratishdagi mahorati shundaki, romandagi voqelik ham, so‘z ham birgina qahramon tomonidan boshqariladi. Bosh qahramonning xotiralari, uchqur tasavvurlari roman syujetining asosini tashkil etadi, vaholanki, roman syujeti ana shu xotiralar bayonidan, ya’ni hikoyalardan hosil bo‘lgan. Hikoyadan hikoyaga o‘tilgani sari tinib-tinchimas qahramon xarakteri, hamma narsani kuzatuvchi, o‘z yoshiga mos xulosalar chiqaruvchi bola ko‘z o‘ngimizda gavdalanib boradi. Bola nigohi bilan tevarak-atrofdagi voqealar kuzatilib, bu voqealar obraz va xarakterlarga shu qadar bog‘lanib ketganki, har bir voqea bosh qahramon xarakterining o‘ta kuzatuvchan, sinchkov, keng fikrlovchi, barcha hodisalarga qiziquvchi jihatlarini ketma-ketlikda ochib boradi. Asar qahramoni romanda tabiatning keng plandagi fonida harakat qiladi: bolalik g‘aroyibotlari, xotiraga abadiy muhrlangan tasavvurlari, qishloq hayoti, go‘zallikka burkangan tabiat ko‘rinishlari, lirizmga, teran tafakkurga ega peyzaj tasviri, ilm-ma’rifatga intilish, genetikaning o‘tmish bilan uyg‘unligi real manzaralarda tasvirlangan.

Voqelikni roviy tilidan bayon qilinishi asar o‘qimishligini ta’minlagan omillardan biri. Romanda hikoyalash, tavsif va ba’zi o‘rinlarda dialogdan unumli foydalanilgan. Birinchi qismda qishloq hayoti, turmush tarzi, shunga monand tabiat manzaralari, odamlari – Ubay aka, Sofiya xola, Bobo, Dashti qipchoq, Teshiktoshdan topilgan bola, Uch chanoqli muhabbat, Kuz haqidagi hikoyalar tavsifi keltirilgan. Asarning dastlabki qismlari, ayniqsa, Omonning bolalik dunyosi orqali tasvirlangan qahramonlar va hodisalar kitobxon qalbiga go‘zal manzara va

ruhiy tiniqlik hadya etib, ular haqidagi tasavvurni hosil qiladi: “Insonlarning qiyofalari ham ma’lum voqea-hodisalar bilan birlashib ketgan, kimni eslamay, qaysidir voqeaga bog’liq holda jonlanadi. Ubay akani shamollar bilan birga tasavvur qilaman, Sofiya xolam oy manzarasi bilan uyqash, Dashti Qipchoqdan kelgan suluv qiz bol va asal hosil qiladi, onamni yalpiz, rayhon hamda gul ochgan chechaklar yonida, otamni qo’lida bolta yoki arra, kesilgan daraxt shoxlari yoki yaxshilab ag’darib chiqilgan maydon o’rtasida ko’raman. O’zimni mana shu manzaralar ichida uchib yurgan bolariday tasavvur qilaman, qay manzaraga yaqinlashsam, o’sha kattalashib, mayda-chuydalarigacha namoyon bo’ladi” [5, 33].

Romanning ikkinchi qismi “Genetikaga kirish”, “Genlarni boshqarish, “Do’st”, “Ustoz”, “Er Bug’u”, “Hukmi mutlaq”, “Sen, men, biz”, “El”, “Dashti qipchoq qizi” deb nomlangan fasllardan tashkil topgan bo’lib, roviy tilidan bayon qilingan hikoyalar orqali genetikaning asl mohiyatiga urg’u berilgan. El-ulusning tashqi milliy qiyofa jihatidan kelib chiqishi bilan birga ularning o’zligini topishi, anglashi, ma’naviyati, madaniyatining o’zaro birikuvi birgina xalq va elat timsoliga chambarchas bog’lanishi real hayotiy haqiqatlar asosida dalillangan. Yozuvchi romanda qahramonlar xatti-harakatini mubolag’aviy tarzda tasvirlaydi: “Bir kuni bostirma ostidagi buqa arqonini uzib, odamlarni quva ketdi. Ubay aka uyda edi. Hamma qochsa ham oyoqlarini kerib, buqaga qovoq uyib qarab turaverdi. Bir mahal hayvon unga qarab intildi. Qarshisiga kelib, yer tepinib shoxlashga chog’langanida, Ubay aka “He, o’sha turqingga” deb baqirib, oldinga tashlandi-yu, ulkan mushti bilan peshanasiga bir urgan edi, buqa gangib qoldi. Bu odamdagi qudratni ko’rsangiz edi!” [5, 33]. Folklor adabiyotining ertak, afsona motiviga xos mushtaraklik, buqaga qarata amalga oshirilgan xatti-harakat, tildagi zarda ohangi Ubay akaning oddiy to’pori, mehnatkash qishloq odami ekanligiga nisbat beradi. Xatti-harakatni bo’rttirish qishloq odamiga xos kayfiyatni hosil ettiribgina qolmay, obrazlar dunyoqarashi borasidagi tasavvurni to’ldiradi. Mazkur tasvir usulida xalq og’zaki ijodiga xos lavhalar bilan qorishiq tarzda qo’llanilganligini ko’rsatadi.

Roviylar tilidan bayon qilingan bir oilaga mansub qahramonlar tashqi portreti rassom nigohiga monand holda, ichki portreti ham tashqi qiyofasiga mos tarzda o’z ifodasini topgan: “Ubay aka bizning qo’shnimiz, baquvvat, yelkalari keng, ovozi o’tkir kishi edi. Ubay akaning xotini, bolalari ham boriydi. Xolis aya baland bo’yli, kelishgan ayol bo’lib, Ubay akaning zug’um va tazyiqlariga lom-mim demay bardosh beradigan va o’sha zug’umlar aro bolalarini tishida tishlab katta qilayotgan bir xotin edi. ... Mahalladagilar Ubay aka bilan aytishib qolishdan ehtiyot bo’lar edilar. Sababi, jini bor, deyishardi. Ko’zining oqidagi xoli o’sha jin bo’lsa kerak, degan gaplarni eshitganmiz. Haqiqatan, Ubay akaning ko’ziga tik qarab turish qiyin, g’alati bir jununi boriydi. ... Ha, zo’r edi, urishqoq edi, unchamuncha kishi bas kelolmas, ammo hassasiga tayanib zo’rg’a yuradigan cholardan hayiqardi. Chollar koyib berishsa, “xo’p” deya bosh egib, itoatkor bo’lib qolar, o’sha bosh egganicha uyiga qarab jo’nardi” [5, 33]. Xalq ta’birida uchraydigan “jini bor” qarashi birinchidan Ubay akaning jini kelganidagi fe’l-atvoriga ishora bo’lsa, ikkinchidan uning individual tabiatini, ya’ni “urishqoq, unchamuncha kishi bas kelolmas” ligini yuzaga chiqargan.

“Sofiya xolam – esini tanib-tanimasdan turmushga chiqqan qishloq ayoli edi. Danakdayligidan onasining yoniga kirib mitti mushtchalari bilan xamir qorgan, hovli supurgan, tomorqada o‘t yulgan, sigir-qo‘ylarga qaragan, qishning sovuqlarida o‘tin ko‘tarib sandalga olov qalagan... shu mehnatlar aro bir kuni kelin bo‘lishni, keng-mo‘l, issiq uyda bolalarini katta qilishni orzulagan bo‘lsa ajabmas” [5, 25]. Sofiya xola e’tirof etilgan mazkur tasvirda saj’ san’ati qo‘llangan bo‘lib, kitobxon ko‘z oldida qishloq ayolining o‘ziga xos xarakteri qirrasini, umri davomida mehnatda toblangan qiyofasi gavdalantirilgan.

“Poyonsiz dalalar jigarrang-qo‘ng‘ir tusga kirgan, kuz yomg‘irlari bir xilda yog‘ib, pilchillagan loyga aylantirgan. Shiyponlar huvillagan, bo‘m-bo‘sh. Ochiq eshiklardan shamol kirib o‘ynaydi. Ayvondagi radio buni o‘zicha sharhlaydi:

Buncha ham yomg‘ir yog‘odir biz garibning tomiga,
Kimni rahmi kelur bechoralarning holiga...” [5, 68].

Badiiy matndagi mazkur lavhada saj’ san’ati peyzaj tasviriga tiniqlik va aniqlik ato etgan. U hissiy bo‘yoqdorlikni oshirib, matndagi ohang tovlanishini hosil qildirgan. Poyonsiz dalalar, jigarrang-qo‘ng‘ir tus kabi so‘zlar metaforik tasvirni quyuqlashtirib, tabiatning o‘ziga xos injiqligini yuzaga keltirib timsol darajasiga ko‘targan. Peyzaj tasviridagi shamolning o‘ynashida jonlantirish san’ati qo‘llanilgan. Radio orqali sharhlanayotgan xalq qo‘shig‘i qahramon sezimlariga parallel ravishda berilib, olam va odam yaxlitligini ishonarli dalillagan. Lirik parcha ruhiyat manzarasi va tuyg‘ular oqimini jonli va ta’sirchan ifodalab, qahramon tabiatiga mos ohangdorlikni ta’minlagan.

Foydalanilgan adabiyotlar:

1. Shoabdurahmonov Sh. Mohir so‘z san’atkor. //O‘zbek tili va adabiyoti. 1973. 4-son, – B. 15.
2. Yoqubov I. Mustaqillik davri o‘zbek romanlari poetikasi. Monografiya. – T.: Nurafshon business, 2021. – B. 199.
3. Quronov D., Mamajonov Z., Sheralieva M. Adabiyotshunoslik lug‘ati. – T.: Akademiya nashri, 2010. – B.52.
4. Yo‘ldoshev M. Badiiy matn va uning lingvopoetik tahlili asoslari. – T.: Fan, 2006. – B.23.
5. Isajon Sulton. Genetik. – T.: Yangi asr avlodi, 2018. – B.33.

MOHIYAT VA BADIYYLIK IFODASIGI (Ulug‘bek Hamdan ijodi misolida)

Avazov Vahob, SamDU tadqiqotchisi

Keyingi yillar badiiy adabiyotida juda katta o‘zgarishlar maydonga keldiki, buning zahirida turfa xil ohanglar yuzaga chiqdi. Istiqloq yillarida turfa sohalarda bo‘lgani kabi ta’lim tizimida ham jiddiy izlanishlar, islohotlar amalga oshirildi va oshirilmoqda. Yoshlarni bunday ruhda tarbiyalashda badiiy adabiyotning o‘rni va roli beqiyosdir. “Adabiyot va san’atga, madaniyatga e’tibor – bu, avvalo, xalqimizga e’tibor, kelajagimizga e’tibor ekanini, adabiyot, madaniyat yashasa, millat yashashi mumkinligini unutishga bizning ham haqqimiz yo‘q” [1, 1-bet]. Bu tushunchalarning zahirida bugungi yoshlarni istiqloq va milliy qadriyatlar asosida

tarbiyalash, ularning ma'naviy etuk shaxs sifatida shakllantirish asosiy vazifalarimizdan biriga aylandi.

Jahon adabiyotshunosligida ijodiy jarayon va badiiy mahoratning uzviyligi, badiiy asarda hayot voqeligining ifodalanishi, undagi sujet va kompositsion yaxlitlik masalasiga nazariy jihatdan yondoshiladi. Keyingi yillar o'zbek adabiyotining taraqqiyotida iste'dodli shoir va nasrda ijod etuvchi adib Ulug'bek Hamdamning o'rni beqiyosdir. Adibning bir qator she'riy to'plamlari, nasrdagi asarlari "Muvozanat", "Isyon va itoat", "Sabo va Samandar", "Namatak", "Ota" ramanlari keng kitobxonlar ommasini tomonidan juda yaxshi kutib olindi.

Romaniy tafakkur tizimidagi o'zgarishlar nasrimizga ham sezilarli ta'sirini ko'rsatdi. Keyingi davr romanlarining eng xarakterli xususiyati shaxs erki, botiniy olamidagi ziddiyatlar, imon va e'tiqod, olam va odam o'rtasidagi ziddiyatlarni haqqoniy aks ettirilishi bilan alohida ajralib turadi. Hayot, ijtimoiy hayot, shaxs qalbidagi iztirobu quvonchlarni tasvirining o'ziyiq, adabiyotimizdagi tub o'zgarishlardan dalolat beradi. Axir yillar davomida "ijobiy" qahramon obrazini yaratish, ma'lum bir davr yoki tizimga xizmat qiluvchi obrazlar tizimi shakllanib kelgani bugungi kunda hech kimga sir emas! Ammo bugungi shaxs tafakkuri, olam haqidagi qarashlari, o'zlikni anglash yo'lidagi iztiroblarining talqini bilan bir qatorda, inson olamidagi ziddiyatlarni aks etishining o'ziyiq bu jarayondagi tasvir usulining o'zgarishidan dalolatdir. Adibning "Muvozanat" romanida inson xarakteridagi ijobiy va salbiy xislatlarning teran talqini kitobxonni hayotga jiddiyoq munosabatda bo'lishga undasa, "Isyon va itoat" romani esa inson qismati, taqdiri, ruhiy iztiroblar iskanjasida shaxs qismatidan darak beradi.

Adabiyotshunos olim H. Karimov qayd qilganidek: "...Muvozanat" romani juda vaqtida yozilgan asardir. Haqiqatdan ham, mustaqillikning dastlabki arafasida odamlar ham zohiriy, ham botiniy muvozanatini yo'qotib, ancha afgor holga tushib qolishgandi, roman xuddi shuning mohiyatini ochib beradi" [2, 279-bet].

Darhaqiqat, asar qahramonlari ziyoli shaxslar bo'lib, ularning o'ziga xos olami, hayotdagi o'rni, o'zligini anglashdagi murakkab qirralari teran talqin etilgan. "Isyon va itoat" romanida esa isyon va itoatning inson botinidagi kurashlari orqali yoritishga intilganligini kuzatamiz. Asardagi Tabib, Akbar obrazlaridagi o'ziga xosliklar bilan bir qatorda, ularning ijtimoiy muhitdagi o'rni orqali, mulohazalari, ruhiyatidagi ziddiyatlar zahirida isyon va itoat tushunchalari talqin etiladi. "Isyon va itoat" romanida esa isyon va itoatning inson botinidagi kurashlari orqali yoritishga intilganligini kuzatamiz. Asardagi Tabib, Akbar obrazlaridagi o'ziga xosliklar bilan bir qatorda, ularning ijtimoiy muhitdagi o'rni orqali, mulohazalari, ruhiyatidagi ziddiyatlar zahirida isyon va itoat tushunchalari talqin etiladi.

Roman haqida adabiy tanqidchiligidan turfa xil fikrlar, bir-birini izohlab to'ldiruvchi, ammo ziddiyat tushunchalar va mulohazalar ham uchraydi. Haqiqat bahslarda tug'ilgani kabi roman haqidagi mulohazalar, qarashlar qayd etilayaptimi, shuning o'ziyiq asarning yashovchanligidan dalolat beradi. Roman haqida so'z yuritgan adabiyotshunos Hakimjon Karimov yozadi: "...Albatta, Ulug'bek Hamdam itoatning mohiyatini shunday angelaydi, biroq badiiy talqinga kelganda, uning ko'limi torayib qolgan, ya'ni Ollohga itoat etishning mohiyati, uning

samarasi aniq tasvirda epik ko‘lamda o‘z ifodasini topmagan. Bu narsa tabib obrazidagina ko‘rinadi, lekin uning ezgu ishlari faqat davolashgina, falsafiy qarashlari esa hayotiy tartib qoidalarga so‘zsiz bo‘ysunish tartibidan iborat bo‘lib qolgan. Mazkur hol aniq tasvirda bo‘lmay, bayonda bo‘lgani uchun kishini shuuriga uncha yetib bormaydi” [2,283-284-betlar]. Adabiyotshunos olim qayd etgan fikrlarda to‘lasincha haqiqat ko‘rinmaydi. Axir romanda qahramonlar ma’naviy olami voqealar silsilasida juda go‘zal tasvirlar orqali yoritilganligi butun sujet chizig‘ida o‘z aksini topganligiga adabiyotshunos olim nima uchundir diqqatini qaratmaydi.

Tabib qalbidagi iztiroblar o‘quvchini hayotga, olamga teranroq qarashga undaydi. Uning botinidagi ziddiyatlar o‘quvchi qalbini iztirobga soladi: “Hammasi o‘zimdan o‘tdi”, deb keyin-uzun yillar qamoqda o‘tirganda o‘zini koyir edi-yu, aslida professorning yerning tagida qimirlagan ilonni payqaydigan hushyorligi bor gap edi... «Ammo... ammo shundan keyin payimga tushgan» deb mulohaza yuritar edi u» [3,38-bet].

Tabib chekkan iztiroblarning hamma-hammasi “Hammasi o‘zimdan o‘tdi” degan tushunchada mujassamlashgan. Axir uning shu fikrida yillar davomida chekkan azoblari jamuljam. O‘quvchida uning hayotini mulohaza qilishga, sabablarini anglashga undaydi. Yoki “Ish vaqtimda keling, deyiladigan kasallar o‘zi boshqa bo‘ladi. Ular o‘zi bilib mavridida kelishadi. Lekin dard qo‘qisdan xuruj qilib qolganda, bemor najot istab eshigingni qoqib turganda, qaysi yuz bilan uni qaytarib bo‘ladi. Bundan keyin sen kimsan? Odammi, vrachmi?..” der edi u hammadan oldin o‘ziga-o‘zi” [3,60-bet].

Tabibdagi insoniy fazilat bilan bir vaqtda o‘z kasbiga bo‘lgan mehr tushunchasining o‘zaro mujassam ekanini guvohi bo‘lamiz. Yillar davomida iztirobda yashagan Tabibning qalbida isyon bo‘lsa-da, odam, olamga muhabbati yetakchilik qiladi. Shuning uchun insonga bo‘lgan muhabbati yetakchilik qilganligi bois, ularga madadkor bo‘lishga intiladi. “Erkin fikr zamonida yashayotgan odamzot jamiyat badiiy tafakkurini xolislik bilan qabul qilar ekan, u yoki bu darajada salbiy qarashlarning bo‘lishi tabiiydir. U.Hamdamning asarlarida bosh fenomen inson va uning qismati. Yozuvchi jamiyat hayotini zimdan nigoh solib kuzatadi. Baayni esa o‘ta xolislik bilan qahramon kechinmalarini tasvirlay boshlaydi. Bu esa tabiiy bir yo‘nalishga tutashib, kitobxon diqqat e‘tiborini o‘ziga tezda jalb etadi” [4, 6-bet]. Ushbu sifatlar U.Hamdam ijodiga xos muhim fazilat ekanligi barchamizga ayondir. Hozirgi adabiy jarayonda ancha yillardan beri qizg‘in bahslarga turtki bo‘lib kelayotgan adib asarlarini o‘qigan kitobxon tasavvurida uning yaratgan qahramonlaridan ibrat olib yashay boshlaydi. «Men, nihoyat isyon azobidan, forig‘ bo‘lib, ozodlikka chiqqandim. Ozodlikning ismi esa itoat edi. Va, men o‘zimni uyon bu yonga urishni bas qilib... yo‘q-yo‘q, bunday emas, qirq-ellik yil davomida meni chirpirak qilib uchirib yurgan kuch asta-sekin orqaga chekindi-da, men o‘zimga o‘zim tegishli bo‘lib qoldim, desam to‘g‘riroq bo‘ladi. Shunda qarshimda hayotning mazmuni, tug‘ilish va o‘lishning ma’nisi yarq etib namoyon bo‘lganday edi: u itoatda, insonlik qismatiga ko‘nikishda edi. Yo‘q, bu shunchaki ko‘rko‘rona ko‘nikma emasdi, balki anglash va tushunishdan keladigan buyuk Itoat – Yaratganga tobelik edi. Chunki mendagi Isyon Itoatimning

ichiga, uning bir bo'lagiga aylanib o'zga ma'no kasb etgandi. Va, men xotirjam edim. Dunyo qayg'usi-ku ko'pdan beri bezovta qilmay qo'ygandi, endi hatto o'lim ham meni cho'chitmayotgan, qaytaga uni, mo'jizani kutgandek kutadigan bo'lgandim» [3, 98-bet].

Yozuvchi falsafasiga ko'ra «Yaratganga tobelik»dan hayotdagi boshqa ko'plab omillarga itoat qilish zaruriyati kelib chiqadi. O'zining bu g'oyasini asoslash uchun muallif xalqning turli qatlamlariga, har xil millatga, kasbga, e'tiqodga mansub kishilar timsolini yaratadi va ularning hayot yo'lini, taqdirini alohida-alohida hikoya qiladi. Yozuvchi romandagi personajlarga aloqador sujet chiziqlarini ongli ravishda bir-biriga uzviy bog'lab yuborishga urinmaydi. Shu sababli ham har bir obrazga tizimli ravishda ruhiy tahlillar vositasida ochib berishni maqsad qiladi. Ko'rinadiki, romanda yozuvchi g'oyasini tabib tilidan keltirilgan birgina tafsilotda aniq-ravshan qilib tasvirlaydi.

Inson ruhiyatidagi, qalbidagi e'tiqodiga sodiq qolishga intiladi. Bu holatni tabib, Akbar obrazlarida mujassamlashganini ko'ramiz. So'z naqadar qudratli vosita. Mavloni Rumiy aytganidek, «biz tushuncha va tasavvurlarimizni faqatgina so'z va jozibali fikrlar ila ifodalaymiz. Bu esa mohiyatni anglatgani bilan, inson o'zligini topishdan falsafa to'qimaydi. Mohiyat har bir insonning o'zi. Buni anglash, idrok etish faqatgina o'zimizga, o'zingga bog'liq» deganlarida qanchalar haq gapni aytgan edi. «Isyon va itoat»da bir-biridan xarakter va dunyoqarashlari bilan farq qiluvchi personajlar borki, yozuvchi xos talqinga jiddiy ma'no yuklashni, bu ma'nodan har kim o'zigagina tegishli xulosa chiqarishni maqsad qilib qo'ygan bo'lsa, ajabmas! Har qanday teran idrok kishi qalbini hayajonga soladi. Yuqoridagi tabibning bashariyat oldidagi muammolar ildizi qayerdan boshlanishi, alal-oqibatda ruhiy borlig'imizga tutashib ketgan tamaddunning nechog'li og'ir kulfatlar keltirib chiqarishi haqida chuqur mulohaza yuritir ekan, kitobxon tasavvur va qalbida bunga xayrixohlik seza boshlaydi. Boshqacha aytganda, yozuvchini qiynagan muammo nima?! Fikrimcha «Isyon va itoat» ana shu kabi mangu savollarga javob beradi.

Xullas, adibning badiiy qahramonlari o'z hayoti davomida o'zlikni anglash bilan bir qatorda hayot va insonning mohiyatini anglashga intilib yashasha, bu mohiyat esa inson qalbida mavjudligini kech juda kech ilg'ay boshlaganligini kuzatamiz.

Adabiyotlar:

1. Mirziyoyev Sh. Adabiyot va san'at, madaniyatni rivojlantirish – xalqimiz ma'naviy olamini yuksaltirishning mustahkam poydevoridir // Xalq so'zi, 2017. 4-avgust.

2. Karimov H. Istiqlol davri adabiyoti. – Toshkent, “Yangi nashr”, 2010. 279-bet.

3. Hamdam U. Isyon va itoat. Roman. – Toshkent,

4. Quronov D. Adabiy jarayonda “Mom sindromi”. – Toshkent, “Akademnashr”, 2010. – B 110.

G‘AFUR G‘ULOM NASRINING LUQMON BO‘RIXON IJODIDAGA TA’SIRI

**Hamidova Dilorom,
SamDU 1-kurs tayanch doktoranti**

XX asr o‘zbek adabiyotining zabardast vakillaridan biri G‘afur G‘ulom tasvir ko‘lami keng ijodkorlaridan edi. U ham she‘riy, ham nasriy yo‘lda asarlar yaratib, badiiy adabiyotning rivojlanishiga o‘z hissasini qo‘shdi. Keyingi davr ijodkorlari adibning ijodidan bevosita ta’sirlanib, G‘afur G‘ulomning mahoratidan saboq oldilar. Ana shunday ijodkorlardan biri – Luqmon Bo‘rixon bo‘lib, uning asarlarida G‘afur G‘ulomning nasriy asarlaridagi obrazlar tasviri va talqinini kuzatish mumkin.

G‘afur G‘ulomning poetik uslubi, obraz yaratish mahorati keyingi davr ijodkorlariga ham o‘zining ijodiy ta’sirini ko‘rsatganligini alohida ta’kidlash mumkin. Adibning “Yodgor” qissasi bilan L.Bo‘rixonning “Jaziramadagi odamlar” romanidagi ayrim jihatlarni ko‘rib chiqish, tahlil qilish jarayoni ijodiy oziqlanish samarasi ekanligida dalolat beradi. Har ikkala asar yosh bo‘lsa-da hayotning turli qiyinchiliklariga duch kelgan yigitlar - hikoyachi tilidan bayon etiladi. Ayniqsa, har ikki asarda ham ona obrazi alohida ahamiyatga ega. G‘afur G‘ulom “Yodgor” asarida umri mehnatda o‘tgan, mehdaryo, sodda, bolalarini yakka o‘zi tarbiyalayotgan onani tasvirlaydi. Asarning bosh qahramoni Jo‘ra bo‘lib, u olti farzandning uchinchi, dastlab o‘ta o‘jar, qiziquvchan va g‘o‘r yigit timsolida gavdalanadi. Uning onasi oltmish ikki yoshdan oshgan bo‘lsa ham, farzandlar parvarishi, ro‘zg‘or yumushlaridan qo‘li bo‘shamagan, mehnatdan boshqa narsani bilmaydi deb aytish mumkin:

“Kampir o‘z umrida o‘nlab bola o‘stirgan onalarga xos mehr-muhabbat bilan bolani bag‘riga bosardi, oila sevgisi uning asl kasbiga aylanib ketgan. U har zamon, har zamon: - Bolam, kuch degani yo suyakdan, yo go‘shdan bo‘lar ekan. Xudoyo shukur, meniki suyakdan ekan, go‘shdan bo‘lganida edi, shu olti bolani o‘stirish osonmidi, onang o‘rgulsin, - deb qo‘yardi. Men bu sodda gapdan hech nima anglamasdim”.(1,16-b.) Bundan anglashiladiki, bu ayol butun umrini bolalarining tinch-farovon yashashiga bag‘ishlagan inson. Barcha onalar kabi farzandi beboshlik qilib qo‘ysa koyiydi. O‘z tilidan “Onaning ko‘ngli bolada, bolaning ko‘ngli dalada” maqolini keltirish orqali o‘zining g‘amxo‘r va e’tiborli ekanligini namoyon etadi:

“Kampir meni koyib ketdi:

- Tinib-tinchimaysan-da o‘g‘lim, sening bolajonliging tinkamni ham quritdi. Nega emadigan bolani onasidan ajratib olib kelasan, men endi bunga nima beraman, egaching tushmagur ham o‘lguncha beparvo, bolaning qadrini bilmaydi. “Omon bo‘lsang pisharsan, bu taptingdan tusharsan”, - ular ham yoshlikning tax-u kosasini yig‘ishtirgandan keyin, zora bolaning qadriga yetsa, “onaning ko‘ngli bolada, bolaning ko‘ngli dalada” [1,17-bet].

Adib Jo‘raning onasini oddiy ayol sifatida tasvirlasa-da, aslida, xatti-harakati va gap-so‘zi orqali uning tabiatan kuchli ekanligiga urg‘u beradi. Olti

Bolani ham ota, ham ona sifatida tarbiyalagan ayol o'g'li ko'chadan chaqaloq ko'tarib kelib, "Bu mening bolam" deb turganida barcha onalarga xos ko'z yoshi qilib, oh-u nola chekadi:

"Axir, - dedi kampir, - men endi qanday qilaman? Yetti nomusimni yerga bukding, juvormak! Men seni kim ko'rganga maqtab, orqangdan ko'rpacha soldirib yurgan bo'lsam, ammaning qiziga sovchi yuborib unashtirib qo'yan bo'lsam, sen juvormak oxir chog' uyimga onasining tayini yo'q Bolani ko'tarib kelsang. Men bu xo'rlikka qanday chidayman? Do'stim bor, dushmanim bor, mahalla-ko'y, guzarim bor, qarigan chog'imda kenjaginamning xotini menga pushtipanoh, qo'l-oyoq bo'larmikan, degan edim. Xudoyo, seni otangning arvofiga soldim" [1,19-bet]. Bolalarini, ayniqsa, kenja o'g'lini yer-u ko'kka ishonmaydi, ulardan umidlari katta. O'g'lining xolis xizmati onani biroz xafa qilib qo'yadi, ammo u bag'rikeng, chaqaloqqa dastlab zimdan, keyin esa oshkora tarzda mehr qo'yadi. Unga xuddi o'zining bolasidek mehribonlik qiladi:

"Avvalgi bir necha kun kampir bolaga unchalik mehribonlik ko'rsatmadi, ukalarimning sut stansiyasidan har kun keltiradigan sutini ham juda ishonchsizlik bilan berib yurdi. Lekin kundan-kun bolaga bo'lgan mehr-muhabbati oshib borganligi sezilar edi" [1,20-bet].

Garchi Jo'raning onasi sodda ayol bo'lsa ham, vaqti kelganida zukkoligini ko'rsata oladi. Shu sababdan bo'lsa kerak, u qayerda qanday so'zlash kerakligini biladi. Masalan, Jo'ra avval harbiy xizmatga boradi, keyin esa tibbiyot akademiyasida o'qiydi, uning kelishini nafaqat onasi, balki ammasining qizi Saodat ham kutadi. Ammasi qizini unga uzatishga rozi bo'lsa ham, Jo'ra o'qishni tugatish bahonasida to'yni kechiktiradi. Onasi, Jo'ra va Saodat oshni kim tayyorlashi to'g'risida bahslashib qolganlarida, onasi vaziyatdan foydalanib, piching qiladi:

"So'z navbati menga kelib qoldi: - Oshni o'zim qoyil qilaman-da, lekin shunda ham o'tni birov yoqib berib tursa. - Oh, bolam, - dedi kampir, - to'rt yildan beri masalluqli tayyor oshni pishira olmaysan-ku?.." [1, 64-bet] deya javob berib, ikkalasini ham qizartirib qo'yadi.

Asarda ona obrazi har qanday sharoitda ham yaxshilikdan umid qiluvchi, o'zi uchun tasalli topa oladigan inson sifatida tasvirlangan. Jumladan, "Yodgor" qissasida Jo'ra harbiy xizmatga chaqirilganida, ona o'g'lidani omonat qolayotgan bola – Yodgor borligidan quvonadi va taskin topadi: "O'rtoqlaring bilan yenginglar-u, yengilmanglar. Men o'g'lingning otini ehtiyot shartdan Yodgor qo'ydim. Sendan qoladigan tuyoqqina. Yaxshi ham shu bola dunyoga kelib qolgan ekan, seni ko'rgandek bo'lib yuraman, hiding dimog'imdan ketmaydi,-deb yig'lar edi [1,24-bet].

Aslida, Yodgor – ramziy nom, poetik vosita. Uning hayoti va xatti-harakatini ko'rsatish adibning bosh maqsadi ham emas. Asarda insoniy munosabatlar va qahramonlar ruhiy-ma'naviy olamini ko'rsatishda, xarakterlar rivojini ta'minlashda bu vosita muhim rol o'ynaydi. Qissaning boshida yozuvchi onaning xarakterini ochib berishga harakat qiladi. Bu o'zbek ayoli – onalarining har qanday vaziyatda ham o'z odamiylik burchlarini unutmasliklarini va insofli,

adolatli farzandlar tarbiyasiga mana shunday onalar sababchi bo'lishlarini ko'rsatmoqchi bo'ladi.

Luqmon Bo'rixonning "Jaziramadagi odamlar" romanida ham hikoyachi qahramon-Samadning onasi soddadil, mehribon, mehnatkash, oilasiga vafodor, turmush o'rtog'iga itoatkor ayol sifatida tasvirlangan. Yozuvchi Samadning onasini mukammal, beqiyos ona sifatida tasvirlashga harakat qilmaydi. Uni bor holicha namoyon etadi.

Ayniqsa, bu jihatlar dialoglarda teran anglashiladi. Adabiyotshunos olim Islomjon Yoqubov yozganidek, "Luqmon Bo'rixonning falsafiy-estetik konsepsiyasida insonni ijtimoiy voqelik, xalq hayoti, davr taraqqiyoti bilan bog'liq holda tadqiq etish kuzatiladi. Yozuvchi qahramon xarakterini epik ko'lamdorlikda, teran psixologizm asosida ijtimoiy muhit muammolari bilan uyg'unlikda ifoda etadi. Ijtimoiy voqelik inson ma'naviy-ruhiy olami, fikrlash tarzini o'zgartirayotgani millat psixologiyasi uchun xarakterli xususiyat ekanligi bois, adib hayotiy jarayonlarning o'zinigina ko'rsatish bilan cheklanmay, tafakkur darajasi o'zgarishga yuz tutgan jamiyatning ruhiyatini, tobora teranlashib borayotgan xalq intellektual dunyosini tasvirlashga harakat qiladi" [2].

"O'roqning onasi Xosiyat opaning turli vaziyatlardagi holati tasviri kishida kuchli qiziqish uyg'otadi. Qishloqning soddagina ayoli farzandlarining baxti kulgan kunlari gulday ochilib, yasharib ketganligi, shaharcha shevada gapira boshlagani, o'g'li halok bo'lgan kunlarda esidan ayrilganday bo'lib qolish holatlari juda ishonarli va ta'sirli ochib berilgan".

"Jaziramadagi odamlar" romanida Xosiyat xolaning o'g'li O'roq urushda halok bo'lgan bo'lsa ham, u o'g'lini tirik va jangdan qochib ketib, yashirib yurganligiga, bir kun kelib, qaytib kelishiga ishonadi. Ungacha esa uning asosiy ovunchog'i va umidi nabirasi Baxtiyor bo'ladi.

Har ikkala asardagi yana bir o'xshashlik shundaki, Jo'raning "o'g'li" Yodgorning ulg'ayishiga ham, O'roqning o'g'li Baxtiyorning ham parvarishiga buvisi katta ta'sir ko'rsatadi.

Xulosa o'rnida aytish mumkinki, G'afur G'ulom ham, Luqmon Bo'rixon ham o'z asarlarida o'z oilasi va farzandlarining baxti uchun har qanday to'siqlarni yengishga tayyor ona siymosini tasvirlaydi.

Adabiyotlar ro'yxati:

1. G'afur G'ulom. Yodgor // Qissa va hikoya. – T., Turon zamin, 2023, - 96 b.
2. Yoqubov I. Adib sog'ingan manzil-ma'volar. <https://kh-davron.uz/kutubxona/uzbek/luqmon-borixon-aldoqchi-tunlar.html>
3. Luqmon Bo'rixon. Jaziramadagi odamlar. – T., G'afur G'ulom nomidagi nashriyot-matbaa ijodiy uyi, 2005, - 336 b.
4. Yoqubov I. Adib sog'ingan manzil-ma'volar. [kh-davron.uz sayti](https://kh-davron.uz/sayti)
5. Yo'ldoshev Q. "Kinoyaga yo'g'rilgan umid//Luqmon Bo'rixon "Jaziramadagi odamlar" romaniga so'ngso'z. -T.: G'afur G'ulom nomidagi nashriyot-matbaa ijodiy uyi, 2005. -336 b.

G'AFUR G'ULOM HIKOYALARIDA RUHIY KECHINMALAR TASVIRI

Muratova Gulbaxar
Nukus davlat pedagogika
instituti mustaqil tadqiqotchisi

XX asr o'zbek adabiyotining etuk namoyandalaridan biri akademik G'afur G'ulomdir. U o'zining she'riy, nasriy, tarjima asarlari bilan o'zbek adabiyoti xazinasiga munosib hissa qo'shgan. Ijodkorning boshqa turdagi asarlari qatori hikoyalari ham alohida e'tiborga molikdir. Adib o'z davrining dolzarb muammolarini hikoyalarida mahorat bilan aks ettirgan.

G'afur G'ulom hikoyalarida bir oila fojiasi, shaxsiy tragediya misolida ijtimoiy fojialilikni ko'rsatib bera oladi. Uning «*Soyalar*» (1930 y.) hikoyasida Yoqutoyning achchiq taqdiri tasvirlanadi. Oila boshlig'i bo'lgan akasining beparvoligi, sayoqligi tufayli nomusi o'g'irlangan qiz taqdir sinovlariga ojiz bir banda sifatida tadbir ko'ra olmaydi. U bemisl sabr-bardosh bilan «*aybsiz aybdor*»ligiga chidashga majbur. Chunki ro'y bergan voqeani hech kimga ayta olmaydi. Achchiq-achchiq yig'lashu onasiga iddao qilishdan nariga o'ta olmaydi. O'zining iztirob va g'azabini izhor etib: “-Axir, men qo'rqayotirman, akam hali ham kelgani yo'q, qurib ketsin” [6. 75-b]. deyishgagina jur'at etadi. Qiz akasining noto'g'ri yo'lda yurganligini yaxshi biladi. Biroq o'zbek oilasida tarbiya topganligi bois buni ochiq-oshkor unga aytishdan tortinadi. Hikoyada maishiy holatlar tasviridan ko'ra qahramon ko'ngliga diqqat qaratish muhimroqdir.

Hikoyadagi qizning onasi Enabuvi esa totli-totli o'ylar, orzular girdobida yashaydi. Uning eng katta orzusi o'g'li Isani uylantirib, qizi Yoqutoyni uzatishdir. G'afur G'ulom ta'biri bilan aytganda: “...bir azamat kuyov, novdaday kelinchakka ega bo'lish” orzusi madorsiz bu ayolga dalda beradi, yashashga umid bag'ishlaydi. Shunga qaramasdan u o'g'lining nihoyatda beparvoligidan, “etti xuftongacha sakillab” yurganidan, etilib turgan singlisi va mushtipar onasini yolg'iz tashlab ketishga ko'zi qiyganidan noliydi. Hatto qiziga qarata: “...axir, akang o'lgur kelmagan bo'lsa...” deya ko'nglini ochishga urinadi.

Asardagi ushbu ayollarning biri o'g'lidan, ikkinchisi esa akasidan noroziliklari o'zbek oilasida erkak kishini oila boshchisi, nomusining qo'rg'oni deb bilishlari, shu sha'nga qo'riqchiligi jihatidan qadrlashlarini, loqayd erkakni yozg'irishlarini milliy asoslarga bog'lab talqin qilish, yozuvchining mahoratini ta'kidlash lozim.

Adabiyotshunos Q.Yo'ldoshev “Alpomish talqinlari” nomli kitobida Qaldirg'och haqida so'zlar ekan, o'zbek ayoli haqida quyidagilarni yozadi: “O'zbek ayolining o'z shaxsiy hayotidan ko'ra oilani afzal ko'rishi, muqaddas bilishi sof milliy ildizga ega. U er, erkak uchun yashaydi. Shu bois erkakdan juda ko'p narsa kutish va talab etishga haqdor. Bizning ayollar o'z hayoti bilan hech qachon yashamagan. Qiz bola tug'ilgan uyida otasi, aka-ukalarini uyatga qo'ymaslik, o'zi oila qurgach esa eriyu farzandlariga isnod keltiradigan ish qilmaslik uchungina yashayveradi. Shu yashayverishining o'zi bilan har kuni

qahramonlik ko'rsataveradi. Chunki u-o'zidan kecha bilgan, o'zgalarga hayotini baxshida eta bilgan qudrat egasi. Shu bois erkaklardan chin erkaklik talab qilishga, hammadan oldin, qiz bola haqli bo'ladi" [1. 39-b].

Shu bois ham dastlab, "sochi oqarguncha onasining boshiga yostiq bo'lib qolishga rozi" edi. Bu bilan o'z-o'zini ovutadi, biroq bu fikrini ham oshkor eta olmaydi, ibo va hayo pardasini sindirib tashlay olmaydi. Agar kuyov bo'lmish Nizomjon sha'n-shukuh va nomus to'g'risidagi tushunchalarida kengfe'lroq bo'lsa, hamiyatlilik qilib uning gunohini kechirsa, bir galgina Yoqutoyni kechirsa, umri boricha uning cho'risi bo'lib qolishga ham tayyor. Tuyg'ular girdobida o'rtanayotgan qiz bu shirin xayollarining-da ro'yobi dushvorligini biladi: "Kechirmaslar... kechirmaslar...", - deydi ichida.

Hikoyadagi Nizomjonni ham aybsitib bo'lmaydi. Chunki Savri amma, Olma xola va boshqa hikoya qahramonlari ham «to'kis-tugallik»da oila baxtini, qizning sha'nini ko'radilar. Bu voqea hayotiy asosga ega bo'lib, o'sha davrda ne-ne qizlar bir nafaslik nafs halovatini turmushning asosi deb tushunish orqasida begunohligini isbot etolmay ma'sum hayotdan ko'z yumish hollari tez-tez uchrab turardi. Vahshiylarcha qiymalangan, so'yilgan qizlar haqidagi hayotiy voqealarni kuzatgan G'afur G'ulom chinakam realist sifatida inson va insoniylik, iffat va g'urur, poklik va sha'n-shukuh tushunchalarini dunyoviy asoslarda talqin etib, o'z davri fojiasi dramalarini haqqoniy chizadi.

Yoqutoy "satang qizi", "buzuq bolasi", "o'tmas buyum", "eshakmunchoq" kabi so'zlarni eshitishga, haqoratlarga chidab, do'pposlash va tepkilashlarga bardosh berishga majbur bo'ladi. Eri tomonidan taloq qilinadigina emas, qiz o'stirganlarga ming la'nat yog'iladi. Shunga qaramasdan Yoqutoy qalbidagi nomus tuyg'usining qudrati hikoyani ichidan nurlantirib, unga milliylik bag'ishlab turadi. Bu nochor juvonning piq-piq yig'isi, uyqusizlik, kaltak zarbi va haqoratu kamsitishlardan o'rtangan qalbi, ozor tortgan badani barobarida gangib qolgan qayg'uli hamda hasratli holati kitobxon ko'z o'ngida, xotirasida muhrlanib qoladi.

G'afur G'ulomning ushbu hikoyasida voqealarda bevosita qatnashmasa-da, Isa obraziga xos mas'uliyatsizlikka urg'u beriladi. Etti xuftongacha sanqillab yurgani holda mushtipar va mushfiq onasi hamda bo'y etgan singlisini bog'da yolg'iz qoldirgan Isa e'tiborsizligi tufayli Yoqutoyning nomusi bulg'anadi. Bo'lg'usi kuyov Nizomjon o'zini «belida belbog'i bor»lardan sanovchi, obro' va nomus haqidagi fikrlari jihatidan birmuncha mahdudroq qarashdagi qahramondir.

Akademik S.Mamajonov «Soyalar» hikoyasidagi peyzaj tasviri haqida shunday deydi: "Soyalar"dagi peyzaj qahramonlarning psixologik holatini ochish yoki voqea sodir bo'layotgan joy manzarasini gavdalantirish uchungina xizmat qilmasdan, voqeani rivojlantiruvchi va asarni kompozitsion tomondan uyushtiruvchi muhim vosita vazifasini ham o'taydi" [2.114 b.].

Biz ham ustoz adabiyotshunosning bu fikrlariga qo'shilganimiz holda hikoyadagi peyzaj bilan bog'liq ramziylik va tuyg'ular parallelizmiga diqqat qaratmoqchimiz. Dastavval, hikoyaning «Soyalar» deb nomlanishiga e'tibor bersak. Soya - quyosh nuri tushmaydigan salqin va ko'lanka joy. U yorug'likni, nurni to'sadigan narsalardan tushadigan tasvirdir. Ko'chma ma'noda soya g'ashlik va ko'ngil xiralikni, hijolat va havotirni, shuningdek, turli sharpalarni bildiradi.

Anglashiladiki, Gʻafur Gʻulom hikoyada koʻpchilik nazaridan panada qolgan jihatlariga eʼtiborni qaratmoqchi. Homiysiz qolgan oila aʼzolariga, panohsiz nozik nihol qizi - Yoqutoy va onasi Enabuvi taqdiriga xayrixohlik bildirmoqchi boʻladi.

Muallif tabiatning sirli-sehrli shivirlariga quloq tutadi. Hikoya boshida tasvirlangan yangi oʻtkazilgan olcha koʻchati asarning soʻngida ketmon dastadan yoʻgʻonroq shaklga kiradi. Ojiz navnihol olcha koʻchatining mevali daraxtligi, taʼmi nordon ekanligi, qaddi tikligi Yoqutoyga, hayotga qiyoslanadi. Tun nihoyatda uzun, kecha esa gʻayur. Shabada olchani yaproqlarini yulqilaydi, sarv qomatini silaydi. Bu oʻrinda yaproq koʻrkamlik belgisiyu, daraxt tanasi Yoqutoyning kelishgan qomatiga ishora ekanligi oydinlashadi. Erta pishar uzum-chillaki rang-tus olib, qizarib pisha boshlagan. Qisqasi, Yoqutoyning yoshligi, koʻrkamligi, xushvaqtligi, yuzlaridagi qizillik olchani ham, daraxtni ham, daroyi uzumlarni ham uyatda qoldirar darajada goʻzal.

Yozning shabadasi - behadik va sayoq, kapalakday beqaror. Qizning qaldirgʻoch qanotiday qayrilma qoshlari – sut daryosining qoʻsha zuluklari. Biroq oy yorugʻligi va oydin kecha atrofdagi tumanli, ogʻir sokinlik muqarrar fojidan darak berayotganday taassurot uygʻotadi. Salqin kecha sokinligi va vazminligi ahli jonzoyni uyqu ogʻushiga chorlagan. Sarrin shamollar allalab tebratadi, erkalab uxlatadi. Bir qarashda butun atrof “osoynishi barkamol”day tuyuladi.

Umuman, hikoya bizning *iffat* haqidagi tushunchalarimiz doirasini xiyla kengaytirishga xizmat qilgani bilan ham yashovchanlik kasb etgan, bugun ham oʻz qimmatini yoʻqotmagan boʻlsa ajab emas.

Gʻafur Gʻulom ayol nomusi haqidagi gap-soʻzlarning oʻzbek xalqi hayotida qanchalik kuchli taʼsir qudratiga ega ekanligini yaxshi biladi Oʻzbek xalqi nazdida mazkur tushunchaning muhim ahamiyat kasb etishidan kelib chiqib, oʻz ortidan gap-soʻz chiqarmaslikka uringan bir ayol qismati misolida u qanchalik haq boʻlmasin, jamiyat tomonidan aybsitilishini haqqoniy, ishonarli koʻrsatib bera olgan [3. 50-b].

Umuman, ushbu hikoyada inson ruhiyati chuqur yoritilgan boʻlib, bu yozuvchi hikoyalari poetikasining jozibasini oshiradi. Bu esa adib hikoyalarining bugungi kunda ham yashovchanligini taʼminlay olgan.

Foydalanilgan adabiyotlar:

- 1.Йўлдошев Қ. Алпомиш талқинлари. –Т., Маънавият, 2002.
- 2.Мамажонов С. Ғафур Ғулом прозаси. –Т., Фан, 1966
- 3.Матёкубова Т. Ғафур Ғулом бадиияти. –Т.: Фан ва технология, 2006
- 4.Matyakubova T.R. Lyric Experience in Gafur Gulam's Poetry // Pindus Journal Of Culture, Literature, and ELT ISSN: 2792 – 1883 Vol 2 No. 1. 2022
- 5.Назаров Б. Ғафур Ғулом олами. –Т., Фан, 2004.
- 6.Matyakubova Tozagul Rajapovna . A mastery of affecting a student with a lyric feeling // International Journal of Engineering and Information Systems (IJEAIS). Vol. 5 Issue 4, April - 2021, Pages: 290-292
- 7.Ғафур Ғулом. Мукаммал асарлар тўплами. 6т. –Т., Фан, 1986
- 8.Ҳотамов Н., Саримсоқов Б. Адабиётшунослик терминларининг русча-ўзбекча изоҳли луғати. –Т., Ўқитувчи, 1983.

9.Yakubov Islamjon. Experimental research in the creation of a “Mini-Novel”// Asian Journal of Multidimensional Research 2022, Volume : 11, Issue : 11. Pp. 143-147

10.Yakubov Islamjon. Tozagul Matyakubova. laboratory works of gafur gulam: poetic image and imagery // International jornal of Advanced Science and Technology. № 6. 2020. Pp. 28-37

11.Yakubova Sevinchoy. Description Of The Spirit Of Call For Patriotism And Unity In The Poetry Of Fitrat // International Journal of Engineering and Information Systems (IJEAIS). Vol. 5 Issue 4, April - 2021, Pages: 83-85

“SHUM BOLA” QISSASIDA DRAMATIK PAFOS

Islomov Jurabek Soxibnazarovich

SamDU tayanch doktoranti

Gʻafur Gʻulom adabiyot olamiga shoir sifatida kirib kelgan boʻlsa-da, dastlab iteʼdodli nosir, ocherknavis, publitsist sifatida shuhrat topadi va umrining oxirigacha bu sohalarida samarali ijod qiladi. Quvonarli tomoni shundaki, uning lirikasi qatori nasriy asarlari ham bugungi kungacha adabiyotshunoslarning tadqiqot obyekti sifatida oʻrganib kelinmoqda. Biz ushbu maqolamizda uning betakror lirikasi, hikoyanavislikdagi gʻoyat tabiiy yoʻsini, xalqchil qissalari yoki tengi yoʻq ajoyib hajviyoti haqida toʻxtalmoqchi emasmiz, chunki uning boy ijodiy merosi miridan sirigacha tadqiq qilib kelinmoqda.

Biz uning oʻzbek dramaturgiyasiga qoʻshgan ulkan hissasi, ijodkor asarlaridagi kuchli dramatik pafos va uning asarlarida tasvirlangan yashirin dramatik xarakterlar tahliliga biroz eʼtibor qaratmoqchimiz. Oʻz mulohazalarimizni bayon qilishdan oldin shuni eslatib oʻtmogʻimiz joizki, Gʻafur Gʻulom dramatik turga mansub birorta ham asar yozmagan. Shunday boʻlsa-da, Gʻafur Gʻulom poetikasida dramatism va lirizm, dramatism va epizm uygʻunligi kabi masalar eʼtibor berishga arziydigan jihatlar deb hisoblaymiz.

Bundan tashqari, drama adabiy ijodning oʻziga xos turi sifatida sanʼat tizimidan joy olib, turli tarixiy bosqichlarda “qoʻshni” janrlar (epos, lirika) va sanʼat turlari (teatr, musiqa, kino) bilan oʻzaro aloqada boʻlib, ularni va ular hisobiga oʻzini boyitib, yaxshilay olishi mumkinligini Gʻafur Gʻulom ijodi orqali kuzatish mumkin.

Gʻafur Gʻulom oʻzbek adabiyotida birinchilardan boʻlib Shekspir tragediyalarini ona tilimizga mahorat bilan tarjima qilib, teatr va adabiyot muxlislarini xursand qila olgan ijodkorlardan biri hisoblanadi. “Gʻafur Gʻulom Vilyam Shekspirning “Otello” tragediyasini tarjima qilib, Hamza teatriga topshiradi. Kunora teatrga borib asar repititsiyasini kuzatardi. Baʼzi soʻzlarni aytishga qiynalayotgan artistlarga oʻsha soʻzni boshqasiga almashtirib berardi. Ayniqsa, bosh rolni ijro etayotgan Abror Hidoyatovga uning ovoz imkoniyatlarini hisobga olib yangi jaranglaydigan, harakatlariga mos soʻzlar yozib berardi. Asar sheʼriy boʻlgani uchun u Abror Hidoyatovga vaznni saqlash, sheʼriy ohangni buzmaslik kerak ekanligini tushuntirardi” [1, 71]

Shuningdek, adib “Qirol Lir” va bir qator rus va yevropalik adiblarning asarlarini tarjima qilib, yetuk tarjimon ham ekanligini koʻrsatadi. Bu bilan oʻzbek

adabiyoti va dramaturgiyasi xazinasini shohona hisoblangan tarjima asarlari bilan boyitishga xizmat qildi.

Bizga ma'lumki, adabiyotning har uchala turida ham diologdan keng foydalaniladi. Diolog dramaning mohiyatini aks ettiradigan bosh alomat sifatida qarash xato ekanligi adabiyot nazariyotchilari tomonidan isbotlangan. Lekin dramatik asarlarda diologga dramaturg nosir va shoirga qaraganda ko'proq narsani yuklaydi, natijada dramada diolog og'irroq tosh bosadi. "Diolog dramada fikriy qilichbozlikdir. Bir personajning zarbasi uning qarshisidagi personajning ham zarbasiga sabab bo'ladi. Hatto do'stlar ham shu "qilichbozlik" usulida so'zlashadilar." [2, 184]

Izzat Sultonning dramatik asrlardagi diologga bergan ushbu ta'rif G'afur G'ulomning ko'pchilik nasriy asarlarida uchraydigan diologlarga ham xosdir. Masalan "Shum bola" qissasidagi dandon sopli pichoqning sinishi bilan boshlanuvchi mashhur suhbatda ham xuddi dramadagidek ikki bahslashuvchi bir-biridan qanday bo'lmasin ustun kelishga harakat qiladi. Biri ikkinchisini mot qilishga urinadi. Yozuvchi yumor orqali obrazlar orasida keskin va ta'sirchan vaziyatlarni keltirib chiqarishga harakat qiladi, bu esa asarda dramatismni kuchaytiradi.

G'afur G'ulom yaratgan obrazlar ham xuddi o'zidek hozirjavobligi bilan asarning ta'sir kuchini ortirishga xizmat qilganligini ko'rishimiz mumkin bo'ladi. Bu jihatlari ham dramaturgiyaga xos ekanligi bilan diqqatimizni tortadi. "Dramadagi personaj dramaturgga yot bir shaxs va shu bilan birga, dramaturgning o'zi hamdir. Lir ham shoh, ham shoh libosidagi Shekspirdir. G'ofir ham xizmatchi (batrak), ham o'sha xizmatchining yirtiq chaponiga burkangan Hamzadir" [3,190]. Avtobiografik asar hisoblanmaydigan "Shum bola" dagi Qoravoy ham xuddi Lir va G'ofur singari muallifning ichki dunyosini aks ettira olgan yosh G'afur G'ulom hamdir.

"Shum bola" qissasi boshidayoq yozuvchi yumoristik ruh yaratadi. Bora-bora yumor satiraga o'tadi. Sarguzasht bahonasida o'sha davr fojiaiy hayotdagi inson holatini, uning axloqiy-ma'naviy dunyosini, odamiyligi va mehr shavqatini, hayvoniy qiyofasini haqqoniy tasvirlanishi orqali tragikomediya xos pafos seziladi.

Shuningdek, asar boshida o'sha paytda Toshkentda sanog'iga yetib bo'lmaydigan jinnilar paydo bo'lgani bilan bog'liq tasvirda fojiaiylik ruhi ozmi-ko'pmi singigan obrazlar gavdalanitiriladi. Masalan, ilgari bo'zchi bo'lgan chit ko'payib ketgandan keyin bo'z o'tmay qolib, bozori kasodga uchrab, bola-chaqasini boqolmay jinni bo'lib qolgan Karim jinni yoki o'z erini singlisi bilan o'ynashib turganda ustidan chiqib qolib jinni bo'lib qolgan Eshon oyi kabi bir qator personajlar (garchi asarda ularning ichki kechinmalari, o'y-fikrlari tasviri berilmagan bo'lsa-da) tabiatida fojiaiy pafos bo'rtib ko'rinadi.

"Shum bola" qissasini dramatik asarlar bilan bog'lab turuvchi yana bir jihat (asar asosida yaratilgan "Shum bola filmi") borki, uni aytib o'tmaslik mumkin emas. Odatda nasriy asarlarni kinoga aylantirish murakkab jarayon hisoblanadi. Chunki yozuvchi taqdim etgan nasriy asarning barcha jozibasini kino o'zida sig'dira olmaydi, nasr individual idrokka moslab yoziladi, dramaturgiyada esa

jamoaviy sezim yetakchilik qiladi. “Shum bola” qissasida bo‘limlarning alohida manzaralardan tashkil topgani, diologlarning drammatizm asosiga qurilishi, tomoshabopligi kabi dramatik elementlarning mavjudligi asarning muvafaqqiyatli tarzda ekranga ko‘chirilganligining asosiy omillaridan biri hisoblanadi. Shuni ham tan olish kerakki, yuqorida aytganimizdek film asarni to‘la qamrab ololmagan bo‘lsa-da, “Shum bola” kinosining muvafaqqiyati oldida bunday farqli jihatlar ko‘p ham ta’kidlanmaydi.

Shuningdek, milliy dramaturgiyamizning shakllanishiga asos sifatida qaraladigan xalq teatri va o‘yinlari jadidlar tomonidan asos solingan ilk yozma professional dramaturgiyaga mavzu va nomlanish jihatdan andoza bo‘la olganligini hech kim inkor qila olmaydi. Lekin og‘zaki dramaturgiya hisoblangan xalq teatri va o‘yinlari jadid dramaturgiyasidan ijro maqsadi, sahna asarlarining g‘oyaviy-estetik vazifalari nuqtayi nazaridan ancha farqlangan.

Masalan, mudroq qora xalqni “ko‘zini ochish” ma’rifatlashgan, taraqqiy etgan, hur jamiyat qurishni asosiy maqsad deb qaragan jadidlar o‘z dramalarini ushbu g‘oyalar bilan to‘yintirgan bo‘lsalar, An’anaviy xalq teatrlarida esa ijtimoiy-iqtisodiy, ma’rifiy, maishiy muammolarga bag‘ishlangan tarbiyaviy ahamiyatga ega bo‘lgan sahna asarlari mavjud bo‘lgan bo‘lsa-da, ularning namoyishidan ko‘p hollarda sof tomosha maqsadi ko‘zlangan.

Shuningdek, og‘zaki teatr va dramaturgiyaning katta qismini yig‘ilganlarning kayfiyatini ko‘tarish maqsadida faqat kulgiga asoslangan repertuarlar tashkil qilibgina qolmasdan, bozorlarda odamlarni aldab tomosha, vazxonlik bahonasida pul ishlashni maqsad qilgan vazxon, qiziqchi va masxarabozlarning ham xalq teatrlari vakillari orasida mavjud ekanligini G‘afur G‘ulomning “Shum bola” qissasidagi Ko‘sa maddoh, Rafiq masxaraboz [4,265] kabi obrazlar orqali ham bilib olishimiz mumkin. Shunday jihatlarni inobatga olgan holda uzoq asrlar davomida shakllanib kelgan og‘zaki teatr va dramaturgiya turli xil g‘oyaviy maqsadlar natijasida yuzaga kelganini taxmin qilishimiz ham mumkin.

Xullas, ijodkor o‘zi tanlagan yo‘nalishda o‘ziga xos turli-tuman ifoda vositalarni, mahorat yo‘llarini izlab topmay turib, adabiyot va san’atimizni rivojlantirishga munosib hissa qo‘sha olmaydi. G‘afur G‘ulom kabi ijodkorlar esa o‘z iste’dodi, o‘ziga xos uslubi, ohangi bilan adabiyotimizning barcha sohalari istiqboliga munosib hissa qo‘shgan serqirra ijodkor sifatida har doim e’tirof etiladi.

Foydalanilgan adabiyotlar:

- 1.Саид Аҳмад. Танланган асарлар. Учинчи жилд. – Т.: ШАРҚ НМК Бош тахририяти, 2000.
- 2.Izzat Sulton. Adabiyot nazariyasi. – Т.: “O‘qituvchi”. 2005.
- 3.Izzat Sulton. Adabiyot nazariyasi. – Т.: “O‘qituvchi”. 2005.
- 4.Ғафур Ғулом. Танланган асарлар.–Т.: Ғафур Ғулом номидаги НМИУ, 2003.

JOY NOMLARI BILAN BOG‘LIQ METONIMIYA

Suvonova Rohila Akramovna

SamDU dotsenti

Metonimiya o‘zbek tilida juda keng tarqalgan, uning hatto metaforaga nisbatan ham amal qilinish va sodir bo‘lish doirasi keng. U barcha mustaqil ma’noli turkumga oid so‘zlarda uchraydi.

O‘zbek tilida metonimiyaning til hodisasi sifatida ham, nutq hodisasi sifatida ham sodir bo‘lganligi kuzatiladi. Uning, ayniqsa, til hodisasi sifatida sodir bo‘lishi o‘zbek tilida keng tarqalgan. Bu narsani shu tilda so‘zlashuvchi xalqni ob’ektiv olamni o‘zaro aloqador, bir-biri bilan bog‘liq holatda qabul qilishi, milliy tafakkurning namoyon bo‘lishi namunasi deb qarash kerak.

Metonimiya – so‘z ma’nosi taraqqiyoti bilan bog‘liq hodisalardan biridir. Ma’no taraqqiyoti esa turli ko‘rinishlarga ega bo‘ladi. Bundan tashqari voqea-hodisa narsa buyumlar o‘rtasidagi o‘zaro yaqinlik va bog‘liqlik asosida ma’no ko‘chishiga ham aytiladi. Masalan: Sening ko‘zing o‘tkir, Zamon ham shaffof (Zulfiya). Bu misoldagi ko‘z so‘zi “mushohada” hosila ma’nosi bilan namoyon bo‘lgan. Chunki mushohada hamma vaqt ko‘z bilan kuzatilgan narsalar doirasiga aloqador holda kechadi.

Tilshunoslikda metonimiyaning o‘rnini belgilashda turlicha qarashlar mavjud. Juda ko‘p tilshunoslar uni polisemiyaning bir ko‘rinishi deb qaraydilar. Polisemiya bilan metonimiyaning o‘zaro aloqadorlik, bog‘liqligi mavjud. Metonimiya so‘z semantik taraqqiyoti deb qaralar ekan, uning natijasi bilan polisemiyaning yuzaga kelishi o‘rtasida bog‘liqlik borligi inkor etilmaydi.

Ot turkumiga xos metonimiyalar ko‘proq joy nomi bilan ham bog‘liq bo‘ladi, ya’ni atoqli otlarni tashkil etadi. Joy nomlari bilan bog‘liq metonimiyalar ikki xil ko‘rinishda yuzaga keladi;

1. Joy nomlarini bildiruvchi metonimiyalar.

2. Joy munosabatiga ko‘ra metonimiyalarning sodir bo‘lishi.

Joy nomi va joy bildiruvchi so‘zlarda metonimiya sodir bo‘lishi nutqda ko‘plab uchraydi. Ayniqsa, joy nomini bildiruvchi so‘zlar o‘sha joyda ishlab chiqarilgan mahsulotni bildirishi orqali metonimiya sodir bo‘lar ekan, bu jarayon til hodisasi sifatida kuzatiladi. Masalan: Qorako‘l so‘zi asli Buxorodagi bir tumanning nomidir.

U hozir qo‘zi terisidan ishlangan jingalak yungli mo‘ynani bildiradi. Bunday mo‘yna olinadigan qo‘zilar dastlab shu tumanda yetishtirilgan. Bu hosila ma’no joy munosabatiga ko‘ra yuzaga kelgan. Yana shivirg‘on, kattaqo‘rg‘on, g‘ulja, uchqora kabi joy nomlari ham bor. Bu nomlar kelib chiqishi jihatidan o‘sha joylar bilan aloqador bo‘lgan uzum navlarini ham ifodalaydigan bo‘lgan, ya’ni metonimiya hodisasi kechgan. Yana Samarqand shahri nomida olma navi ham bor. Bu keltirilgan misollarning barchasi til hodisasi bo‘lgan metonimiyaga xosdir.

Joy nomi bilan o‘sha joyda yashovchi aholini atash orqali ham metonimiya sodir bo‘ladi. Lekin ular deyarli nutqiy hodisa sifatida kuzatiladi: Agar kerak

bo'lsa, Sharqni va G'arbni / Yolg'iz bir she'riga eta olur jo (A.Oripov 86-b). Bu gapdagi Sharq va G'arb so'zlari o'sha yerlarda yashovchi barcha aholini ifoda etgan. Toshkent chiqdi Shostri yo'liga (E.Vohidov 58-b). Bu gapda ham Toshkent so'zi Toshkent aholisini ifoda etgan. Quidagi misolda berilgan Osiyo so'zini ham shunday izohlash mumkin: Zabtga olib keng Osiyoni, / Bir zot chiqdi mag'rur, davangir (A.Oripov 32-b). Joy nomi, ayrim hollarda, o'sha joyga oid kishini ham bildirishi mumkin: Tanladi Kavkazning papoq, bo'rkini. Bu gapdagi Kavkaz so'zi "kavkaz kishisi" ma'nosida qo'llangan.

Umuman, joy bildiruvchi so'zlar, o'sha joyda yashovchi aholini ifoda etishi bilan metonimiya sodir bo'lishi mumkin: Saroy yo'lga chiqdi savlati bilan (A.Oripov), Qishloq g'ala-g'ovur, soldatni kutar (Uyg'un 63-b). Bu gapdagi saroy, qishloq so'zlari o'sha joydagi aholini bildirgan, ya'ni metonimiyaga uchragan. Ba'zan joy bildiruvchi otlar faqat shu joyga oid aholini emas, har qanday subyektlarni ifoda etishi ham mumkin.

Joy nomi bilan unda yashaydigan aholi ifodalanar va metonimiya sodir bo'lar ekan, bu nom ma'lum hududni bildiradi. Bunga shahar, qishloq, tuman, vodi, mahalla, O'zbekiston, viloyat so'zlaridagi metonimiyani ko'rsatish mumkin. Yuqorida unga misollar keltirildi. Ularning hammasida ham hosila ma'no aholini bildiradi. Yana korxona, muassasa, saroy, zal kabi joy nomlari ham metonimiyaga uchrashi, odamlarni bildiruvchi hosila ma'noga ega bo'lishi kuzatiladi. Masalan: Klub mudiri zalni ikki marta tartibga chaqirdi (A.Qahhor 43-b.), Gavjum bosmaxona (O.Hojiyeva) gaplaridagi zal va bosmaxona so'zi metonimik ma'no - "odamlar" ni bildirib kelgan.

Javob berar bunga na yer, na osmon (A.Oripov 17-b). Bu misoldagi yer so'zi yerdagi aql egalari, osmon so'zida esa ilohiy subyektlar ifoda etilgan. Bu sabablarga ko'ra barcha metonimiyalar faqat nutqiy hodisa sifatida sodir bo'ladi.

Nutqiy hodisa sifatida sodir bo'lgan metonimiyalar - joy nomini bildiruvchi so'zlar vatan ma'nosini bildirishi orqali ham kuzatiladi: Bu jonning bor erur na Qorabog'i? / Na O'zgan, na O'sha Farg'onasi bor (A.Oripov 23-b). Bu gapdagi O'zgan, O'sh, Farg'ona, Qorabog' so'zlari "vatan" metonimik ma'nosini ifoda etgan. Joy nomini bildiruvchi atoqli otlar o'sha joyga ishora qiluvchi belgi ma'nosida qo'llanishi - metonimiyaga uchrashi ham mumkin: Ana xaritada Mirzacho'l, Jizzax (A.Oripov 6-b) misolidagi Mirzacho'l, Jizzax so'zlari aslida joy nomlari bo'lgani holda, xaritadagi o'sha joylarni ko'rsatuvchi shartli belgini ifoda etadigan metonimik ma'noni bildirmoqda.

Bunda kishining biror a'zosi o'zi o'rnashgan joy bilan tutash joyni nomdosh qilib oladi. O'sha tutash joyni bildirgan hosila ma'no yuzaga kelishi joy munosabatiga ko'ra sodir bo'lgan metonimiya hisoblanadi. Masalan: Hoji Kumushning boshiga kelib o'tirdi (A.Qodiriy), U har qachon yonboshimda (U.Nosir 8-b), Ulug'lar qoshida goh bo'ldi joyim (A.Oripov 24-b) gaplarida bosh so'zi bosh bilan tutash, yonbosh so'zi yonbosh bilan tutash, qosh so'zi qosh bilan tutash joyni ifoda etgan. Hosila ma'no joy aloqadorligiga ko'ra yuzaga kelgan.

Xulosa o'rnida shuni aytish lozimki, joy nomlari bilan bog'liq metonimiyalar ko'pgina semantik ma'nolarga ega bo'lib, nutqimizda ko'plab

uchraydi. Biz badiiy asarlardan kuzatilgan misollarni oldik xolos. Og‘zaki nutqda ham bunday holatlarni uchratishimiz mumkin.

Uslubiyatning asosiy vazifasi til birliklari imkoniyatlarining nutqda namoyon bo‘lish qonuniyatlarining, davrga, nutq ko‘rinishlariga nisbatan me‘yoriyligini belgilab berishdan iboratdir.

Foydalanilgan adabiyotlar:

1. Abdurahmonov X., Mahmudov N. So‘z estetikasi. –Toshkent: Fan, 1981.

2. Karimov S.A. Badiiy uslub va tilning ifoda – tasviy vositalari. – Samarqand: SamDU, 1994,- 72 b.

3. No‘rmonov A. O‘zbek tilshunosligi tarixi. –Toshkent: O‘zbekiston, 2002.

4. Қўнғуров. Р. Ўзбек тилининг тасвирий воситалари. - Тошкент:Фан,1977.144 б.

5. Suvonova R. O‘zbek tilida metonimiya. –Toshkent: A. Qodiriy, 2004,113b

HOZIRGI O‘ZBEK SHE‘RIYATIDA MILLIY KOLORIT

**Buriyeva Firuza Normurotovna,
o‘qituvchi, O‘zbekiston-Finlandiya
pedagogika instituti, Samarqand**

Adabiyot xalq ijodi va ma‘naviy mulki ekan, albatta, u o‘zida yaratuvchisini, ijodkorini in‘ikos etadi hamda qaysi millat bisotiga mansub bo‘lsa, o‘sha millatning urf-odatlarini, maishiy hayoti, orzu-umidlari, qayg‘u-alamlari - umuman, milliylikni o‘zida mujassam etadi. Adabiy asarlarda milliy kolorit haqida so‘z ketganda, ko‘pincha, nasriy asarlar tadqiqot obyekti etib olinadi. Masalan, adibimiz O‘tkir Hoshimov milliy kolorit haqida quyidagicha nazariy fikrlar bildirgan edi: “Shoir va adib asarlarida milliy til boyligi, tovlanishlari aks etadi. Qolaversa, qahramonlar portreti, peyzaj, udumlar kitobxonda o‘sha xalq, o‘sha millat haqida tasavvur uyg‘otadi. Asarda zamon va makon tushunchasi bo‘lmog‘i tabiiy. Hozirda yer yuzida 1600 dan ortiq millat yashaydi. Har birining o‘z tili, libosi, urf-odatlarini bor.

Deylik, o‘zbek do‘ppi kiysa, meksikalik sombrero kiyadi. Markaziy Osiyo dehqoni qovun ekkan, Janubiy Amerika fermeri shakarqamish o‘stiradi... Bular ham “kolorit”. Biroq milliylikning tashqi – zohiriy ko‘rinishi milliy xarakter teran tasvirlangan asarda, avvalo, odamning o‘ziga xos ruhiy olami aks etadi. Bunisi endi, ancha mushkul yumush” [1].

So‘ngra, o‘zbek nasrii durdona asarlaridan bo‘lgan “O‘tkan kunlar” va “Ufq” romanlaridan misollar keltiradi. Demak, anglashiladiki, kolorit tushunchasi zohiriy va ruhiy olamning mujassamligini ifoda etadi. Badiiy asarda milliy kolorit yuzasidan tadqiqot olib borgan adabiyotshunoslardan yana biri Sh. Jumayeva ham o‘zining “Milliy kolorit va uning xususiyatlari” maqolasida ushbu atamaga quyidagicha ta‘rif beradi:” Milliylik u yoki bu millatning ma‘naviy faoliyati va moddiy hayotidagi o‘ziga xoslikdir. Ma‘naviy faoliyat kishilarning xarakteri,

tafakkur tarzi, ruhiyati, intilishlari, qiliqlari, yumor xususiyatlari va boshqalarni o'z ichiga oladi. Moddiy hayot esa urf-odat, rasm-rusum, marosimlar, kiyimlar, uy-ro'zg'or anjomlari, cholg'u asboblari, pazandachilik, ismlar va hokazolar. Badiiy asarda aks etgan ana shu milliy xususiyatlar yig'indisi adabiyotshunoslikda milliy kolorit deyiladi. "Kolorit" terminini O'zbek Sovet Ensiklopediyasi "rang" so'zidan olingan deb da'vo qiladi. Olim Usmon, Renat Doniyorovlar "rang, bo'yoq" ma'nosidagi lotincha "color", italyancha "colore" so'zlari orqali rus tiliga va u orqali o'zbek tiliga o'zlashgan, deb hisoblaydilar" [2,132-133-betlar].

Ko'rinadiki, mazkur maqoladagi ushbu umumlashma nazariy xulosalarda ham milliy koloritning moddiy va ma'naviy tushunchalar jamligini ifodalashi aytilyapti. Shuningdek, adabiyotshunoslikda milliy koloritga bag'ishlangan ko'pgina tadqiqotlarning badiiy tarjima bilan aloqadorlikda olib borilganligini aytish mumkin. Masalan, shunday ishlardan biri sifatida Berdaq nomidagi QQDU O'zbek tili va adabiyoti kafedrasida assistenti Zulfiya Asamatdinovaning "Badiiy tarjimada milliy kolorit ruhini saqlash muammosi (Zulfiya she'riyatining qoraqalpoq tiliga tarjimasi misolida)" maqolasini misol tariqasida ko'rsatish mumkin. Unda Zulfiyaning "O'g'lim sira bo'lmaydi urush", "Bahor keldi seni so'roqlab" she'rlari tahlilga olinib, o'zbek onasi, o'zbek ayolining ichki olami tasvirini milliy kolorit ifodasi sifatida ko'rsatib o'tadi. Bizningcha ham, she'riy asarlardagi milliy kolorit keng tadqiq etiladigan mavzu. Chunki aynan she'riy asarlarda lirik qahramon ichki dunyosi, ko'ngil kechinmalari, umuman olganda, "men"i namoyon bo'ladi va aynan qahramonning "men"ida milliy kolorit ko'proq ko'zga tashlanadi.

Yuqorida iqtibosda keltirilganidek, badiiy asardagi obrazlarning kiyinishlari, uy-joy tasviri, marosim va urf-odatlar ham, albatta, milliylikning ko'rinishlari, lekin asar qahramonining o'y-fikr va sezimlari, so'zlarida ifodalangan milliylik asosiy va poetik zalvarga ega. Hozirgi zamon she'riyatida milliy kolorit haqida so'z ketganda, avvalo, G'afur G'ulom, Zulfiya, Mirtemir, Erkin Vohidov, Abdulla Oripov kabi shoirlarimizning asarlari misol tariqasida olinadi. Ayniqsa, G'afur G'ulomning she'riy va nasriy asarlari tahlil etilganda birinchi navbatda ulardagi milliylik ko'zga tashlanishi adabiyotshunoslikda ko'p marotaba e'tirof etilgan. Masalan, maktab darsliklarida buyuk shoirning "*Sog'inish*" she'ridagi ota obrazi haqida so'z yuritilar ekan, uning o'zbek millatiga mansub otaning tipik vakili ekanligini ko'rsatuvchi ifoda va tasvirlarga diqqat qaratiladi: "Bu she'rda otalarimizga xos bo'lgan jamiki fazilatlar o'zining yorqin ifodasini topgan. Ularning samimiyligi, jonsarakligi, har doim ham oshkor qilinaermaydigan farzandga mehr-muhabbati, kuzatuvchanligi, andishasi... barcha-barchasi shu she'rda namoyon bo'ladi" [3,111-bet].

G'afur G'ulom she'riyatida bunday misollar juda ham ko'p. Hatto uning "Sen yetim emassan" she'rida bolani "jigarim" deb suyishi-yu, dushmani "oqpadar" deb so'kishi ham milliy koloritning o'ziga xos namoyon bo'lishi, aslida. Ustoz shoirlarning she'rlarida tasvirlangan milliy kolorit ifodasi an'analari keyingi yillarda ham ijodkorlar tomonidan davom ettirildi. Ayniqsa, 70-80- yillar she'riyatida bu tushuncha vatanparvarlik g'oyasi uchun ham tasvir vositasi bo'ldi, deyish mumkin. Bu davr shoirlaridan, jumladan, Usmon Azim, Xurshid Davron

she'riyati misolida oladigan bo'lsak, Usmon Azimning "Baxshiyona" turkumidagi xalqona obrazlarning kiyinishi, so'zlari, fe'l-sajiyasi, odamlarga munosabatida milliy kolorit ko'rinsa, Xurshid Davron o'z ijodiy yo'nalishidan kelib chiqib, ko'pgina she'rlarida tarixiy mavzularga murojaat etish jarayonida milliy koloritni misralar qatiga singdiradi. Masalan, shoirning "Men sevaman o'zbek dalasin" sheridan olingan quyidagi bandni keltiramiz:

To'yxonalar oldida yongan
Gulxan uzra sakrab o'ynagan
Kuyovjo'ra yigitlarni-yu,
Momolarni-ertak so'ylagan [4,43-bet].

Ushbu band milliy koloritni zohiran ifodalovchi nisbatan umumiy tasvirlar. Ahamiyatlisi shundaki, mazkur parcha olingan she'r aslida lirik qahramonning o'z vataniga muhabbatini kuylashga bag'ishlanadi. Dastlabki ikki bandda o'zbek dalasi, tabiati tasviri, keltirilgan uchinchi bandda xalqining urf-odatlarini, keyingi bandlarda esa tarixiga muhabbat tuyg'ulari beriladi. Yuqorida aytib o'tganimizdek, she'rdagi milliy kolorit tasvirlari vatanparvarlik, yurtga muhabbat g'oyasining ifodasi uchun xizmat qiladi. Shoirning quyidagi she'rida esa milliylik she'rdagi personajlarning holatlariga orqali beriladi va yana vatanparvarlik, el-yurt uchun dardmandlikning namoyon bo'lishiga vosita bo'ladi:

Saraton oftobi tig'ida
Mehnat qoraytirgan bolalarning
Ko'zlariga qarolmasdan kuzni o'yla
Kuz kelishi bilan ko'karib ketgunicha
Yo'talayotgan qo'shni kampirga yordam berolmasdan
Kuzni o'yla
Ikki tol ovutolmayotgan
Belanchakdagi bolaning bo'g'ilib yig'lashi,
Kun issig'ida ko'ksida suti qurib qolgan ayolning
Iztirobi aro kuzni o'yla [4, 44-bet].

She'rdagi saratonda qorayib ketgan bola, kun issig'ida suti qurib qolgan ayolning obrazida ham milliylik bir qadar ifodalangan, lekin onasi ishlayotgan daladagi tolda belanchakka solib qo'yilgan bola obrazi faqat o'zbekona bo'lib, milliy koloritning yorqin fodasidir. Mazkur she'rda ham ijodkor milliy koloritni g'oyaviylkka bo'ysundiradi. Umuman olganda, 70-80-yillar avlodi bo'lgan shoirlar she'riyatida mavzu, tasvir, g'oya - barcha-barchasi asarda vatanparvarlik tuyg'usining ifodalanishiga xizmat qiladi. Davr she'riyati haqida adabiyotshunos R.Mullaxo'jayeva quyidagi fikrlari ham buni tasdilaydi: "Yetmisinchi-saksoninchi yillar avlodi she'riyati o'ttizinchi-oltmishinchi yillardagidek siyosiylashuv va sho'ro mafkurasining jarchisiga aylanish holati susaydi. Vatan, ozodlik, erk mavzulari turli ko'rinish va shakllarda sho'roviy mavzular o'rnini egalladi" [5, 38-bet].

O'zbek she'riyati 70-80 yillarda kirib kelgan yana bir shoir Usmon Azim ijodi nihoyatda rang-barang va keng qamrovli ekanligi bilan o'ziga xosdir. Shoirning ko'pgina she'rlarida jahon adabiyotidan ta'sirlanib yaratilgan obrazlar, peyzaj va xronotopda g'arbona tasvirlarga o'xshash holatlarni ko'rishimiz

mumkin. Lekin uning milliy ruhdagi an'anaviy she'rlari ham ijodining alohida fasllarini tashkil etadi. Masalan, shoirning "Saylanma"sida berilgan "Chapani yoxud jaydari she'rlar", "Baxshiyona" kitobidan" ruknlari ostidagi she'r va dostonlari ana shunday asarlardir.

Shoirning "Baxshiyona" turkumidagi dostonlarida asar qahramonlarining ismlariyoq, ya'ni Elbek baxshi, Elomon, Oytuman, Oqbotir, Qorabotir milliy koloritning vositalaridan ekanligi e'tiborni tortadi. Shuningdek, personajlarning gap-so'zlari va ular orqali namoyon bo'lgan fe'l-atvorlari ham milliyliги bilan betakrordir. Masalan, "Baxshiyona"dagi "Elbek baxshi bir kambagalning to'yini gurullatib, necha kampir-qizlarning yuragini dirillatib-ovuliga qaytib kelayotgan edi, bir karvonga duch keldi.

Karvonning atrofida necha otliqlar chopishib kelishyapti, tuyalarni yetaklagan shotirlar qoqilib kelishyapti. Osmonga mushaklar otilgan, tuyalarga atlas kimxoblar yopilgan, yosh-yalanglar bo'za ichib bo'kirishgan, bir-biriga do'q urishgan, tuya ustidagi qizlar ularga lab burishgan, karvonboshining peshonasi tirishgan - oldinda kelyapti" [6, 188-bet] kabi nasriy qismlarida marosim, urf-odat, kiyim-kechak va hayvonlar tasviri milliy koloritni ifodalash uchun xizmat qilsa, she'riy parchalar qahramonlarning fe'l-atvoti, ruhiyati, qalb kechinmalarini-da millatga xosligini ko'rsata olgan:

Yomon to'g'ri so'zda mudom xun ko'rar,

Tushlarida el og'zida mum ko'rar.

Sho'rlik elning farzandlari, botirlar,

Yurtin eshakdayin minib kun ko'rar.

She'riy parchadagi "*mum tishlamoq*" iborasiga ishora, shuningdek, birovni qadrsizlantirish ma'nosidagi "*eshakdayin minib*" birikmasi ham milliylikni o'zida jamlaganligi ta'riflarsiz ham o'quvchiga tushunarli bo'lsa kerak. Xullas, "Baxshiyona" nomlanishi-yu, qahramonlari, she'riy-nasriy parchalardagi peyzaj, voqealar, narsa-buyumlar, obrazlarning ismi-yu ularning gap-so'zlari, ichki kechinmlari bilan milliy koloritni o'zida ifodalaydi.

Umuman olganda, asarda milliy kolorit badiiyat uchun eng muhim bo'lib, u jahon adabiyotida har bir millatning ovozi bo'la olishini ta'min etuvchi vositalardandir. Shuning uchun har qanday janrdagi adabiy asarlarning tahlilida ularning ushbu jihatiga alohida e'tibor qaratilishi ahamiyatli va hamisha tadqiqot uchun dolzarb masalalardandir.

Adabiyotlar ro'yxati

1. <https://muxlis.uz/uz/article/badiiy-asarda-milliy-kolorit>.
2. Жумаева. Ш.Ш. Миллий колорит ва унинг хусусиятлари. Filologik tadqiqotlar: muammo va yechim. Ilmiy –nazariy anjuman materiallari. Filologiya fanlari doktori, professor Hamid G'ulomovich Ne'matov tavalludining 80 yilligiga bag'ishlanadi. 2021 yil 22-noyabr, 132-133-betlar.
3. Olimov S., Ahmedov S., Qo'chorov R. Adabiyot. 8-sinf uchun darslik. – T., G'afur G'ulom nomidagi nashriyot-matbaa ijodiy uyi, 2019.
4. Даврон Хуршид. Қакнус. Шеърлар. –Т., Ёш гвардия, 1987.
5. Муллахўжаева Р. Тафаккур янгиланиши (Шавкат Раҳмон ижоди мисолида). –Т., Мухаррир, 2019.

6.Азим Усмон. Сайланма. Шеърлар. – “Шарк” нашриёт-матбаа концерни, 1995.

TARIXIY ROMANDA MUALLIF SHAXSIYATI, ESTETIK IDEAL

**Samandarova Nigora Erkinovna,
UrDU mustaqil tadqiqotchisi**

Tarixiy-biografik romanda olis va yaqin o'tmish voqeligi yoxud tarixiy personajlar aynan tasvirlanadi, deb o'ylash u qadar durust emas. Chunki bu tipdagi asarlarning qimmati yozuvchining tarixiy davrni butun ziddiyatlari bilan ifoda eta olish mahorati bilan belgilanadi. Shubhasiz, tarixiy o'tmish tasvirlanar ekan, muallif o'zi tasvirlayotgan davrda muayyan ahamiyat kasb etgan, kelajak avlodlar uchun ibratli xulosalar beruvchi real voqelikni asos qilib oladi. Ammo, adabiy material hamisha ham ibratli va ideal bo'ladi,- deb o'ylash soddalik bo'lardi. Yozuvchi tarixiy va ilmiy faktlarga zid bo'lmagan tarzda, o'z fikru xayolotiga erk beradi. Tarixni estetik ideallariga muvofiq tarzda qayta yaratadi. Badiiy materialni tiplashtirish jarayonida muallif o'z tarixiy konsepsiyasini shakllantiradi: hayotiy materialni maqsadli tanlaydi va tizimlashtiradi.

Shunga monand tarzda tarixiy voqealarni badiiy talqin etadi. Xalq tarixini real shaxslar hayoti orqali aks ettiradi. Davr muammolarini shaxs fikr-kechinmalari vositasida tasvirlaydi. Tarixiy xarakterlarning xatti-harakatlarini makon va zamon nuqtai nazaridan ijtimoiy-psixologik shartlanganlik asosida ifoda etadi. O'quvchini xalqning ma'naviy-axloqiy qadriyatlari, hayot va kurash yo'llari bilan tanishtiradi. Tarixda shaxsning o'rni va rolini ko'rsatadi. Binobarin, tarixiy romanda muallif shaxsiyati, estetik ideali va poetik mahorati muhim ahamiyat kasb etadi [1].

Erkin Samandarning “Quyun izlari yoxud Ogahiy” tarixiy-biografik romanini shu nuqtai nazardan kuzatishga harakat qilamiz. Romanning birinchi bobidayoq biz Ogahiy obrazini uchratamiz. Uning Buxorodan Xivaga kelgan Abdumalik to'rani Matmurod (Muhammad Murod) devonbegi bilan birgalikda kutib olgani haqida xabar beriladi. Tarixning guvohlik berishicha, Abdumalik to'ra va Matmurod devonbegi shaxsiyatida yurtsevarlik, dushmanga nafrat, mardlik va jasurlik bobida ma'naviy yaqinlik mavjud. Bu hol Xivaga to'rt tomondan – Toshkent, Kazalinsk, Orenburg va Kaspiy dengizining ikki porti (Krasnovodsk va Mang'ishloq)dan hujum qilgan Kaufman, Veryovkin, Lomakin kabi rus sarkardalari boshchiligidagi harbiy otryadlariga qarshi kurashda uning Mahmud yasovulboshi, Yoqubbek qalmoq, Eltuzar inoq, Bobo mehtar kabi lashkarboshilardan biri sifatida ishtirok etishida yaqqol ko'zga tashlanadi [3].

Yozuvchi e'tibordan soqit qilmaganiday, Ogahiy va Matmurod devonbegi Buxoro va Xivaning siyosiy jihatdan yakka lab qo'yilganidan qattiq tashvishda edilar. Shuning uchun Rossiya imperatori va otasi amir Muzaffar irodasiga qarshi boruvchi kuchlarga bosh-qosh bo'layotgan amirzoda Abdumalik to'raga xayrixoh edilar. Kaufman Xorazmni zabt etgach, Matmurod devonbegi va Rahmatulla Yasovulboshini oldin Kazalinsk, keyinchalik Kaluga viloyatiga surgun qilishi ham bejiz emas. Bu tadbir bilan Kaufman Xiva saroyida Matmurod devonbegi rahbarlik qilgan nufuzli aksilrossiya guruhiga kuchli zarba bergandi. Ammo, surgunlar

Matmurod devonbegining siyosiy irodasi va matonatini buka olmaydi. U 1880 yilda Kaluga surgunidan qaytishi hamon oldingi amaliga qayta tiklanishga erishadi. Devonbegi vafot etgach (1901), bu lavozimni meros qilib olgan o'g'li – Muhammad Husaynbek, va xonning yaqin odamlari qatoriga kirgan farzandlari SHayx Nazarboy va Omonkeldiboy siyosiy hokimiyatni o'z qo'llarida ushlab turishda davom etishadi...

Ma'lumki, Ogahiy 1857 yilda miroblik vazifasidan iste'fo bergandi. U xasta ekani bois, ijtimoiy jarayonlarga faol aralashavermasdi. Ammo qaltis vaziyatlarda xon hazratlari uni hamisha yo'qlar, maslahatlariga ehtiyojmand edi. Qolaversa, amirzoda o'zining ta'bi nazmi bilan Xivada ham tanilgan edi. Binobarin, uning kutib olinishi va umumiy dushmanga qarshi harakat chog'ida Xiva xonligi pozitsiyasi muhokama qilinadigan siyosiy mashvaratda Ogahiyning qatnashishi tabiiy hol edi. Ammo, romanda adib ikkita tarixiy san'ada bir oz xatolikka yo'l qo'yadi.

Birinchidan, E.Samandar amirzodaning Xivadan madad izlab kelishini 1873 yilning ko'klami bilan bog'laydi. Vaholanki, 1868-yilning kuz faslida Abdumalik to'ra boshchiligida Buxoroda qo'zg'olon ko'tarilgan va istilochilar ko'magida shafqatsizlik bilan bostirilgan edi. To'g'ri, chor Rossiyasining Xivaga hujumi 1873-yilga to'g'ri keladi. Ammo tarixning guvohlik berishicha, o'sha kezda xonlik qo'shinida hammasi bo'lib 27 ta eski zambarak, 2 ming nafar otliq askar, 4 ming navkardan iborat qo'shin bo'lgan [4].

Demak, Xiva xoni amirzodaga ko'mak berishda real imkoniyatlarga ega emasdi. Biroq, Abdumalik to'raning ixtiyoridagi (Bayoniy bergan ma'lumotlarga ko'ra: "... ikki yuz sarbozu bir to'qsoba va bir miqdor otli" [4,23-bet] kuchlar bilan birgalikda harakat qilish mumkin edi. Afsuski, bu imkoniyat ham boy beriladi.

Ikkinchidan, Muhammad Rahimxon II bu paytda romanda keltirilganiday, 29 emas, balki 28 yoshida edi. Yozuvchi uning o'ktam va viqorli qiyofasi, shoirona qalbini ishonchli chizadi. Zotan, o'n yillik mustaqil hukmronlik davri unga shunday vazmin qiyofa bag'ishlagan edi. E.Samandar Abdumalik to'radagi sarkardalarga xos dadillik, davlat arbobiga mos vazminlik, dilbar siyrat, shoirlik sifatlari Feruzxon mavqei va insoniy sifatlariga uyg'un kelishini to'g'ri ilg'agan. Abdumalik to'ra o'z padari qat'iyatsizligi xususida so'z ocharkan, ich-ichdan entikadi, ruhan qiynaladi.

Chunki otasining xatolari haqida so'zlash komil farzand uchun nomunosib ish ekanini u yaxshi biladi. O'z tuyg'ularini sezdirmaslikka har qancha urinmasin, mamlakat g'orat etilgan hamda yurt qayg'usi o'rta tushgan, madad va imdodga muhtojlik sezilgan ijtimoiy-siyosiy vaziyat talabiga ko'ra, shunday yo'l tutishga majbur bo'ladi. Bu hol to'raning chindan ham oriyatli, qat'iyatli va jasur yigit ekani, amir qo'shinidan ajralib chiqqan sardorlaru navkarlar aynan uning atrofida jipslashishi bejiz emasligini ko'rsatadi.

Shuning uchun, xon huzuridagi mashvarat chog'i Ogahiy Abdumalik to'ra qiyofasida: "... yog'iy panjasiga panja urishga qodir bo'lgan sheryurak sarkardani ko'rib uni qo'llamoq zarur"ligi haqida o'ylaydi. Hatto, shoirning dilida: "Bul yigit nafaqat Buxoroning, balki Xorazmning ham, butun Turon zaminning ham najotkorlaridan biri bo'lishi" [2,8-bet] mumkin ekaniga ishonch tug'iladi.

Biroq, amirzodaning shum niyatli mulozimi–Malangxon muhokama yo‘sinini ota-o‘g‘il munosabatlariga burib yuboradiki, buning oqibatida Feruzxon ko‘ngliga shubha qushlari uya qurganini Ogahiy tezda payqaydi. Xonning mavlono so‘zlashiga izn beruvchi ko‘z qarashidan so‘ng, ochiq-oydin so‘zlash o‘rni emasligini sezgan Ogahiy ulug‘ shoir va davlat arbobi sifatida vazminlik bilan muammoning kalitini topib shunday deydi: “Fikri ojizimcha, muammoni ikki bosqichga bo‘lgan holda ko‘rib chiqilsa, foydadan xoli bo‘lmas. Birinchi bosqich amir Muzaffar ila Abdumalik to‘ra oralarinda paydo bo‘lmish anglashilmovchiliklarni yo‘qotishga ko‘maklashishdan iborat bo‘lmog‘i kerak, deb o‘ylaymen. Bu – masalani echishdagi birinchi qadam bo‘lg‘ay. Ana shundin so‘ng, inshoolloh, birgalikda sa’y-harakat qilmoqlikka imkon tug‘ilur.” [2,9-bet].

Yozuvchi Feruzxonning Muhammad Aminxon davrida Buxoro bilan tuzilgan o‘zaro ahil qo‘shnichilik haqidagi bitimni buzib, otasiga sarkashlik qilgan amirzodaga ko‘mak berishni o‘ziga nomunosib ko‘rganini negadir e‘tibordan soqit qiladi.

Bizningcha, Erkin Samandar muammoning badiiy echimini to‘g‘ri topgan. Ya‘ni u muammoni o‘g‘ilning otaga sarkashligi yo‘sinida emas, balki tashqi dushmanga qarshi birlashish imkonlarini izlash tarzida qo‘yadiki, aslida ham ota-o‘g‘il munosabatlariga darz ketishi mohiyatida Abdumalik to‘raning ochiq kurash tarafdori ekanligi yotadi. Anglashiladiki, tarixiy roman hamisha o‘z ichki badiiy mantig‘iga bo‘ysunadi. Unda nainki hayotiy, balki badiiy haqiqat tushunchasi ham faol amal qiladi. Chunki badiiy asar muallif ijodiy tasavvuri – dunyoqarashi, tafakkur va taxayyulidan tashqarida mavjud bo‘la olmaydi. Yozuvchi agar davr imkon bersa, tarixiy shaxs qilishi mumkin bo‘lgan amallarni ham chamalab ko‘rishi, odam va olamni qayta taftish etishi lozim. Shu ma’noda, tarixiy roman konkret muallifgagina tegishli bo‘ladi.

Umuman, tarixiy roman hayot haqiqati ummonidan topilgan, mohirona qayta ishlanib, kitobxonni ishontirish mumkin bo‘lgan tarzda sayqal berilgan va umumlashtirilgan “badiiy tarix”dir.

Foydalanilgan adabiyotlar:

1.Базылова Б.К., Даутова С.Б. Проблема специфики жанра исторического романа и художественного отражения концепции исторической личности // Международный журнал экспериментального образования. – 2021. – № 3. – С. 55-60; [Ковтун Е. Н. Художественный вымысел в литературе XX века.](#) – М.: Высшая школа, 2008; [Хализев В.Е. Вымысел // Литературная энциклопедия терминов и понятий / Гл. ред. и составитель Николюкин А. Н. – М.: Интелвак, 2001.–С.153-156;](#)[Хализев В.Е. Художественный вымысел. Условность и жизнеподобие // Теория литературы. – 4-е изд., испр. и доп. –М., 2004. –С. 103-107; Вымысел художественный // Словарь литературоведческих терминов / Ред.-сост.: \[Л. И. Тимофеев\]\(#\) и \[С. В. Тураев\]\(#\). – М., “Просвещение”, 1974. – С.55-57.](#)

2.Эркин Самандар. Куюн излари ёхуд Огахий. Тарихий роман. – Тошкент, MUMTOZ SO‘Z, 2009. – 252 б.

3. Ўзбекистоннинг янги тарихи, 1ж. [Туркистон чор Россияси мустамлакачилиги даврида], - Т., 2000.

4.Авторханов А.Г. Империя Кремля. –Электронная библиотека RoyalLib.Com, 2010-2023.

5.Баёний. Шажарайи Хоразмшоҳий. Нашрга тайёрловчи, луғат ва изохлар муаллифи И.Адилова. –<https://n.ziyouz.com/> – Б. 23.

¹ 1873 йилнинг 12 августида Хива хонлиги ва Россия империяси ўртасида имзоланган “Гандимиён” “тинчлик битими” га кўра, эндиликда Хива хони рус ҳукуматининг рухсатисиз қўшни давлатлар билан тўғридан тўғри ҳатто дўстона алоқалар ҳам ўрнатиш, савдо ва бошқа ҳар қандай йўналишдаги шартномалар тузиш ҳуқуқидан воз кечишга мажбур қилинади. Бошқача айтганда унга: “Бутунроссия императорининг камтарин хизматкори” эканлиги эътироф қилдирилади.

6.Баёний. Шажарайи Хоразмшоҳий. Нашрга тайёрловчи, луғат ва изохлар муаллифи И.Адилова.–<https://n.ziyouz.com/> – Б. 23-24.

MUSTAQILLIK DAVRI ROMANLARIDA VAQT VA MAKON TALQINI

**Abdulxamidova Xikmatoy Axrorjon qizi
FarDU o‘qituvchisi**

Jahon adabiyotida roman XX asrdan buyon yetakchi janr bo‘lib keldi. Bu janr taraqqiyoti o‘zida millat adabiyotining tafakkur darajasini belgilab beradi. Roman janri taraqqiyoti adabiyotshunoslik uchun muhim sanaladi. Janr taraqqiyoti xususida U.Normatov shunday ta’kidlaydi: “Bashariyat dahosi yaratgan adabiy janrlar orasida eng universali, kanonlarni, milliy chegaralarni tan olmaydigani, betinim yangilanib, o‘zgarib borishga moyili, hamma davrlarda oqimga moslasha oladigani, ayni shu roman janri bo‘lib chiqdi. Romantizm deysizmi, realizm, sotsiorealizm, neorealizm, syurealizm, magik realizm, postrealizm deysizmi, modernizm, postmodernizm deysizmi – barcha adabiy oqimlarda uning namunalarini topish mumkin”[1]. Yuqorida aytilgan xususiyatlarni o‘zida namoyon qilishda zamon va makon muhim vazifa bajaradi. Mustaqillik davri o‘zbek romanlarida tasvir zamoni va makoniga tafakkur zamoni hamda makoni kirib keldi.

Ushbu xususiyatlar makon nisbiyligini o‘zida mujassam qilgan romanlarda aks etdi. Xurshid Do‘stmuhammadning “Donishmand Sizif”ida voqeliklar yuz beradigan makon va zamonsizlik, Ulug‘bek Hamdamning “Muvozanat” romanida aniq zamon va makonda kechgan tasvir makoni va zamoniga xos bo‘lmagan tafakkur egasining tasavvurlari, Isajon Sultonning “Boqiy darbadar” romanida darbadarlik makonlari va zamonlari tasviri qahramonlar tasavvuri hamda muallif tafakkurini ifodalashga xizmat qilgan. Shuningdek, unda mustaqillik davri romanlaridagi umumiy tafakkurning neorealistik romanchilik g‘oyalari ifodalangan.

Demak, diniy tafakkur tarzining erkinligi, mafkuraviy liberallik, ifoda yo‘sinidagi soddalik va jo‘nlik ortiga berkitilgan falsafiylik, ramziylik mustaqillik davri adabiyotiga xos unsurlardan sanaladi. Shunday ekan, avvalgi davr realizmidan farqli o‘laroq, sotsial realistik tasvirlardan shaxs realizmi ehtiyojiga nafi tegadigan tarzda shakllantirilgan fabula va turli g‘oyalardan iborat qurama

kompozitsiyali neorealistik romanlar yaratildi. Shuningdek, ularda umumiy bir g'oya – o'zlikni anglash mavjud. Bunga ijodkorlar sharqona, g'arbona, faqirona va boy tafakkur egalari nigohidan yondashmoqda.

Roman – janr sifatida insonning voqelikka bo'lgan emotsional munosabatini umumlashgan holda ifodalaydigan badiiy estetik hodisa. Badiiy adabiyotning epik turiga mansub bu janr ijodkor estetik idealiga muvofiq tarzda, san'at nazariyasiga ko'ra voqelikni falsafiy-sotsiologik jihatdan tahlil etib o'ziga xos tarzda ifodalaydi. Demak, romanda san'atkor tomonidan idrok etilgan voqelikka bo'lgan estetik baxo, badiiy rejaning amalga oshishi uchun qulay bo'lgan shakl, o'zlashtirilgan mazmunning ifodasi mujassamlashadi. “Roman janr sifatida, bir jihatdan, ijtimoiy tarixiy jarayonlarga, ikkinchi tomondan, esa san'atning ichki dinamikasiga bog'liq tushunchadir. Binobarin, uni ijtimoiy omillargagina bog'lab tahlil qilish durust emas. Zotan, roman taraqqiyotida hamisha ham ijtimoiy omillarga bog'lanavermaydigan ichki tadrij mavjud. Ya'ni uning rivojida san'at taraqqiyotining mustaqilligi qonuniyati ham namoyon bo'ladi”[2]. Ushbu qarashlar romanning biz e'tibor qaratayotgan janrga xos ichki mazmuniy taraqqiyoti bilan bog'liq. Isajon Sulton romanlarida fan, din, mistika, sharqona qadriyatlar, liberal tafakkur bilan bog'liq chizgilar bir nuqtada kesishgan. Bu nuqta – inson obrazi sanaladi. Inson esa dunyoni anglash, o'zlikni anglashga qaratilgan qarashlar negizida badiiy tasvirlash markaziga chiqadi. Mustaqillik davri ijodkorlari Xurshid Do'stmuhammad, Ulug'bek Hamdam, Luqmon Bo'rixon, Isajon Sultonlar qahramonlariga bunda hayotiy tajribalarini tuhfa etish uchun safardan munosib tarzda foydalanadi. Bu ijodkorga istalgan makonga va zamonga sayohat qilish orqali qahramonlarini turli davrlar sinovidan o'tkazishiga zamin hozirlaydi.

XX asr romanlaridan farqli o'laroq qisqa hajmda keng ma'no ifodalash yo'lidan boriladi. Janrning shakliiy taraqqiyotidagi o'zgarishiga munosib hissa qo'shgan mustaqillik davri romanchiligining ilk shakliiy xususiyatlari folklorga borib taqalsa-da, bu davrga kelib (XX asar nazarda tutilmoqda) romanga xos komponentlar shakllanib ulgurgan edi. Roman ilk yaratilishidanoq zamonni yangicha anglash, his qilish yuzaga keldi va rivojlandi. Absolyut o'tmish, afsona, bosqichma-bosqich o'tish masofasi romanning shakllanish davrida hech qanday ahamiyatga ega emas.

Roman aynan epik masofaning yo'q bo'lib ketishi natijasida yuzaga keladi, olam va odamning o'zaro talqin qilinish davrida badiiy tasvir obyektining kechayotgan, zamonaviy voqelik darajasiga tushirish talqini orqali yuzaga keldi. Roman asosida shaxsiy malaka va erkin badiiy to'qima yotadi. Yangi (mukammal) badiiy prozaik roman va yangi mantiqiy asoslangan ilmiy nazariy tadqiqot bir vaqtning o'zida shakllandi [3]. Yuqoridagi tadrij mustaqillik davri romanlarining zamon va makonida aks etadi.

Isajon Sultonning “Boqiy darbadar” va “Ozod” romanlarida kompozitsiya mayda voqeliklarga ajratish va bir syujet chizig'iga ularni uyushtirishda o'ziga xos bo'lgan yo'l va shamol motivlaridan foydalanganligini ta'kidlash mumkin. Romanni bunday mayda qismlarga taqsimlash orqali har bir qismda asarning bosh g'oyasini to'ldirib keluvchi mavzu va g'oyalar tahlil yakunida birlashtirilsa, ular sistem butunlikni tashkil etadi.

Roman voqeliklari real va noreal makonlarda kechadi. Shunday bo'lsa-da ularda inson qismatiga xos muhim holatlar, ma'naviy qiyofalar tasvirlanadi. Yozuvchining zamonaviy romanlari poetik ifodasida kompozitsion mukammallik, global va mental tafakkurning qorishiq ifodasi, kuchli polifonik ruh kuzatiladi. "Har bir yetuk roman o'ziga xos struktur-semantik tizimga ega badiiy fenomen sifatida yaralishini e'tirof etgan holda, aytish lozimki, milliylik janr kompozitsion tarkibi, badiiy tasvir usullaridan ko'ra, ko'proq uning ichki mazmuniga daxldor tushunchadir. Chunki u asoslagan etik-estetik zaminga xos badiiy konseptual mohiyat, universal xronotop qamrovi, umumbashariy mazmun mundarija, syujet va motivlar obrazlarning tabiati shuni taqozo etadi" [4].

So'z va ruh uyg'unligi hamisha badiiy adabiyotning muhim komponentlaridan biridir. Milliy nasr badiiy takomilida so'z va ruh uyg'unligi hamisha o'zining maromida idrok etilgan emas. Yozuvchi voqelikni ifoda qilishda moddiy dunyo o'lchovlari bilan ma'naviy dunyo sarhardlarini birgalikda chizishda yetuk iste'dodga, keng tafakkur ko'lamiga ega bo'lishi zarur. Aks holda, badiiy nasrning ta'sirchanligi yuzaga chiqmaydi. Isajon Sulton "Ozod" romanida ana shu tamoyilda ish ko'radi. Ya'ni o'tgan vaqt saboqlari unga katta manba bo'lib xizmat qiladi. Adibning badiiy chizgilari ikki eshik orasida kechayotgan voqelikni ramzlar tilida hikoya qilganligida qabarib ko'rinadi.

Asar harchand ishq haqida bitilgan bo'lmasin, xilma-xil hodisalarni boshidan kechirgan Ozod roman leytmotivida alohida o'rin egallaydi. "Ozod" romanidagi uch aks tasvirida, shuningdek, "Boqiy darbadar"dagi uchinchi qismdan "Boeng dremliner. Bo'rondan yarim soat avval", "Bo'rondan o'n besh daqiqa avval", "Mezonul-avzon", "Bo'ron" qismlarida vaqtning keskin kengayishini va torayishini uchratishimiz mumkin. Bo'ronga yaqinlashgan sari tasvir quyuqlashadi va vaqt kengayadi. Havo laynerlari tasvirida bevosita o'zaro murosasiz yer yuzi aholisi tasvirlangan xronotop orqali asarning umuminsoniy qimmatini oshiriladi. "Ozod" romani qahramoni so'z vositasi bilan ifodalagan xabardan uning ijodkori ko'nglini anglash sari ildamlaydi. Savobga ilhaq ustozlar Oybek va Mirtemir ruhini shod etish uchun duoga qo'l ochadi. Shu tariqa kitobxon ham ma'no va ishoratlar olamiga kirib boradi. U Ozodga hamroh bo'lib kelayotgan ("aravaga qo'shilgan ot", "ko'zga ko'rinmas arslon", "qarg'a", "kuchuk", "toshbaqa chayon", "popishak", "hudhud", "qumri") tabiati va hayot tarzi turfa xil bo'lgan majozlarga yashirin ma'nolar haqida o'ylay boshlaydi. Shunda Isajon Sulton ishora qilayotgan "yog'ochlari baquvvat, g'ishtlari pishiq uy" adabiy meros qarshisidan chiqib qolganini angelaydi. Yuqoridagi majozlar kitobxonni xalq og'zaki ijodidan Navoiy va Gulxaniygacha cho'zilgan bebaho olis meroslar sari boshlaydi" [5].

Bularni tasvirlashda o'ziga xos zamon va makon tanloviga to'g'ri erishgan yozuvchi ularni tartibli tarzda shunday joylashtiradiki, biri ikkinchisini to'ldirib sistem-struktur ramzlar butunligiga aylanadi. Bu roman struktur butunlik sifatida "uch aks" zamoni va makoniga, ular o'zining boshqa mayda tarkibiy qismlari zamoni hamda makonini o'zida mujassam etadi. Romanga qamrab olingan zamon va makon makro xronotopni, akslarning tarkibiy qismlarida uchraydigan zamon va makonlar esa mikro shaklini ifodalaydi.

Romanda uchraydigan mikro xronotoplardan biri qishloq toposida kechadi. Bu xronotop birinchi aksda o'ziga xos tarzda namoyon bo'ladi. Ota qismatining bolada aks etish jarayoni hamda taqdiridagi baxt gulini topish ilinjida toqqa sayohat qilishga yo'naltirilganligi shular jumlasidandir. "Birinchi aks"ning ilk hikoyasida "Shamol" obrazi haqida so'z boradi. Ya'ni, yozuvchi voqelik va undan keyin sodir bo'ladigan hodisalarni shu yerda bir-biriga bog'laydi. "Shamol Ozodning hamrohiga qanday aylanib qoldi?", – degan savolga ana shu yerda javob topish mumkin. "Birinchi aks"da Shamol obrazi avval bulutlarni haydab keluvchi tabiatning bir hodisasi sifatida ifodalanadi. Shamol – moddiylashuv jarayonidan – ma'naviy bir xilqat tomon evriladi. "Ozod" romanida hayotning qarama-qarshiliklarida o'zligini anglash sari qat'iy odimlayotgan Ozod tafakkurining zamon va makonda akslanishi ko'zda tutiladi.

U har bir hodisadan keyin – bir xulosa chiqarib boradi. Mazkur jarayonda ko'zga ko'rinmas – Shamol obrazi yordamga keladi: "U lola o'sha bulutlar chiqib kelgan joyda o'ssa kerak, deb xayolidan o'tkazdi Ozod. Shamol paydar-pay epkin urmoqda, loyqaga qorishgan o't-o'lan isini dimoqqa tutmoqda edi. Yo'l aniq: Uchyong'oqdan oshib o'tilsa, undan narida Tuz cho'liyu Oydinko'l bor. Oydinko'ldan ham narida yaydoq biyobon, biyobon ortida esa toshloqlar yastanib yotadi. Keyin tog'u tosh boshlanib ketadi, yanayam ichkariroqda, ikki tog' orasida sip-silliq baland qoyalar bo'y cho'zgan, o'sha qoyalarning eng tepasiga chiqib borilsa bas. "Tushgacha yetib boraman, cho'qqilarga chiqib-tushgunimcha yana bir oz vaqt o'tsa, shomga qadar izimga qaytsam kerak", deb o'yladi Ozod. Shu mahal daraxtlarning barglarini shitirlatib shamol esib o'tdi-da, qarshisidagi tuproq yo'lning changini to'zg'ita boshladi [6].

Yuqorida keltirilgan parchada lola o'sgan makon xususida so'z boradi: "Tasavvuf adabiyotida lola mushohada natijasida hosil bo'lgan ma'rifat ma'nosini anglatadi. Shuningdek, orif insonning qalbi ham lolaga o'xshatiladi. Lola so'zi arab yozuvida Alloh so'zi bilan o'xshash bo'lganligi uchun ba'zi holatlarda Hudo ma'nosida ham qo'llanadi" [7].

Asar qahramoniga maqsad sifatida tanlangan lola moddiy baxt guli ma'nosidagina emas, Ozodning oriflikka ma'rifat, adabiy asarlar va ularni yaratgan ijodkorlarning tajribalari, shuningdek, ma'naviy quvvati orqali erishish mumkinligini ko'rsatib beradi. U o'sgan makon "bulutlar chiqib kelgan joy" esa Lola chindan ham makoni osmonlar ustida bo'lgan Alloh va uning visoliga erishish yo'li, shuningdek, unga erishishning maishiy makondagi aksi sifatida talqin etilgandek tuyiladi. Turli davrlarda turli mafkuralar ta'sirida din va unga munosabat "loyqaga qorishgan o't-o'lan isini dimoqqa tutmoqda edi" tasvirida yana-da oydinlashadi.

"Tushgacha yetib boraman, cho'qqilarga chiqib-tushgunimcha yana bir oz vaqt o'tsa, shomga qadar izimga qaytsam kerak" Isajon Sulton asarlarida kun qismlarini namoz vaqtlari nisbati orqali ifodalash yetakchilik qilgani holda Ozodning safar vaqti (tongdan yo'lga chiqqani anglashiladi) "tush"dan "shom" gacha belgilanmoqda. "Tush so'zi o'zbek tilining izohli lug'atida birinchi ot ma'nosini anglatganda Tush- uyquda vujudga keladigan subyektiv psixik hodisa, jarayon; uyquda ko'riladigan obrazlar, narsalar" [8] ikkinchisida esa

“Quyosh qoq tepaga kelgan payt” [9] ma’nolari keltiriladi. Ijodkor bu ikki mazmunni anglagani holda omonimiyaga amal qilib so‘z o‘yinidan foydalanadi.

Bu o‘rinda “Tushgacha yetib boraman” iborasi nafaqat tushni – vaqt ma’noli birlik sifatida ifodalaydi, balki uzoq vaqtni, shuningdek, sarhadsizlikdan qisqa vaqt ulushi yordamida tez kezishi mumkinligini ifodalay oladigan “tush” sifatida aks ettiradi. Bu qisqa kun qismlaridan unumli foydalanish uchun shamolning hamrohligi yanada vaqtni kengaytirishga erishadi. “Yozuvchi yuz berishi jihatdan bir paytga to‘g‘ri keladigan voqealarni navbati bilan tasvirlashi ham mumkinki, bu epik asarlarda “badiiy vaqt” imkoniyatlarining ancha kengligini ko‘rsatadi. Asarning “syujet vaqti” fabuladan farqli ravishda asosiy syujet chizig‘idagi voqealar yuz berish vaqti bilan belgilanadi. Shu chiziqdagi voqea bilan bir paytda syujet chizig‘ida kechayotgan voqea esa shartli ravishda “parallel vaqt”da deb hisoblanadi”.

Isajon Sulton romanlarida esa asosiy syujet chizig‘idagi voqealar vaqt mezonlarini tark etib, qisqa vaqt ulushi orqali nisbiy fursatda uzoq davom etishi mumkin bo‘lgan vaqtni o‘zida mujassamlashtiradi. Yozuvchi ifodalagan badiiy vaqtda mavjud bo‘lgan shartlilik syujet va kompozitsiyaning uzluksizligini (diskertiklikni) ta‘minlaydi. Ijodkor romanlarida shuning uchun alohida o‘qilsa alohida mazmun beradigan bir nechta voqeliklar shartlilik asosida yagona nom ostidagi romanga birlashadi. Ular shunday tartibda joylashtiriladiki, bir-biridagi g‘oyalarni to‘ldiradi, shakllantiradi.

Adabiyotlar ro‘yhati:

- 1.XX asr ўзбек адабиёти масалалари. –Т., Фан, 2012. 32-б.
- 2.Ёкубов И. Мустақиллик даври ўзбек романлари поэтикаси: монография. –Т., Nurafshon business, 2021. – 361 б.
- 3.Пардаева З. Ҳозирги ўзбек романчилигининг тараққийёт тамойиллари. –Т., 2003. 48-б.
- 4.Ёкубов И. Мустақиллик даври ўзбек романлари поэтикаси: монография. –Т., Nurafshon business, 2021. – 255. б
- 5.Абдулҳамидова Х. Исажон Султоннинг “Озод” романида акс хронологи. Хива, Хоразм маъмун академияси ахборотномаси. 2021. 3-сон. 6-бет.
- 6.Исажон Султон Асарлар: Роман ва қиссалар. –Т., F.Ғулом. 2017. 221.
- 7.Д.Мингбоева. Тимсоллар тилсими. –Т., Адабиёт, 2022.
- 8.Ўзбек тилининг изоҳли луғати. – Т.: Ж. III. Е – М. O‘zbekiston, 2020 .
- 9.Quronov D. Adabiyot nazariyasi asoslari. –Т., Akademnashr, 2018.

MUMTOZ ADABIYOT – YANGI O‘ZBEK SHE’RIYATI TAKOMILINING ASOSI

Tajibaeva Latofat Farxodovna
filologiya fanlari bo‘yicha falsafa doktori (PhD)
Qoraqalpoq davlat universiteti o‘qituvchisi

Yangi o‘zbek she’riyati rivoji va badiiy takomilga erishuvida mumtoz adabiyot har bir jihatdan badiiy manba vazifasini o‘tadi. Zero, yangi o‘zbek

she'riyati mumtoz adabiyot an'analari negizida o'ziga mos poetik shakl va mazmunda namoyon bo'la boshladi va buning uchun bir qancha ijodiy bosqichlarni bosib o'tdi. Bu bosqichlarni quyidagicha tasnif etish mumkin:

she'riyatning mumtoz adabiyotga xos vazn va shaklni saqlagan holda yangilana borishi; an'anaviy poetik obrazlarga yangi mazmun va g'oyalar yuklanishi; mavjud poetik janrlar ijtimoiy masalalar ifodasiga yo'naltirilishi; badiiy til va ifoda uslubining xalq ruhiyatiga yaqinlashuvi.

She'riyatning mumtoz adabiyotga xos vazn va shaklni saqlagan holda yangilana borishi. Yangi o'zbek she'riyati mumtoz aruz negizida takomilga erishgani kuzatiladi. Aruzdan barmoqqa o'tish jarayonida dastlab ushbu vaznda yozilgan g'azallar grafik shakllanishi orqali kechdi. Ya'ni g'azal aruzdagi kabi bayt emas, xuddi barmoqdagi kabi band (kuplet) ko'rinishida yozila boshladi. G'azalning grafik jihatdan banday shakllantirilishi amalda barmoqqa o'tish uchun tayyorgarlik bosqichi bo'ldi. Masalan, Cho'lponning "Ko'ngil she'ri" quyidagi bandi grafik shakllantirilishi ushbu fikrni tasdiqlaydi:

Tiriksan, o'lmagansan,
Sen-da odam, sen-da insonsan,
Kishan kiyma,
Bo'yin egma,
Ki, sen ham hur tug'ilg'onsan!

Ushbu she'r aslida aruzning hazaji musammani solim vaznida yozilgan. Taqti'si quyidagicha:

Mafoiylun mafoiylun mafoiylun mafoiylun
V - - - / V - - - / V - - - / V - - -

Agar bayt shaklida yozilsa, ijtimoiy mazmunni istisno qilganda, aynan mumtoz g'azal ko'rinishiga ega bo'ladi. Lekin Cho'lpon yangilikka intiladi. Mumtoz aruz ohangini saqlagan holda she'r misralarini barmoq vazni suratida shakllantiradi. Misralarni sindirish orqali poetik mazmunga alohida urg'u beradi. "Tiriksan, o'lmagansan" so'zlarining alohida satrda berilishi, "Sen-da odam, sen-da insonsan" jumllalarining maxsus qatorga joylanishi, "Kishan kiyma", "Bo'yin egma" birikmalarining sinq satrlar holida keltirilishi, "Ki, sen ham hur tug'ilg'onsan!" xitobiga urg'u qaratilishi – barchasi shoir ijodiy niyatidan kelib chiqib, aniq badiiy-estetik maqsad asosida amalga oshirilgan. Natijada she'rning grafik shakllantirilishi 4+4 turoqli barmoq vazniga muvofiqlashtirilgan. Misralar sindirilishi natijasida mazmunning ta'sir kuchi bir necha baravarga oshirilishiga erishilgan.

An'anaviy poetik obrazlarga yangi mazmun va g'oyalar yuklanishi. Yangi o'zbek she'riyati vakillari mumtoz adabiyotdagi obrazlardan unumli foydalanish barobarida an'anaviy obrazlar mohiyatini yangilagani kuzatiladi. Mumtoz she'riyatda faol qo'llangan obrazlar bu davrga kelib, tamomila yangi mazmun kasb eta boshladi. Obraz jamiyatning qiyofasini, Vatan va millat boshiga tushgan kulfatlarni, ijtimoiy holatni yoritishga xizmat qila boshladi. Endi ular mumtoz an'analardan farqli yangi mazmun-mohiyatni ifodalay boshladi.

Oy, *quyosh* kabi an'anaviy obrazlar mumtoz she'riyatda o'ziga xos poetik ma'no ifodalagani ma'lum. Jumladan, "G'aroyib us-sig'ar" devonida hazrat Alisher Navoiy mana bunday yozadi:

Boqqach quyosh ruxsorig'a andin qilurmen ko'z yoshi

Kim, ul musofir oyima husn ichra bas monand erur.

Quyoshga tik qarab bo'lmaydi. Agar qaralsa, uning zarrin nurlari ta'siridan ko'z yoshlanadi. Ana shu hayotiy hodisani tamsil etgan buyuk shoir buning sababini quyoshning musofir oyga – safardagi yorga o'xshash ekani bilan izohlaydi. Mumtoz she'riyatdagi husni ta'lil san'atining betakror namunasi bo'lgan ushbu baytda quyosh – mahbubi haqiqiy, oy – majoziy ma'shuqa timsolini ifoda etib kelgan.

"Navodir ush-shabob"ning 205-g'azalida yulduz obrazi mana bu tarzda ohorli ifodalangan:

Bas ettim ashkfishonlig' chu zohir etting yuz,

Nechukki mehr ko'ringach, nihon bo'lur yulduz.

Ulug' shoir baytda: yor yuzini ko'rsatganda, ko'z yoshlarim sochildi, bu xuddi mehr, ya'ni quyosh ko'ringach, yulduzlarning nihon bo'lishiga o'xshaydi, degan fikrni go'zal badiiy tasvir orqali ifodalagan. Ushbu baytda yor yuzi quyoshga, oshiq ko'z yoshlari esa yulduzga tashbeh etilgan.

Oy, *quyosh*, *yulduz* obrazlari mumtoz adabiyotda ana shunday poetik mazmunni ifodalab kelgan. Yangi zamon she'riyatida bu obrazlarga ijtimoiy ma'nolar yuklana boshladi. Obrazlarning ijtimoiy ma'no ifodalashi adabiyotning ijtimoiyligi asnosida ramziyligini ham kuchaytirdi. Shuni alohida ta'kidlash joizki, bu jarayon adabiyotning badiiyatiga salbiy ta'sir ko'rsatmadi. Yangi o'zbek she'riyati o'zining badiiyati yuqoriligi, tafakkur kashfiyotining betakrorligi bilan alohida ajralib turadi. Bu holatni yangi o'zbek adabiyotidagi har bir shoir ijodida kuzatish mumkin.

Ushbu misollar tahlilining o'ziyoq yangi o'zbek she'riyatidagi poetik obrazlar takomilida mumtoz adabiy an'analar o'ziga xos badiiy-estetik omil vazifasini o'tagani, bu davr she'riyatida obrazlar mumtoz obrazlar negizida shakllangani isbotidir.

Mavjud poetik janrlar ijtimoiy masalalar ifodasiga yo'naltirilishi. Yangi o'zbek she'riyati janrlar takomilida ham mumtoz adabiyot xazinasiga tayandi. Endi ijodkorlar mumtoz adabiy janrlarga ham davr talabidan kelib chiqqan holda Vatan va millat hayotidagi murakkab va ziddiyatli voqelik mohiyatni singdira boshladi. Bu hol dastlab Muqimiy, Furqat, Zavqiy, Komil Xorazmiy, Avaz O'tar singari shoirlar ijodida kuzatiladi. Jumladan, Ubaydulla Zavqiy "Ko'z ochaylik" radifli muxammasida mana bunday yozadi:

Fursat g'animat, ahhob, millatga ko'z ochaylik!

Sa'y ila jonu dilda himmatga ko'z ochaylik!

Dinu diyonat istab, g'ayratga ko'z ochaylik!

Haq amri farz birla sunnatga ko'z ochaylik!

Umr o'tdi g'aflat ila ibratga ko'z ochaylik!

Avvalo, muxammas uchun tanlangan radifga diqqat qaratilsa, unda milliy uyg'onish adabiyotining asosiy mohiyati aks etgani kuzatiladi. Qofiya bo'lib

kelgan millatga, himmatga, g'ayratga, sunnatga, ibratga so'zlari tashigan ijtimoiy mazmun bu she'ning mumtoz muxammaslardan keskin farq qilishini ko'rsatadi. Demak, mumtoz she'riy janr o'zgacha ma'no kasb etyapti. Unda milliy uyg'onish, dinu diyonat va Haq amrini baland tutish g'oyasi betakror badiiy talqin etilgan.

Badiiy til va ifoda uslubining xalq ruhiyatiga yaqinlashuvi. Yangi o'zbek she'riyati mumtoz adabiyot an'analari asnosida taraqqiy topayotgan bir davrda til, uslub, mavzuning ham mumtoz adabiyot ta'siri negizida yangilanishi jarayoni kechdi. Davr ruhi va talabidan kelib chiqqan holda, badiiy til va ifoda uslubi o'zgarishga yuz tuta boshladi. Ammo ular to'raligicha mumtoz adabiyot an'alaridan xoli emas edi. Furqatning "Vistavka xususida" she'rida yuqorida qayd etilgan barcha xususiyatlar o'z aksini topgani kuzatiladi. She'ning nomlanishiga e'tibor qiladigan bo'lsak, yangi o'zbek she'riyatiga xos bo'lgan zamonaviylik ko'zga tashlanadi. Davr talabidan kelib chiqqan holda vistavka masalasiga munosabat bildirish uchun yozilgan she'r bog' tasviri bilan boshlanadi:

Ajab bog'iki, ruhafzo havosi,
Eram rashki nasimi jon fizosi.
Oqib har soridin obi ravonlar,
Edi andog'kim ul jism ichra jonlar.
Muattar bog' sahni ochilib gul.
Tomoshobinlar erdi anda bulbul.

Garchi mavzu ma'rifatchilik adabiyoti uchun xos bo'lsa-da, she'ning masnaviy tarzida qofiyalanish tizimi, vazni, til unsurlari, ifoda tarzi, obrazlar tizimi mumtoz she'riyat an'alarini yodimizga soladi. Bu she'rni tahlil etar ekan, adabiyotshunos Ulug'bek Hamdamov ham vistavka o'tkazilayotgan bog' tasviri mumtoz she'riyatdagi jannat bog'chalari tasviriga monand ekanligini, tasvir realistik emas, aksincha an'anaviy uslubga mos kelishini yozadi. Bu asarning tili va uslubini tahlil etib, shunday fikrlar bildiradi: "Birinchi parchada arab-fors tillaridan o'zlashgan so'zlar ko'proq bo'lsa, keyingi parchalarda sof o'zbekcha va rus tilidan o'zlashgan so'zlar ko'proq. Ya'ni birinchi parcha an'anaviy she'r tiliga, keyingilari jonli so'zlashuv tiliga yaqin. Shu sabab ham birinchi parcha aruziy ohangda tabiiy o'qiladi, keyingilarining o'qilishida bir qadar sun'iylik seziladi. Buning sababini, menimcha, ifodalash ko'zda tutilgan yangicha mazmunning mavjud shaklga muvofiq emasligi bilan izohlash kerak. Mazmundagi o'zgarishlar esa, hayotdagi o'zgarishlar bilan, davrning ijtimoiy kayfiyati bilan bog'liqdir. Aslida, davr ruhi eng avval tilda aks etadi. Shu jihatdan qarasak, jadid she'riyatida tilning xalqchillashuvi barmoq tomon siljishning eng muhim sababi sifatida ko'rsatilishi mumkin. Zero, yuqorida Furqat, Muqimiy asarlarida ko'rilgan an'anaviy she'riyat tilidan chekinib, jonli tilga yaqinlashish tendensiyasi jadidchilik davriga kelib kuchaydi, jadid she'riyati uchun anglangan ijodiy prinsip bo'lib qoldi"[1,75].

Tavallo she'riyatida ham til va uslub xalqchil ekani bilan xarakterlanadi. "Jahon ayvonda bizdek..." sarlavhali she'ri ayni xususiyati bilan qimmatlidir:

Jahon ayvonida bizdek badan afgor yo'x, yo'x, yo'x,
Bilurga bu badan afgorni hushyor yo'x, yo'x, yo'x.
Netay qon yig'lamay, do'stlar, jahonda biz kabi bormu,

Aromizda bizing bir voqifi asror yo‘x, yo‘x, yo‘x.

Avvalo, xalqona takror so‘zlardan iborat “yo‘x, yo‘x, yo‘x” radifi tanlangani, ikkinchidan ifoda uslubining soddaligi hazaji musammani solim vaznida yozilgan g‘azalni millat ruhiga yaqinlashtirgan. “Netay qon yig‘lamay” – odatda, ilojsizlik vaziyatini ifodalaydigan bu ibora, birinchidan, ayni o‘zbek xalqining tabiatiga mos ekani bilan xoslanadi, ikkinchidan, shoir ijodiy niyatini ta’sirli aks ettirishga xizmat qiladi.

Hama o‘z boshiga ovvora, millatga nazar qilmas,
Milliyat hislari bizda, ko‘rung miqdor yo‘x, yo‘x, yo‘x.
Desam dunyoda bizdek ortda qolg‘on bormu millatdan,
Bu Turkiston elidin topmadim iqror yo‘x, yo‘x, yo‘x.

Millatning o‘z-o‘ziga tanqid ko‘zi bilan qaray olishi – muhim xususiyat. YAngi o‘zbek she’riyati ana shu xususiyatni tajassum etgani bilan ham alohida ahamiyatga ega. Tavalloning ushbu she’ri ayni fazilatga ega ekani jihatidan muhimdir. Shoir adabiy-estetik ideali millatni ozod va mutaraqqiy holda ko‘rish bo‘lgan. Buning uchun unga taraqqiyotdan ortda qolishiga sabab bo‘layotgan illatlarni ta’kidlab ko‘rsatmoq muhim edi.

Ma’lum bo‘ladiki, yangi o‘zbek she’riyatida an’ana va yangilanish jarayoni bir-birini taqozo etdi va uzviy bog‘liqlikda kechdi. Mumtoz adabiyot an’analari yangi o‘zbek she’riyatining taraqqiy topish jarayonida asosiy adabiy-estetik zamin vazifasini ado etdi.

Foydalanilgan adabiyotlar:

- 1.Хамдамов У. XX аср ўзбек шеърляти бадий тафаккур тадрижининг ижтимоий-психологик хусусиятлари. Филол.фан.д-ри. дисс. – Тошкент, 2017. Б.75.
- 2.Тожибоева М. Жадид адиблари ижодида мумтоз адабиёт анъаналари: Филол. фан.д-ри. дисс. – Тошкент, 2018.
- 3.Чўлпоннинг бадий олами / Масъул муҳаррир: Каримов Н. – Тошкент, Фан, 1904.
- 4.Каримов Н. XX аср адабиёти манзаралари. – Тошкент: Ўзбекистон, 2008.

MATNAZAR ABDULHAKIM SHE’RIYATIDA NAVOIYONA RUH

Abdusalomova Kumush
Alisher Navoiy nomidagi Toshkent davlat
o‘zbek tili va adabiyoti universiteti
mustaqil tadqiqotchisi

O‘zbek adabiyotida ko‘pgina shoirlarning kamolotida Alisher Navoiy ijodining ta’siri beqiyos. Hazrat Alisher Navoiyning ijodiy merosi barcha turkiy xalqlarning bebaho ma’naviy xazinasidir. Adabiyotshunos olim Abdurasul Eshonboboevning “Navoiy ijodi va adabiy ta’sir” maqolasida bunday deyiladi: “Alisher Navoiy ijodi Sharq adabiyotining boy adabiy an’analari zaminida maydonga keldi va o‘z navbatida keyingi davr adabiyoti rivojiga samarali ta’sir

ko'rsata oldi. Ma'lumki, Navoiy nafaqat o'zbek tilida, balki forsiy tilda ham salmoqli (forsiy tildagi taxallusi Foniyy) meros qoldirgan". ["Sharq yulduzi", 4:29]

Iste'dodli o'zbek shoiri Matnazar Abdulhakim ijodida Hazrat Alisher Navoiyning ta'siri bo'rtib ko'rinadi. Bu albatta shoirning olis bolaligiga borib taqaladi. Matnazar Abdulhakim bolaligi haqida bunday eslaydi: "Men adabiyotimizning mumtoz namoyandalari asarlari mutolaasini otam yordamida juda barvaqt boshlaganman. Otamning hamsaboq do'sti – Xorazm adabiy muhitida sezilarli ovozga ega bo'lgan aruzchi shoirlardan Orzu domla, Mahbubiy domlaning muntazam tashriflari, otam mulla Abdulhakimdan olgan saboqlarim ham beta'sir o'tmagan. Otam arab, fors tilidagi diniy kitoblarni mutolaa qilishdan tashqari, she'riyatning ulkan muxlisi, Navoiyfahm inson edilar". [M.Abdulhakim, 2:87]

Har kim ham o'z otasi haqida ishonch bilan Navoiyfahm inson edi, deya olmasa kerak. Sababi yuqorida ta'kidlaganimizdek, Navoiy ijodiy merosini bor bo'yi bilan anglash, fahmlab olish oson emas. Zabardast shoirimiz Matnazar Abdulhakim ne baxtki mana shunday oilada tarbiya topdi, mana shunday adabiy muhitda kamolga etdi.

Hazrat Alisher Navoiy ijodiy ummonidan shoirning qanchalik qonib ichgani haqida fikr yuritishga harakat qilib, Matnazar Abdulhakim ijodiga Alisher Navoiyning ta'siri quyidagi yo'nalishlarda kuzatildi:

1. M.Abdulhakimning Alisher Navoiyga bag'ishlab yozilgan she'rlari.
2. Navoiy asarlarining mazmun va g'oyasi ta'sirida yozilgan she'rlar.
3. Navoiy she'rlariga ishora qiluvchi misralar.
4. SHoir asarlari qahramonlari nomi orqali fikr va tuyg'uni ta'sirchan ifodalash.

Matnazar Abdulhakimning Alisher Navoiyga bag'ishlab yozilgan she'rlari talaygina. Navoiyga bo'lgan yuksak mehr-muhabbatini, ehtiromini do'sti Xurshid Davronga atab yozgan "Da'vat" she'rida yaqqol ko'rishimiz mumkin.

Ne kerak zaminni titratmas surur,

Ko'kni zir titratmas ohni netamiz.

Ko'p ham davronnishin bo'lavermay, yur,

Hazrat Navoiyga ketamiz. [M.Abdulhakim, 1:94]

Matnazar Abdulhakimning do'stiga bu taklifni berishi bejiz emas. Shoir o'zining ta'biri bilan aytganda, Navoiyga ketishni uddalagan shoirlardan, uning ijodiy merosini to'la anglash va tadqiq qilish baxtiga muyassar bo'lgan ijodkorlardan. Matnazar Abdulhakim Navoiy ijodiy merosini, mutolaasini qadrlab, hayajon bilan "Jo'naymiz, do'stginam, yuksak bir baxtga" deydi. [M.Abdulhakim, 1:121]

Shoirning "Da'vat" she'riga mazmunan yaqin turadigan yana bir she'ri "Navoiyni o'qib" she'ridir:

Ming mashaqqat bilan chiqdim men,

Qirq yil chirmashdim bu cho'qqiga.

"Shoirmassan. Tushaver qaytib!"

Shunday bo'ldi hukm – o'qilgan.

Tegramga bir boqdim yutoqib

Dunyo ko'rib olmoq g'amida,

Erga qaytib tushmog'im uchun

Yana qirq yil kerak... kamida. [M.Abdulhakim, 1:176]

Matnazar Abdulhakim Alisher Navoiy ijodini yuksak cho‘qqiga mengzamoqda. Bu cho‘qqiga qirq yil davomida chirmashib chiqib olgan shoir Navoiy dahosining oldida o‘zini yupun his qilib, o‘zi haqida “shoirmassan” degan xulosaga keladi. Darhaqiqat, Navoiyni anglagan ijodkor, tadqiqotchi borki, uning haybati oldida o‘zini ojiz, mayda his qiladi. Shoir she‘r yakunida bu cho‘qqidan tushish uchun yana qirq yil kerakligini ta’kidlaydi. Demak, u butun atrofga, hayotga, boshqa barcha ijod namunalariga ham mana shunday balandlikdan, yuksaklikdan qaraydi, baho beradi.

Hazrat Navoiy asarlarining mazmun va g‘oyasi ta’sirida yozilgan she’rlar Matnazar Abdulhakim ijodida yaqqol ko‘zga tashlanadi. Misol uchun “Mahzun un chekadi nay yoralari” she’rida “Navolar chorasizlik choralari” degan satrga ko‘zimiz tushadi. Demak, shoir chorasiz, ilojsiz qolganda bir choraga – navo qilish, kuylash, ya’ni ijod qilish, yozishga tayanadi. Chorasizlikning chorasini topganday bo‘ladi. Ushbu satrni o‘qib, beixtiyor Navoiyning ushbu baytini esga olamiz:

Navoiy, choradin ko‘p dema so‘z kim,
G‘amingga chorasizlik chora bo‘lmish.

Ko‘rib turganingizdek ikkala holatda ham lirik qahramonga chorasizlik chora bo‘lib tuyilmoqda. Matnazar Abdulhakim Hazrat Alisher Navoiy ijodini muntazam o‘quvchi ijodkor sifatida mana shu baytdan ilhomlangan bo‘lishi ham mumkin. Navoiyning hayot falsafasi va xulosalari Matnazar Abdulhakimga yuqqanining guvohi bo‘lamiz.

Matnazar Abdulhakim bir g‘azalida ma’shuqasiga qarata “Elim ichra musofirman, xayoling yor, vatan bo‘lsin”, - deydi. SHu o‘rinda “Farhod va Shirin” dostonidagi Farhod va Xusravning suhbat yodimizga tushadi.

Dedi: qaydinsen ey, majnuni gumrah?

Dedi: majnun vatandin qayda ogah.

Demak, oshiq hamisha boshqalar oldida o‘zini begonadek, musofirdek his qiladi. Unga yor va uning xayoli vatan bo‘lishi mumkin. Alisher Navoiyning quyidagi qit’asi barchaga birdek tanish. Ba’zilar uning muallifi kimligini bilmasa ham, ammo ko‘p marta eshitgan.

Kim, kuchuk birla xo‘tukka necha qilsang tarbiyat,
It bo‘lur, dog‘i eshak, bo‘lmaslar aslo odami.

Matnazar Abdulhakimning “Bashorat” sarlavhali she’rida ushbu xulosaga duch kelamiz:

Sen kuchuk emassan, emassan xo‘tik,

Sening kelajaging boshqacha. [M.Abdulhakim, 1:211]

Shoir “Bashorat” she’rida yosh avlodning (yoki aynan bir imsaning) inson bo‘lib etishishiga komil ishonch bilan qaraydi. Ularning kelajagidan umid qiladi.

Hazrat Alisher Navoiy baytda sharq badiiy san’atlaridan tardi aks (qaro ko‘zum va ko‘zum qarosida), tajnis san’atidan (mardum va mardumlig‘) unumli foydalangan. Ushbu g‘azal to maqtagacha bizni shunday hayratlantirib, ma’nolar xazinasini sari tortib boraveradi. “Qaro ko‘zum” nafaqat Navoiy g‘azaliyotidagi, balki mumtoz adabiyotdagi eng betakror g‘azallardan biridir. Shoir haqli ravishda

“Etimologiya lug‘ati” she’rida yo‘qolib borayotgan so‘zlar ustida aynan ushbu g‘azal yangrashi kerak degan xulosaga kelgan. Bu shoirning Hazrat Alisher Navoiyga bo‘lgan cheksiz ehtiromi hamda o‘zbek adabiy tilining asoschisi sifatida Navoiyni ko‘rishidan dalolat beradi.

Matnazar Abdulhakim Navoiy asarlari qahramonlari nomi orqali fikr va tuyg‘uni ta’sirchan ifodalashdan samarali foydalangan. Shoir she’rlarini varaqlab, bu kabi nuqtalarga, kesishmalarga guvohi bo‘lamiz. Fikrlar, ifodalar mutanosibligi yaqqol ko‘zga tashlanadi. Shuningdek, Navoiy tomonidan “Xamsa” dostonida ishlatilgan obrazlar va timsollarni Matnazar Abdulhakim ijodida ko‘plab uchratishimiz mumkin. Misol tariqasida keltiradigan bo‘lsak:

Mening Layliyu Shirin o‘rnida sen sarvinozim yo‘q,
Na Farhodga, na Majnunga, iloj qancha, qiyosim yo‘q.

[M.Abdulhakim, 1:298]

Sizni sevib bo‘lar, tushunib bo‘lmas,
Majnundek telbasiz, Suqrotdek aniq. [M.Abdulhakim, 1:283]

Oqil ey hamrohlarim, kirmoqdaman Qays qavmiga,
Ortga qayting endi siz, bu yoqda sahro boshlanur.

[M.Abdulhakim, 1:295]

Qaydan olsin har kun Farhod-Shirinni,
Layli va Majnunni qaerdan olsin?! [M.Abdulhakim, 1:325]

Yuqoridagilarni o‘qib, Matnazar Abdulhakim ushbu satrlarda keltirilgan qahramonlar bilan xuddi yaqin tanishdek, ular bilan har kuni ko‘rishadigan, uchrashadigandek xulosa uyg‘onadi.

Bir so‘z bilan aytganda, Matnazar Abdulhakim mumtoz adabiyot an‘analariga tayanib o‘ziga xoslik yarata olgan shoirdir. Shuningdek, Matnazar Abdulhakim bugungi badiiy-falsafiy lirikamiz rivojiga munosib hissa qo‘shgan shoirlardan. Uning ijodi, hikmatga yo‘g‘rilgan qarashlari mazmunan teranligi bilan ajralib turadi. Bu bebaho ma’naviy boylik zavol topmasligiga ishonamiz.

Foydalanilgan adabiyotlar:

- 1.Матназар Абдулҳаким. Танланган асарлар 1. – Т.: Ғафур Ғулом, 2017.
- 2.Матназар Абдулҳаким. Мангулик жамоли. – Хива: Хоразм Маъмун Академияси нашриёти, 2009
- 3.Матназар Абдулҳаким. Фасллар кўшиғи. – Т.: Ғафур Ғулом, 1986.
- 4.“Шарқ юлдузи” журнали, 2016 йил, 9-сон
- 5.Matyokubova, T., & Yakubov, I. (2020). Laboratory works of Gafur Gulam: poetic image and imagery. Journal of critical reviews, № 7, pp. 28-37.
- 6.Matyokubova, T. Poetic imagery of nature // Theoretical & Applied Science, 2023. 02 (118), 521-524
- 7.Yakubova S. The issue of «way» in cholpon's poetry. ISJ Theoretical & Applied Science. . 2023. 02 (118), 490-492
- 8.Yakubov I. A. Real and artistic truth in the poem “Black sun” / Aktualnye problem tyurkologii: Rossiya i tyurko-musulmanskiy mir. Kazan . 2021. pp.211-213.

9.Yakubov, I. “Boburnoma” - o‘zbek nasrining nodir yodgorligi. “Zahiriddin Muhammad Boburning Sharq davlatchiligi va madaniyatida tutgan o‘rni” mavzusidagi xalqaro ilmiy-nazariy konferensiya materiallari, Toshkent, 2023. pp.174-179.

10.Yakubov, I. Artistic interpretation of the drama of moral and spiritual problems in the tragedy “Romeo and Juliet”. ISJ Theoretical & Applied Science. . 2023. 02 (118), 517-520

11.(<https://khdavron.uz/kutubxona/multimedia/matnazarabduhlikim-bedil>)
2022 йил 19 февраль

G‘AFUR G‘ULOMNING “SHUM BOLA” QISSASIDA SHARQ BOZORI TASVIRI

Boltaeva Lobar

ToshDO‘TAU 2- kurs magistranti

G‘afur G‘ulomning “Shum bola” qissasida ham boshqa ko‘plab asarlari qatori xalq og‘zaki ijodi namunalarining ta’siri kattadir. “SHum bola” 1936-yil yozgan, ammo qissa XX asrning 60-yillarida qaytadan ishlandi, yana-da sayqalladi. Qissada ijodkorning bolaligi, XX asr boshidagi Toshkent hayoti tasvirlangan. Asar qaymoq bozorining burilishida, mahkamaning boshida Ilhom samovarchining kattakon choyxonasi tasviri bilan boshlanadi, shundan keyin asarda jinnilarning tasviri beriladi: “...Bir jinni ko‘chada ketmon dastasi bilan o‘tgan-ketganni quvlab, urib-so‘kib «Hammang bir tomonga yur, tarqalib yurma! Tartib kerak, intizom kerak... Nimaga odamlar bir tomonga yurmasdan, har qayoqqa tarqalib yuradi? Nikolay poshsho zamonida tartib-intizom kerak, bir tomonga yursin-da», deydi. Boshqa jinni unga shunday javob qiladi: «Er axir taroziga o‘xshagan narsa bo‘ladi, hamma bir tomonga yursa, er barkashday bir yoqqa og‘ib, hammamiz Qurduim daryoga g‘arq bo‘lib ketamiz-ku». Hushyor kitobxon jinnilar tilidan aytilgan bu latifanamo gaplarda jiddiy, o‘ta qaltis ma’no borligiga - gap Nikolay poshsho zamoni emas, balki barchani bir yo‘ldan bir tomonga zo‘rlab yurgizish siyosati ketayotgan sho‘rolar davri ustida borayotganini sezadi” [3.37].

Asarda yozuvchi Shum bola tilidan bozorni bunday tasvirlaydi: “Hay-hay, bozor bo‘lganda ham qanday bozor, deng? Bu tomoni Eron-u Turon, Makka-yu Madina, Maymana-yu Maysara, Xito-yu Chin, Istambul-u Mozandaron - na quyi, na past, na o‘ng-u na chap. Bunday katta bozorni odam bolasi ko‘rmagan bo‘lsa kerak. Bozordagi rastalarni ayting, mollarning shig‘al totib ketganligini ayting, bozor ahlining turlanganini ayting. Savdogarlarning makkor basharalarini, rangor-rang kiyim-boshlarini ayting. Bay-bay, bunday bozor “Qissas ul-anbiyo”da ham, “Huriliqo” degan kitobda ham yozilmagan, hech qaerda - tarixda yo‘q” [6.17].

Shum bolaning hayratlanib gapirishidan ham uning uyidan birinchi bor chiqqanligini bilish mumkin. Yana bir jihatdan esa “Qissas ul-anbiyo”, “Huriliqo” singari xalq kitoblari nomining tilga olinishi adibning bu asarlar bilan chuqur tanish ekanligini ko‘rsatadi. Bozordagi har bir rasta yozuvchi tomonidan mohirona ta’riflanadi. Bozordagi birinchi rasta attorlik; ikkinchi rasta bir tomoni kulollik buyumlari, bir tomoni sovungarlik; keyingi rasta “bit bozori”, ya’ni eski buyumlar

sotiladigan bozor, ovqat bozori, qo‘y bozori, mol bozori, qoramol bozori, chorbozor, kiyim bozor, qassob bozor, qandolat bozori, qovun bozori, sahhob-kitob bozor, vofurushlik - oyoq kiyim bozori, nog‘ora bozor, pichoqchilik, namat bozor, qaymoq bozor, mum bozor, g‘o‘za bozor, ot bozori kabi bozorlar nomi va ta‘rifi berilganligini ko‘rish mumkin. Bundan turmushning turli qatlamiga mansub insonlar ehtiyoji uchun zarur bo‘lgan barcha buyumlar bozorda borligini kuzatish mumkin.

Sharq adabiyotida bozor motivi, yoki bozor bilan bog‘liq holatlar, voqealarga murojaat etilgan asarlar anchagina. Xalq dostonlarida ham bozor tasviri alohida o‘rin tutadi. Chunki dostonlarda bozor xalq yig‘iladigan, yoki sinov maydoni sifatida gavdalanadi. “Ravshan” dostonida bozor shunday tasvir etiladi:

“...Mardikorlik – ish bozori,
Cho‘yan bozor, mis bozori
Manov pishiq g‘isht bozori
Qassob bozori- go‘sht bozori

...

Changib yotgan un bozori
Ko‘qib yotgan jun bozori
Anov mursak to‘n bozori
Pichoq bozor qin bozori... [1.219]

Doston qahramoni Ravshan sevgilisi Zulxumorni qalpoq bozoridan qidiradi. “Ravshan” dostonida bozor xalqning ijtimoiy holatini, qanday kun ko‘rishini, nimalar bilan shug‘ullanishiyu, mamlakat aholisining to‘kin-sochin yashashini ifodalaydi. “Shum bola” asarida esa bozor ta‘rifi “Ravshan” dostonidek bir o‘rinda, tekis ketma-ketlikda berilmagan, asar qahramoni sayohati davomida bozorlar bilan tanishib kitobxonni ham tanishtirib boradi. Agar bozorlar to‘kin-sochin bo‘lsa, mamlakat aholisi o‘ziga to‘q bo‘ladi. G‘afur G‘ulom bozorlar nomini bejiz kiritmagan, kiyim bozor bo‘la turib Qoravoyga o‘xshagan etim bolalar usti yupinligi, oyoq kiyim bozori bo‘la turib oyoqyalang yurishlari, ovqat bozori bo‘la turib qanchadan qancha aholi och- nahorligi, kitob bozori bo‘la turib bolalarning bilimsizliklarini ta‘kidlagandek, go‘yo. Shuningdek, bozor tasviri berilganligining yana bir sababi bu shum bolaning har qanday vaziyatga moslashuvchanligini, uddaburonligini ham ifodalaydi

“Bugungi kunning qahramoni faqat salbiy yoki ijobiy bo‘yoqlarga ega emas. Bugunning qahramoni har ikki xarakterga tushadigan xususiyatlarga ega qahramon. Shum bola ham shunday qahramon. U ayni paytda ziyrak, saxiy, yolg‘onchi, qiziquvchan, maqtanchoq, so‘zamol - Etim bolalar obrazi. Shum bolada o‘z tabiatiga mos ko‘chib yuruvchi xarakter mujassam. U o‘g‘rilar davrasida o‘g‘ri, bozorda savdogar-xaridor, eshon dargohida mullavachcha, boynikida xizmatkor bo‘la oldi...” [2. 284].

Ko‘rinadiki, G‘afur G‘ulom “Shum bola” qissasida SHarq bozori tasviriga alohida urg‘u bergan. Adib bozor tasviri orqali ijtimoiy hayot tasvirini holisona yoritadi. Qahramonning hayotga, jamiyatga, insonga munosabatini ifodalashda bozor tasviri muhim ahamiyat kasb etgan.

Фойдаланилган адабиётлар:

1.Кунтуғмиш, Равшан: Достонлар/Айтувчи Эргаш Жуманбулбул ўғли; ёзиб олувчилар: Муҳаммадиса Эрназар ўғли, Ҳоди Зариф. — Т.: Шарқ, 2011. 368-б

2.Норбабоева М. Ғарб ва шарқ адабиётида “Етим бола”ларга муносабат // О‘зМУ хабарлари Вестник НУУз АСТА НУУз. 1(6)2022. — Т.: 320-б

3.Норматов У. Ижод сеҳри. —Т., Шарқ, 2007. 352- б

4.Матёкубова Т. Ғафур Ғулом бадиияти. —Т.: Фан ва технология, 2006.

5.Ғафур Ғулом замондошлари хотирасида. -Т.: Ғ. Ғулом номидаги нашриёт-матбаа ижодий уйи, 2003.

6.Ғафур Ғулом ижодининг маънавий-маърифий ахамияти. Масъул муҳаррирлар: филология фанлари докторлари Наим Каримов ва Тўра Мирзаев. ЎЗР ФА Ишлар бошкармаси Тошкент: – 2003.

7.Ғафур Ғулом. Шум бола. Қисса. -Т., Ёшлар нашриёт уйи, 2018.

HOZIRGI O‘ZBEK HIKOYACHILIGIDA AN’ANA VA USLUB

**Urazbaev G‘ayrat Kenjabaevich
Qoraqalpoq davlat universiteti**

O‘zbek tili va adabiyoti kafedrasi assistenti

XX asr o‘zbek adabiyotining yirik vakillaridan biri G‘afur G‘ulom badiiy olami hozirgi kunda ham zamonaviy nasr badiiy takomilida muhim ahamiyat kasb etadi. Shunday ekan, adibning avtobiografik yo‘sindagi o‘nlab qissa va hikoyalari O‘zbekiston xalq yozuvchisi Isajon Sulton ijodiga ham ta’sir ko‘rsatgani sir emas. Kinoya va hajmiy talqin ustuvorligi, jamiyat hayotining muhim hayotiy manzaralari, adib badiiy mahorati I.Sulton ijodida ham bo‘y ko‘rsatayotgani ayni haqiqatdir. G‘afur G‘ulom badiiyati, uning shakliy-uslubiy izlanishlari zamonaviy nasrda sezilarli ta’sir ko‘rsatib kelayotgan bir vaqtda, uning ijodini har tomonlama puxta o‘rganish dolzarb masalalardan biridir. “Mening o‘g‘rigina bolam” hikoyasidagi avtobiografik talqin Isajon Sultonning “Munojot”, “Qismat”, “Oydinbuloq” kabi hikoya va qissalarida rang-barang ko‘rinishda istifoda etilmoqda. Adib A.Qahhor va G‘afur G‘ulom, Oybek, Sh.Xolmirzaev singari adiblardan o‘ziga xos jihatlarni o‘zlashtirgan va o‘z uslubini yaratgan.

G‘afur G‘ulom tabiatidagi komiklik va dolzarb muammolarga munosabatli nutq adib hayotining ajralmas halqasini tashkil etadi. Mana shu jihatlari ijodkorga katta shuhrat keltirgan. U davr og‘irqlarini ich-ichidan his qilib ijod qildi. Isajon Sulton ham adib badiiy izlanishlaridan ilhomlandi. Bu borada o‘z adabiy suhbatlarida haqli ravishda e’tirof etadi. Janr poetik qirralari haqidagi ilmiy-nazariy qarashlarni bir maxrajga keltirganimizda “...hikoyaning belgilari bizga janrning algoritmik modelini tuzish imkonini beradi. Ammo, badiiy adabiyot tarixidagi har bir davr bu algoritmgaga o‘z tuzatishlarini kiritib boradi. Bu, bizning fikrimizcha, davrning ijtimoiy-madaniy o‘ziga xosligi va adabiyot rivojining ichki qonuniyatlari bilan belgilanadi”[1,16-b].

Haqiqatdan ham, davrlar osha sayqallanib kelayotgan hikoya universal modelida inson tafakkur tarzi o'z ini'kosini topgani shubhasiz. Shu ma'noda, o'zbek hikoyachiligining haqiqiy rivojlanish davri o'tgan asrning 30-yillaridan keyin yangicha uslubiy-ifodaviy, talqiniy shaklda namoyon bo'lishi kuzatildi. Hayot haqiqatini badiiy haqiqatga aylantirish masalasi sobiq ittifoq davrida janrning misli ko'rilmagan jihatlarini takomillashtirishga keng yo'l ochdi. Biroq A.Qahhor, Oybek, G'afur G'ulom ijodida davr muammolarining achchiq manzarasi, qahatchilik, manfur siyosatning odamzot boshiga solgan alamli kulfatlari o'z tasdig'ini topdi.

Har bir hikoyaning qurilishida so'z qo'llash usuli turfalashib, hissiy-emotsional birliklar yig'indisini birlashtiradi. Bir qarashda oddiy voqelik "Ota qismati", murakkab syujet "Bibi Salima", sodda ifoda "Uzuk" singari hikoyalarda ana shu jihatlarining betakror manzarasi uchraydi. Rus munaqqidi M.Baxtin ta'kidlaganidek: "Hikoya ijodkor hayot tarzining o'zgarishi bilan birga yashaydi. Unda borliqning universal ko'rinishi hamda roviy-qahramon birligi yangi shaklni barqarorlashtiradi. U qadim an'analar, antik yunon madaniyatidagi ritsarlik adabiyotidan ham oziqlanadi. Negaki, oliy maqsadlar hamisha hukmron sinflarni qo'rquvda ushlab turishga bel bog'lagan. Muallif ifoda yo'sinida o'sha ijodiy tafakkur mahsuli birinchi maqsadga aylanadi. Bu esa ijodkor yashayotgan muhit, zamon, mulki borliq muammolari orasida yaxlitlashib, turfa aqidalarni yagona ijodiy makonga bo'ysundiradi" [2,502-b].

Isajon Sulton ko'p hollarda ijodiy jarayon bilan bog'liq tarzda oddiy odamlar hayotini tasvirllovchi syujetlar yaratadi. Neorealizm oqimi ijodkorlari bunday vaziyatni allaqachon yuksak darajaga olib chiqqanlar. Neorealizm metodiga tayangan yozuvchilar borliqni epik planda tasvirlashga odatlanishgan. Syujetni harakatga keltiruvchi dinamik kuch konflikt bo'lsa, uni yaxlit bitta maqsadda birlashtirish konsepsiyani yuzaga keltiradi. "Ozod" to'plamiga kiritilgan hikoyalarni mazmunan ikki qismga ajratgan:

1. Organik hikoyalar;
2. Anorganik hikoyalar.

Bunday tavsiflashning o'ziyoq adib hikoyalarida real manzaralarni, aniq yashab o'tilgan hayot yo'llarida umrguzaronlik qilgan odamlar taqdirini tipiklashtirishga qaratilganligi bilan belgilanadi. Syujet tarkibiga kiruvchi jami unsurlar ixcham badiiy shakl tamoyillarini harakatga keltiradi. Bular xarakterni shakllantirishga xizmat qilsa, qalb shuurini larzaga solgan yozuvchi maqsadlarini ro'yobga chiqarishga asos bo'ladi.

Akademik M.Qo'shjonov qayd etishicha: "Voqealarga ma'no bag'ishlash uchun san'atkor nima qiladi? Buning uchun yozuvchi o'sha voqealarning tug'ilish sababi bilan qiziqadi. Tibbiyotda shunday bir qonuniyat bor: bemorning kasallanish sababini topish – uni davolash yo'lini topish degan gap. Yozuvchi ham shu qoidaga amal qiladi. Voqeaning ro'y berish qonunini topish uning ma'nosini topish bilan teng. Jamiyat tarixidagi hamma voqealarning – xunukmi, go'zalmi, yaratuvchisi insondir. Inson esa biron voqeaning ro'y berishiga sababchi yoki ishtirokchisidir. Yozuvchi o'sha maqsadni, voqeaga sababchi bo'lgan shaxslar maqsadining muhim yo'nalishini, bundan keyin ro'y bergan voqea va hodisalardan

kelib chiqadigan xulosasini tahlil etadi va ulardan umum bir ob'ektiv ma'no chiqaradi" [3,376-b].

Ko'rinadiki, ushbu tahliliy matnda yozuvchi voqelik yaratuvchisi, ishtirokchisi, kuzatuvchisi, baholovchi sifatida namoyon bo'ladi. Adib biron voqelikni hikoya qilar ekan, xarakterni individuallashtiradi. Individd shaxs ruhiy bosim ostida qiynoqlarga dosh beradi. Ma'lum ma'noda falsafiy-estetik yukni ham tashuvchi, illatlarga to'lgan hayotni yaxshilash yo'lida sobit qadamlik bilan ish yuritadi. Isajon Sulton xarakter mantiqini ikki xil yo'sinda baholaydi: kecha tarzida ro'y bergan syujet liniyalarini yaxlitlashtirish; bugun tarzida ro'y bergan syujet qismlarini tipiklashtirish malakasi. Bunday tavsifiy xarakter ijobiylik kasb etib, ideal g'oya, konsepsiyani shakllantiradi.

"Sog'inchi" nomli hikoyasida esa tamomila boshqacha manzaraning guvohi bo'lamiz. Ayniqsa, tabiat bilan tillashib, nafis gullar, tog'lar, shamollar, yomg'irlarga lison ato qilgan yozuvchi fantaziyasi bu safar qush tilini bayon qiladi:

"Osmon tiniq, shabada o'zgarmagan, demak, havo ertaga ochiq keladi. Olis yulduzlar orasida, juda balandda qizil chirog'ini miltillatib qanaqadir uchoq suzib bormoqda. Uchoqdagi kishilar chet ellarga yo'l olgan bo'lsalar kerak. Uchoq ichi issiqdir? Yorug', shinam salonda bu baxtiyor kishilar mudrashayotgandir balki? Bo'lishi mumkin, lekin ularning taqdirleri, hayotlari boshqacha. Bizniki shu – dehqonchilik... To'nimga yanada o'ranib, biroz aylanib yurdim. Shabadada derazaning ko'ziga yopishtirib qo'yilgan suvqog'oz shitir-shitir qiladi, ortida, xona ichkarisida televizor xira oqish dog' bo'lib ko'rinib turibdi. Oyog'im ostida bulturgi xazonlar shitirladi. Bitta-ikkita yaproq eski to'nka ustiga qo'nibdi. Yoz kunlarida mana shu to'nkaga o'tirib dam olardim. Hozir u namiqib qolibdi, ich-ichidan chirigan bo'lsa ham ehtimol.

Deraza yonidan o'tayotganimda choynakning shig'illagan ovozi keldi. Choy qaynabdi. Qaytib ichkariga kirdim. Eski do'ppini buklab, choynak dastasini ushlaganimni bilaman, bir nima to'satdan pirr etdi, mushtday, qoramtir bir nima potirlab ko'zim oldidan yuzimga tekkuday bo'lib uchib o'tdiyu o'zini suvqog'ozga urdi, ko'chirib tashqariga chiqib ketdi" [4,189-b].

Liro-romantik kayfiyatda voqealarni ifodalash usuli adibda o'ziga xoslik kasb etadi. Ayniqsa, poetik ritm bo'laklari o'quvchiga huzur-halovat bag'ishlaydi. Birinchidan, peyzaj manzarasini aks ettirish davomida adib xarakterni teran tasvirlaydi. Aynan, beozor musicha qismati bilan bog'liq yozuvchi sog'inchi hayot lazzatidan bahra olishni oliy maqsad sifatida biladi. Musichaning ayvon peshtoqiga uya qurishi, polaponlarini shu zaylda parvarishlashi zamirida katta umuminsoniy falsafa turibdi.

Yozuvchi qush timsolida qahramonning hayotini o'nglash payida juda ko'p voqea-hodisalarni ko'z o'ngidan o'tkazadi. Ish bilan mashg'ul bo'lgan hikoya qahramoni hayot qiyinchiliklarini mardona engishda qushlardan ham ibrat olish kerak degan, ideal g'oyani ilgari suradi. Qush real xarakterni inkishof qilsa, g'oya va mazmun mutanosibligi yozuvchi falsafiy-estetik qarashlarini belgilab olishda qo'l keladi. Bunday paytda psixologik kayfiyat ijtimoiy muammolarni ham hal qilishda muayyan darajada kalit vazifasini bajaradi. Adib hikoyalarida syujet va badiiy konsepsiya yaxlitligi psixologik vaziyatlar oralig'ida qolgan xarakterni

kashf qilishga xizmat qiladi. Shu tariqa, xarakter yaratishga bel bog‘lagan adib dunyoqarashida kelajakka umid bilan qarash tamoyilini sezish qiyin emas.

Umuman, hikoya janri genezisi qadim antik dunyo madaniyatida she‘riy yo‘sinda mifopoetik talqin negizida shakllangan, shuningdek, M.Qoshg‘ariyning “Devonu lug‘otit turk”, Kaykovusning “Qobusnoma”, Rabg‘uziyning “Qisasi Rabg‘uziy” asarlarida hikoyat, rivoyat tarzida qo‘llanilib, unda didaktik hamda diniy-tasavvufiy qarashlar uyg‘unligi yangi shakl – hikoyaning yuzaga kelishiga asos vazifasini o‘tagan.

Foydalanilgan adabiyotlar:

1.Комилова С. XX аср охири XXI аср бошлари рус ва ўзбек адабиётида хикоя жанри поэтикасининг ривож. Докторлик диссертацияси автореферати –Т., 2016.

2.Бахтин М.М. Вопросы литературы и эстетики. – Москва, Художественная литература, 1975.

3.Қўшжонов М. Бадиият қонуниятлари. Т., Шарқ. 2019.

4.Исажон Султон. Боғи эрам. –Т.: “Шарқ”. 2015.

FAXRIYOR SHE‘RIYATIDA POETIK FIKRNING BADIY IFODASI

**Fayzullayev Mirjalol Sheramat o‘g‘li
SamDU 2-kurs magistranti**

She‘r ko‘ngil mulki bo‘lgani bois kitobxonlarga nasriy asarlardan ko‘ra kuchliroq ta‘sir qiladi. Nasriy asarlar uning tafakkuri uyg‘onishiga ta‘sir etsa, lirik asar uning hissiy kechinmalariga kuch, quvvat beradi. Bu holat she‘riyatda his-tuyg‘uning musiqiy ohangda ifodalanishi bilan bog‘liq hodisadir. Shuni ham alohida ta‘kidlash mumkinki, faqat ohangdorlikning o‘zi she‘rning ta‘sir kuchini ta‘minlamaydi. She‘r his-tuyg‘u ifodasi bo‘lsa, demakki shu his-tuyg‘uni qanday holatda, qanday ko‘rinishda tasvirlash ham juda muhim. She‘riy misralar ham obraz kabi yuzaga kelib, obrazda shoir o‘z his-tuyg‘ularii tavsiflaydi yoki rassom kabi tasvirlab berishi mumkin.

“Ayolg‘u” she‘rlar to‘plamiga so‘z boshi yozgan Ahmad A‘zam shoir she‘riyati haqida quyidagilarni yozadi: “Men Faxriyorni ko‘pdan beri tanirdim, she‘rlarini o‘qiganman, o‘z bilan ko‘p gaplashganman, lekin “Ayolg‘u” muallifi, baribir menga notanish bo‘lib chiqdi, yangi she‘r sifatida. Yana yangilikka kirib borayotgan shoir sifatida uning izlanish yo‘lidagi o‘zgacha so‘rinish-toyinishlarni ham sezgandek bo‘ldim. Menga ayrim she‘rlari, ba‘zan so‘z tanlashda oshiqishlari shunday tuyuldi. Lekin u, baribir, she‘rning shunday sakta joylarida ham o‘zidan uzoqlashmaydi, so‘z yasashlarida ham navqironlik bor. Topganining uyog‘ida yana nimalar borligini bilishga oshiqadi va, tabiiyki, ayniqsa ko‘ngil go‘zalligidan shoshgan odam buni go‘zal aytmaydi, shunisi bilan ham samimiy, yana she‘r balki shudir” [1,6-bet].

Ahmad A‘zam nosir bo‘lsa-da, nozik didli she‘rshunos sifatida ham o‘zini namoyon eta olganligini guvohi bo‘lishimiz mumkin. Bu holat uning shoir she‘riyati haqidagi qarashlarida yaqqol ko‘zga tashlanadi. Shoir she‘riyati bilimdoni sifatidagi fazilatlar, shoirona nigohi she‘r tahlillarida o‘z isbotini topadi.

Shoirning “Xiyonat qilolmas...” she’ri biz ko‘niqib qolgan mantiqlar bilan tushunish qiyin bo‘lgan she’rdir. She’rga “pul ota bilan bolani bir-biridan ajratadi” maqoli mazmuni singdirilgan.

Xiyonat qilolmas hech kim pulchalik.
Do‘stlik bo‘lib tuyular, hatto,
g‘animlar dushmanligi
dushmanligi oldida pulning.
Qirq gazli shamshir bilan
kesib bo‘lmas pulning boshini.
Darvoqe, pulning boshi yo‘q.
Unga bosh bermagan qizg‘anchiq egam.
Yo‘qsa, sal insofga kirarmidi u,
O‘ylab ko‘rarmidi...

Pulning xiyonati oldida g‘animlar dushmanligi hech narsa emas. Uni yo‘lga solish uchun qirq gazli qilich ham o‘jizlik qiladi. Chunki uning kesiladigan boshi yo‘q. Agar boshga – aql bitganidami sal insofga kelardi. Shoir bu o‘rinda insondagi nafsni pulga qiyoslab metaforik obraz yaratayotir. Nafsig qul bo‘lganlarda fikr, tafakkur bo‘lmasligi bois ham u do‘stiga, yaqin kishilarga xiyonat qilishi mumkin. Uni insofga chaqirishning imkoni yo‘q. Chunga Tangri fe’li-xuyidan kelib chiqib bosh – aql ato etmagan. Boshi yo‘qligi uchun ham u nafs timsoli. Gar uni aqli bo‘lganda nafsiga qul bo‘lmasdi. Ozroq o‘ylab ko‘rardi, insofga kirardi. Bu bilan lirik qahramon o‘z nafsiga qul bo‘lganlarni sal bo‘lsa-da, o‘ylab ko‘rishga chaqirayotir.

Bahor hech narsani esdan chiqarmas,
Har safar gul qo‘yar
Har bir qabr poyiga.

Shoir yaratgan minaturalarda ham poetik fikr jonsiz predmetlarni jonlantirilishi orqali tasavvur chegaralarini ishg‘ol qila oladi. Beg‘araz bahor ezgulik kuychisi sifatida ramziy ma’no ham tashiydi.

Faxriyorning “Imkoniyat” she’rida tasavvur va xayol o‘rtasida bahs boradi. Lirik qahramon kechinmalar qarama qarshiligiga duch keladi. Oxir oqibat poetik his-tuyg‘ular falsafiy mushohadalar bilan boyib boradi. Estetik g‘oyaviylik yuzaga chiqadi. Aytilmoqchi bo‘lgan fikr oydinlashadi. Shu o‘rinda M.Xolovaning metaforaning she’riyatda tutgan o‘rni masalasiga e’tibor qaratish o‘rinli bo‘ladi: “She’riyatga xos obrazli ifodalar yaratishda, so‘zning chinakkam shoirona qirralarini kashf etishda metaforaning roli beqiyos, bu borada poetik vositalarning hech biri u bilan tenglasha olmaydi. Metafora adabiyotning universal hodisasi bo‘lib, istalgan so‘z turkumi o‘rnida, ammo turli-tuman ko‘chma ma’nolarda kelishi mumkin. Metafora ayniqsa, modern shoirlarimiz she’rlaridagi majozlarda aynan lirikagagina xos xususiyatlar: olamni o‘zgacha, odatdan tashqari yorqin, nafis rangin yoki qora bo‘yoqlarda, irratsional shakllarda ko‘rish, sirli, g‘aroyib, g‘ayrishuriy ohanglarni his etish, boshqacha sifat berish, bo‘lakcha suvratlarda tasavvur qilish ko‘zga tashlanadi. Demak, modern she’rda fikrni muxtasar, oforizmlardagidek sanoqli so‘zlar orqali ifodalash, uni iloji boricha matn ostiga yashirib, she’rning umumiy tugal g‘oyasidan keltirib chiqarish ehtiyojining

kuchliligi o‘z-o‘zidan metaforik tafakkur tarzini talab qiladi” [2,78]. Mazkur fikrlar tahlilga tortayotganimiz bu she‘r tahlilida ham ahamiyatli vazifani bajarib kelmoqda. Fikrlar tabiiyligiga ko‘mak bermocda.

Imkoniyat – dastyorim mening,
Yugurdagim – imkoniyat.
Har kuni ko‘zimni ochishim bilan
O‘tib ketgan umidlarimni
Qirtishlab qo‘yar.
Armonlarni sug‘orar har kun.
Don sepadi hijron qushiga.
Lekin har zamon
aql o‘rgatadi u ablah menga:
– Oyni etak bilan yopib bo‘lmaydi,
deydi masalan.

Mening jonim chiqar,
shunda u la‘natiga
yodlataman shiorlarni,
toki u o‘rgansin ushbu zamonda
yashashning ma‘nosi maqoldan emas,
shiordan iborat ekanligini.

She‘r erkin vaznda yozilgan. Kitobxonni o‘ziga tortadigan ritm, ohanglar yo‘q. Mazmun tig‘iz. Matn osti fikrlari his-tuyg‘ularga ta‘sir qiladi. Tasavvur chegaralarini kengaytiradi. Har bir jumla bir zarb kabi qalbni hayajonga soladi. Hayotda imkon qidirib yashagan lirik qahramon imkoniyatsizlikdan charchab ketadi. O‘z xayollari bilan, ichki “men”i bilan dialoglar qilichbozligi orqali mantiqsizlikdan mantiq yarata biladi. Lirik qahramon o‘z orzularini amalga oshirishga intiladi. Qalbdagi yaratuvchilik hayotiy reallik oldida qurquvga tushadi. Har qanday umid qirtishlanadi, uni hushyorlikka chorlaydi.

She‘r XX asrning 80-yillarida yozilganligi bois, she‘rni ijtimoiy talqin qilish ham mumkin. Niyat xolis. Yurtni ozod ko‘rishni istaydi. Lekin imkoniyat yuqori emas. Shuning uchun ham “armonlarni sug‘orar har kun” deb nola qiladi shoir. Hijron ayriliqqa har kuni don sepib, uni avj oldiradi. Ba‘zan aql ham o‘rgatadi. Axir “oyni etak bilan yopib bo‘lmaydi” maqoli bilan ovutmoqchi bo‘ladi. Shunda lirik qahramon roviy – hikoyachiga qarab dadillik bilan “yashashni ma‘nisi maqoldan emas, shiordan iborat” ekanligini uqtirmoqchi bo‘ladi. Sho‘rolar davrining quruq shiorlari lirik qahramon ensasini qotiradi. U vatanni o‘zligini tanitadigan xalqona tafakkur tarzi bo‘lgan maqollar bilan emas, balki soxta shiorlar bilan anglashi lozimligini kinoya qiladi. Demakki, shiorlar imkoniyat imkoniyatini o‘rgatishda davom etayotir, degan achchiq haqiqatni anglatmoqchi bo‘ladi.

Foydalanilgan adabiyotlar:

- 1.Фахриёр. Аёлғу. –Т., Шарқ, 2000. – 262 б
- 2.Xolova M. O‘zbek modern she‘riyati: tarixi va nazariyasi. –Т. Navro‘z. 2018.
- 3.Фахриёр. Излам. –Т., Академнашр. 2017. – 224 б.

4. Фахриёр. Геометрик баҳор. –Т., “Маънавият”, 2004. – 192 б.
5. Фахриёр. Дарднинг шакли. –Т., Ёзувчи, 1997. – 41 б.

ARBAIN AN'ANASIDA YOZILGAN SHE'RLARDA ONA OBRAZI

Mardanova Gulshan
SamDU 2-bosqich magistranti

Adabiyotshunoslik ilmidagi zamonaviy o'zbek she'riyati o'tmish adabiy merosining davomi va an'analar vorisi sifatida tadqiq etib kelinadi. Yangi davr she'riyatini xolis idrok etish, tushunish va tushuntirish, yangicha ilmiy o'rganish bugunning muhim vazifalaridan sanaladi. O'zbek she'riyati doimo o'z g'oyaviy va badiiy qiymati, mazmunning chuqurligi, tarbiyaviyligi, ijtimoiy muammolarni hal qilish uchun tinimsiz izlanishi bilan ajralib turadi. Ijodkorlar o'z she'rlarida ayol obrazini, uning qalb kechinmalarini ilohiy ilhom bilan yoritishga harakat qilganlar.

Ayol, umuman, ona obraziga adabiyotimizda muhim va katta rol berilgan. Ayol - yozuvchilar uchun ilhom manbai, ayol - go'zallik va ezgulik timsoli, ayol farzandlariga mehribon onadir. Ayolning mehr-muhabbati kishini hayratga soladi. Uning mehrini quyosh nuriga qiyoslasak bo'ladi. Uning mehri cheksiz. Muborak dinimiz islom va uning muqaddas kitobi bo'lmish Qur'oni Karimda va hadislarda onaga ehtirom, uning haqqini ado etish haqida juda ko'p ibratlarni uchratishimiz mumkin. Ushbu maqolada Arbain-hadichilik an'anasida ijod qilgan adiblar ijodida ona madh etilgan o'rinlarni tahlil qilamiz. Bir hadisning mohiyatini shoirlarimiz talqinlarida turlicha jilvalanishi, va nihoyat ular bir hadis mazmuni atrofida birlashganiga guvoh bo'lamiz.

Onalarni madh etuvchi she'rlar o'zbek she'riyatida o'z o'rniga ega. Bu mavzudagi she'rlarni deyarli har qanday shoir she'riyatida uchratish mumkin. Bunday she'rlarni hadischilik an'anasida ijod qilgan shoirlar ijodida ham ko'plab mavjud. Bir mavzudagi she'r turli ijodkorlar qalamida o'zgacha jilolanadi. Kishiga ayrica estetik zavq bag'ishlaydi. Alisher Navoiyning quyidagi she'rini olib ko'raylik:

Onalarning oyog'i ostidadur,
Ravzayi jannat-u jinon bog'i.
Ravza bog'i visolin istar esang,
Bo'l anoning oyog'i tufrog'i [1, 15-bet].

Mazkur hadis “Jannat onalar oyog'i ostidadir” deb nomlanadi. Hadis turli davrlarda sayqallanib, hayotimizning ajralmas bir qismiga aylanib ulgurganligini ko'rishimiz mumkin. Shunday ekan, bu hadisni Abdulla Oripov ham o'ziga xos tarzda she'riy shaklda ifodalab ko'rishga harakat qiladi. “Sharq she'riyatida yaratilgan “Arbain” larda avval hadisning arabchasi, so'ng forscha yoxud turkiy tarjimai keltiriladi-da, keyin she'riy (nasriy) sharh beriladi. Abdulla Oripovda esa hadisning asl shakli keltirilmay, bevosita she'rning o'zi berilaveradi. Bu ham shoirning maxsus tayyorgarliksiz ilohiy ilhom natijasida mazkur turkumni yaratilganligini ta'kidlaydi.

Abdulla Oripov hadislarni yaxshi biladi va buni o'zi ham e'tirof etadi: “...satrlarim o'z-o'zidan quyilib kelaveradi. Hadislarning barchasi payg'ambarimiz

Muhammad alayhissalom suxanlari bilan bevosita bog‘liq” edi. Balki, shu boisdur, Abdulla Oripov she’rlarida birdaniga bir necha hadisning sharhini ko‘rish mumkin. O‘tmish “Arbain”larida esa bitta hadis keltiriladi va shu hadisning sharhi beriladi” [1, 97-98-betlar].

Darhaqiqat, Abdulla Oripovdek iste’dodli shoirlar har bir she’rida katta hayotiy umumlashmani yasay olgan. Bir she’rida kamida uch-to‘rtta hadisni talqin qilib, uni sakkiztagacha yetkazgan. Misol uchun “Ona” she’rini olib ko‘raylik. Muhammad payg‘ambar(s.a.v.)ning onalarga bo‘lgan hurmati, ayol zotiga bo‘lgan shafaotini hech qanday mezon bilan o‘lchab bo‘lmaydi:

Ka’ba qopqasida turgan, ey posbon,
Avval onalarning ochgin yo‘llarin.
Onalar poyiga tiz cho‘k o‘shal on,
Tavof qil, ko‘zga surt, o‘pgin qo‘llarin [2, 21-bet].

Shoir she’r yaratar ekan, lirik kechinmani biror voqea yordamida ifodalashga harakat qiladi. Bunday she’rlar voqeaband she’rlar deb yuritiladi. Abdulla Oripov “Haj daftari”ga borib “Voqeaband lirika – lirik kechinmani voqeaning ixcham tasviri asosida ifodalovchi she’r, zamonaviy she’riyatda keng tarqalgan janr. Voqeaband lirikada voqeani tasvirlash maqsad emas, balki bir vosita, lirik kechinmani ifodalash vositasidir. Shunga ko‘ra, voqeaband lirikada voqea to‘laqonli tasvirlanmaydi, balki punktlar bilan chiziladi: uning eng muhim detallarini olish, kulminatsion nuqtalariga urg‘u berish bilan kifoyalanadi” [4, 76-bet].

Jamol Kamol qalamiga mansub ushbu she’r yuqoridagi hadisning boshqacha jilvalanishini o‘qigan o‘quvchida “onadek aziz va mukarram” zotning oldida dunyo molining qiymati hech ekanligini tushunish lozim. Hadisdagi “jannat onalar oyog‘i ostida” deb ta’rif berilishida chuqur hayotiy falsafa mavjud. Inson Allohni tanishi, mehribon volidasining roziligini olishi, uch bora yaxshilik qil, undan keyin otaga marhamat ko‘rsatilishi Muhammad payg‘ambar(s.a.v.)ning hadislarini yodimizga soladi. Bu hech bir zamonda eskirmas, qiymati tushmas bitiklardir. Hadislarni she’rga aylantirishda an’anaviy barmoq vazni juda qo‘l kelgan.

Alisher Navoiy to‘rtlik she’r shaklida hadislarni turkiy tilda ifodalaydi. Darvoqe, shoirlar eng avvalo, ona roziligi, ona duosi, ona mehr-shafqatini birinchi o‘ringa qo‘yib, go‘zal dostonlar, qasidalar, g‘azallar, she’rlar bitganlar. Islomiy qarashlarning she’riy manzuma shaklida, hadislarning ritmik joriylanishi o‘quvchida ham nafosatni tarbiyalaydi, ham ona-Vatanni ko‘z qorachig‘iday asrashni o‘rgatadi, yoshlarni vatanparvarlik ruhida kamol topishida katta hayotiy saboq bo‘lib xizmat qiladi.

Binobarin, hozirgi o‘zbek she’riyatidagi o‘shish-o‘zgarishlar tadrijiy davom etib kelmoqda. Bu kabi jihatlar har bir shoir ijodida o‘ziga xos tarzda ko‘zga tashlanmoqda, har bir ijod namunasida uslubiy, shakliy, obrazlilik jihatidan tamomila tafovutlanmoqda.

Sirojiddin Sayyidning “Yaxshilik eskirmagay” (Qirq hadis) turkumi ham Muhammad payg‘ambar(s.a.v.)ning muborak hadislarini she’riy yo‘sinida o‘z ifodasini topgan. Unda onani qanday e’zozlash, uni avalab-asrash, marhamat ko‘rsatish, aytganini vaqtida qilib borish farzandning yelkasidagi katta mas’uliyat,

vazifa ekanligini to'laqonli ko'rsatadi. Shuning uchun ham, qaysi davrni olib ko'rmaylik, ota-onaning o'rni Sharq-musulmon o'lkalarda e'zozlanadi. Ularga ta'zim bajo keltiriladi:

Sen – mehmon, u – mehmon,
Hammamiz – mehmon,
Dunyo ham bir mehmonxonadir, bilgil.
Jannat o'rtasida ko'p eshiklar bor,
Ularning bittasi – onadir, bilgil...[5, 157-bet].

Shoir go'zal hadisni boshqacha shaklda jaranglatadi. Ya'ni, onadek mukarram va aziz zotning hurmatini joyiga qo'ysang, jannat senga o'z eshiklarini ochib qo'yadi, agar buning teskarisini qilsang, eshikni o'z qo'ling bilan yopgan bo'lasan... Shoirning qalbi bezovtalanadi. "Eng avval onaning qadrini bilgil...". Bunday o'tlig' satrlar har bir inson uchun ibrat maktabi bo'lishi lozim.

Islomiy qarashlar motivida hadislarning she'riy shakli o'ziga xos xalqani tashkil qiladi. Bu motiv – Ona, Vatan, Ota, Do'st, Muhabbat, Insonparvarlik, Iymon, E'tiqod darajalarini o'zida to'laligicha qamraydi. Masalan, har bir shoirda "Jannat onalar oyog'i ostitadir" motivi goh to'rtlik, goh doston, goh qasida, goh sonet shaklida jaranglashini e'tiborga olsak, masala yaqqol namoyon bo'la boradi.

Shunisi muhimki, har bir shoir o'zining quvvai hofizasidan kelib chiqib so'z aytadi. Mana shu zaylda ish yuritadi. Motiv badiiy shaklning boshqa komponentlariga nisbatan muallif fikri va his-tuyg'ulari bilan muvofiqroq keladi. Biroq, ulardan farqli o'laroq, mustaqil obrazlilikka, estetik tugallikka ega emas. Shu ma'noda bir xil motiv va kechinma tabiatiga ega shoirlar she'rlari ham ma'nosi bir xil shaklda bo'lishi tabiiy hisoblanadi. Masalan, ertaga bugungidan yaxshiroq yashash motivi barcha davrlarda she'riyatning harakatlantiruvchi kuchi bo'lgan. Lekin she'rlar shaklan turlicha bo'lib, ifodalash uslubi ham o'ziga xos ko'rinishlarda yuzaga chiqqan.

Shakliy-uslubiy o'zgarishlar esa insoniyatni axloqiy, ma'naviy va madaniy mezonlar hamda yuksak ideallar ishlab chiqilishi barobarida, badiiy-estetik g'oyalar takomillashuviga ham olib kelgan. Chunki lirik asardagi shaxs ham olamni bilish, tushunishning dialektik yo'lidan borib, birinchi galda borliqni biladi, so'ng mulohaza yuritadi, uchinchi bosqichda esa yana fikrlashiga qalbida ishonch paydo qiladi va nihoyat uni yakuniy badiiy-hissiy xulosasi sifatida she'r shaklda ifodalaydi. Bu esa uning individual uslubini ham yuzaga chiqaradi. A'zam O'ktam ijodida mana shunday o'tlig' satrlarni kuzatish mumkin bo'ladi:

Keltirildi bir to'da asir,
Bitta ayol yugurardi zir.
Mahkam quchib go'dak ko'rgan on –
Emizgali tushardi shodon.
Rasululloh berdilar savol:
Ne deysizlar, mana shu ayol –
Xohlarmikan har ne bo'lmog'i,
Ona bundoq qilolmas aslo!
– Bola desa ona jon berur,
Olloh undan g'amxo'roq erur! [6, 7-bet].

Shoir mana bu she'rida Muhammad payg'ambar(s.a.v.)ning ummatga mehr-u muhabbati cheksizligini, Allohning rahmati keng va ulkanligini amalda ko'rsatib beradilar. Onaning farzandi uchun elib-yugurishi, e'zozlashi, asrashini sahobalar ham diqqat bilan kuzatgan. Rasululloh har paytda adolat bilan ish tutishni buyurganlar. Onadek aziz zotning oldida boshi egib, unga hurmat bajo keltirishni bot-bot uqtirganlar. Qiynoqlar-u, iztiroblardan nari qilish, mushfiq ojizalarga shafqat ko'rsatish eng katta ibodat ekanligini o'z ayonlariga teran idrok bilan tushuntirganlar.

Adabiyotlar ro'yxati:

1. Alisher Navoiy. Arbain. – T., Meros. 1991.
2. G'aniyev I., Afoqova N. Abdulla Orif falsafasi. –T., Muharrir. 2021.
3. Oripov A. Ishq sahrosi. –T., Hilol-nashr. 2021.
4. Quronov D., Mamajonov Z., Sheraliyeva M. Adabiyotshunoslik lug'ati. – Toshkent: Akademnashr, 2010.
5. Sirojiddin Sayyid. Ustimizdan o'tgan oylar. –T., "Cho'lpon" nashriyoti. 2014.
6. A'zam O'ktam. Ikki dunyo saodati. –T., Cho'lpon, 1998.

NOSIR FOZILOV IJODIDA SHAXS KONSEPSIYASI

Abdunazarov O'tkir Saydaliyevich
TermizDU katta o'qituvchisi

Yillar davomida shakllangan milliy qadriyatlarni ifodalovchi badiiy asarlarning yaratilishida etuk ijodkorlarning o'rni beqiyosdi. Har qanday jamiyatda ham adabiyot va san'at doimo inson ma'naviyatini bezovchi va belgilovchi mezon bo'lib kelgan. Shu bois ham adabiyotning barkamol avlod tarbiyasidagi o'rni beqiyosdir. Aslida, badiiy asarning hayotimizdagi benazir xizmati ham, uning bosh vazifalaridan biri ham ana shunda. Adabiyotni o'zining qismati deb bilgan haqiqiy yozuvchi va shoirlar barcha davr va zamonlarda ham inson va uning ma'naviy olamini tadqiq etishga, ko'ngil manzaralarini jimjimajor bo'yoqlarsiz, samimiy va tabiiy holda chizishga intilganlar. Chunki ular yozgan har bir asari jamiyat taraqqiyotiga, inson kamoloti rivojiga muhim hissa bo'lib qo'shilishiga qattiq ishonganlar. Jahon adabiyotida bo'lgani kabi o'zbek adabiyotida ham chinakam iste'dodli qalam sohiblari, hasos yozuvchilar barcha davr va zamonlarda mo'l bo'lgan. Bunday yozuvchilarimizning badiiy tafakkuri, o'tkir qalamidan yaralgan badiiy durdonalar milliy adabiyotimiz xazinasini boyitib xalqimizning bebaho mulkiga aylanmoqda.

Ana shunday yozuvchilarimizdan biri, bolalar adabiyotida o'z hikoyalari va qissalari bilan tanilgan Nosir Fozilovdir. "Nosirning qissalari ko'ngillarimizning allaqaerida mudragan bolalik xotiralarimizni uyg'otadi. Ko'ksimizga muzdek adir salqinini olib kelgandek bo'ladi. Yonbag'irlarda sudralgan poda ovozi eshitgandek, shu poda orqasidan ko'tarilgan chang to'zonlarni ko'rgandek bo'lasiz. Guvala devor orqasidagi tandirdan ko'tarilgan ko'm-ko'k tutun bilanyangi yopilgan nonning omuxta hidi dimoqlaringizni qitiqlaydi. YAg'rinini oftob kuydirgan o'roqchining bug'doyzor o'rtasida qaddini g'oz tutib, qumg'ondan

yaxna simirayotganini ko‘rib siz ham tamshanasiz. Urush davri birdan ulg‘aytirib qo‘ygan qishloq bolasining o‘ziga yopishib tushmagan salmoqli gaplarini eshitasiz, beixtiyor yuzingizga tabassum yuguradi” [1,3-4-bet].

Atoqli yozuvchimiz Said Ahmad tomonidan aytilayotgan bu e‘tiroflar bejiziga emas, albatta. Ularning mohiyatida yozuvchi bilgan, sinagan katta hayotiy asos yotibdi. Nosir Fozilov ijodining ko‘plab qismida o‘z bolaligida boshdan kechirgan urush va urushdan keyingi davr hayoti, o‘ziga zamondosh bo‘lgan odamlar hayoti oborazli tarzda yoritib beriladi. Asarlarining aksar qismida, jumladan “Qush qanoti bilan”, “Saraton”, “Tashvish” kabi qissalarida Vatan urushi davrida front ortidagi xalqning mashaqqatli turmush tarzi haqqoniy tasvirlanadi. Shu davrda yashagan insonlarning ruhiy holati, hayotga bo‘lgan intilishlari, bu qissalarda yaratilgan o‘smir yoshdagi bolalarning tirishqoqligi yu juvonmardliklari yosh o‘quvchilarning diqqat e‘tiborini tortadi.

Umuman olganda, badiiy adabiyotda yozuvchining mahoratiga baho beradigan bir qancha omillar mavjud bo‘lib, ular orasida adibning obrazli fikrlashi hamda dunyoni qanday ko‘z bilan qo‘rishi, obraz yaratish mahorati alohida ahamiyat kasb etadi. Ijodkorning yaratgan asarlarida obrazlilik qanchalik chuqur bo‘lsa, ularning badiiy qiymati ham shunchalik yuqori bo‘ladi. Chunki har qanday obraz yaratishda yozuvchi o‘zining borliqqa bo‘lgan hissiy munosabatini ham namoyon etadi. Adibning bunday hissiy munosabati singdirilgan asar badiiylilik mezonlarining nozik talablariga javob beradi hamda asarni o‘qigan o‘qirmanninguni tushinishi va yurakdan his qilishida muhim omil sanaladi.

Adabiyotshunoslikda “obraz” atamasi ikki xil - keng va tor ma’noda ishlatiladi. Keng manoda, badiiy obraz deganda borliqdagi san’atkor tomonidan ko‘rib, his qilinib ijodiy qayta ishlangan har qanday poetik narsa-hodisa, unsur tushunilsa, tor ma’noda badiiy asarda yaratilgan inson nazarda tutiladi [2,78-bet].

“Borliqni idrok etishni maqsad qilgan adabiyotning markazida inson obrazi turadi. Negaki, insonning o‘zi borliqda shu mavqeni egallaydi. Shunday ekan, badiiy adabiyotning borliqni idrok etishida inson obrazining asosiy vosita bo‘lishi ham tabiiy hol” [3, 97-bet]. Shuni ham aytish kerakki, badiiy asar qahramoni haqida gap ketganda uning individual xarakter xususiyatlarni belgilashda uning nutqi bilan ajralmas munosabat borligi barchaga ma’lum bo‘lsa-di, ko‘pgina ijodkorlar undagi ohangdorlikka ko‘pda e‘tibor berishavermaydi. Vaholanki, badiiy asarda qahramon nutqiga xos ohangdorlik ana shu munosabatni mutanosiblashtiradi.

Mutanosiblik obraz xarakat qilayotgan muhit vaziyatni, obrazning o‘zini yozuvchi aniq ko‘ra olgandagina yuzaga chiqa oladi. Adib asarlarida Vatan urushi davrida o‘zbek askarlarining, ziyolilar va ishchi dehqonlarning ko‘rsatgan mardliklari va jonbozliklari, yosh va o‘smir qahramonlarning fidoyilik bilan ko‘rsatgan jonbozliklari o‘quvchi qalbiga bir ajib jo‘shqinlik baxsh etadi. Uning qissa va xikoyalarida qahramonlarning qiyin vaziyatlarga tushib qolganda o‘zini tuta bilishi, har qanday qiyinchiliklarni matonat bilan engib o‘tib nurli manzillarga intilishi, ezgulikka sadoqat tasviri orqali ma’naviy axloqiy jihatdan hayotiy xulosalarga kelish yozuvchi asarlarini tutashtirib turuvchi muhim nuqta sanaladi. Yozuvchining har bir yaratgan hikoya va qissalarida bolalik va o‘smirlikning

begʻubor dunyosi xalq tarixi va taqdiri bilan bogʻliq muhim muammolarning badiiy ifodasi sifatida niyati sof boʻlgan murgʻak qalblardan mustahkam oʻrin egallagan. Adib yaratgan oʻnlab kurashchan qahramonlar bolalarning oʻziga yaqin koʻrgan maslahatgoʻyi va maslakdoshiga aylangan. Bizga maʼlumki, kattalar ishtirok etgan xar qanday asar kattalarniki boʻlavermaganday, bolalarga atab yozilgan asarlar xam faqatgina bolalargaa tegishli degani emas, adib asarlarida kattalar va bolalar hayoti chambarchas bogʻlangan tarzda ifoda etiladi. Tarixdan bizga maʼlumki, har bir davr oʻzining turli voqealarga boyligi bilan ajralib turadi.

Nosir Fozilov asarlarida ham asosan oʻzi koʻrgan va guvohi boʻlgan davrni va shu davr insonlarining ruhiyati, qalb kechinmalari hamda iztirobli onlariyu quvonchli damlarini xaqiqiy real tarzda koʻrsatib berganligini taʼkidlash zarur. Adibning asarlari real hayot voqealari asosida yaratilganligi uchun ham oʻquvchi qalbiga hech qanday toʻsiqlarsiz qirib boradi. Ularda asardagi voqea hodisalar hamda qahramonlarga nisbatan ishonch tuygʻusini shakllantiradi. Yozuvchi hikoyalarida qaysi joy nomi tilga olinmasin, albatta oʻsha joyning toponomik kelib chiqishi, xalqining tili, urf-odatlar, anʼanalari haqida batafsil toʻxtalib oʻtilgan.

Jumladan, yozuvchi Odil Yoqubov yuqoridagi fikrimizning isboti tariqasida quyidagilarni keltirib oʻtadi: “Nosirning asarlarida Turkiston oʻzbeklarining oʻziga xos tili, qiyofasi, urf-odatlar juda aniq sezilib turadikim, bu ham qoʻlingizdagi kitobning fazilatiga fazilat qoʻshadi. Nosir Fozilov badiiy ijodning eng qiyin sirlaridan biri - bitta-ikkita ibora bilan manzara yarata olish sirini biladi. “...Haydar ikkalamiz ikki eshakda shahardan qishloqqa qaytib ketayapmiz. Quyosh tikka koʻtarilib qolgan. Javzo. Koʻlankalarimiz issiqqa dosh berolmaganday borgan sari bagʻrimizga tiqiladi... Eshaklar arava izi oʻyib tashlagan chuqur yoʻlda sap-sariq moy tuproqni bir maromda tap-tup bosib, yalqovgina qadam tashlaydi. Yoʻl chetidagi shuvoq va yantoqlarning changdan rangi bilinmaydi, saratonda sargʻayib zang bosgan simday qovjirab qolgan...” Bunday ravon chizilgan yorqin tasvirlar, koʻz oldingizga “lop” etib keladigan tiniq manzaralar kitobda kirgan har bir hikoya va qissada bor”[3,4-bet].

Nosir Fozilov asarlarining mazmuni, pafosi xamda ohangining xilma xilligi diqqatga sazovor. Uning “Saraton” qissasida Toʻra bilan Kamolaning ilk muhabbat romantikasi orqali urush yillarining ogʻir hayotida xalq jasoratini ifodalashni sezishimiz mumkin. Ushbu qissa harbiy mavzuda boʻlib, front ichkarisidagi kishilar hayotini, maqsad va intilishlarini koʻrsatuvchi asarlar qatoridan oʻrin egallagan.

“Saraton” qissasidagi yozuvchi yutugʻini, oʻsha davr ruhini yarata olish, qishloq kishilarining umumlashma harakterini ishonarli tasvirlash belgilaydi. Asarda shu oddiy qishloq hayotidagi muhim belgilar topib-topib koʻrsatiladi, tasvirlanayotgan hodisalarga oʻquvchini ishontirishga harakat qilinadi. Adibning “Qush qanoti bilan” qissasida shaxsga sigʻinish davrining achinarli oqibatlari qalamga olinadi.

Xullas, adibning har bir asarida insoniy fazilatlar, uning qalbidagi istiroblar talqini shaxs va jamiyat birligida namoyon boʻladiki, bu esa adibning ijodida inson konsepsiyasining haqqoniy ifodasidan dalolat beradi.

Foydalanilgan adabiyotlar:

1. Носир Ғозилов замондошлари хотирасида. – Тошкент, “Машҳур прес” 2019.

2. Қуронов. Д Адабиёт назарияси асослари. – Т.: 2018.

3. Носир Ғозилов замондошлари хотирасида. – Т.: “Машҳур прес” 2019-й 4-бет

4. Ғозилов Н. Ғира-шира шомдан оппоқ тонгача. Таниқли ёзувчи Носир Ғозиловнинг суратию сийратига чизгилар. – Тошкент, Ғофур Ғулом номидаги нашриёт-матбаа ижодий уйи, 2017.

5. Ғозилов Н. Танланган асарлар. Қиссалар, ҳикоялар. – Т., Шарқ, 2020.

JAMOL KAMOLNING “SHAHTRIBONU” DOSTONI POETIKASI

**Toshmamatov Umidjon
SamDU 2-kurs magistranti**

Jamol Kamol adabiyotga oʻtgan asrning 60 yillarida kirib keldi. Bu davr oʻzbek adabiyoti qatʼiy qolipga tushgan mafkurabozlikdan qutula borib, tasvir obʼekt sifatida inson kechinmalari, qalbi, ruhiyati, bashariatni qiynayotgan hayot omillarini gavdalantirdi. Jamol Kamolning lirik va liro-epik asarlari tuygʻuga, xayolotga, fikrga boy boʻlib, tasvir markazida shaxs fenomeni yotadi. Shoirning dostonlarida “haqiqat va yolgʻon”, “urush va tinchlik”, “mardlik va jasorat”, “Vatan va oila”, “sevgi va sadoqat”, “ijtimoiy-siyosiy”, “dinu diyonat” kabi mavzularga oid epik voqeliklar lirik tasvirga tortiladi.

Mustaqillik davrida jahon adabiyotidagi modernistik tasvir va talqinga hamohang tarzda yaratilgan asarlar bir qancha, ammo adabiyotimizning monumenti boʻlgan mumtoz badiiy asarlardan oziqlanib yozilgan ijod namunalari nisbatan kamroq. Jamol Kamolning “Shahribonu” dostoni 2000-yilda yozilgan boʻlsa-da, besh asrlik tarixga ega boʻlgan Alisher Navoiyning “Xamsa”sidan yangragan hikoyatdek yangraydi. “Shahribonu” dostonidagi syujet yangi, ammo voqelikning taʼrifu tavsifi navoiyona usul va ohangda berilgan. Doston orqali Jamol Kamolning Alisher Navoiy asarlarining bilimdoni boʻlibgina qolmay, oʻz ijod yoʻnalishini yoritib turuvchi bosh mayoq sifatida Alisher Navoiyni bilishini anglash mumkin. “Shahribonu” dostonida rost va yolgʻon mavzusi yoritilgan. Maʼlumki, hazrat Navoiyning “Hayrat ul-abror” dostonidagi oʻninchi maqolot va undan keyingi “Sheʼr bilan durroj” hikoyatida, “Sabʼai sayyor” dostonidagi “Muqbil va Mudbir” hikoyatida ham bu mavzu badiiy ifoda etilgan. “Shahribonu” dostonida farzandsizlikdan qiynalgan Sharqning ulugʻ xojasi Allohga nolalar etib, qiz farzand koʻradi. Tugʻilgan farzand Navoiy usulida shunday tasvirlanadi:

Qiz ismini Shahribonu, dedilar,
Bir oilaning joni jahoni, dedilar.
Qiz bori latif, misoli gulgʻuncha edi,
Gulgʻuncha magar qancha esa, shuncha edi.
Boqqan necha koʻz borki, faqat mast boʻldi,
Mast boʻlsa-da gul vasliga toʻymas boʻldi [2,418-bet].

Tabiat Shahribonuni goʻzallik bilan siylagan boʻlsa-da, unda nutq irod etish qobiliyati yoʻq edi. Otasi oʻz jonini nisor qilib, farzandiga til baxshida etadi. Ham

tabib, ham bashoratchi bo‘lib ulg‘aygan qiz faqat haqiqatni so‘zlardi, xalq dardiga malham bo‘lardi. Ammo qudratli podshoning boyligiga mahliyo bo‘lib, unga turmushga chiqadi va haqgo‘y qiz xalqidan ajralib, podshoning duogo‘yiga aylanadi. El unga shunday baho beradi:

El ichra ataldi avval Mulla bonu,

So‘ngroq dedilar ismini Tilla bonu[2,432-bet].

Oltin-u tilla taqinchoqlarga mukkasidan ketgan Shahriboni o‘zligini yo‘qotib, ertaklardagi kabi oltinga aylanib fojiali qismat topadi.

Doston syujetining rivoyat asosiga qurilishida folklorizmni, tili va tasvir usulida Alisher Navoiy ijodidan ilhomlanishni anglash mumkin. Zero, adabiyotshunos D.Quvvatova ta’kidlaganidek, “XX asr ikkinchi yarmi poemachiligida, avvalo, folklor asarlari va Sharq mumtoz adabiyotining hayotbaxsh an‘analari samarali ta’sir ko‘rsatdi”[3,4-bet].

Jamol Kamol baytlaridagi ruju’ san’atining qo‘llanilishi Alisher Navoiy misralarining shaklan va mazmunan yangilangan, zamonaviy variantidek yangraydi. Alisher Navoiy “Farhod va Shirin” dostonida:

“Shabistonida tug‘di bir yangi oy,

Yangi oy yo‘qki, mehri olamoroy” [1,46-bet],-

deya farznd ne‘matidan bahramandlik voqeligini badiiy ifoda etgan.

Jamol Kamolning “Shahribonu” dostonida esa:

Men bandayi bechoraga farzand berding,

Farzand demakim, diydai ravshan berding, [2,418-bet]. -

deya uzoq kutilgan farzand quvonchi aks ettirilgan.

Ushbu baytlararo mushtaraklikni faqat mazmun va tasvir usuli emas, unda qo‘llanilgan istiora, tamsil, tasbe’ va ruju’ san’atlari ham ta’minlab turibdi. Voqelikni tasvirlashdagi tuyg‘ular oqimining silsilasi ham falsafiy-badiiy jihatdan bir nuqtada kesishadi, ammo zamon nuqtai nazaridan farqlanadi. “Shahribonu” minidoston hisoblanib, mazmunan yirik umuminsoniy g‘oyani o‘zida aks ettirgan. Unda ertak dostonning janr xususiyatlari ham mavjud.

Shahribonuni komillik sari etaklovchi ustozlar bo‘lmagach, u nafsga mag‘lub bo‘lib, oltin qurboniga aylanadi. Dostonda moddiy ne‘matlarga mukkasidan ketgan malika – Shahribonu misolida boylikka qullik insonni fojiaga etaklashi mumtoz usulda bayon etilgan. Haqiqat va yolg‘on tushunchalari rad etib bo‘lmas dalillar bilan tasvirlangan. Xotimada shoir rost va yolg‘onga bo‘lgan o‘z munosabatini quyidagicha bayon qiladi:

Rost aytsang – xalqdin jafo kelgay,

Yolg‘on aytsang – Haqdin balo kelgay[2,437-bet].

Xullas, Jamol Kamol dostonlaridagi liro-epik tasvir uyg‘unligi, adabiy turlarning bir-biriga tutashishi, o‘ziga xos poetik xususiyatlari, originalligi kabi xususiyatlar “Eshikda Oy to‘lqini”, “Quyosh chashmasi”, “Shahribonu” dostonlari misolida tadqiq etildi.

Jamol Kamol she’riyatida epik voqelikning drammatizmga boy, avj nuqtasini tasvirlash, undan tuyg‘u va fikrlarga dinamik kuch olish individual uslub qirrasini sanalib, bu badiiy ko‘rsatgich shoir dostonlaridagi liro-epik tasvir uyg‘unligini keltirib chiqargan. Liro-epik tasvir uyg‘unligi esa shoir dostonlaridagi

kompozitsion markazning aniq, ixcham, ravon ko‘rinishda ifodalanishini ta’minlagan. Shuning uchun Jamol Kamol dostonlari siqiq syujet asosiga qurilgan bo‘lib, ularda badiiy jimjimadorlik, ortiqcha voqelik tasviri uchramaydi. Liro-epik tasvir uyg‘unligi hajman siqiq dostonlaridagi epik voqelikning tasvirida lirik me’yorlarga siljish mavjudligini ko‘rsatadi.

Adabiyotlar:

1.Алишер Навоий. Фарҳод ва Ширин. www.ziyouz.com кутубхонаси, – Б.46.

2.Жамол Камол. Сайланма. Олти жилдлик. II жилд. Ёнаётган дала. – Тошкент: Ғ.Ғулом номидаги нашриёт-матбаа уйи, 2018. –Б.437.

3.Қувватова Д. XX аср иккинчи ярми ўзбек поэмачилигида жанр ва услуб ранг-баранглиги. – Тошкент, Фан, 2010. – Б. 4.

“SHUM BOLA” QISSASIDAGI BA’ZI DIALEKTIZMLAR XUSUSIDA

**Bobotayev Mirjalol Ibodulla o‘g‘li,
SamDU mustaqil tadqiqotchisi**

O‘zbek tili dunyodagi eng ko‘p sheva va lahjalarga ega bo‘lgan boy til hisoblanadi. Vaqtlar o‘tishi bilan esa sheva va adabiy tilimiz o‘rtasidagi farqlar sezilarli darajada yo‘qolib bormoqda. Shu sababli tilimizning ko‘rki hisoblanmish sheva va lahjalarimizni hozirgi zamon tilshunosligining tadqiqot usullari bilan tekshirish ishlarini jadallashtirish, zamonaviy o‘zbek tilshunosligining muhim va dolzarb masalalaridan biriga aylandi. Shu jihatdan shevalarimizni har jihatdan tadqiq qilish hozirgi tilshunosligimiz oldida turgan asosiy masalalardan biri bo‘lib qolmoqda.

Mustaqillik yillarida o‘zbek dialektologiyasining deyarli barcha sohalari bo‘yicha tadqiqotlar bajarilgan bo‘lsa-da, hali o‘rganilishi va tadqiq qilinishi kerak bo‘lgan jihatlari ko‘p. Xususan, o‘zbek tilini, uning ma’no qirralarini izohlovchi bir qancha lug‘atlar mavjud bo‘lib aynan mazkur lug‘atlardagi dialektizmlar hamon o‘rganilmay qolmoqda. Bu “O‘zbek tilining izohli lug‘ati”dagi dialektizmlarga ham tegishlidir. “Innovatsiya – bu kelajak degani. Biz buyuk kelajagimizni barpo etishni bugundan boshlaydigan bo‘lsak, uni aynan innovatsion g‘oyalar, innovatsion yondashuv asosida boshlashimiz kerak” [1].

Agar xalq shevalari o‘z vaqtida o‘rganilmas ekan, ular davr o‘tishi bilan iste’moldan chiqadi. Zero, “til doimo o‘shishda, rivojlanishda bo‘lgan dinamik hodisadir”. [2] Shu bois ham o‘zbek tilshunosligida xalq shevalarining u yoki bu xususiyatlarini an’anaviy metodlar bilan birga tilshunoslikning yangi metodlari bilan tadqiq etish eng dolzarb masala ekanligi bilan ahamiyat kasb etadi. Shevalarimizni o‘rganish yosh avlodni milliy g‘oya ruhida tarbiyalash imkoniyatini tug‘diradi. Bu borada prezidentimiz Sh.M.Mirziyoevning: “...o‘zbek tilining o‘ziga xos xususiyatlari, shevalari, tarixiy tarqqiyoti, uning istiqboli bilan bog‘liq ilmiy tadqiqotlar samarasini oshirish” [3] haqidagi fikrlari alohida e’tiborlidir.

Yuqoridagilardan kelib chiqqan holda o‘zbek shevalarining katta bir qismi aynan xalqimizning milliyligini aks ettirib turuvchi ajdodlardan avlodlarga o‘tib

kelayotgan qadim meros hisoblanadi. Bu borada biz aynan ushbu jihatlarni o'zida aks ettiruvchi asarlarga e'tiborimizni qaratdik.

O'zbek nasrining yetuk donishmandlaridan biri G'afur G'ulom yaratgan asarlar naqadar xalqchilligi bilan O'zbekistonda balki xorijiy mamlakatlarda ham e'tirof etib kelinmoqda. Adib yozgan asarlar kirib bormagan o'zbek xonadoni bo'lmasa kerak. Adibni yosh avlodga maktab davridayoq tanitadigan ajoyib asarlaridan biri "Shum bola" qissasidir. Biz mazkur qissada uchraydigan ayrim shevaga oid so'zlar tahlili bilan qiziqdik. Quyida ayrim dialektlarimiz misolida bu jihatlarni ko'rib chiqamiz.

Moyak– Tovuqning tuxum qilishi kerak bo'lgan yerga qo'yiladigan tuxum yoki tuxumga o'xshash narsa. *Kulrang tovug'im piyozdan qilingan moyak ustida tug'ib o'tirar edi.* [4,12] Bu misolda moyak aynan o'z ma'nosida, ya'ni tuxum qilishi kerak bo'lgan yerga qo'yiladigan tuxum yoki tuxumga o'xshash narsa ma'nosida ifodalangan.

"O'zbek tilining izohli lug'ati"da **moyak** so'zi quyidagi ma'nolarda izohlangan. Birinchi ma'nosi: shevaga oid so'z bo'lib **tuxum** ma'nosida qo'llaniladi. *Bir guruh bola moyak urishtiryapti.* T. Murod, Ot kishnagan oqshom. Ikkinchi ma'nosi: Erkaklarning yorg'oq ichida joylashgan bir juft jinsiy bezi; urug'don (spermatozoid va erkaklar jinsiy gormoni ishlab chiqaradi). O'zbekiston milliy ensklopediyasida ham aynan shu tarzda izohlangan.[5,770]

Moyak so'zi "O'zbek xalq shevalari" lug'atida [6,335] **mayak** tarzida Farg'ona hududida asosan "tuxum" ma'nosida, Shimoliy Xorazmda ham **moyak** ma'nosida ishlatilishi ko'rsatilgan. Qipchoq lahjasining ayrim hududlarida, masalan, Forish tumanida yashovchi aholi vakillari tomonidan ham **mayak** so'zi **tuxum** ma'nosida ishlatilishini ko'rishimiz mumkin.

Chalma– Qo'y-echki oyog'i ostida to'planib, qatlam hosil qilgan go'ng. [Omonboy] Ayniqsa, gardishni ko'rib meni chalma quyish uchun qishloqqa chiqib ketyapti, deb o'ylagan ekan. [4,16]

"O'zbek tilining izohli lug'ati"da **chalma** so'zi quyidagi ma'nolarda izohlangan. Birinchi ma'nosi: Mol go'ngidan katta chamberak qolipga solib yasalgan yoqilg'i. Chalma quymoq. Sakkiz gektar chiqadigan o'rikzorga qarash, bahor ayozlarida chalma tutatish Omonning bo'ynida edi. Sh. Xolmirzayev, Bodom qishda gulladi.

Ikkinchi ma'nosi: shevaga oid so'z bo'lib aynan salla. [Qori] Choponining ustidan chakmonini kiydi, boshini chalmasi bilan tang'idi. Toshmatov, Erk qushi. Uchinchi ma'nosi: Do'ppi, to'n va shu kabilarning chetiga tutiladigan ensiz jiyak ma'nosida qo'llangan. Do'ppi chalmasi. To'n chalmasi. "O'zbek xalq shevalari" lug'atida [6,293] chalma so'zi Buxoro aholisi vakillari tomonidan ichiga qovoq, piyoz solib pishiriladigan yupqa uy noni ma'nosida ishlatiladi.

Guppi – "O'zbek tilining izohli lug'ati"da quyidagi ma'nolari ifodalagani keltirilgan. Birinchi ma'nosi: shevaga oid so'z bo'lib Hovliqma, shoshma-shoshar ma'nolarini anglatadi. Ochil Kuch guppiroq odam, gapga tez uchadi. M.M.Do'st, Galatepaga qaytish.

Ikkinchi ma'nosi: shevaga oid so'z bo'lib Qalin paxtali chopon, to'n ma'nosini bildiradi. "Shum bola" qissasida aynan ikkinchi ma'nosini ifodalab

kelgan. Bu yerda joningizga orom beradigan hamma narsa topiladi: saldoti shim deysizmi, poyma-poy sag'ri kavush deysizmi, biror yetti yilgina kiyilgan, asli matoi nima ekanligi ma'lum bo'lmagan guppi deysizmi, Mallaxon zamonidan qolgan mursak deysizmi, chevar qizlar uchun rango-rang quroqlar deysizmi, ot bo'ktargisi, yolpo'sh, gulchin bilan tagcharm qo'yilsa hali kiysa bo'ladigan nimdoshgina saxtiyon mahsi deysizmi, paytavabop mollarning va lungibop matolaming son-sanog'i yo'q [4.18].

Mursak– “O'zbek tilining izohli lug'ati”da quyidagi ma'nolari ifodalagani keltirilgan. Birinchi ma'nosi: Ayollar kiyadigan yengi kalta ustki milliy kiyim; yengsiz kamzul.Mallaxon zamonidan qolgan mursak deysizmi, chevar qizlar uchun rango-rang quroqlar deysizmi, ot bo'ktargisi, yolpo'sh, gulchin bilan tagcharm qo'yilsa hali kiysa bo'ladigan nimdoshgina saxtiyon mahsi deysizmi, paytavabop mollarning va lungibop matolaming son-sanog'i yo'q [4.18].

Ikkinchi ma'nosi: shevaga oid so'z bo'lib Marhuma tobuti ustiga yopiladigan uzun yengil kamzul ma'nosini ifodalaydi. Yuqorida keltirilgan misolda esa mursak birinchi ma'noni, ya'ni milliy kiyim ma'nosini ifodalab kelmoqda.

Lung– “O'zbek tilining izohli lug'ati”da *forscha so'zdan olingan bo'lib* – bel va songa o'raluvchi mato parchasi ma'nosini ifodalashi keltirilgan. Ya'ni hammomga kirganda, beldan pastni berkitish uchun bog'lanadigan mato.Mallaxon zamonidan qolgan mursak deysizmi, chevar qizlar uchun rango-rang quroqlar deysizmi, ot bo'ktargisi, yolpo'sh, gulchin bilan tagcharm qo'yilsa hali kiysa bo'ladigan nimdoshgina saxtiyon mahsi deysizmi, paytavabop mollarning va lungibop matolaming son-sanog'i yo'q [4.18].

Yuqoridagi misoldan ko'rishimiz mumkinki asarda lungi aynan yuqorida ta'kidlangan ma'noda qo'llanilgan.

Ikkinchi ma'nosi: Eskirgan so'z bo'lib sartaroshlikda soch-soqol oldiruvchi kishining ko'ksiga tutiladigan sochiq ma'nosini ifodalaganini bilishimiz mumkin. *Mo'ysafid sartarosh uni [Yo'lchini].. kursiga o'tqazib, kirdan qatirmalanib yaltiragan lungini bo'yniga ilib, boshish ishqalay boshladi.* Oybek, Tanlangan asarlar.

Uchinchi ma'nosi: shevaga oid so'z bo'lib Sochiq, piyola sochiq ma'nolarini ifodalaydi. *Samovarda choyfurushning bir o'zi mog'or lungisi bilan yelpini bo'tirar edi.* M. Ismoilov, Farg'onat. o.

“O'zbek xalq shevalari” [6.174] lug'atida esa bu so'z biroz boshqacharoq izohlangan, ya'ni lungi Janubiy Xorazm hududida kalta ishton ma'nosida ishlatiladi.

Bacha/Bachcha – “O'zbek tilining izohli lug'ati”da *forscha so'zdan olingan bo'lib* odam bolasi ma'nosini ifodalaydi. Bachaga ish buyur, izidan o'zing yugur. Maqol [7.181].

“O'zbek xalq shevalari” lug'atida [6.335] ham bacha termini bola ma'nosida izohlanib qarluq lahjasining asosan Samarqand, Buxoro, Qashqadaryo, Farg'ona, Tojikiston aholi vakillari tomonidan muomaladagi termin hisoblanadi. Shunog' qilib bacha ahasini topib oldi. Bundan tashqari bacha termini “o'g'il bola” ma'nosida Forish hududida muomalada bo'lgan. Bachali uy guliston bachasiz uy

cho‘liston. Bu termin yana bir ma’noda, ya’ni raqqos bola ma’nosida (ilgari bacha o‘ynardi, arxeiklashgan) Toshkent hududida muomalada bo‘lganligini bilishimiz mumkin. Men bir necha yil avval ota kasbimning hadeganda jo’niga tushib ololmay, anchagina shaloqliklar ham qilganman. Avvaliga yigit-yalanglarning bazmida bachcha bo‘lib o‘ynab pul topdim [4.32]. Yuqoridagi misoldan ko‘rishimiz mumkinki, asarda bachcha termini aynan raqqos bola ma’nosini ifodalayapti.

Shuningdek, bu termin (bacha) jins kategoriyasini ham ifodalaydi. Ammo, yakka holatda jins kategoriyasini ifodalamaydi. Qachonki, jinsni ifodalash uchun undan oldin o‘g‘il yoki qiz so‘zini qo‘llash kerak bo‘ladi. Masalan, qiz bacha, o‘g‘il bacha.

Xulosa qilib shuni aytish mumkinki, shevalarimiz asrlar davomida jonli xalq tilida sayqal topib adabiy tilimizga o‘zgacha ko‘rk bag‘ishlab kelmoqda. Shunday ekan keyingi tadqiqotlar aynan milliyligimiz, til madaniyatimizni, mentalitetimizni o‘zida mujassam etadigan lingvokulturologik yo‘nalishdagi tadqiqotlar bo‘lishini istaymiz.

Adabiyotlar:

1.Ўзбекистон Республикаси Президенти Ш. М. Мирзиёевнинг 2018 йил 28 декабрдаги “Тараққиёт йўлимизнинг шиддати янада ошаверади” мавзусидаги Олий Мажлисга Мурожаатномаси / Халқ сўзи, 2018, 29 декабрь.

2.Нурмонов А. Лингвистик тадқиқот методологияси ва методлари. – Тошкент, Академнашр, 2010. – Б. 44.

3.Mirziyoyev Sh.M. Milliy o‘zligimiz va mustaqil davlatchiligimiz timsoli / O‘zbekiston ovozi, 2019-yil 22-oktabr.

4.G‘afur G‘ulom. “Shum bola” qissasi. –Тошкен, Yoshlar nashriyoti uyi, 2018.-192 b.

5.“Ўзбекистон миллий энсклопедияси” Давлат илмий нашриёти. – Тошкен, 2006.

6.Ш.Шоабдурахмонов, А.Ишаев, Ш.Носиров, Х.Узоқов, Д.Абдурахмонов. Ўзбек халқ шевалари луғати. –Тошкен, “Фан”, 1971.

7.Ўзбек тилининг изоҳли луғати. Беш жилдли. Биринчи жилд. Тузатилган 2-нашри. –Тошкен, “O‘zbekiston nashriyoti” Давлат унитар корхонаси, 2020. – 680 бет.

“SUDXO‘RNING O‘LIMI”DA YASAMA TERMINLAR STRUKTUR XUSUSIYATI

Xasanov A.I. SamDU o‘qituvchisi

Terminlar tadqiqiga bag‘ishlangan ilmiy adabiyotlarda terminlarning tuzilishi jihatidan turlari turlicha tasnif qilingan. Ayrim manbalarda terminlarning tuzilishiga ko‘ra bir komponentli va ko‘p komponentli, ba’zi manbalarda oddiy va murakkab terminlar, boshqalarida esa soddada, murakkab, termin-birikmalar kabi tadqiq etilgan. Tilshunos olim R.Dubuk hamma terminlarni morfologik tuzilishiga ko‘ra ikki turga bo‘ladi: 1.Oddiy terminlar (bitta so‘zdan iborat terminlar).

2. Murakkab terminlar (ikkita yoki undan ortiq soʻzlardan iborat terminlar) [1, 38–39.].

Termin soʻz birikmalari sodda va qoʻshma turlarga ham ajratilib, sodda terminologik birikmalar mustaqil va bogʻlangan soʻzlardan iborat boʻlsa, murakkab terminologik birikmalarda bogʻlangan soʻz asosiy soʻzning turli maʼnolarini belgilaydi. Terminlar asosan tildagi mavjud soʻzlardan vujudga keladi shuning uchun terminlar strukturaviy har xilligi shu tildagi xususiyatlarga qarab belgilanadi.

A.Ya.Kovalenko terminlarni tuzilishi jihatidan uch turga boʻlib oʻrganadi: 1) sodda terminlar, yaʼni bitta soʻzdan iborat boʻladi. 2) murakkab terminlar, ikkita soʻzdan iborat boʻlib chiziqli bilan yoziladi. 3) termin-birikmalar-bir nechta soʻz komponentlaridan iborat [3,220]. I.Yuldashevning doktorlik dissertatsiyasi avtoreferatida oʻzbek tilidagi kitobchilikka oid terminlar affiksatsiya va sintaktik usul bilan hosil qilingan terminlar hamda ichki va tashqi manbalar asosida taraqqiy etgan terminlar sifatida oʻrganilgan [5,15-16]. Oʻzbek bank-moliya terminologiyasini oʻrgangan olimi E.Shirnova tadqiqotida esa terminlar struktural jihatdan bir komponentli va koʻp komponentli terminlarga ajratib tahlilga tortilgan [4,20-21]. Rus olimi S.V.Grinev-Grinevich fikriga koʻra, terminlarni termin-soʻz (bir morfemali va koʻp morfemali) va termin-birikma (ikki va undan ortiq oʻzakli leksemalar)ga ajratish lozim [2, 15-16]

Oʻzbek tilidagi yoʻlsozlik terminlarining struktur-semantik xususiyatlarini oʻrgangan tilshunos T.Valiyev yoʻlsozlik terminlarini struktur jihatdan quyidagicha tasnif qiladi: 1) sodda terminlar: rejalash, shosse, shtir; 2) qoʻshma terminlar: ravoqqulf, choktoʻldirma; 3) juft terminlar: sement-tuproqli, temir-beton, termos-bunker; 4) birikma terminlar: yoʻl qoplamasi, yoʻl poyi, yoʻl chetidagi ariq (kyuvet); 5) qisqartma terminlar: ABS (avtomatlashtirilgan boshqaruv sistemasi), QTL (qurilishni tashkil etish loyihasi).

Yuqoridagi tadqiqotlarga asoslanib, S.Ayniyning “Sudxoʻrning oʻlimi” asaridagi terminlarni struktur jihatdan ikki guruhga ajratib oʻrganishni lozim topdik: sodda terminlar va murakkab terminlar. Shuni taʼkidlash muhimki, S.Ayniyning “Sudxoʻrning oʻlimi” povestida qoʻllangan terminlarning koʻpchiligi sodda soʻz shaklidagi terminlardir. Ular oʻz navbatida sodda tub soʻz shaklidagi terminlar va yasama soʻz shaklidagi terminlarga ajraladi. “Sudxoʻrning oʻlimi” asaridagi sohaviy terminlarning yasashiga oid tahlillarimiz shuni koʻrsatadiki, -chi (*tanburchi*, *dutorchi*), -li (*tuyoqli*), -xoʻr (*sudxoʻr*), -furush (*chinnifurush*), -lik (*attorlik*), -dor (*doʻkondor*) kabi adabiy tilda faol soʻz yasovchi qoʻshimchalar sohaviy terminlar yasashda ham oʻz faolligini saqlagan. Asarda qoʻllangan kasb-hunarga oid soʻzlar semantik-struktur jihatdan tahlil qilinganda, ularning aksariyati affiksatsiya usuli bilan hosil boʻlgan terminlar ekanligi aniqlandi. Bu borada D.S.Lottening quyidagi fikri oʻrinlidir: “Terminlarning qisqa boʻlishini talab etish, soʻz yasovchi elementlarga yana qator qoʻshimcha talablar qoʻyadi. Avvalo shuni qayd etish kerakki, soʻng qoʻshimchalarning oʻzi imkoni boricha qisqa boʻlishi va uni haqiqatdan ham zaruriyat tugʻilganda, maʼnaviy yoxud fonetikaviy mulohazalardan kelib chiqib, terminlarga joriy etish lozim” [6, 20].

V.M.Leychik ta'kidlaganidek, "terminlar aksariyati maxsus leksik birliklar, ya'ni so'z yasash usullari yordamida hosil qilinadi" [7,52]. Demak, affiksatsiya terminning ichki tuzilishini yaratishda muhim ahamiyatga ega. "Sudxo'ring o'limi" asarida soha terminlari yasalishiga oid ma'lumotlarni tahlil qilganimizda, yasama terminlarning quyidagi ko'rinishlarini ifoda etishimiz mumkin: a) prefiks bilan yasalgan terminlar: hamsaboq. b) suffiks bilan yasalgan terminlar: tergovchi, chimxo'r

Qissada prefiks bilan yasalgan terminlar sanoqli qo'llangani sababli ularning tahliliga to'xtalishni lozim topmadik. Affiksatsiya usuli bilan yasalgan terminlarni atroflicha tahlil qilishga harakat qildik. Tilimizdagi ba'zi terminlar konversiya usuli bilan ham paydo bo'lishi mumkin. Konversiya bilan yasalgan terminlar asosan bir terminning yoki umumiste'moldagi so'zning bir so'z turkumidan boshqa so'z turkumiga o'tishi bilan hosil bo'ladi. Asar matnida qo'llangan *sinish*, *qaychilash* kabi so'zlar bu usulga misol bo'la oladi. Masalan, fe'l so'z turkumiga oid *sinish* leksemasi iqtisodiy termin hisoblangan *bankrot*ning muqobili sifatida ot so'z turkumiga ko'chgan.

Oradan ko'p vaqt o'tmayin podshohlik banki to'g'risida ham **sinish** (bankrot) ovozlari chiqara boshladilar, har vaqt gazetalarda imperator askarining mag'lubiyat xabari yozilsa, shutqorilar u xabarlarini ikki-uch barobar oshirib, Qori-Ishkambaga yetkazadilar va podshoxlik bankidan ko'z quloq bo'lishga, mabodo sinib qolsa, uning «qon yutib to'plagan pullari» «kuyib qolishi» mumkin deb maslahat beradilar.

Qaychilash termini bilan ham yuqoridagi holat yuz bergan. Ya'ni qaychilamoq fe'li adabiy tilimizda istalgan buyumni qaychi yordamida qirqmoq, kesmoq ma'nolarida qo'llanishi ma'lum. Bugungi kunda konversiya usulida mazkur leksema sartaroshlik kasbiga xos bo'lgan terminni ifodalash uchun hizmat qiladi: - Xo'p, unday bo'lsa... - dedi sartarosh salmoqlab va Qorining labini ikki barmog'i bilan burib ushlab, mo'ylovini **qaychilash**ga kirishdi.

Shuni ta'kidlash kerakki, arab, o'zbek va boshqa toponimlar tarkibiga turli komponentlar sifatida turli tojikcha leksemalar, ayniqsa, ko'rsatkich atamalar kiradi. Qissada qo'llangan shaxs otlari tahlil qilinganda, ular tarkibida o'zbekcha qo'shimchalarga nisbatan fors-tojik tilidan o'zlashgan qo'shimchalar ko'proq qo'shilganini kuzatdik. Masalan, shaxs oti yasovchi -xo'r affiksi yordamida *chimxo'r*, *sudxo'r*, *foydxo'r* yasalmalari hosil qilingan va asarda ko'p qo'llangan.

-**xo'r** affiksi asli tojik tilidan o'zlashgan so'zlar tarkibida kelib so'z yasallish asosidan anglashilgan narsani yeyuvchi, ichuvchi, shu narsani iste'mol etishni yaxshi ko'ruvchi shaxs ma'noli qo'shma otlar yasaydi, nonxo'r, palovxo'r, mayxo'r, araqxo'r, choyxo'r va boshqalar. Tarkibida -xo'r elementi bor tojik tilidagi yasama so'zlarning anchasi o'zbek tiliga o'zlashgan. Keyinchalik esa -xo'r o'zbek tilining o'zida ham xuddi shu tipdagi shaxs otlari yasaydigan vositaga aylangan. Ma'lumki, insondan boshqa jonzorlar ham yeydi, ichadi, ya'ni yeyish, ichish harakati insondan boshqa jonlilarga ham xos. Shu tufayli -xo'r qo'shimchasi ba'zi jonlilar nomini bildiruvchi otlar ham yasaydi: hasharotxo'r, o'laksaxo'r. Demak, bunday so'zlarda ham -xo'r qo'shimchasi "yeyuvchi narsa" ma'nosini

bildiradi. Nimani yeyish esa soʻz yasash asosidan anglashiladi. Lekin bunday yasama soʻzlar kam miqdorda.

-chi affiksi ishtirokida “Sudxoʻrning oʻlimi” povestida biror kasb, mutaxassislik yoki muayyan xizmat sohasi bilan shugʻullanuvchi shaxs nomlarini ifodalovchi terminlar yasalgan: *dutorchi, chayqovchi, tanburchi, meshkobchi, samovarchi* va hokazo. Mazkur affiks termin yasashdagi vazifasi jihatidan -furush va -soz affikslari bilan bir-biriga yaqin.

Xulosa qilib aytganda, povestda tuzilishiga koʻra terminlarning katta qismini sodda soʻz shaklidagi terminlar tashkil qiladi: *ustara, yirtish, xudoyi, janoza, mayda, bank, lungi, kosib, kassa, garrov, salla, doka, tasbeh* kabi.

Kompozitsion yoʻl bilan hosil qilingan qoʻshma soʻz shaklidagi birikma terminlar asosan ot+ot tuzilish strukturasiga ega: *mozorboshi, zarxarid, zarkafil, qushbegi, joynamoz, tilxat* kabi. Ammo ayrim oʻrinlarda sifat+ot, son+ot koʻrinishidagi terminlar ham qoʻllangan. Sintaktik usul yordamida shakllangan birikma terminlar ot+ot (*oʻlik yirtishi, pulning tani*), sifat+ot (*naqd pul, tashqi savdo, sariq chaqa, katta protsent*), ot+harakat nomi (*soch olish, moʻylov qaychilash, ustara urish*), ot+feʼl (*foйда olmoq, qarz bermoq*) koʻrinishidan iborat.

Foydalanilgan adabiyotlar:

1.Dubuc, R. (1997). Terminology: A practical approach. Canada National Library. pp. 38–39.

2.Гринев-Гриневич С.В. Терминоведение. –М.,Академия, 2008.–304с.

3.Коваленко А.Я. Общий курс научно-технического перевода/ А.Я. Коваленко – Киев: ИНКОС, 2003. – 320с.

4.Ширинова Е. Ўзбек банк-молия терминологияси. Ф.ф.ф.д (PhD).илмий даражасини олиш учун ёзилган дисс автореферати. -Тошкент, 2020. 200 бет.

5.Юлдашев И. Ўзбек китобатчилик терминологияси: шаклланиши, тараққиёти ва тартибга солиш. Ф.ф.д. дисс автореферати. -Тошкент, 2005. 128 бет.

6.Лотте. Д.С. Краткие формы научно-технических терминов. – Москва.,1961.

7.Лейчик В.М. Терминоведение. Предмет, методы, структура / В. М. Лейчик. – М., Ком.книга, 2009. –С. 52.

8.Жумаев Р. Садриддин Айний асарларидаги арабча топонимлар. Хоразм Маʼmun akademiyasi axborotnomasi –10/4-2022.

DUNYO MIFOLOGIYASIDA AJDARHO OBRAZ TALQI

**Achilova Nurxon Normammedovna
SamDU mumtoz adabiyot tarixi
kafedrasi mustaqil izlanuvchisi
Abduraxmonova Munira Istam qizi
Sh.Rashidov nomidagi SamDU
“Buyuk ipak yoʻli” markazi xodimi**

Ajdarho haqidagi dastlabki yozma ma'lumotlari (iyerogliflar) Qadimiy Misr bitiklari va shumer-bobil xalqlari dostonlarida keltirilgan bo'lib, ushbu manbalarda ajdarho azaliy yovuzlik obrazida namoyon bo'ladi. Qadimiy Bobilda, nabirasi Marduk tomonidan o'ldirilgan ma'buda Tiamat ajdarho obrazida keltiriladi. Shuningdek Qadimiy Misrda, quyoshni yeb quyishga intiluvchi ulkan sudraluvchi ajdarho qiyofasida Apep namoyon bo'ladi. Unga qarshi ma'bud Ra kurashadi va g'olib chiqadi. Keyinchalik ajdarlarga qarshi ma'budlar emas yarim ma'budlar kurash olib boradigan afsonalar paydo bo'la boshladi.

Misol tariqasida Qadimiy Yunoniston qahramoni Geraklning o'n ikkinchi qahramonligini keltirish mumkin. Vaqt o'tgani sari, dastlabki o'rta asrlarda jasur ritsarlar yovuz ajdarlarga qarshi olib borgan kurashlari to'g'risida afsona va rivoyatlar paydo bo'la boshladi (Nibelunglar uzugi - german-skandinav xalqlari dostoni). Qadimgi slavyan xalqlari xalq og'zaki ijodida ham ajdarho insoniyat dushmani sifatida namoyon bo'ladi, biroq ushbu doston va ertaklarda ular insoniyatga koinot darajasida xavf tug'dirmaydilar, odatda ular qaroqchilik ("Dehqon o'g'li Ivan va Chudo-Yudo"[1] ertagi) va odamlarni asir olish bilan ("Dobrynya Nikitich va Zmey Gorinich (Olovli Ilon) [2]" to'g'risidagi doston) shug'illanadilar.

Sharq mif va afsonalarida ajdarho, G'arb mamlakatlari singari yovuz obrazda namoyon bo'lmaydi. Misol uchun, "To'rt ajdarho haqidagi Xitoy afsonasida [3]" ajdarholar odamlarga yordam berishga intiladilar, va hatto jazolanishlarini bilsalar ham, Osmon Imperatorining ruxsatisiz xarakat qiladilar va odamlarga suv keltiradilar. Yana bir Sharq mifologiyasida yomg'ir va daryolarni boshqaradigan Apalala suv ajdari haqida so'z boradi [4]. Afsonaga ko'ra, Apalala odamlar va ularni ekinlarini yovuz ajdarholar tomonidan uyushtiriladigan to'fon va buronlardan himoya qilgan. Biroq vaqt o'tishi bilan odamlar unga hurmat bajo keltirmay qo'yishadi, bundan jahli chiqqan ajdarho odamlar ustiga suv toshqinlarini yuboradi va odamlarga ko'plab talofatlar yetkazadi. Shundan so'ng, odamlarga rahmi kelgan Buddaning o'zi Apalalani tartibga chaqiradi va uni o'ziga shogird qilib oladi. Buddaviylikni qabul qilgan Apalala ortiq insonlarga ziyon keltirmaslikka va'da beradi, biroq har o'n ikki yilda unga o'lpon berilishini so'raydi.

Oltoylik olim L.P.Potapovning ma'lum qilishicha, oltoy shamanining qamchisi ilon sifatida tushunilgan, shomon o'z ilon-qamchisidan dushman ruhlardan asranish uchun foydalangan. «Bundan shu narsa tushuniladiki, ilon shomonning bosh himoyachisi va homiysi sanalgan: bekorga uning libosi ilonni tasvirlagan uzun tasmalar va kamarlar bilan bezatilmagan. Shunisi diqqatga sazovorki, qozoqlar, qirg'izlar, qoraqalpoqlar, oltoyliklar va boshqa turkiy xalqlar e'tiqodiga ko'ra, albasti, yalmog'iz kabi shaytoniy mavjudotlar va yovuz ruhlar qamchilardan o'ta darajada qo'rqadilar. Shu sababli oltoyliklar qamchini turli ins-jinslardan, umladan, go'daklar ruhini o'g'irleydigan iblisdan himoya qilish uchun chaqaloqlar beshigiga bog'lab qo'yishgan. Insonga dushman ruhlarning ilondan, uning shaklidagi qamchidan qo'rqishi oltoy eposlarida o'z ifoasini topgan. Bahodir Sulutoy Xon o'liklar mamlakati hukmdori Yerlikni tutib olib, uni kulrang ilonga

o'xshash qamchi bilan savalaydi. Yerlik bundan qattiq dahshatga tushadi va Sulutoy Xonga yalinadi:

Endi yo'lingda senga qarshi turmayman,
Yer yuziga qayta chiqmayman [5] ...

Turkiy xalqlar folklorida uchraydigan yana bir mifologik obraz Yuho (Yuxva) hisoblanadi. Afsonaga ko'ra, uzoq umr ko'rgan ajdarhoning Yuhoga aylanadi. Yuho go'zal ayol ko'rinishiga kira oladigan yovuz ajdarho yoki ilon bo'lib, u erkaklarni o'ziga og'dirib halok etadi. Ayrim xalqlar (boshqird, tatar) mifologiyasida Yuho erkak kishini o'zining go'zalligi bilan rom etib unga turmushga chiqadi va tunda uning qonini ichib o'ldiradi. Yuhoni olov va sho'r yegulik yordamida fosh etish mumkin. Sho'r ovqat iste'mol qilgan Yuho tunda ilojisiz dengiz yoki ko'l bo'yiga ilon shaklida sudralib borib tashnaligini qondirishga harakat qiladi [6].

Boshqa xalqlar mifologiyasida Yuhoning "qarindoshlari" uchraydi. Slavyan va Yevropa xalqlarida ilon ayol shakliga ega bo'lgan Lamiyalar ham Yuho singari suv va g'orlarda yashashadi. Ular ham erkaklarni yo'ldan og'dirib ularni qonini ichib nobud qilishadi. Yuhoning yarim ilon (yoki ajdar) yarim odam qiyofasida yunon mifologiyasidagi Meduza gorgona bilan bog'liqlikni ko'rish mumkin. Biroq Yuhodan farqli ravishda Meduza erkaklarni chiroyi bilan rom etmaydi, u ularni uchratgan zahoti toshga aylantiradi.

Sharq xalqlari orasida uchraydigan yana bir ajdarho - Abraksas haqida Hind mifologiyasida so'z yuritiladi. Ushbu obraz gnostik samoviy ma'bud, Osmonning bosh oliy hukmdori, Zamon va Makon birligini ifodalaydi. Abraksas qadimiy Hind, Fors, Misr san'at asarlarida, odam tanali, xo'roz boshli va oyoqlari o'rniga ilon ko'rinishida tasvirlangan. Kechgi antik va dastlabki o'rta asrlarda ushbu mavjudotning ko'rinishi quyidagicha tafsiflangan: xo'roz – kelajakni ko'ra olish va sergaklik ramzi, ilonlar – ichki sezgi va mulohaza. Abrakas qadimiy ilon – ajdar obraziga kiritilgan o'zgartirishlar natijasida vujudga kelgan deb hisoblanadi [7].

Olib borilgan etnografik tadqiqotlar natijasida Markaziy Osiyoda ajdarholarga nisbatan ikki hil munosabatda bo'lingani aniqlangan. Misol uchun, G. P. Snesev tadqiqotlariga ko'ra qadimgi Xorazmda ilon va ajdarho salbiy va ijobiy talqin qilingan [8, 46-49]. Bunday xolatning yuzaga kelishida, ushbu obrazning Markaziy Osiyodagi dastlabki ijobiy talqiniga keyinchalik boshqa madaniyatlarning qo'shilishi bilan izohlash mumkin. Jumladan, Markaziy Osiyoga Makedoniyalik Iskandarning yurishlari natijasida vujudga kelgan ellinizm ta'sir ko'rsatganligi ma'lum. Ellinizm ta'sirida dastlab ijobiy talqin qilingan ilon - ajdarho obraziga nisbatan yunonlarning salbiy qarashlari ta'siri ko'zatilganligi namoyon bo'ladi. Shu bilan birga, Firdavsiyning Eron va Turon qarama-qarshiligi aks etgan "Shoxnoma" asarida bosh qahramon Rustamning dahshatli ajdarho bilan jang qilgan epizodi mavjud [9,77]. Agar "Shoxnomada" Eron va Turon qarama-qarshiligi aks ettirilganini e'tiborga olsak, Eron qahramoni bo'lgan Rustamning ajdarho bilan jang qilishi mantiqan ajdarhoning Turon tomonda turib jang qilganini anglatadi, shu tariqa qadimiy Eron va Turon xalqlarida ajdarho obrazi ikki hil, ya'ni forslarda salbiy va turkiylarda ijobiy obrazda tasnif qilingani ma'lum bo'ladi. Bunday misolni yuqorida keltirilgan rus-slavyan mifologiyalariga nisbatan ham

keltirish mumkin. Ko'chmanchi turkiy xalqlar bosqinlari ta'sirida, turkiy xalqlar orasida ijobiy hususiyatga ega bo'lgan ajdarholar rus mifologiyasida asosan qaroqchi va talonchi obrazida gavdalanadi. Bunday obrazlarga yana, qadimiy turkiy xalqlarda muqaddas hisoblangan bo'ri obrazini kiritish muki. Ko'chmanchi turkiylar bosqinidan ziyon ko'rgan rus va yevropa xalqlari mif va ertaklarida bo'ri ajdar singari salbiy obrazda gavdalanadi.

Tarix fanlari doktorlari A. M. Belinitskiy va V. A. Meshkerislarning fikriga ko'ra, o'rta asrlar davriga kelib Markaziy Osiyoda ajdarho asta sekinlik bilan to'raligicha yovuz kuchlarni ifodalovchi obrazga aylanadi va qahramonning ajdarho bilan bo'lgan jangda g'alaba qozonishi an'anaga aylangan [10].

Qozog'istonlik mifshunos olim Serikbol Kondibay ajdarhoni ikki turga ajratadi – bugungi kunga qadar qozoq va boshqa turkiy millatlar ertaklari, dostonlari va afsonalarida uchraydigan “ertaklardagi” ajdarho va qadimiy mifologik prototurkiy “boshqa” ajdarho. Ularning tashqi tashqi ko'rinishida deyarli farq bo'lmasda, arab-fors mifologik syujetlariga asoslangan “ertaklardagi” ajdarho yovuzlikni ifodalaydi, undan farqli o'laroq prototurk “boshqa” ajdarhosi – bu totemistik qahramon, u – yaratuvchi, insoniyat bobokaloni, shu sababli uning yovuzlikka dahldorligi rad etiladi.

Serikboy Kondibayning keltirishicha, ajdarhoning “yovuzlik” sifatida talqin qilinishi arab-fors psixologiyasining ilon va ilon sifat mavjudotlarga nisbatan salbiy qaralishiga borib taqaladi, shu sababli zardushtiylik va keyinroq vujudga kelgan islom dini ilon va ajdarhoni salbiy ko'rinishda namoyon etadi. Shu sababli Markaziy Osiyoning turkiy xalqlari folklorida fors madaniyatining kirib kelishi oqibatida ilon (yoki ajdarho) obrazi yovuzlik ramzi sifatida talqin etila boshlagan. Biroq shunga qaramasdan, Markaziy Osiyo turkiy xalqlari folklorida, ayniqsa alplar haqidagi afsonalarda “Ilon-bobo” haqidagi tasavvurlar saqlanib qolingan [11].

Umumiy qilib aytilganda ilon va ajdarho obrazlari qadimiy xalqlar mif va afsonalarida shu darajada uyg'unlashib ketganki, ko'p hollarda ular bitta obrazning turli ko'rinishida namoyon bo'ladilar. Ko'p hollarda ilon-ajdarho miflarda idrokli mavjudot sifatida gavdalanadi. G. Xenkok o'zining “Ma'budlar (yoki xudolar) izi” kitobida ilon va qadimiy insonsifat ma'budlar o'rtasidagi aloqalarga alohida to'xtaladi: “Misrning “Marhumlar kitobi”ga ko'ra, ma'bud Osiris qarorgohi “suv ostida joylashgan, uning devorlari “tirik ilonlar”dan yasalgan... Qadimiy mayyaning diniy “Chilam-Balam Kitobi”da keltirilgan ayrim miflarda Yukatanning (Meksika) dastlabki aholisi “ilon odamlar” bo'lganligi haqida ma'lum qilinadi. Ular o'liklarni tiriltira oladigan va jarohatlarni qo'li bilan davolay oladigan buyuk tabib, qabila sardori Isaman, “Sharq iloni” boshchiligida sharqdan qayiqlarda suzib kelishgan”[12].

Shuningdek qadimiy mayya qabilasi mifologiyasida qirollik sulolalari va yirik shaharlari asoschisi, shamol va suv ma'budi bo'lgan, oliy ma'budlardan biri hisoblangan Kukulkan yoki Ketsalkoatl ilon-ajdarho haqida so'z yuritiladi. Mayya e'tiqodlarining biriga ko'ra, dunyo Kukulkan va Xurokan ma'budlari tomonidan yaratilgan. Mayya qabilasi vakillari Kukulkan ularga baliq ovlashni o'rgatgan, ular uchun yozuv va taqvimni ihtiyo qilgan, shuningdek marosimlarni joriy etgan deb

hisoblaganlar. An'anaga ko'ra, Kulkukanga faqatgina zodagon qatlam vakillari sig'ingan va faqatgina dabdabali marosim bilan zodagon oialadan bo'lgan o'smir yigitlar uning uchun qurbonlik qilingan. Odatda Kukulkan odam boshli va patli ilon ko'rinishida tasvirlangan [13]. Bir qarashda Yevroosiyo qit'asi bilan madaniy aloqalar o'rnatganligi gumon ostida bo'lgan Markaziy Amerikaning mayya kabi qadimiy sivilizatsiyalari miflarida ajdarho obrazining mavjudligi, ajdarho obrazi bir-biriga bog'liq bo'lmagan madaniyatlarda birdek mavjud bo'lganligi to'g'risidagi nazariyani tasdiqlagandek bo'ladi.

Foydalanilgan adabiyotlar:

- 1.Иван – крестьянский сын и Чудо-Юдо (Elektron manba: [Сказка Иван - крестьянский сын и Чудо-Юдо - читать онлайн \(nukadeti.ru\)](http://nukadeti.ru) murojaat etilgan sana: 11.09.2021)
- 2.Про Добрыню Никитича и Змея Горыныча (Elektron manba: [Про Добрыню Никитича и Змея Горыныча. Былина \(lukoshko.net\)](http://lukoshko.net) / murojaat etilgan sana: 11.09.2021)
- 3.Китайская легенда о четырёх драконах (elektron manba: [Китайская легенда о четырех драконах | Древние боги и герои \(drevniebogi.ru\)](http://drevniebogi.ru) / murojaat etilgan sana: 11.09.2021)
- 4.Апалала (elektron manba: [Апалала | Фантастические существа вики | Fandom](http://Fandom) / murojaat etilgan sana: 11.09.2021)
- 5.Потапов Л.П. Луки и стрела в шаманстве и алтайцев. – М.: «Советская этнография», №3, 1934.
- 6.Фольклор – мифология: Юхва (elektron manba: <https://folklor-mythology.ru/yuvha/> murojaat etilgan sana: 03.07.2021)
- 7.Дракон в разных культурах мира (elektron manba: [Драконы в разных культурах мира - Zefirka](http://Zefirka) / murojaat etilgan sana: 14.09.2021)
- 8.Снесарев Г. П. Как вы относитесь к змеям? — Наука и религия, 1983, № 3. Стр. 46-49.
- 9.Семёнов А. А. Этнографические очерки Зеравшанских гор Каратегина и Дарваза. М., 1903. Стр. 77
- 10.Беленицкий А.М., Мешкерис В.А. «Змеи-драконы в древнем искусстве Средней Азии» (elektron manba: <https://dragonology.ru/a-m-belenickij-v-a-meshkeris-zmei-drakony-v-drevnem-iskusstve-srednej-azii/> / murojaat etilgan sana: 15.09.2021)
- 11.Серикбол Кондыбай Змея и дракон: значение образа змеи для познания истории предказахов. Книга вторая. (elektron manba: [Часть вторая. Змея и дракон: значение образа змеи для познания истории предказахов — otuken.kz](http://otuken.kz) / murojaat etilgan sana 17.09.2021)
- 12.Грэхем. Хэнкок следы богов. В поисках истоков древних цивилизаций (elektron manba: [Грэм Хэнкок - Следы богов читать онлайн \(libking.ru\)](http://libking.ru) / murojaat etilgan sana: 17.09.2021)
- 13.Дракон в разных культурах мира (elektron manba: [Драконы в разных культурах мира - Zefirka](http://Zefirka) / murojaat etilgan sana: 14.09.2021).

AZIZ QAYUMOV TALQINIDA “BOBURNOMA” VA BOBUR

Buxorov Sherali
SamDU 2-kurs magistri

Asrlar osha xalqimizning milliy qadriyatlari, uning o'ziga xos tamoyillarini aks ettiruvchi asarlarga katta ehtiyoj seziladi. O'zbek adabiyotining zabardas vakili, Zahiriddin Muhammad Bobur ijodi bilan doimiy shug'ullanib kelgan iste'dodli olimlardan biri Aziz Qayumovdir. Olimning qator maqola va risolalari, monografik tadqiqotlarida Bobur ijodining rang-barang va sermazmun talqinlari haqidagi qarashlar o'z ifodasini topganligini alohida qayd etish lozim.

O'z davrining shoh va shoiri, murakkab qismat va taqdir egasi bo'lgan Boburning ijodiy merosi nafaqat Sharq xalqlari va olimlarini shu bilan bir qatorda, G'arb ziyolilarini, olimlari tarixchilarini, faylasufi siyosatchilarini ham diqqatini o'ziga jalb qilgan. Buning boisi esa, Bobur o'z davridayoq haqiqatni aytishga va haqiqatni kuylashga intilgan hukumdor va ijodkorli sababali ham qiziqish juda katta katta bo'lgan.

XX asrning ikkinchi yarmiga kelib, o'zbek adabiyotida Bobur ijodim merosini o'rganish, undagi ilgari surilgan qarashlarni tahlil etish borasida samarali ishlar amalga oshirilgan. Adabiyotshunos Aziz Qayumov ta'kidlaganidek: “Zahiriddin Muhammad Bobur qalamiga mansub asarlarning qayta-qayta nashr etilmog'i, ular yuzasidan o'tkazilayotgan ilmiy tekshirish ishlari doirasining kengayishi buning yorqin dalilidir. Shu bilan birga Bobur hayoti, siyosiy faoliyati, uning adabiy va madaniy taraqqiyot yo'lidagi xizmatlari ommalashtirilmoqda. Bobur tom ma'noda o'zbek adabiyotining ko'zga ko'ringan arbobi sifatida, yangi avlod tasavvurida munosib o'rin egallamoqda” [1, 4-bet].

Darhaqiqat, XX asrning ikkinchi yarmidan keyin Bobur ijodi, uning adabiy merosi haqidagi qator tadqiqotlar maydonga kela boshladiki, ana shu davrlardayoq, istedadli olim Aziz Qayumovning ham qator maqolalari, adabiy-tanqidiy qarashlari e'lon qilindi. Olimning qarashlariga nazar tashlanar ekan, har bir asarida ilgari surilgan tushunchalarga jiddiy yondoshish an'anasi etakchilik qiladi. Olimning qarashlarida Bobur nafaqat shoh, shu bilan bir qatorda ise'dodli ijodkor, o'z davrining yirik va qomusiy ijodkori sifatida alohida mehr bilan e'tirof etilganligini ta'kidlash joizdir.

Aziz Qayumov yozadi: “Boburnoma” XV-XVI asr o'zbek tilining buyuk yodnomasidir. Uning sarf, nahv sohasidagi ahamiyati, o'zbek (turkiy) adabiy tilning birinchi manbai sifatida o'zbek tili tarixida tutgan o'rnini alohida tadqiqotlarga asos bo'lajagi ravshan [1, 104-bet]ligini alohida ta'kidlashida ham tarixiy haqiqat mujassasam edi. Aziz Qayumovning qarashlarida Bobur ijodiga, uning har bir talqiniga juda katta mehr bilan yondoshish holati etakchilik qiladi. Shuning uchun ham, olim “Boburnoma” asari haqida juda to'lqinlanib fikr yuritishida ham asoslar mavjud edi. Boburning tarixiy asartidagi qarashlarni, talqinlarni shu darajada mohirlik bilan tahlil qiladiki, shuning o'ziyoq, sadoqatdan, adib ijodiga bo'lgan qiziqish va mehrdan iborat ekanligini yanada teranroq anglash, his etish mumkin edi.

Aziz Qayumov Bobur ijodi haqida soʻz yuritganda, XX asrning ikkinchi yarmiga kelib adib ijodiga, maʼnaviy merosiga katta qiziqish uygʻonish sabablarini juda teran ilgʻaydi va bu haqidagi qarashlarini alohida taʼkidlaydi. Aziz Qayumov qayd etganidek, Boburning meʼmuar xarakterdagi asari, bu davrning turfa xil ziddiyatlarini, shohlik va shoirlik istiroblarini, tarixiy voqealar silsilasini, uning turfa ohanglarini badiiy talqin etuvchi asar sifatidagin aemas, etnografiya, geografiyaga, tilshunoslikka oid qarashlarning keng koʻlamdagi talqinlariga ham jiddiy nazar tashlaydi. Olim yozadi: “Bobur ijodiyoti oʻzbek adabiyoti tarixida muhim oʻrin tutadi. Uning adabiy va ilmiy merosi koʻp asrlardan beri oʻrganilib kelinmoqda. Bu ish yana muttasil davom etajak” [1, 207-bet].

Tahliliy kuzatishlarimiz shuni koʻrsatadiki, Aziz Qayumov Boburning meʼmuar xarakteridagi asarini har bir sahifasidan oʻrin olgan qarashlarga tahliliy yondoshadi va hattoki asardan oʻrin olgan boshqa tildagi soʻzlarning maʼnosini ham izohlashga, “Boburnoma”dan keltirilgan faktik materiallar asosida isbotlashga intiladiki, buning asosida ham haqiqatlar mujassamlashganligini inkor etib boʻlmaydi.

Aziz Qayumov oʻz davrining etuk ijodkori, adabiyotshunosi sifatida, Bobur asrlaridagi qarashlarning mazmun-mohiyatini anglashga harakat qiladi. Chunki olimning tahliliy qarashlarida Zahiriddin Muhammad Boburning chorak asrlik istirobi, mashaqqatli hayoti, tinimsiz izlanishlari, kurashlarini juda teran anglagan holda oʻz qarashlarini, tahliliy tushunchalarini oʻquvchiga etkazadiki, buning ham ham oʻziga xos sabablari mavjuddir.

Aziz Qayumovning har bir talqiniga oid mulohazalarida Boburning etuk isteʼdod sohibi ekanligiga urgʻu berilmasa-da, xuddi shu tushuncha teran anglashilib turadi. Bu bejiz emas, albatta, chunki olim nafaqat mehrini, balki adibning taix sahifalaridagi oʻrnini ham juda teran anglagan va his etganligini kuzatish mumkin. “Bobur sheʼr va kitobni juda sevar, Firdavsiy, Hofiz, Saydiy, Nizomiy, Xisrav Dehlaviy, Jaloliddin Rumi va boshqa ulugʻ shoirlarning sheʼrlarini berilib mutolaa qilar edi. Unga, ayniqsa, Alisher Navoiy asarlari juda yoqar edi. Navoiyning ona tili (turkiy)da yozgan goʻzal sheʼrlari Bobur koʻngliga orom berar, turmush mashaqqatlarida yuzaga keladigan dardlariga darmon boʻlar, uning qalbida ona yurt, ona tiliga muhabbat tuygʻularini avj oldirar edi” [1,217-bet].

Olimning bunday eʼtiroflarida tarix haqiqati ham mujassamlashgan ediki, chunki Bobur shohlik va shoirlikni bir qalbda mujassam etganligini, uning buyuk ijodkorlarning asarlariga, ayniqsa, sheʼriyatiga katta mehr bilan qaraganligini juda teran ilgʻaydi va shu nuqtaiy nazardan mulohaza yuritadi. Boburning hayotiga nazar tashlar ekan, barcha-barchasi “Boburnoma”da mujassamlashganligini, uning ruhiy qatlamidagi ichonchu eʼtiqod, qalb qaʼridagi ziddiyatlaruyu kurashlari, shohlikning azobu istiroblari, shoirlikning mangu qolishiyu shohlikning oʻtkinchiligini, oddiy inson kabi seva olishiyu, uning azobini his etishi kabi qator masalalarga tahliliy yondoshadiki, bularning barchasida Aziz Qayumovning serjilo fikrlari, mazmundor va asosli qarashlarining tajassum etilganligi oʻquvchini hayratga soladi. Olimning qarashlarida insonni anglash, anglaganda ham uning borligʻicha his etish jarayoni oʻz ifodasini topgan. Axir Boburni na shohlik, na

shoirlik xislatiga urg'u beradi, balki oddiy inson sifatida qiyofasini ko'z o'ngimizda jonlantiradi. Bunday qarashlar, tahliliy yondoshuvlarning barchasi Aziz Qayumovning Bobur ijodiyotiga, shaxsiyatiga bo'lgan muhabbatining ramzi sifatida bemalol e'tirof etish mumkin, chunki shoh va shoir qismati shunday e'zozlanishga loyiqdi.

Adabiyotshunos A.nasirov qayd qilganidek: "Temuriylar sivilisatsiyasining etuk vakillari hisoblangan Mirzo Ulig'bek, Gavharshodbegim, Husayn Bayqaro, Mir Alisher Navoiy, Zahiriddin Muhammad Bobur kabi o'z davrining buyuk siymolarining tarixini, murakkab hayotini tarixiy voqealar zahirida o'rganishi ham bejiz emas" [2, 6-bet]ligida ham asoslar mavjud. o'z davrining buyuk siymolari qoldirga ma'naviy merosning Sharq va G'arb sivilistsiyasidagi o'rni beqiyosdir.

Sharq xalqlarining ma'naviy hayotida XIV-XV asrlar juda ham muhim bir davr sifatida e'tirof etilishi ham bejiz emas, chunki temuriylarning tarix sahnasiga kelishi va o'z hukmronligini o'rnatishi asosida, ilm-ma'rifat, madaniya va san'atning taraqqiyotiga jiddiy e'tibor qaratishining mahsuli sifatida ham qayd etilishida tarix haqiqati mujassamdi.

Tarix sahifalarida "Buyuk Mo'g'ullar" imperiyasining asoschisi sifatida G'arb tarixidan ovrin olishi ham, bizni o'z milliy tariximizda uzoqlashtirish bilan bog'liq edi. Shu o'rinda tarixchi olim A.Berdimurodovning fikrlarini ham keltirishni lozim topdik: "... Ammo gapingda bir xatolik bor, bu xatolikning senga bog'liq joyi yo'q. Men sening "Buyuk Mo'g'ullar" degan so'zing haqida gapirmayapman. Aslida bu imperiyani "Buyuk Boburiylar imperiyasi" deb atalsa to'g'ri bo'lardi, Tojmahalni Boburiylar qurganlar, ular mening ajdodlari, - dedim. Shunda Yuranning ko'zlari katta-katta bo'lib ketib: - Amriddin, sening bunday xato qilishingni hecham kutmagan edim. Balki sen O'zbekiston tarixi bo'yoicha yaxshi arxelog bo'lishing mumkin, ammo Buyuk Mo'g'illar imperiyasi bo'yicha katta xato qilding. Bu holat tarixchi uchun kechirarli emas, - dedi" [3, 62-bet].

Qayd qilingan tushunchalardan shu nasrsa anglashiladiki, "Buyuk Mo'g'ullar" tushunchasi G'arb ziyolilarining qon-qoniga, tafakkuriga butunlay singib ketgan, ammo yillar va uzoq tarixning haqiqatini "Buyuk Boburiylar" imperiyasini inkor etib bo'lmas edi. Tarix sahifalari bilan bir qatorda jahon tarixidan ham, o'chmas o'rin olib ulgaurganligini inkor etib bo'lmaydi.

Shunday bo'lsa-da, "Buyuk Mo'g'ullar" tushunchasi o'rnida, "Buyuk Boburiylar" imperiyasi, bugungi G'arbning ham uyg'oq tafakkurli insonlari tomonidan o'rinli va asl tarixiy haqiqat nuqtaiy nazaridan ilgari surilgan qarashlarini ifodalash holatlari kuzatilayotganligini ham ta'kidlash lozim.

Xullas, iste'dodli olim Aziz Qayumovning tadqiqotlarida Bobur va uning ma'naviy merisi, "Boburnoma"dek shoh asar, inson qalbini titroqqa, hayajonga soluvchi goh realistik, goh romantik tasvirlar etakchilik qiladigan she'riyati haqida ilmiy-nazariy qarashlarini qayd qilib boradiki, baularning barchasi, olimning samarali mehnatining mahsuli sifatida e'tirof etishga arzuvi.

Adabiyotlar:

1.Qayumov A. Asarlar. Nashrga tayyorlovchi F.Ikromova. Alisher Navoiy Davlat adabiyot muzeyi. – Toshkent, Mumtoz so'z, 2009. – 304 bet.

2.Nasirov A. Badiiylik va hayotiy haqiqat. – Turkiya, Istanbul, Kesit, 2019. – 140 bet.

3.Berdimurodov A. Vatan haqqiga munojot. Esselar. – Toshkent, Adabiyot nashriyoti, 2020. – 304 bet.

“SADDI ISKANDARIY”DA QO‘LLANGAN ORNITOLOGIIYAGA OID TERMINLAR

**Mavlonov Ahmad
SamDU o‘qituvchisi**

Nizomiddin Mir Alisher – butun hayoti davomida ilm, fan, san'at rivojiga homiylik qilgan, tinchlik va totuvlikni ta'minlashga harakat qilgan buyuk shaxs. U Navoiy va foniyl taxallusi ostida ijod qilgan o'zbek adabiyoti hamda tilshunosligining eng yirik namoyondasi.

Alisher Navoiy buyuk iste'dodi, adabiyotshunoslik, tilshunoslik va tarix sohalarining yetuk bilimdoni bo'lgani bois bir-biridan go'zal dostonlar, tazkiralari, g'azal, ruboiy, tuyuq, qit'alar yaratdi. Tom ma'noda o'zbek adabiyotida “g'azal mulkining sultoni”, “o'zbek tilining asoschisi” deya e'tirof etildi. Bunga Navoiyning nodir iste'dod sohibi va buyuk jasorati sabab bo'ldi. U birinchi bo'lib “Xamsa”ni turk tilida yaratdi. O'zidan oldingi xamsanavislar bilan ijodiy bahslashdi, “Nizomiy panjasig'a panja urmoq”dan hayiqmadi va mislsiz yutuqlarga erishdi. Sa'diy, Firdavsiy, Nizomiy, Dehlaviy va Jomiy kabi so'z san'atkorlari bilan bir qatordan joy oldi. “Xamsa” dostoni hamda “Xazoyin ul-manoiy” kulliyoti Navoiy nomini abadiylikka muhrladi.

Navoiyning shoh asarlaridan biri, hech shubhasiz, “Saddi Iskandariy” dostonidir. Bu asar haqida Natan Mallaev O'zbek adabiyoti tarixi kitobida quyidagi ma'lumotlarni beradi: “Saddi Iskandariy” “Xamsa”dagi eng katta dostonidir. U 7215 bayt (14430 misra) dan tashkil topgan. Doston 89 bo'limdan iborat. “Saddi Iskandariy” o'z kompozitsiyasi bilan “Xamsa”dagi boshqa dostonlardan ham, xamsanavislarining shu temadagi dostonlaridan ham tubdan farq qiladi. Doston muqaddima, asosiy qism va xotimadan iborat. Dastlabki 14 bob dostonning muqaddimasidir.

XV bo'limdan dostonning asosiy qismi boshlanadi. XV bo'limda Navoiy Iskandarning tug'ilishi va yoshlik yillarini tasvirlaydi (bu bo'lim Iskandar sarguzashtlarining o'ziga xos bir debochasidir). XVI bo'limda podsho va donishmand Iskandar sarguzashtlari bayoniga o'tiladi, shu bo'limdan boshlab doston kompozitsiyasi tamomila yangi negizga, yangi prinsipga ega bo'ladi, dostonning har to'rt bo'limi mazmunan uzviy bog'langan alohida bob hisoblanadi. ... Shu saylda dostonni tashkil etgan 64 bo'lim 16 bobni hosil qiladi [1,53].

Mutafakkir bobomiz buyuk shoir bo'lish bilan birga ulug' olim ham edi. U tilshunoslik, adabiyotshunoslik, geografiya, matematika, iqtisod kabi fan va bu fanga oid terminlarni ham mukammal bilan va o'z asarlarida qo'llagan. Arab va fors tillarini mukammal bilgan Navoiy, avvalo, o'sha tilga oid terminlarni qo'llagan. Agar ularni qo'llash imkoniyati bo'lmasa, o'zi yangi terminlarni kashf qilgan. Bularni biz “Muhokamat ul-lug'atayn” (tilshunoslik), “Mezon ul-avzon” (adabiyotshunoslik), “Sab'at-u abhur” (lug'atshunoslik) asarlarida ko'rishimiz

mumkin. Bu haqda “O‘zbek adabiy tili tarixi” kitobida quyidagi ma’lumotlar keltirilgan:

O‘zbek adabiyotshunosligi terminologiyasi taraqqiyotida Alisher Navoiyning ham o‘z o‘rni bor. Alisher Navoiy boshqa tillarga xos terminlarni ham qo‘llagan. Masalan, «Mezon ul-avzon» asarida aruz nazariyasiga xos tavil, madid, basit, vofir, komil, hazaj, rajaz, ramal, munsareh, muzore’, muqtazab, mujtass, sarg‘, jadid, qarib, hafif, mushoqil, mutaqorib, mutadorin kabi arabcha-forscha terminlarni qo‘llaydi. Bundan tashqari, Navoiy o‘zbek she’riyatida arab, fors she’riyatidagidan boshqa turlari ham borligini ko‘rsatadi. Navoiy ularni nomlashda xalq tiliga murojaat qiladi. Yangi vazn va she’riy formalarni xalq orasida yuritilgan nomlar bilan, nomi yo‘qlarini esa aruzdagi vaznlardan qaysi biriga to‘g‘ri kelsa, shu vazn nomi bilan ataydi. Navoiy bu o‘rinda termin tanlashning ichki va tashqi manbalaridan samarali foydalanadi. U xalq qo‘shiqclariga xos vazn va she’riy formalarni tuyuq, qo‘shiq, changi, muhabbatnoma, mustahzod, turkiy kabi terminlar bilan ataydi. Navoiy qo‘llagan terminlarning asosiy qismi hozir ham adabiyotshunoslik termini sifatida ishlatilmoqda [2,84-85].

Alisher Navoiy nafaqat ilmiy asarlarda, balki badiiy asarlarda, xususan, “Xamsa”ning eng katta asari bo‘lgan “Saddi Iskandariy” dostonida harbiy, tasavvufiy, diniy soha, shuningdek, dengizchilik, hayvonot va hasharot olami, geografiya, tilshunoslik, fizika, biologiya, dehqonchlik, chorvadorlik, yilqichilik, to‘y, bayram, bazm, musiqa bilan bog‘liq ko‘plab terminlar qo‘llanilgan.

Dostonda **qush nomi** bilan bog‘liq ko‘plab terminlar uchraydi. Xususan, tahlil jarayonida quyidagi terminlarni topdik: makiyon/mokiyon, hudhud, sung‘ur, bulbul, kabutar, zog‘, shuturmurg‘, tovuq, qirg‘ovul, bulduriq, qarchig‘ay, tovuq, jo‘ja, qo‘ton, kaklik, burgut, samandar, kabki dariy, uqob, nutuqchi, karkas, qush, tazarv, chubchuq (chumchuq), ko‘k qarg‘a, zog‘, to‘ti, kalog‘, katak, jurraboz (erkak lochin), tayr, minqor (qush tumshug‘i), shorak (mayna), durroj, bozu shohin (lochin, qiyg‘ir), charga (qush to‘dasi), chug‘z (boyqush), qumri, bum (boyo‘g‘li), shuturmurg‘ (tuyaqush) va boshqalar.

Dostonda juda ko‘p qush nomlarining keltirilishi hazrat Navoiyning kuchli ornitolog bo‘lganidan dalolat beradi.

Qushlarga oid terminlar, asosan, shoh Iskandarning Malluning sehru jodularini fosh qilgani voqealari bayonida uchraydi. Kashmir yurtidagi o‘rmonlarni ta’riflayotganda ornitonimlarni uchratishimiz mumkin. Masalan:

Borib anda ko‘k qarg‘a – zog‘e kelib,

Ketib to‘ti, ammo kalog‘e kelib. (Saddi Iskandariy, 243)

Alisher Navoiy dostonda qo‘ton va sung‘ur kabi qushlarni ham bir baytda keltirib o‘tadi. Bayt:

Qo‘tonning uluq qush aro soni bor,

Vale sung‘ur oldida ne joni bor.

Qo‘tonga Navoiy asarlarining izohli lug‘atida “laylaksimon bir qush, ko‘kqo‘ton” deb ta’rif berilgan. “Qo‘tonning ulug‘, katta qush degan nomi bor, ammo sung‘urning oldida qanday joni bor”, – demoqda hazrat Navoiy. Mokiyon-tovuqning urg‘ochisi. Hudhud esa sassiq popishakdir. Hudhud bilan bir qatorda

sungʻur termini ham qllanilgan. Bu terminga Navoiy asarlarining izohli lugʻatida lochin, shunqor deb izoh berilgan (III jild, 126-bet). Masalan:

Ki, band aylamaklikka yoʻq ehtiyoj,

Emas hudhud oyini sungʻurgʻa koj (Saddi Iskandariy, 341).

Kalez ham biologik termindir. U asalari maʼnosini anglatadi. Nesh esa nishdir. Alisher Navoiy asalari neshi kalez birikmasini forscha izofali birikma shaklida qoʻllaydi.

Shaker tungini ayladi shahdrez,

Koʻp ul shahd zimnida neshi kalez (Saddi Iskandariy, 409).

Shuturmurgʻ ham biologik termindir. Hammamizga maʼlumki, fors tilida shutur – tuya, murgʻ esa qush maʼnosini anglatadi. Demak, shuturmurgʻ tuyaqushdir. Samandar ham qush nomi. Ammo u biologik termin hisoblanmaydi. Afsonaga koʻra, oʻtda paydo boʻladigan va oʻtda yashaydigan afsonaviy hayvon, qush [Navoiy asarlari tilining izohli lugʻati, III jild, 3,34-bet]. Yuqoridagi terminlarning qoʻllanishi hazrat Navoiyning biologiya fanining, xususan, ornitologiya sohasining ham kuchli bilimdoni boʻlganligidan darak beradi.

Foydalanilgan adabiyotlar:

1. Маллаев Н. Ўзбек адабиёти тарихи. –Т., Ўқитувчи, 1976.
2. Турсунов У., Ўринбоев Б. Ўзбек адабий тили тарихи. –Т., Ўқитувчи, 1982.
3. Алишер Навоий асарлари тилининг изохли луғати. III жилд. –Т., 1984.

ASQAD MUXTOR HIKOYALARIDA SHAXS TALQINI

Nazarova Feruza, SamDU tadqiqotchisi

Oʻzbek adabiyotidagi mavjud janrlar taraqqiyotiga sezilarli hissa qoʻshgan, tarjima asarlari bilan ham shuhrat qozongan etuk ijodkorlardan biri Asqad Muxtoridir. Adibning har bir asari oʻziga xos badiiy mukammal asarlar qatoridan oʻrin olishining boisi ham, adibning ijodni, uning mashqqatini teran va izchil anglaganligi bilan izohlash mumkin. Adibning nasriy asarlarida davr va inson muammosining goʻzal talqinlari etakchilik qilsa, nazmiy asarlarida inson ruhiyatining tuygʻu va kechinmalarining goʻzal talqinini kuzatish mumkin. Bularning zamirida tinimsiz izlanish va mashaqqatli mehnatni ham, ijod va ijodiy jarayonga muhabbat bilan yondoshish deb qarash mumkin. Ijodkor nasriy asarlarida inson kosepsiyasining badiiy talqiniga jiddiy eʼtibor qaratishi bejiz emas. Har qanday asarda shaxs xarakter qirralari talqin etilar ekan, uning zamirida makon va zamonda harakat etuvchi inson qismati etakchilik qiladi.

Isteʼdodli adib Asqad Muxtorning “Insonga qulluq qiladurmen” hikoyasida tarixiy shaxslar qiyofasi, ularning ruhiy-maʼnaviy olami juda goʻzal talqin etilgan. Hikoyaning oʻziga xosligi, unda tarixiy voqelik talqini ufuq turmasa-da, asar qahramonlarining botiniy olamiga singdirib yuborilgan-ki, bu ham ijodkorning badiiy mahoratidan dalolat beradi. Yozuvchi talqinlariga eʼtibor qarataylik: “Quyosh subh yoqasini chok etib, koʻk maydonida jilva koʻrguzgach, Sohibqiron Qurʼoni karimni lahv ustiga qoʻydilar. Kun saraton burjida edi, shiddati beadam. Oʻrda sahnida davlatpanohning oq chodirlari shukuhu asʼasa ila charaqlab kunga

yuz tutdi” [1, 1-bet]. Talqinlarga nazar tashlar ekanmiz, asar xronotop talqinidan boshlangan. Erta tongdagi vaqt kategoriyasi orqali o‘quvchni diqqatini jalb qilmoqda. Buning zahirida makon va zamonning hamohangligini kuzatamiz. Makon orqali tarixiy hayotni yoki uzoq o‘tmishni qalabga olish baraborida insonni, uning qiyopfasini, davrning murakkab ziddiyatlarini talqin uchun asos qilib olgan: “Shu mahal xirgohning ko‘rinishxona yo‘lagida soch-soqoli o‘siq, darvishona xirqa ustidan kumush fo‘ta bog‘lab, unga esa tug‘ro bezagi taqqan bir kimsa paydo bo‘lib, mangu ko‘zlarini erdan olmay, shohona ostonaga qarab o‘taverdi. Chodirning davlatxona qanotida Sohibqironga ko‘rinish bermoq uchun muntazir o‘ltirgan kazoo-kazo saltanat ustunlari, fuzaloyu ulamo, sipohsoloru no‘yonlar, xosu ra‘iyatdan kelgan kalontaru kadxudolar – biri hayratda, biri g‘azabda, noiloj qarab qoldilar” [1, 1-bet]. Sohibqiron Amir Temurdagi insoniy fazilatlar o‘z davridayoq tarixiy manbalarda asosli qayd etib qoldirilgan. Bu o‘rinda ham, ijodkor Amir Temurning o‘ziga xos fazilatini, insoniylik xususiyatiga ega bo‘lgan shaxslarni ajrata olishi, ular bilan muloqot qilishi, fikr almashishi bejiz emas edi. Ana shundagina xalqning hayoti, ularning turmush darajasi, insoniy fazilatlari, dushmanning maqsadini ham anglashga harakat qiladi. Natijada, haq va haqsizlikni, adolat va adolatsizlikni o‘z xayollarida anglashga harakat qiladi. Raiyatning turmishi, uning o‘ziga xos hayoti, ulardagi mavjud harakatlarning yuzaga chiqish sabablarini, anglashga intilardi. Bu esa Amir Temurning hayotdagi o‘rnini, saltanatdagi mavqeyini mustahkamlashga xizmat qilar edi. Darvesh bilan Amir Temur uzoq suhbatlashdi, Iso alayhissalomning dunyoga kelishi, davr hukumdorlarining fojialari, qirg‘inlari haqidagi afsonaviy xarakterdagi hikoyatlarni tinglar ekan: “Bas qil, mug‘anniy. – dedilar Sohibqiron. – Fahmladikkim bizning go‘dakligimiz afsonalarig‘a shama qilursen” [1,2-bet]. “Devona” bilan suhbatlashar ekan, qalb qaridagi istaklari, orzu armonlari xayolan ko‘z o‘ngidan birma-bir o‘tdi. Hayotning murakkabliklarini, kurashlarning zahiridagi adolatu-adolatsizliklarni yana-da, teranroq anglashga intilganligini his etamiz. Devona bilan suhbatlashar ekan, hayotning naqadar murakkabligini, aksincha, inson xarakterining ham murakkabligini yanada teranroq anglay boshlaydi. Albatta, ijodkor bu o‘rinlarda, Amir Temurning ruhiyati bilan bir qatordainsoniy fazilatlar egasi ekanligiga urg‘u bergan. U atrofidagilar yoki saroy a‘yonlarining qutqusiga uchamasligini, adolat va haqiqatni qaror topishiga ishonishini kuzatamiz. Chunki Amir Temurdek buyuk siymo Devonaning gaplaridan hayot haqiqatini teranroq anglar edi: “Baribir el, amir Temur Olloh taoloning barguzidasidur, derlar. Zero, Zuhul ila Mushtariy burjida tavallud topibsenkim, Olloh toborak eru ko‘kni shul soatda yaratmishdir. Nujumotning bu holati har sakkiz yuzlikda bir kelurkim, alarning chehrasida nuri ilohiy zuhur o‘lnay. Avvalo Iskandari Zulqarnayn, andin so‘ngra Muhammad alahissalotu vassalam va dag‘i sen, qiblagoh... – Abas bu, nag‘masoz! Hisobda g‘alat ketding. Avvalo Iskandari sohibqiron kalimai shahodatdin bexabar mushriktur, bizning qatorimizdan emas”[1,2-bet].

Sohibqiron Amir Temur o‘zini oddiy insonlar qatorida ko‘rishni istaydi. Maqtovlardan ko‘klarga ko‘tarilgan emas. Uning qalbining qaeqlaridadir, hayotiy haqiqatning yuzaga chiqarish naqadar murakkabligini his etib turadi. Undagi insoniylikning zahirida ham adolatsizlikka qarshi kurashishi, u oddiy darvesh

bo'lsin, haq so'zini tan olar, to'g'ri so'zlagani uchun ham jazolardan ozod etilardi. Buning zamirida hukumdorlik bilan bir qatorda, el-ulusni, raiyatni shu yo'lga boshlashi, haqiqat uchun kurashlarda toblanishini ko'ramiz. Devonaning har bir so'zini tinglar va o'zicha xulosalar chiqarishga intilar ekan: “- Ha... olam sehrlidur. Sohibqiron. Uning tarixi sening jangu jadallaringdangina iborat emas. Anda ruhiyat, fusunkor afsonayu ilohiy hikmatlar...” mavjudligini qayd qilganda dahshatga tushmaydi. Oddiy suhbatdosh kabi tinglaydi. Bu esa uning qalbidagi istiroblarni qayta jonlanishiga sabab bo'ladi.

Ijodkorning badiiy mahorati ham, Amir Temurning buyuk hukumdorligidan ko'ra uning insoniy fazilatlari talqiniga alohida diqqat qilganligi bilan izohlash mumkin. Shuning uchun ham, adabiyotshunos Sanjar Sodiqov shunday yozadi: “Asqad Muxtor bilimdon va chuqur o'ylaydigan yozuvchi edi. Shuning uchun u o'z asarlarida umuminsoniy qadriyatlarni e'zozlashga, ya'ni mafkura qoliplarini jinday bo'lsa-da yorib chiqishga uringan” [2,506-507-betlar]. Haqli ravishda ta'kidlanganidek, Asqad Muxtor o'zining murakkab davridayoq, jamiyatning mafkuraviy tayziqlarini, belgilangan qoliplarini chetlab o'tishga intilganligini yaratgan asarlaridagi talqinlar bilan izohlash mumkin. Adibning “Chinor” romanidagi polifonik talqinlar zamiridagi ramziy ma'no ifodasi bilan ham asoslash mumkin. Adibning turfa xil janrdagi asarlari zamirida insonni anglash, uning turfa xil muhitdagi xarakter qirralarining ifodasini kuzatish mumkin. Biz tahlilga tortgan hikoya zamiridagi shaxs konsepsiyasining o'ziga xos talqinlarida inson qismati, uning ruhiy-ma'naviy olami ifodasi etakchilik.

Sohibqiron Amir Temurning Devona bilan suhbatlashar ekan, uning qalbidagi istiroblari yuzaga chiqa boshlaganligini his etadi. Ammo Devonaga gap uqtirsa-da, uning so'zlariga juda asosli javob berar, har bir bayon qilgan fikrini isbotlab berar edi. Uning notiqligidan ema, odam va olamni teran anglaganligi unga nisbatan hurmatini oshishiga sabab bo'ladi. Sohibqiron anglaydiki, haqiqat barcha narsadan ustun, unga qarshi borib bo'lmasligini his etadi. “- Ha... Olam sehrlidur. Sohibqiron. Uning tarixi sening jangu jadallaringdangina iborat emas. Anda ruhiyat, fusunkor afsonay-yu, ilohiy hikmatlar... – Sening tungi navolaring... – Ore, bari omuxtadurkim...” Bu mulohazalarning asosida sohibqiron Amir Temurning etuk insoniy fazilati bilan bir qatorda, odam va olamni anglashga bo'lgan intilishini kuzatamiz. Axir, Sohibqironning bir Devona bilan shubatlashishidan mani nedur, – deya, savol berguvchilar ham mavjud edi. Ammo Sohibqiron uning darveshona kiyinishidan emas, aksinch, mulohazalarida olam-olam ma'no borligi uchun u bilan suhbatlashar, mulohazaga kirishardi. Adib bu kabi talqinlar orqali insoniylikni ulug'lashga, insonning qadri uning ilmi bilan, mulohazalari bilan namoyon bo'lishiga urg'u beradi.

Turk olimi Ismoyil Aka o'zining “Buyuk Temur davlati” nomli asarida Sohibqironning o'z davrining o'ta bilmli, fidoiy inson, meribon ota, buyuk millatparvar shaxs ekanligini ta'kidlab shunday yozadi: “mutlaq hokimiyat tushunchasida bo'lgan Temur qurultoy bilan ish yuritishga ahamiyat bermagan. U bir ishni qilishni istarkan, o'zini haqli ko'rsata bilmoq uchun Qur'oni Karimdan oyatlar keltirib, o'z ishining to'g'riligini isbotlar edi. Shundayin bir hukumdor

bilan suhbatda ulamoning doim diqqatli, hushyor turishi zarur edi” [3, 111-bet], – deb qayd qilib o‘tishida ham, tarixiy asoslar mavjudligini ta’kidlamoqchimiz.

Tahlillar davomida bunday qarashlarni keltirishimizga asosiy sabab, Sohibqiron Amir Temurning o‘z davrida ulamolar, buyuk ma’rifatparvarlar, zamonasining etuk insonlariga juda katta hurmat bilan qaraganligini qayd etib o‘tmoqchimiz. Yozuvchi Asqad Muxtor talqinidagi Devona obrazida ham, ma’lum ma’noda tarixiy haqiqat mavjuddir. Adibning bu hikoyasida davr va inson muammosiga yondoshishida o‘ziga xos badiiy mahorati namoyon bo‘lgan. Ijodkorning nuqtaiy nazari asosida badiiy qahramonning o‘ziga xos betakror xarakter qirralari falsafiy talqinlar zahirida o‘z ifodasini topgan.

Adabiyotlar:

1.Asqad Muxtor. Insonga qulluq qiladurmen. Hikoyalar. www.ziyouz.com. kutubxonasi.

2.Sodiq Sanjar. Yangi o‘zbek adabiyoti tarixi. Darslik. – Toshkent, O‘qituvchi, 2019. – 720 b.

3.Ismoyil Aka. Buyuk Temur davlati (Tohir Qahhor tarjimasi). – Toshkent, “Cho‘lpon” nashriyoti, – 152 b.

XURSHID DAVRON SHE’RIYATI LEKSIKASI

Hamroyeva Nozima

SamDU 2-kurs magistranti

Xurshid Davron o‘zbek tili boyliklaridan juda keng foydalanadi. Shuning uchun ham uning leksikasi boy va rang-barangdir. Shoir doim original, yangi tashbehlar topib, ularni lirikaning badiiy-estetik quvvatini oshirishga xizmat qildiradi. Shuni ham alohida ta’kidlash lozimki, Xurshid Davronning yapon she’riyatidan qilgan tarjimalari to‘plami “Dengiz yaproqlari”, jahon xalqlari she’riyatidagi mutarjimlik faoliyatida yuzaga kelgan “Qirq oshiq bir daftari” kabi to‘plamlari shoir badiiy tilining rivojiga, so‘z qo‘llash mahoratining yuksalishiga beqiyos ta’sir ko‘rsatganligini ko‘rishimiz mumkin. Haqiqatda, “Poetik asarning yetuk bo‘lishini faqat tilning o‘zigina hal etmaydi. Ammo til asarning butun ichki olamini ko‘rsatuvchi oynadir va poeziyaning barcha komponentlari bilan muomala qiluvchi ko‘p qirrali vositadir” [1,356-bet]. Mazkur ilmiy-nazariy qarashlar fonidagi poetik xususiyatlar Xurshid Davron lirikasining ham badiiyligini ta’minlab bergan jihatlardandir.

“Adabiyotda jinday nom chiqargan, uning rivojida sal bo‘lsa-da iz qoldirgan qalam sohiblari borki, ularning hammasi yozuvchi (shoir) mahoratining ko‘p qismini til mahorati tashkil qilishini” (O.Sharafiddinov) adabiyotshunos, kitobxonlar yaxshi biladi. Aynan shu yo‘nalishlar orqali shoir mahoratini tekshirish ham katta samara beradi.

Shoirning “Qodiriyning so‘nggi surati” she’ri XX asrning 70-yillarida yozilgan. Mazkur she’rda shoirning badiiy-estetik g‘oyasi birgina “surat” so‘zi, detali atrofidagi falsafiy, poetik mazmun bilan manzaralashtiriladi. Surat o‘tmishda faqat devorga osilgan (bugun stol ustida, shkaf-servantlar yuqori qismida ham turaveradi). Shoir suratga tikiladi. “Buncha alam, buncha muhabbat” har ikkala

birikma ma'no jihatdan bir-birini to'ldiradi. Ular bir sinonimik qatorni tashkil etadi. "Surat" so'zi esa jonlantiriladi. Suratda shunday xususiyat bor, buni nozik didli kishi seza oladi. Siz yon tomondan qarasangiz, sizga o'girilib qarayotganga o'xshaydi, to'g'ridan qarasangiz, ro'parangizda turgandek bo'ladi. Ketsangiz go'yo ma'yus tortib qolgandek taassurot qoldiradi. "*Tunlar jimjit, uzundir garchand, Tugamaydi dillar suhbat*". Har uchala jumla, birikma bir-biriga mutanosib tarzda joylashtirilgan. Qodiriyning o'ychan surati she'r tinglayotgan kabi taassurot uyg'otadi. "*Tunning sokinligi, uning uzunligi, ko'ngillar tillashishining adoqsizligi*" qish kechalarining tancha atrofidagi ijod jarayonini eslatib yuboradi. Shoirdan ko'ngil so'rovchi ham, shoirning ahvol-ruhiyatidan xabardor kishi ham, yolg'izlikda hamroh bo'luvchi ham shu surat. Mazkur she'rda shoirning badiiy-estetik g'oyasi birgina "surat" so'zi, detali atrofidagi falsafiy, poetik mazmun bilan manzaralashtiriladi.

Yo'llarimda uchrasa xato,
Qiyinab qo'ysa elim hasrati.
Kelib sendan tilayman panoh,
Qodiriyning so'nggi surati.

"Men moziyga" deb boshlanuvchi she'rda shoir xayolan o'tmishga safar qiladi. She'r uch banddan iborat. U shaklan erkin vaznni eslatsa-da, ammo to'qqiz bo'g'inli barmoq vaznda yozilgan. Shoir hissiyotlarini poetik tizimga solish uchun shu usulni tanlagan.

Men moziyga
Tikildim uzoq –
Kelajakni anglamoq uchun,
Shunda ko'rib
Qoldim men nogoh
Yog'iy tutgan nayzaning uchin.

Misralaridagi so'zlar shoir xohish-irodasi bilan inversiya hodisasi talablari ko'rinishiga keltirilgan. She'rdagi antiteza usuli badiiy tilning emotsional xususiyatlarini oshirish bilan birga, shoir poetik fikrini dalillovchi vositaga aylantiradi. "Men o'tmishga kelajagimni qurmoq uchun nazar tashlagan edim, kutilmaganda qilich-qalqon tutgan dushmanni ko'rib qoldim". Lirik qahramon xatti-harakatlari maqsadiga ters kelib qoladi. Shunda shoir fikrini parallelizm poetik usuli bilan asoslaydi.

Qora baxmal
Uzra zumradday –
Nayza uchi yonib turardi.
Go'yo bir cho'g'
Yonib zulmatda
Kecha bilan suhbat qurardi.

"Qora" sifatlashi lirik qahramon qalbidagi qo'rquv, vahimani maksimal darajaga ko'tarib, unga "harorat" bag'ishlab turibdi. "-day" qo'shimcha ko'rinishidagi, "go'yo" so'z ko'rinishidagi o'xshatishlar voqea negizida hosil bo'lgan kechinmani obrazli ifodalamoqda. "Nayza uchi" yog'iy niyati, o'zi uchun

qulay makon bo'lgan "kecha" bilan suhbat qurmoqda. Jonlantirish esa shoir qarashlarini badiiy-g'oyaviy jihatlarini ochib bermoqda.

"Badiiy nutqda muayyan so'z boshqa so'zlar bilan faqat ma'no jihatdangina emas, tasviriylilik jihatdan ham birikadi, o'zaro bog'lanadi. Hatto jumladagi so'zlar o'rining almashinuvi, urg'u va intonatsiyaning o'zgarishi, nutq sur'atining tezlashishi va sekinlashishi, so'roq va undov shakllarining kiritilishi badiiy nutq ruhini o'zgartirib turadi" [2, 427-bet], - deb yozadi adabiyotshunos To'xta Boboev. Mazkur holatlar badiiy tilning har tomonlama mukammal bo'lishiga xizmat qiladi hamda badiiy asarlarning o'qimishlilikini ta'minlab beradi.

Birdan yog'iy nayzani otdi
Va u bobom ko'ksiga botdi:
Men ingradim
Alam, o'ksikdan,
Qonlar oqdi mening ko'ksimdan.

Banddagi so'zlar grammatik qoidalarga zid tarzda berilmoqda. "Yog'iy nayzani otmaydi, nayzasini otadi", "bobom ko'ksiga emas, bobomning ko'ksiga", "men yig'ladim, alam, o'ksikdan emas", "Men alam, o'ksikdan yig'ladim".

Mazkur inversiya hodisasi she'r ohangdorligini oshirish bilan birga poetik talablarga muvofiq so'z tanlashda ham qo'l kelgan. Tabiiyki, she'rdagi ohang poeziyada birlamchi xususiyat sanaladi. Poeziya mantiq bilan tekshirilmaydi. Mantiq bor joyda san'at asari bo'lmaydi. "Qonlar oqdi mening ko'ksimdan" jumlasida metaforik ko'chim bo'lib, lirikada lirik qahramon badiiy niyatini amalga oshiradigan birlamchi hodisadir. A.Oripovning "O'zbekiston" qasidasida ham aynan shunga o'xshash so'zlar qo'llangan. "Qonim oqdi Dansigda manim, Sobir Rahim yiqilgan chog'da". Har ikkala she'rda ham "qon" so'zi vatanparvarlik, vatanga fidoyilik, shu vatan sha'ni barcha narsadan ulug'ligini yuqori bosqichga olib chiqmoqda.

Nuriddin Shukurov "G'afur G'ulomning lirik poeziyadagi mahorati" kitobida obrazli til xususida quyidagilarni yozadi: "Shoir poeziyasining obrazli tili, birinchidan, shoirning tasvir ob'ektiga bo'lgan munosabatini aniq va konkret qilib ifodalashga; ikkinchidan, xarakterli ko'rinishlarning suratini chizishga; uchinchidan, voqea-hodisalar, tushunchalarning ichki mohiyatini chuqur his qildirishga; to'rtinchidan, keng fikrlarni nihoyatda qisqa va ixcham qilib ifodalashga; beshinchidan o'quvchida kuchli his-hayajon uyg'otishga xizmat qiladi" [3, 70-bet]. Mazkur nazariy qarashlar Xurshid Davronning "Oybek" nomli she'rida har jihatdan o'zining mukammal talqinini topgan. She'r shoir, yozuvchi, tarjimon O'zbekiston xalq yozuvchisi Muso Toshmuhammad o'g'li Oybekka bag'ishlangan. Shoir barcha ko'ngil izhorini, ehtiromini shogirdlik maqomidan turib ifoda etgan. O'zbek tilining bitmas-tuganmas boyligini Oybek timsolida manzaralashtira olgan. Har bir so'zga yuklangan poetik ma'no ajdodlarimiz ruhiyatidan so'zlaydi.

O'zbeklar "bedazor" deb ko'k beda, yo'ng'ichqa ekilgan keng maydonni tushunishadi. Shunchaki o't-o'lan o'sgan, ko'm-ko'k qir-adirlar, past-tekisliklar o'tloq, yaylov deb ataladi. Insonning qo'l mehnati bilan yaratilgan, ifori dimog'ni yoradigan dala rayhoni – ko'k beda o'sadigan joy bedazor deyiladi. Bedazor

istilohining o'zida yoqimli hid aralash hashoratlar ovozi va bo'zto'rg'ay navosi yashiringandek. Soy ovozi emas sasi. Arxaik so'zning qimmatini shundaki, bu bilan shoir tovush uyg'unligiga hamda barmoq tizimidagi she'rning bo'g'inlar miqdorini muvofiqlashtirgan. "Soy sasi" deyilganda, suv so'zini ishlatmasdan ham suvni tushunish mumkin. She'rda yana bir o'rinda "suv" so'zi ham keladi. Bu holatda shoir "takror topgan so'zning dilkash emasligini" amalda isbotlaydi.

Xulosa qilib aytganda, shoir asosan XX asrning 70-80 yillarida tarix va vatan mavzulariga e'tibor qaratib, zamonaviy ko'rinishdagi she'riy janrlarda ustozlari tajribalariga suyanib ijod qildi. O'z ovozi, poetik til yaratishdagi urinishlarida ularga to'g'ridan to'g'ri ergashmay, an'analarni saqlagan holda o'ziga xos uslub yarata oldi. Xurshid Davronning til boyliklaridan unumli foydalanishi XXI asr o'zbek she'riyati uchun mahorat maktabini o'tashi, shubhasiz.

Foydalanilgan adabiyotlar:

1. Adabiyot nazariyasi. 1 jild. -T., Fan. 1978. 356-bet.
2. Boboev T. Adabiyotshunoslik asoslari. -T., O'zbekiston. 2002. 427-bet.
3. Shukurov N. G'afur G'ulomning lirik poeziyadagi mahorati. -T., Fan. 1966. 70-bet.

G'AFUR G'ULOM LIRIKASIDA TABIAT TASVIRI

Ro'ziqulova Dilbar

SamDU filologiya fakulteti xodimi

Antik davr insonni tabiatning bir qismi deb hisoblagan, uning ideali tabiat bilan uyg'un hayot edi. Uyg'unish davri adabiyoti, san'ati va madaniyatida tabiat zavq manbai sifatida o'ziga xos ahamiyatga ega edi, keyin esa sivilizatsiyaning yovuz hayotidan boshpana sifatida ko'rilgan. XX asrda fan va texnikaning maqsadi tabiat ustidan hukmronlik qilish deb e'lon qilindi. Shunga qaramasdan inson tabiatdan mutlaqo ayro mavjud bo'la olmadi. Inson tabiat bilan nafaqat biologik jihatdan, balki ijtimoiy borliq sahnida ham chambarchas bog'liq bo'lib qolaverdi. Tabiat insonning fiziologik rivojlanishi uchun ozuqa manbai bo'lishi bilan bir qatorda uning ma'naviy-madaniy ongining rivojlanishi, estetik dunyoqarashining shakllanishi uchun ham asos bo'ldi deya olishimiz mumkin (A. Avloniyning "Sanoyi nafisa" maqolasi esa fikrimizni yana bir bor tasdiqlaydi).

Darhaqiqat, barcha sohalar qatori badiiy san'at namunalarini ham tabiat tasvirisiz tasavvur etib bo'lmaydi. Ijodkor badiiy olami tabiiy, ijtimoiy borliqdan ozuqa olgan holda rivojlanadi va yaratilgan san'at asarida aks etadi. Shu jihatdan olib qaraganda, ijodkorning mahorati borliqni qay darajada inkishof etishi, ya'ni o'zgalarga xos bo'lmagan nozik nigoh bilan anglangan tabiiy hodisa hamda uni mohirona tasvir eta olishida namoyon bo'ladi, bunda tong oddiy kechaning kunduzga almashinish nuqtasi emas, tong – bu "chinorlar uchidagi birinchi nur" yoxud "Navqiron bir terakning cho'qqisida oshiyon tutgan" tongotardir. Donishmand adibimiz G'afur G'ulomni bu borada mahoratli shoir deya olishimiz mumkin. Adib shoir sifatida tabiatning eng inja hodisalaridan ulkan falsafa yarata oladi [3].

Antik davrdan to bugungi kunga qadar davom etib kelayotgan jahon adabiyotini ham, o'zbek mumtoz va zamonaviy adabiyotini ham tabiat falsafasisiz tasavvur etib bo'lmazligi haqiqat. Ammo bu borada aslo bir xillik kuzatilmaydi, kimdir uni go'zallik manbai, pokiza tuyg'ular timsoli sifatida tasvir etsa, yana kimdir ushbu falsafa orqali shodlig-u quvonchi, dard-u izzatoblari kabi qalb kechinmalarini ifodalashga harakat qiladi. G'afur G'ulom lirikasida esa har ikkala holat ham ko'zga tashlanadi, ya'ni shoir bir o'rinda tabiatga oshino, uning go'zalliklariga mahliyo shaxs sifatida namoyon bo'lsa, bir o'rinda tabiat, peyzaj tasviri shoir lirik qahramonining ruhiy holatini ochib berish vositasi bo'lib xizmat qiladi. Xususan, adbining o'zi ham "Qor" sarlavhali she'rida peyzaj deya izoh keltirar ekan, tabiatning ajib hodisalaridan biri bo'lgan qorni "ona g'ozning to'shi kabi" deya obrazlashuv jarayoniga olib kiradi. Ma'lumki, nasr va nazmda qor o'xshatish vositasi bo'lib xizmat qiladi: *qor kabi oppoq, qor kabi beg'ubor, qor kabi mayin* singari. Shoirning peyzaj tasviri borasidagi mahorati ayni shu o'rinda kuzatiladi. Shoir tabiatning ushbu daqiq hodisalarini o'tkir sezgila ilg'ab, o'xshatish asosi qilib oladi.

Ona g'ozning to'shi kabi yumshoq qor
Sukut bilan quyiladi sarbasar..
Borliq vazmin uyqu ichra bexabar,
Yoki osmon tullab, to'zg'itmoqda par,
Kipriklarning momiqlardan yuki bor [1,91-b].

G'afur G'ulomning ushbu singari "Olmos ko'ylak kiydi atlas, parchadan", "Qish lavhalari", "Bahor ohanglari", "Ko'klam shamoli" kabi bir qator she'rlari peyzaj lirikasining yorqin namunasi hisoblanadi. Peyzaj har bir san'at shaydosiga ilhom baxsh etishi bilan birga his etilgan ruhiy holatni jonli muhitga olib kiruvchi vosita. Adabiyotshnos D. Quronov peyzaj lirikasini bir qancha ijtimoiy-siyosiy, intim, falsafiy kabi tematik guruhlariga ajratadi [2,223-b].

"Yoz", "Qish va shoirlar" kabi she'rlarida esa peyzaj detallari shorning falsafiy qarashlarini ochib berishga xizmat qilgan:

Umrda o'tajak har bir nafasni
Yana bir yoz o'tdi, deyilsa ham oz
Bu yoz ta'rifini senga aytaman,
Oltin qalam bilan daftaringga yoz! [1. 145-b]

G'afur G'ulom she'riyatida vaqt falsafasi o'ziga xos ahamiyatga ega hamda H. Umurov, S. Meli, Sh. Hasanov kabi adabiyotshunos olimlar tomonidan keng tadqiq etilgan hamdir. Yuqorida keltirilgan parcha ham aynan vatq o'lchoviga bag'ishlangan. Yoz mumtoz adabiyotimida ham, zamonaviy adabiyotda ham umrning eng gullab yashnagan davriga qiyoslanadi, shu ma'noda shoir olayotgan har nafasning ana shu davr kabi ardoqlashga chaqiradi.

E'tiborlisi shoir vaqtni ta'rif etishni maqsad qilar ekan, oddiy qalam bilan emas, aynan, oltin qalam bilan yozishni ta'kidlaydi, bu esa uning "Vaqt" she'rida keltirilgan "oltin kapgir" ni yodga soladi va vaqt o'lchovining ahamiyatini yana bir karra oshiradi. G'afur G'ulom she'riyatida peyzaj lirikasi ba'zi o'rinlarda yengil, o'ynoqi ruhda, ba'zi o'rinlarda esa yuqorida keltirilgan parchadagi kabi, kishini

o'yga toldiradigan, borliqni, zamonni, makonni teranroq anglashga turtki beradigan lirika sifatida namoyon bo'ladi.

Foydalanilgan adabiyotlar:

- 1.G'ulom G'afur. Mukammal asarlar to'plami. Tom I, II: She'rlar
- 2.Quronov D. Adabiyotshunoslik lug'ati –Toshkent, Akademnashr, 2013. – 408 b
- 3.Suvon Meli. G'afur G'ulom: Vaqt falsafasi // O'zbek tili va adabiyoti, 2013. 3-son.

BADIYLIKDA MAJOZIY TALQIN

Tog'ayeva Sayyora Nodir qizi

SamDU 1-kurs magistri

O'zbek adabiyotining taraqqiyotida iste'dodli adib Normurod Norqobilovning o'ziga xos o'rni mavjud. Adibning turfa xiljanrdagi asarlari o'z o'quvchilarini topga, adabiy tanqidda o'ziga xos tarzda baholangan. Uning asarlaridagi mavzu ko'lamining kengligi, emotsional ta'sir bo'yoqlarga boyligi va nabobat olamining siz-u biz bilmagan o'ziga xos qirralarini hamda sir sinoatini yorqin aks ettirish xususiyati bilan alohida ajralib turadi. Shu nuqtaiy nazardan ham, adib asarlarida oddiy kishilar badiiy qahramon qilib olinsa-da, ularning o'ziga xos xarakter qirralari, ruhiy istiroblari etakchilik qilishi bejiz emas. Ijodkornimg barcha asarlarida oddiy qishloq hayoti va uning tipik vakili etakchilik qilsa-da, uning zamirida millik va o'zlikni anglashga xizmat qiladigan shaxlarning turfa xil xarakter qirralari talqini o'z ifodasini topgan.

Adabiyotshunos U.Normatov qayd qilganidek: “Badiiyat asosidagi eng asosiy o'zgarish shundan iboratki, san'at, adabiyot, adabiyotshunoslik yakka hokim iskanjasidan xolos bo'ldi, san'at va adabiyotning erkin, xilma-xil falsafiy-estetik o'zanlar bo'ylab rivojlanishi uchun keng yo'l ochildi. Eng muhimi, qadimiy va ilg'or zamonaviy qadriyatlarni ardoqlash, ularni yangi asosda qaror toptirish bosh masalaga aylanmoqda” (1, 3-bet).

Bugungi badiiy adabiyotdagi tasvir usulidagi o'zgarishlar, jahon adabiyotidagi mavjud an'analar ham o'z ta'sirini ko'rsatmoqda. Yozuvchining “Ovul oralagan bo'ri” qissasiga nazar tashlar ekanmiz, qissada yoritilgan Jondor – Cho'ngkallaning umri davomida ishonib, sevib, birga (to'dadan ayro holda yashasada) baxtli umrguzaronlik qilgan juftidan, yupanchidan judo bo'lgan holati va uning qalbida kechgan ziddiyatlar silsilasi jondorning ruhiy olamini, qalb nidosini va juftiga bo'lgan sadoqatini, fvvoyillar shamoli bularning o'rtasiga rahna solganligini qayd etish va juda teran aks ettirilganligi bilan ajralib turadi: “Axir dashtda sanqiganingda, oyog'ing ostida qorning g'irchillashiga nima yetsin. Qorga cho'milishlarni-ku asti qo'yaverasiz. Hozir ayni qorga cho'miladigan havo edi. Biroq u narsa Cho'ngkallaning yuragiga sig'mas, negaki, kutilmaganda u urg'ochi bo'ri Oqyolning izini yo'qotib, qonli xalqobga duch kelib, turardi-da. Qon Oqyolniki, ammo jasadi ko'rinmasdi. Ayni shu narsa Cho'ngkallaning ortiqcha bezovtalanishiga izn bermasdi. Nega deganda, jonivorlar to sherigining jonsiz jasadiga duch kelmaguncha judolikka ishonmaydi” (2, 3-bet).

Tasvirlarda ongsiz jonivorning xuddi odamlar kabi iztirob chekishi, fikrlashi kabi talqinlar asosli ifodasini topgan. To'g'ri, yozuvchi bu o'rinda majoziy obraz orqali insonga xos bo'lgan va bo'lmagan xislatlarni talqin etgan. Qissada insoniyatga xos bo'lgan ba'zi bir xislatlar ham yaqqol ko'zga tashlanadi. Buni biz Salom mergan timsolida ifodalanganligini kuzatamiz. Salom merganni obro', shon-shuhrat va qandaydir mukofatni deya qora tunda jondor poylamoqchiligini yoki shu vahimali tunda xayollar iskanjasida qolib, turli o'y fikrlarni, yozuvchi mahorat bilan tasvirlaydi: "Eng qizig'i, yovvoyi jondor juftini qidiradi, bu borada hatto o'limga tik boqadi. Odamzod esa o'lib ketganing bilan ishi yo'q. Ana, ayoli holing qalay demaydi. To'ng'ib qolmang, deganicha qaytib qorasini ko'rsatgani yo'q. Qo'shnilari miltiq ovozi dan ham uyg'onishmaydi. Uyg'onishsa-da, issiq ko'rpadan bosh chiqargisi kelmaydi. Salom mergan bilan necha pullik ishi bor ularning. Ertalab jasadini ko'rishsa-da, bir tuki qilt etmaydi, yo'liga achingan bo'lishadi. Yaqinlari yig'lab siqtashadi... Keyin Salom mergan degan banda o'tganligini hamma unutadi. Yovvoyi bir jondorcha bo'lolmas ekanmiz, yashashdan ne maqsadu, ne mani unda?... " (2, 33-34-betlar) kabilarni hayolidan o'tkazishi ham o'quvchini mushohadaga tortadi.

Kitobxon o'yga tolar ekan, insonlar o'rtasidagi mehrning, odamiylik kabi tushunchalarning asta-sekin yo'qolib borayotganligini teranroq his etadi, bundan iztirobga tushadi. Xuddi shu kabi o'y-fikrlar asar davomida Salom merganni tinch qo'ymaydi. Urg'ochi bo'ri Oqyolning qaysarligi, tixirligiga qaramay, o'z juftini deya tunda mardlarcha ikki bor o'limga ro'paro kelgan – Cho'ngkallani ko'rgan Salom mergan bo'rining yo'liga qopqon qo'yishni taklif etgan Norqul cholning fikriga qarshi turadi. So'ng Cho'ngkalla mard jondor u faqat mardona o'limga loyiqligini alohida ta'kidlaydi. Bu o'lim esa faqat miltiq bilan amalga oshirish lozimligini qayd etib o'zi sezmagan holda arloni bo'ri Cho'ngkallaga mehr qo'yadi. Mukofot dardida bo'lgan va buning uchun jondorni o'ldirishga shay turgan Salom mergan asar so'ngida Cho'ngkallaga bo'lgan munosabati o'zgaradi: "Jondorning qishloqqa tikilgan ko'zlarida yosh qotib qolgandi. Bechoraning yuragi judolikka bardosh berolmagandi. Buni daf'atan anglab yetgan Salom merganning tomog'iga yong'oqdek narsa kelib taqaldi. Egilib jondorning boshini silarkan, chuqur xo'rsindi. Shunda u mukofot naqdligini o'yladi. Biroq bundan zig'rcha quvonmadi. Jondorning yoshli ko'zlariga qarayolmay, uzoq-uzoqlarga termulib qoldi..."

Yozuvchi Salom mergan obraziga o'zgacha yondoshgan. Asar boshida mansab, obro', shon-shuhratga o'ch, mukofot dardida tunni tun demay, kuyib pishayotgan shaxs, voqealar so'ngida esa umuman boshqa shaxsga aylanadi. Uning tosh qalbida hayvonot olamiga nisbatan iliqlik paydo bo'ladi. Salom merganning xarakterini o'zgarishiga ham asoslar bor edi, chunki insonlar o'rtasidagi mehrning yo'qolishi, ammo nabobat olamidagi o'zaro mehr uni shunday fikrlashga majbur qilgan. Buni biz arloni bo'ri Cho'ngkalla o'lganidan keyin Norqul chol va Eson polvonlar jondorni tepib, terisini shilmoqchi bo'lganida bunga qarshi chiqqani, Salom mergan bo'rini izzatlab ko'msh kerak, degan so'zlaridan yanada teranroq his etamiz.

Asrlar davomidagi inson va nabobat olamining uzviy birligi 60-70-yillarga kelib, ularning o'rnini yovuzlik, vahshiylik egallay boshladiki, bu holatlarga alohida urg'u bergan Chingiz Aytmatobdek ijodkor ham bosh mavzu qilib olishi bejiz emasligini anglay boshlaymiz. Yozuvchi Normurod Norqobilov arloni bo'ri Cho'ngkalla va Salom merganning o'y-mushohadalari orqali insoniyatda tobora kamayib borayotgan ba'zi bir xislatlarni bir-biriga bo'lgan mehr-muhabbat, jonkuyarlik, o'zaro ishonch, odamiylik, samimiylik, insofililik kabi qator umuminsoniy xislatlar va shu bilan birga tabiatni asrab-avaylash, uni muhofaza qilish, nabobat olamiga mehr qo'yish hamda uning oldidagi burch va mas'uliyatni yo'qotmaslik kabi g'oyalarni ilgari suradi.

Umuman olganda, inson va tabiat, inson va nabobat olamining dialektik birligi insonning dunyoqarashini, uning hayot va tabiatga bo'lgan munosabatini namoyon etadi. Ikkinchidan esa insonlar o'rtasidagi mehr-muhabbatni, uning qadr qimmatini yo'qolib borishi ham bugungi hayotning global muammosiga aylanib ulgurdi. Ana shu jihatlarni badiiy talin etish jarayonida ijodkor o'ziga xos uslubini namoyon qila olgan.

Adabiyotlar:

1. U.Normatov. Umidbaxsh tamoyillar. – Toshkent, “Ma’naviyat”, 2000. – B 112.
2. N.Norqobilov. Ovul oralagan bo'ri. Qissalar. – Toshkent, “Sharq”, 2005. – B. 256.

“QO‘RQMA” ROMANIDA XARAKTER TALQINI

Shamsiddinov Behruz

SamDU 2-kurs magistranti

Istiqlol yillariga kelib, roman poetikasida va uning talqinlarida turfa xillik yuzaga chiqdi. Shuning uchun ham, roman kashfiyotlar manbaiyi sifatida e'tirof etilishi ham bejiz emas. Janr takomili bilan birlikda, xarakter va obrazlar olamining uzviyligi, shaxs konsepsiyasining badiiy talqinlar teralashmoqda. Roman janri bugun o'zining yuksak shakllangan o'rniga ega. Mazkur janrning imkoniyatlari nihoyatda cheksiz va rang-barang. Unda muallif yetuk shakllangan badiiylik vositasida turfa mavzularda asar yaratishi mumkin. Bugungi davr romanlariga xos xususiyatlardan biri ularda avlodning hayotiy tajribalari umumlashtiriladi, zamonning dolzarb hayotiy, ma'naviy-axloqiy muammolariga e'tibor qaratiladi. Shakl-shamoyil, uslub, ifoda va tarz jihatdan turfa ko'rinishda bo'lib, har bir badiiy asar yozuvchining hayotiy va adabiy tajribalarining natijasi, ijodiy qiyofasini belgilaydi.

O'tgan yillarda ko'plab shov-shuvlarga sabab bo'lgan, nafaqat yoshlar, balki o'rta yosh va undan yuqori qatlam o'quvchilari qalbidan joy olib ulgurgan “Qo'rqma” romani adabiyotimizga muallifning o'ziga xos ovozi sifatida kirib kelib, millat ahamiyatiga molik muammolarni ko'tarib chiqqan asar sifatida tez fursatda dovrug' qozondi. Asar e'lon qilingan paytdan boshlab adabiy jamoatchilik tomonidan iliq kutib olindi. Unda bugungi hayotimiz asosiy jabhasi bo'lgan ilm-fan, millat yoshlarining bugungi ahvoli, ularning xarakteri, ruhiyati, bugungi davrda uchrayotgan ta'lim muammolari, o'qish va ilm olishga nisbatan insonlar

ongida o'rnashib qolgan noto'g'ri qarash kabi muammolarni umumbashariy miqyosdagi ijtimoiy muammo darajasiga ko'targan

Bosh qahramon, uning xonadosh o'rtoqlari Qoravoy, Telefonchi, Qiztaka obrazlari fojiasi orqali bugun ko'pchilik mayda narsalar qatorida baholaydigan, ularga nisbatan befarq munosabatda bo'ladigan muammolar insonning nafaqat ma'naviy olamini, balki o'zini ham tanazzulga olib kelishi mumkinligini ko'rsatib beradi. Roman psixologik metod asosida yozilgan bo'lib, bosh qahramon ruhiyati va xatti-harakatlari orqali syujet chiziqlari gavdalanib boradi. Muallifning ichki dunyosi, tashqi olamga munosabati, insonlarga nisbatan bo'lgan qarashlari juda ta'sirli voqealar orqali bayon etiladi. Yozuvchi o'z ichki olamidan kelib chiqib, jamiyatda bo'layotgan hodisalarni tahlil qilishga, unga chora qidirishga harakat qiladi. Ayni shu jihatlarida qahramonning tanqidiy fikr va qarashlari ko'zga tashlanadi. Muallif voqealarni shunchaki hikoya qilib qolmasdan uning bugungi kundagi ahamiyatini, jamiyatga ta'sirini va bo'lishi mumkin bo'lgan oqibatlarni jonli misollar bilan dalillashga harakat qiladi.

Asarda XX asr boshlarida Germaniyaga o'qish uchun yuborilgan va keyinchalik sovet hukumati tomonidan ta'qibga uchragan, aksariyati o'ldirib yuborilgan 70 nafar talaba, ularning ayanchli taqdiri bilan bog'liq voqealar bugungi zamonda yashayotgan bosh qahramon va uning atrofidagi "uyqudagi" odamlar, bir avlodning mazmunsiz qismati, milliy g'urur, e'tiqod degan tuyg'ularga mutlaqo begona, Vatan oldidagi qarzdorlik burchi tobora o'lib borayotgan avlod ahvoli, ularning o'z hayotlarini o'zgartirishdan qo'rqishlaridan iborat syujet chiziqlari baravar harakatlanadi. Bosh qahramon millatga xiyonat qilgan ajdodi tomonidan yo'l qo'yilgan xatoni to'g'rilash uchun "yetmishvoy"larni qidirishga bel bog'lagan, bu yo'lga butun vujud-u ruhiyati bilan kirishgan talaba yigit obrazidir. Uning ham o'z o'tmishi, o'z qismati, o'z fojiasi bor. Uning yaqinlari ma'nan tanazzulga uchragan, buning ustiga og'ir kasal, birontasida avlodining davom ettiruvchisi yo'q. Asarni o'qir ekan, kitobxon ushbu qismatning ham sababini anglab yetadi. Bunga sabab, ularning ajdodi yetmish talabaga xiyonat qilgan, ularni sotgan. Birgina xoinning qilgan xatosi deb butun avlod qarg'ishga qolgan, betayin taqdir va mazmunsiz hayotga mahkum etilgan.

Roman orqali kitobxon shu millatda yashayotgan har bir insonning yashashdan maqsadi nima ekanligi, o'qishdan, bilim olishdan ko'zlangan asl maqsad nima ekanligini muallifning turkistonlik talabalarning qismatida, ularning bosh qahramonga aytgan har bir so'zida aks ettirishga harakat qiladi: "Dunyo bilsin turkistonlik talabalar ham hech kimdan qolishmasligini, fikrli, ixtirochi, ular ham ilmsevar ekanligini anglasin! Biz shunday o'qiylikki, timsolimizda yengib bo'lmas millat irodasi, shijoati, kurash va zehniyati aniq-tiniq ko'rinib tursin. Biz shunday o'qiylikki, ertaga ortimizdan minglab bolalar boshini tik ko'tarib o'qisin. Biz shunday o'qiylikki, yuz yillardan so'ng emas, bugun millatim taraqqiy etsin, bugun hurlikka yetsin, bugun insonlarning qorni to'ysin, bugun dunyo tanisin. Biz shunday o'qiylikki, dunyoni bizning ma'rifat o'zgartirsin [1, 113-b.]. Sodda tarzda aytadigan bo'lsak, Germaniyada o'qigan talabalar, ularning dunyoqarash va maqsadlar doirasi, ular yashagan ijtimoiy-siyosiy muhit munosabati bugungi yoshlar ma'naviy darajasi, maqsad-muddalari bilan bir "taroziga tortiladi".

Qahramon boshdan-bosh tarixga, o'tmishga, ayniqsa, 70 nafar Germaniyaga o'qish uchun ketgan talabalarining tarixiga qiziqadi. Aynan shuning uchun ham u tarix fakultetiga o'qishga kiradi, o'qishga kirishi ham bobosining o'nta qo'yi puli evaziga bo'ladi. O'qishga kirishi esa "devorda kulib turgan surati osig'liq Ulug' Kursdosh" nomi bilan bog'liq edi. Bobosi bilan birga o'qigan "uyda prezidentdan keyin turadigan odam" Ulug' Kursdosh o'nta qo'yning puli evaziga qahramonni hech bir muammosiz joylashtirib qo'yadi. O'qishga kirishi, u yerdagi hayotning o'zi kutgandek bo'lib chiqmaganligi qahramonni bir tarafdin ko'nglini qoldirgan bo'lsa, Ulug' Kursdoshning faoliyati, hayoti uni battar "jazavaga soladi".

Ulug' Kursdoshning pora evaziga har qanday ishga tayyorligi, undan ham yomoni o'z obro'-e'tibori-yu mansabidan foydalanib nomaqbul ishlar qilishi va go'yo hech narsa bo'lmagandek yurishi qahramonning achchig'ini chiqaradi. Oliygo'h talabalarining hech bir maqsadsiz faqatgina o'zi uchun, bir parcha hujjat uchun o'qishi, ularda vatanparvarlik degan hisning yo'qligi qahramonning dilini qon qiladi, o'zining Germaniyaga ketgan yetmish nafar talabasini qo'msaydi, hech kimning ularga o'xshamasligidan xafa bo'ladi.

Ana shunday vaziyatlarda unga tushlari yordamga keladi, u endi tushlari orqali "o'z talabalarini" qidira boshlaydi, ular bilan uzluksiz suhbatlar olib boradi, ularning kechki davra suhbatlaridan bahramand bo'ladi. Faqat shundagina uning ko'ngli xotirjam bo'lgandek bo'ladi. Talabalardan ajralib qolmaslik uchun endi uzluksiz tush ko'rishga harakat qiladi. Shunday tushlarning birida yetmish talabaning yetakchisi "birinchi o'zbek agronomi" Abduvahob Murodiy bilan tanishib oladi va u bilan uzoq- uzoq suhbatlar qura boshlaydi, mudrash uning kasbiga, ma'lumotiga, sharifiga aylanadi: "Uyquning eng ulug' cho'qqisiga yetmoq istaydi xonadoshlarim! Odam bir oy, bir yil, hatto bir umr hech nima qilmay yashasa ham bo'larkan! Mudrash mening ma'lumotim, mening kasbim, mening sharifim" [1, 138-b].

Romanda millat uchun xitob bo'lib yangragan ta'sirchan xarakterdagi ifodalar, ruhiy holat talqinlari nihoyatda bisyor. Bunday tasvirlar kitobxon qalbida aks-sado bermasdan qolmaydi: "Yotma, mudrama, hali o'lish uchun vaqt bor. O'lim qahramonlik emas. Eshakqurtlar g'alabasi! Dunyoda ma'rifatli xalq borki, o'zining chetda o'qiyotgan bolalarini eslab turadi. Ularni ta'minlash uchun nonini ikkiga bo'ladi. Bizning odamlar ham "jiydaxalta"larini kavlab, bolalarning o'qishidan boxabar bo'lishsin!" [1, 159-b].

Asarda badiiy xarakter darajasi nihoyatda ta'sirli ochib berilgan. Bunda romanning badiiylik darajasi tasvirlanayotgan ifodaga shu darajada singib ketganki, kitobxon haqiqatning ochiq-oydin aksidan ta'sirlanmasdan qolmaydi. Darhaqiqat, badiiylik darajasi, avvalo san'atkorning o'z predmetiga, tasvir obyektiga, ya'ni odamlarga mehr ifodasining saviyasi, ko'lami, ta'sir kuchidadir. Odamlarga mehr yozuvchining yalang'och, dabdabali gaplarida emas, asarning qon-taniga singib ketgan chuqur ichki hissiy ohangidadir [2, 85-b]. Bunday tasvir uslubi inson ruhiyatidagi eng pinhoni jarayonlarni ham ochib beradi. Shu jihatdan asar bir necha yuz yillardan beri millat qalbida pinhonn yashab kelayotgan orzuni, ko'hna dardni ko'rsata olgan ko'zgu sifatida adabiyotimizda yuksak e'tirofga loyiq asarlar qatoridan joy oldi.

Foydalanilgan adabiyotlar:

1. Jovliyev J. Qoʻrqma. Roman. – Toshkent, 2020.
2. Normatov U. Yetuklik. – Toshkent, Gʻafur Gʻulom nomidagi adabiyot va sanʼat nashriyoti, 1982.
3. Normatov U. Umiddahsh tamoyillari. – Toshkent, “Maʼnaviyat”, 2000.

ALISHER NAVOIY OBRAZINING BADIY TALQINI (Isajon Sultonning “Alisher Navoiy” romani misolida)

**Umarova Intizor Abdumalik qizi,
SamDU 1- kurs magistri,**

Oʻtgan asrning boshlarida shakllanib ulgurgan oʻzbek tarixiy romanchiligi, bir asrlik tarixi davomida yuksak badiiy-estetik qiymat kasb eta boshladi. Tariximizni, tarix sahifalaridagi buyuk siymolar obrazini badiiy talqin etish anʼanasi taraqqiy etib keldiki, bu esa tarixiy siymolar haqidagi tarixiy romanlarni yuksalishini taʼminlashga xizmat qildi. “Roman janri oʻzining keng qamrovli tasvirga ega ekanligi bilan alohida ajralib turuvchi janrlardan asosiysidir” [1, 14-bet]. Taʼkidlanganidek, roman hayotni, tarixiy yoki zamonaviy borliqni keng qamrovda epik planda talqin etadi [2, 495-bet].

Tarixiy romanda tarixiy shaxs qismati, ruhiy-maʼnaviy olamining badiiy talqini, ijodkor badiiy mahorati orqali oʻz ifodasini topa boshladi [3, 209-bet]. Shu nuqtai nazardan, oʻzbek tarixiy romanchiligi genezisiga nazar tashlar ekanmiz, adabiyotshunos Gʻ.Murodovning quyidagi qarashlarida ham asoslar mavjudligini kuzatamiz: “Birinci oʻzbek romani va u bilan shakllangan “Oltinchi romanchilik maktabi” birinchi navbatda milliy adabiy-badiiy jarayon taraqqiyoti, maʼnaviy-estetik ehtiyoji mahsuli, hosilasi boʻlib yuzaga keldi... Markaziy Osiyo epik adabiyotlarida ilk roman boʻlgan “Oʻtkan kunlar” oʻzining mukammal badiiy olami, falsafiy konsepsiyasi bilan shu badiiy hududdagi tarixiy romanning kelgusi taraqqiyotining ustivor yoʻnalishlarini belgilab berdi” [4, 54-bet].

Haqiqatan ham oʻzbek tarixiy romanlarining taraqqiyoti haqidagi bunday qarashlarda asoslar mavjud, oʻtgan davr mobaynida janr taraqqiyoti turfa xil ohanglarni, badiiy-estetik tamoyillarni yuzaga chiqardi.

Bu oʻz navbatida, ilk tarixiy romanchilikda ilgari surilgan tasvir usullarining oʻziga xosligi bilan bir qatorda, etuk soʻz sanʼatkori Abdulla Qodiriydek ulkan adib janrning poetik xususiyatlarini juda teran anglaganligi, ijodida bu usulni namoyon eta olganligi bilan izohlash zarur: “Lekin tarixiy sharoit, uning natijasi boʻlgan maʼlum bir voqealar uning gumanistik gʻoyalarini yuzaga chiqarishga imkon bermagan” [1, 15-bet].

Roman uchun asos qilib olingan tarix voqeligining badiiy ifodasi, mavjud xalq ogʻzaki ijodi, mumtoz va jahon adabiy anʼanalaridan oziqlanishi ham poetik mukammallik kasb etishiga imkon yaratgan. Yillar davomida adabiy-tanqidiy qarashlarning asosiy manbai boʻlib kelishini bu janrning ilk namunasi, etuk asar sifatidagi poetik talqinlarning oʻziga xosliklari bilan izohlash mumkin.

Insonning ijtimoiy muhitga taʼsiri, bu muhitda xarakterning shakllanishi, oʻziga xos makon va zamonda harakat etishi, jamiyat va shaxsning birligi ham

yanada asosliroq talqinlarni shakllantirdi. Shuning uchun ma'lum bir davr badiiy ijod jarayonidagi kompozitsion talablarni, mezon va imkoniyatlarni yuzaga chiqardi, bu esa tarixiy romanlarning poetik xususiyatini tahlil qilish imkonini kengaytirdi.

Keyingi yillardagi fan-texnika taraqqiyoti inson tafakkurining ham keskin o'zgarishiga olib kelmoqda. Natijada badiiy adabiyotga, xususan, tarixiy romanga qahramon ruhiy-ma'naviy olamidagi kechinmalar, ziddiyatlarning mahsuli bo'lgan sabab-oqibat natijalarini anglashga intilish, undan o'ziga xos muayyan saboqlar chiqarib olish maqsadida tahliliy yondashilmoqda.

Tarixiy romanning asosiy vazifalaridan biri, o'tmishda sodir bo'lgan tarixiy voqealarni, buyuk shaxslarning badiiy siymosini aks ettirish, ularning tarix va insoniyat uchun eng muhim qirralarini, xarakter xususiyatlarini badiiy talqin etish, davr va inson, shaxs va muhit kabi tushunchalarni badiiylashtirib, o'quvchini uzoq tarix bilan hamnafas bo'lishiga imkon yaratishdan iborat [5,181-bet].

Iste'dodli adib Isajon Sultonning "Alisher Navoiy" tarixiy romanidagi obrazlar olami kitobxon qalbini larzaga soladi. Hayot haqiqatining turli qirralarini badiiy inkishof etish jarayonida tarixiy shaxslar qismatini, uning badiiy olamini, davr haqiqatidan kelib chiqib talqin etgan. Chunki tarix haqiqatini badiiylashtirish ijodkordan katta badiiy mahorat bilan bir qatorda, tarix haqiqatini, tarixiy shaxslar olamini, uning ruhiy-ma'naviy istiroblarini teran anglashni talab etadi.

Yozuvchi Isajon Sulton bu romanidagi bir qator obrazlarni masalan: Mir Alisher Navoiy, Husayn Bayqaro, Xadichabegim, Badiuzzamon kabi obrazlarining turli xislatlarini mahorat bilan talqin etgan.

Adabiyotlar:

1.Nasirov A. Badiiylik va hayotiy haqiqat. Monografiya. – Turkiya, Istanbul, -KESIT, 2019. – B. 139.

2. Nasirov A. Artistic chronotope interpretation in Odil Yakubov's novels // *Academicia: An International multidisciplinary Research journal* ISSN222-49-7137. Impact Faktor SJIF 2020: 7.13. Str. 498-501.

3. Nasirov A. Ard conflict in the novel "Rebellion and obedience" by Ukugbek Hamdam // *Science, Research, Development* // 32. // 2. Berlin 30.08. 2020 – 31. 08. "Diamond trading tour". 2020. ISBN: 978-66401-65-5. 208-211 – str.

4.Муродов Ф. Тарихий роман: генезиси, кейинги тараққиёти. Монография. – Тошкент: Фан, 2005. – Б.172.

“QAYDASAN MORIKO” QISSASIDA XARAKTER YARATISH

Maxamatkulova Shohida Abdusalim qizi

SamDU 4-kurs talabasi,

Ilmiy rahbar: prof. A.Nasirov,

O'tgan asr adabiyotining betakror so'z san'atkori, o'zbek nasrining taraqqiyotiga ulkan hissa qo'shgan ijodkorlardan biri Odil Yoqubovdir. Adibning serqirra ijodi adabiyotshunoslikda ma'lum darajada tadqiq qilindi va o'rganilmoqda, ammo adibning betakror uslubi, sujet yaratish mahorati, obraz

yaratishning o'ziga xos tamoyillari kabi bir qator jihatlar deyarli o'rganilmagan. Adib ijodining turli qirralari haqida bir qator adabiyotshunoslar o'z qarashlarini, nazariy mulohazalarini qayd qilib o'tgan.

Adib ijodi haqidagi tahliliy qarashlarni Ozod Sharafiddinov, Matyoqub Qo'shjonov, Umarali Normatov, Norboy Xudoyberganov, Islomjon Yoqubov, Azimidin Nasirov, Zokir Rahimov kabi adabiyotshunoslarning qarashlarida kuzatish mumkin. Bu tadqiqotlarida yozuvchining o'ziga xos mahorati, ijodkor shaxs sifatidagi faoliyati, tarix va hayotni aks ettirishdagi individual usluybi haqidahi mulohazalarni kuzatish mumkin.

Odil Yoqubov ijodi haqida so'z yuritgan Ozod Sharafiddinov yozadi: "Odil Yoqubovning "Ulug'bek xazinasini" va "Diyonat" kabi romanlari o'zbek adabiyotining rivojiga salmoqli hissa bo'lib qo'shildi. Bu asarlar ko'pdan beri O'zbekiston hududlarini oshib o'tib, bir qator xorijiy mamlakatlarda ham ham o'z kitobxonlarini topgan"ligini alohida ta'kidlasa [1,589-bet], adabiyotshunos Umarali Normatov esa: "Hayotning o'zidan olgan zavqini, o'z yurak dardini, hayojonlarini izhor etadi, o'z qalamiga olgan hayot hodisalarini, personajlar qalbi va ruhiyatini murakkabligi, ziddiyatlari, chinakkam nafasati bilan kitobxonga etkaza oladi" [2, 104-bet], - degan qarashni juda asosli ilgari suradi. Shu bilan bir qatorda adabiyotshunos Azimidin nasirov esa quyidagi qarashlarni ilgari suradi: "Milliy roman tizmidagi jiddiy izlanishlar olib brogan adib ijodida shaxs va jamiyat turfa xil qirralarini umumlashtirish, hayot haqiqatini badiiy aks ettirishhamda ruhiy tahlil teranligini yuzaga chiqarish" [3,4-bet] jarayonidagi badiiy mahoratiga diqqatini qaratib o'tgan.

Odil Yoqubov 1945-1950- yillar oralig'ida harbiy xizmatda bo'lib, hayotning eng qaynoq va murakkab jabhalari bilan tanishadi, o'z boshidan o'tkazadi. Shaxs sifatidagi bu jarayondagi kurashlari, inson sifatigi istiroblari keyinchalik asta-sekin badiiy asarlariga ko'cha boshlagan. Har bir badiiy voqelikning o'z tarixi borligini ham alohida qayd etish lozim. Adib asarlaridagi realistik tasvirning ustunligi, qahramonlar olamining badiiy talqini ham xuddi shu tushunchalar bilan uzviy bog'lanib ketadi. Olam va odamni kashf etish, uning badiiy siymosini yaratish ana shu hayot tajribalarining mahsuli ekanligini ham alohida qayd etishni talab etadi. Ikkinchi jahon urushi yillaridagi inson qismati, fojiali taqdirini ko'rgan adib, murakkab taqdir egalarining badiiy siymosini aks ettirishni barcha asarlarida yuksak darajada talqin etganligini kuztish mumkin. Yozuvchining bu fojialarning guvohi va ishtirokchisi sifatida, urush voqealarini, mashaqqatlarini o'zining bir qator asarlariga olib kirdiki, hayotiy haqiqatni badiiyatga singdirdi. Bu ham ijodkordan katta badiiy maoratni, hayotiy tajribani talab etardi. Ana shunday qismat egalarini, ularning fojialarini haqqoniy talqin etishga intilganligini keyingi asarlaridan biri "Qaydasan Moriko"da ham ko'rish mumkin.

O.Yoqubovning "Qaydasan, Moriko" qissasida inson ruhiyatidagi ziddiyatlar haqqoniy yoritilgan. Asardagi voqealar silsilasi asosan, rus-yapon urushi zamirida shakllangan bo'lib, inson qismatini, ziddiyatlarini muhitning biryoqlama tomonlarini teran anglagan holda obrazlarning xarakter va ruhiyatini asosli talqin etadi.

Atoqli adabiyotshunos olim va adib Ozod Sharafiddinovning o'zining mustaqillik yillarida yaratgan maqola, esse va adabiy suhbatlaridan tashkil topgan to'plamida Odil yoqubovning "Qaydasan Moriko" qissasi haqida quyidagi fikrlarni bildiradi: "Qaydasan, Moriko?" qissasi, avvalo, o'zbek adabiyoti uchun mavzu jihatidan yangi asar. Gap shundaki, sho'ro zamonida har xil, sog'lom mantiqdan xoli bo'lgan va shu tufayli ayrim hollarda odamlarni qiynab qo'yadigan qonunlar, qoidalar, tartiblar ko'p bo'lardi. Shulardan biri - sovet kishisi bilan xorijiy odamlar o'rtasida har xil ishqiy munosabatlarga mutlaqo yo'l qo'yilmas va ularning qonuniy nikohdan o'tishlariga ham ijozat berilmasdi. Lekin inson yuragi g'alati narsa u ba'zan qonun-qoidalarni tan olmaydi, ba'zan, esa hatto mantiqqa xilof ham borishi mumkin. Shunday hollarda - tuyg'ular qonunlar bilan to'qnashgan joylarda turli-tuman insoniy dramalar va hatto fojialar vujudga kelardi. Odil Yoqubovning qissasida shunga yaqin voqea hikoya qilinadi" [1, 591-bet].

Darhaqiqat, adibning bu qissasida yuqorida alohida qayd qilinganidek, insonni anglashga, uning qalb nidolarini aks ettirishga qilingan harakatlarda, talqinlarda faqat va faqat inson degan tushunchaning etakchilik qilishini ham unitmaslik kerak. Asar urush haqida bo'lsa-da, talqinlarda mag'lub yoki g'oliblik haqida emas, aksincha shax fojiasi haqidagi tasvirlar etakchilik qiladi. Qissadagi obrazlar olmi ham, ularning irqi, millati ham turlicha bo'lsa-da, eng xarakterli jihati tili, dinidan qat'iy nazar inson va uning qalbi haqida fikr yuritiladi. Shuning uchun ham adabiyotshunos Ozod Sharafiddinov qayd qilganidek, insonni anglashga bo'lgan ehtiyojning mahsuli sifatida bu asar maydonga kelgan bo'lsa, ajab emas. Yozuvchining uzoq yillik ijodi shundan dalolat beradiki, har qanday asarida insonni, uning fazilatlarini, xarakter qirralarini talqin etishga harakat qilinganligini kuzatish mumkin. "Qaydasan Moriko?" qissasida yozuvchining o'ziga xos uslubi va badiiy mahoratini tadqiq etish hamda sujet yaratish borasidagi mahoratiga diqqat qaratishga harakat qilamiz. "Qaydasan Moriko" qissasida voqelik hikoyachi tilidan bayon qilingan bo'lib, bu usul adib uchun o'z g'oyasi va fikrlarini ifoda etishning vositasi bo'lib xizmat qilgan. Aynan shu holat asar sujetining ham o'ziga xosligini ta'minlagan. Badiiy asarda sujet markaziy ahamiyatga ega hisoblanadi. Sujet atamasiga ilmiy adabiyotlarda turli ta'riflar berilgan. Masalan, "Adabiyotshunoslik lug'ati"da "Sujet (frans.-predmet, "asosga qo'yilgan narsa") badiiy shaklning eng muhim elementlaridan biri sanalib, badiiy asardagi bir-biriga uzviy bog'liq holda kechadigan, qahramonlarning xatti-harakatlaridan tarkib topuvchi voqealar tizimini anglatadi. Umuman, sujetlilik badiiy adabiyotning xos xususiyatlaridan biri bo'lib, barcha turdagi badiiy asarlarda ham sujet mavjuddir"[4, 287-bet], deyiladi.

Qayd qilinganidek sujetsiz badiiy asarlarni tasavvur etish mumkin emas. Badiiyat mavjud joyda sujet ham o'z o'rniga ega bo'ladi. Shuning uchun ham adibning bu qissasidagi sujet hayot voqeligini realistik talqin etish an'anasini yuzaga chiqarishga imkon bergan. Aslida, adib uzoq yillar o'tib, yana urush mavzusiga qatishi, bu haqida maxsus asar yaratishi zamirida juda ham murakkab hayot voqeligi, hayotiy ziddiyatlar mujassamlashganligini ta'kidlash lozim.

"Qaydasan Moriko" qissasidagi sujet liniyasi yangicha fikrlar mantig'iga asoslanganligini ham qayd etish lozim, chunki urush mavzusiga singdirilgan inson

qismati, uning fojialari, turli millat vakillari obrazi orqali yoritiladi. Bu esa adabiyotning, badiiylilikning o'ziga xos qonuniyatlarini juda teran namoyon qilganligi bilan izohlanadi. Shuning uchun ham, asarlar davomida shakllanib kelayotgan jahon adabiyoti va uning uzviy bir qismi bo'lgan o'zbek adabiyotidagi asarlarda ham inson qismati, uning dahshatli istiroblari talqini o'z aksini topib kelganligidan adlolat beradi.

Odil Yoqubovning "Qaydasan Moriko" qissasida ham ana shunday badiiylilik o'z ifodasini topgan. Asar diologik nutqning konflikt shakli bilan boshlanar ekan, kitobxonni kim, nima uchun, nima sababli degan xayollar oxushiga olib ketadi. Diologik nutqda badiiy konflikt bilan bir qatorda badiiy tugun ham mujassamlashgan. Sujetning turfa xil ko'rinishlari, uning tarkibiy qismlari mavjud, ammo muallif juda teran mulohazani diologik nutqqa singdirib yuboradi. Talqindagi konflikt ham, badiiy tugun ham qahramon xayollarini uzoq tarix sari etaklaydi, bu bejiz emas, albatta. Buning zahirida nafaqat o'tmish tarixi, shu bilan bir qatorda insonni anglash, o'z hayotining murakkab bir davriga xayolan sayohat qilish ham talqinlardan anglashilib turadi. Badiiy qahramonning o'y-xayollari uni turli tarix sahifalarini shakllantirish bilan bir qatorda, murakkab va fojialardan tashqari xrotonot orqali, go'zal bir makon voqeligi bilan ham tanishtirib o'tadi. Yozuvchi asar sujetini hikoyachi nutqi orqali hashakllantirar ekan, kitobxonda davrning murakkab siyosiy "iqlim"larining badiiy inkosini teranroq anglash imkonini beradi: "Ming to'qqiz yuz qirq beshinchi yilning iliq kuz oylari, Yapon ofitserlari uchun qurilgan shinam shaharcha – Port-Artur. Yam-yashil archazorlar orasiga yashiringan bir qavotli ozoda, ko'rkam uycharlar. Rus so'zlarini allaqanday yoqimli bildirab gapiradigan yapon qizchasi Moriko! Xayolim yana uzoqlarga uchdi. Salkam ikki ming chaqirimga cho'zilgan mashhur Gobi sahrosini yayov o'tganda chekkan uqibatlarimiz, orta qolgan Gobi sahrosidan keyin yo'limizni to'sgan Xingan tog'lari tog'lari ham orqaga chekingan. Oldinda esa cheksiz-chegarasiz, yam-yashil vodiy yastanib yotibdi. Bu – shimoliy Manjuriyaning boshlanishi edi" [5, 170-bet].

Qissadan olingan taqlinlar nazar tashlar ekanmiz, go'yo urush bo'lmayotgandek, sayohat uchun kezib yurgandek tassurotni shakllantiradi. Chunki tabiat inson yovuzliklarini yo'qotish uchun ham shunday go'zallik ato qiligandek yoki uzoq yillik urushlardan bezgan qalbning, yillar o'tib bunday mo'jizalar oldida tiz cho'kishi ham, tabiatning ne'matidir. Asar qahramonlarining kechinmalaridagi ruhiy istiroblar o'rnini go'zallik, yaxshilik egallay boshlaydiki, bu esa insonni anglashga, borliqning mo'jizakorligini his etishga da'vat etadi: "Biz kelgan qirlar ko'rkam olmazor va nokzorlar bilan qoplangan. Kunduz kunlari bog'larga sho'ng'ib ketamiz; sababi urush, bog'lar qorovsiz qolgan... Qo'yinlarimizni asal ta'mi kelgan nok va olmalarga to'ldirib, pastdagi palatkalarimizga qaytamiz. Biz ham deyarlik qorovsiz qolganmiz" [5, 170-bet]. Yillar davomida zambaraklar, to'plar dahshati bilan kurashgan insonning bunday tabiat qo'yniga tushushib qolishi ham bejiz emas. Muallif bu orqali insonning qalb kechinmalaridagi mujassamlashgan go'zallikni, uning yaxshilik, ezgulik uchun kurshga sarflashi mumkinligini uqtirmoqda.

Darhaqiqat, badiiylilik qonuniyati insonning turfa xil olamini, mavjud makon va zamonda talqin etishga, bu asosida asar sujetini shakllantir, badiiy qahramonlar qiyofasi va ruhiy olamini taqlin etish a'anasini ham shakllantiradi. Qissaning sujeti jahon adabiyotining etakchi tamoyillarini o'zida mujassamlashtirganligi bilan ham alohida ajralib turadi. Badiiy asarning sujeti qaysi janrga mansubligiga qarab o'ziga xos tarzda shakllantiriladi. Epik janrdagi asarlar sujet va kompozitsiyasi o'ziga xos yaxlitligi bilan ham ajralib turadi. Sujet voqealari personajlar xarakterining ochilishi, shakllanishi uchun muhim asos vazifasini o'taydi. Syujetning qay tarzda bo'lishi muallif niyatiga, olam va odamni anglash jarayoniga uzviy bog'liqdir.

“Qaydasan Moriko” qissasi sujeti tayyor voqealar asosiga qurilgan bo'lib, hayotiy voqelikning badiiy in'ikosi sifatida yuizaga chiqqan. Ko'rinayabdi, badiiy asar sujeti hayotni turfa xil ohanglarda badiiy aks ettirish bilan birgalikda, badiiy qahramonlar galeriyasini, ularning o'ziga xos xarakter qirralarini ham asosli shakllanishini ta'minlab boradi.

Haqiqatdan ham, yozuvchining bu qissasida voqealar izchillik bilan rivojlanib boradi. Asardagi obrazlar esa mantiqiy tarzda ijtimoiy muhit ziddiyatlarini ochib beradi. Asar sujetidan o'rin olgan obrazlar tizimida yapon generali, uning ikki qizi taqdiri bilan bogliq voqelar silsilasi o'z ifodasini topgan. Yozuvchi Port-Artur shahrining go'zalliklarini peyzaj tasviriga singdiradi. Shu bilan birlikda uning go'zalliklari sobiq yapon generalining kichik, ammo ko'rkam bog'lari tasviri orqali inson xarakterini, uning botiniy olamidagi qarama-qarshiliklarni talqin etishga asos bo'lib xizmat qilgan.

Xullas, iste'dodli adib Odil Yoqubovning “Qaydasan Moriko” qissasidagi o'ziga xos talqinlar asar sujetida yana-da teranlashadi va badiiy funksiyasini namoyon qiladi. Buning zahirida esa inson va borlqni terang anglash bilan birlikda, ijodkor badiiy mahorati ham mujassamlashganligini alohida qayd etmoqchimiz.

Adabiyotlar:

- 1.Sharafiddinov O. Ijodni anglash baxti. –Toshkent, “Sharq”, 2004. –B.640.
- 2.Normatov U. Ijod sehri. – Toshkent, “Sharq”, 2007. – B. 352.
- 3.Nasirov A. Odil Yoqubov romanlari poetikasi. Monografiya. – Toshkent, “Fan” nashriyoti, 2012. – B. 160.
- 4.Quronov D., Mamajonov Z., Sheraliyeva M. Adabiyotshunoslik lug'ati. – Toshkent, “Akademnashr” nashriyoti, 2010. –B.400.
- 5.Yoqubov O. Qaydasan Moriko. Qissalar, dramalar, hikoyalar, etyudlar, maqolalar. – Toshkent, “Sharq” nashriyoti, 2002. – B. 432.

“DASHTI QIPCHOQ LOCHINI” ASARIDA TARIXIY SHAXS TALQINI

Sodiqov Muslidin Uzoqboy o'g'li

SamDU 4-kurs talabasi

Ilmiy rahbar: prof. A.Nasirov

Turon o'lkasi ko'plab adiblar, buyuk hukumdorlarni, shoiru ulomalarni, olimu fuzalolarni tarbiyalab yoyaga etkazgan zamin hisoblanadi. Ana shunday

shoh va shoirlardan biri Abulfath Muhammad Shayboniyxondir. O‘z davrining etuk davlat arbobi, mohir sarkarda va iste’dodli shoiri sifatida e’tirof etilishi ham bejiz emas.

Muhammad Shayboniy O‘zbek xonligi hukmdori Abulxayrxonning nabirasi, Shohbudog‘ sultonning o‘g‘li. Muhammad Shayboniyxonning bobosi Abulxayrxon XV asrning yigirmanchi yillarda Sharqiy Dashti Qipchoqda o‘z hukumronligiga asos solgan.

XIII-XIV asrlarga kelib o‘zbeklar Dashtiqipchoq cho‘llarida o‘zlarining “Oq o‘rda” deb atalgan davlatini tashkil qilishgan. Bu ko‘chmanchi o‘zbek davlatini tashkil qilishgan. Bu ko‘chmanchi o‘zbek davlati “Oltin o‘rda”dan ajralib chiqqan bo‘lib, uning markazi Sirdaryoning o‘rta oqimidagi Turkiston (to‘g‘rirog‘I Sig‘noq) shahri bo‘lgan, uning asoschisi esa Abulxayrxon edi” [1, 10-bet], - deb yozadi qomusiy olim Xudoyberdi Doniyorov. O‘z davrining buyuk shaxsi Abulxayrxon boshchiligidagi bu davlat XV asrning ikkinchi yarmiga kelib yanada mustahkamlandi.

Abulxayrxonning (1412-1468-yil) vafot etishi bilan u shakllantirgan birlik parchalanib ketadi. Muhammad Shayboniyxon hayoti o‘g‘ir va sinovli kechgan. U yoshligidayoq, ota-onasidan yetim qoladi, shundan keyin bobosi Абулхайрхон qo‘lida kamol topadi, keyinchalik esa, Qorachabek oilasida tarbiyalandi. Ma’lum muddat Turkiston va O‘tror hukmdori Muhammad Mazid unga homiylik qiladi.

“O‘zbekiston tarixidagi xonlar va sultonlar orasida hukm surgan ziddiyatli tarixiy davri, o‘rni faoliyati, poetik ijodi hamda fojiali hayoti bo‘yicha Muhammad Shohbaxt Shayboniyxonga o‘xshashi yo‘qdir” [2, 62-bet], - deb yozadi davlat huquqi tarixi nbilan shug‘ullangan mashhur olim Z.Muqumov.

Tarix haqiqatiga nazar tashlansa, haqiqatdan ham murakkab hayot yo‘lini bosib o‘tganligini guvohi bo‘lamiz. Tarixiy manbalarda qayd qilinganidek, “Bir tomoni okean, ikkinchi tomoni Turkiston, uchunchisi – Darband, to‘rtinchisi – Xorazm, beshinchisi – Astrobod bilan chegaradosh bo‘lgan Dashti Qipchoq o‘zbeklari yurtida 1451-yilda dunyoga keldi” [3, 34-bet]. Chunki, juda katta umidlar bilan bobosi Abulxayrxon Shayboniyxonga “Shohbaxt”deb ism qo‘yadi. Voyaga yetgandan so‘ng bobosining parchalangan davlatini tiklash harakatini boshlaydi. Bu paytda Temuriylar sulolasida ichki nizolar avj olgan, har kim o‘zicha hukmdor va hukmdorlik talab etgan, toji-u taxt talashayotgan, xalq urushlardan charchagan davr hukumron edi. Bu holatdan Shayboniyxon foydalanadi va Movarounnahrda yurishlarini boshlaydi. “Muhammad Shayboniyxon Buxoroda Boburga qarshi jangga butun kuch-qudrati bilan tayyorlana boshlaydi. Muhammad Shayboniyxon bilan Bobur o‘rtasidaBuxoro va Samarqand oralig‘idagi Saripul degan joyda hal qiluvchi uruish bo‘ladi. Shayboniyxon bu urushda “to‘lg‘ama” degan harbiy hiyla ishlatadi, natijada g‘alaba qozonadi. Bobur Samarqandga chekinishga majbur bo‘ladi. Shayboniyxon ta’qib keladi va Samarqandni olti oy qamal qiladi” [4, 84-bet]. Bu faktlarda asoslar mavjud bo‘lib Samarqandi olti oy qamal qiladi va jangsiz qo‘lga oladi.

Iste’dodli adib Sa’dulla Siyoyev bir qator tarixiy asarlari bilan o‘quvchilar qalbidan o‘rin olgan ijodkorlardan biridir. Adibning tariximizni o‘qilmagan sahifalaridan ma’lumot beruvchi “Yassaviyning so‘ngi safari” tarixi romanini ham

alohida qayd etish lozim. Yozuvchining “Dashti Qipchoq lochini” (Muhammad Shayboniyxon qissasi)da ilk marta tarix haqiqatidan kelib chiqib uning badiiy siymosini yaratgan yirik nasriy asar ekanligini ham qayd etish joizdi: “Muhammad Shayboniyxon haqida hozircha o‘zbek adabiyotida ayrim tarixiy mavzudagi hikoyalarni mustasno etganda birorta qissa yoki roman yaratilmagan edi. Sa’dulla Siyoyev o‘zbek adabiyotida mazkur bo‘shliqni to‘ldirish uchun mas’uliyatli vazifani o‘z zimmasiga olib, juda katta mashaqqat va zahmatlar evaziga mazkur qissani yaratadi” [5, 3-bet].

Darhaqiqat, haqli tarzda qayd qilinganidek asarda buyuk tarixiy shaxsning o‘ziga xos xarakter xususiyatlari, ruhiy-ma’naviy olami haqqoniy talqin etilganligini kuzatish mumkin. Chunki bir qator badiiy asarlarda adibning salbiy qiyofasi talqin etilgan bo‘lsa-da, ammo turli tarixiy manbalarning guvohlik berishicha Muhammad Shohbaxt o‘ta murakkb shxs sifatida qayd etilaib, o‘z davrining iste’dodli hukumdori, shoiri sifatida e’tirof etiladi.

Muhammad Shohbaxtning bobosi Abulxayrxon vafotidan keyingi hayoti ham ziddiyatlarga to‘la, uning har bir harakati nazorat ostida o‘tgan bo‘lib, ayniqsa, Mazid Tarxon homiylik qilgan yillar o‘ziga xos bir davr bo‘lganligini kuzatish mumkin. Mazid Tarxonning avlodi aslida temuriy hukumdorlarga borib taqalardi, chunki Abulxayrxon qaynotosi bo‘lmish Mirzo Ulug‘bekka hurmati yuzasidan Mazid Tarxonga Turkiston va O‘tror shaharlarining bekligini in’om qilgan, ishonchli kishilaridan biri sifatida qarar edi. Shuning uchu Abulxayrxonning vafotidan so‘ng, bir muddat Muhammad Shohbaxt va ukasi Sulton Mahmud Mazid tarxonning O‘trordagi qo‘rg‘onida yashgan.

Har bir davrdagi o‘ziga xos ziddiyat shu vaqtlarda ham, hukmrobnlik qilgan, bu tushunchani ilgari surishimizga sabab, Mazid Tarxonning mulozimlaridan biri ma’lum bir vaqt o‘tgandan so‘ng, unga qarata, Bek og‘a siz qalbi daryo insonsiz, ammo bu etimchalarni boqib o‘zingizga tashvish orttirmadizmi, degan fikrni bayon etib alohida qayd etadiki: “Etim qo‘zi asrasang, og‘zi burning moy etar, etim bola asrasang... U yog‘I o‘zlariga ayon, bek og‘a. xususan, ulkan og‘lonning diydasi qattiq aning ot chopishini ko‘rsangiz, o‘q otishini ko‘rsangiz, og‘a. Merganlikning hovasini olibdi, battol! Egar ustida turib, osmondagi qushni otib tushurdi. Hozircha u bola temirqanot, ulg‘aysa, ma’zur tuting, sizning o‘rningizga ham ko‘z tikishi turgan gap. Burgutga aylanib, jigaringizni cho‘qimasin deyma-da, bek og‘a” [5, 8-bet].

Saltanat va beklikning ziddiyatlari, ichki tinimsiz kurashlarini ko‘p ko‘rgan Mazid tarxondek shaxs ham bu tushunchalardan so‘ng uzoq xayolga toladi. Uning nigohlarini ko‘z o‘ngida jonlantirib ham ko‘radi, ammo yaqini aytgan fikr “aylanib kelib” xayolini chulg‘ab olardi. Abulxayrxon unga doimo yaxshilik qilganini, muqaddas ikki shahar bekligini unga hech ikkilanmasdan taqdim qilgan edi, ammo o‘z xayollari bilan olishar ekan, hozir ikki etimni shahardan haydasam Sultonning ruhi azob chekmaydimi, degan o‘ylar iskanchasida qoladi. O‘z botinidagi ziddiyatlar bilan kurashadi, ammo mutloq xulosa chiqara olmaydi.

Sa’dulla Siyoyev qissada tarixiy shaxsning o‘ziga xos jasoratini, insoniy fazilatlarini, istiroblarini juda teran talqin etgan. Ayniqsa, uning yoshlik chog‘laridagi bilm olish ilinjidagi hayotini ham go‘zal lavlarda aks ettirgan.

Shayboniyxon Buxoroda madrasada tahsil olgan, bu yillar ancha murakkab hayot yo'lini bosib o'tishga imkon yaratgan, ammo u tinimsiz va sabot bilan ilm oladi: "Buxoro. Labihavuz yaqinidagi chog'iroqqina xonadon. Hovliga kiraverishdagi kichkina hujrada o'n besh-o'n olti yoshlardagi durkun bolakay oldidagi lavhaga egilganicha Qur'on tilovat qilib o'tiribdi. U qiyiq ko'zlarini yumib, oyatlarni ichida qayta-qayta takrorladi" [5, 6-bet].

Haqli tarzda qayd qilinganidek, yoshlik chog'larida tinimsiz ilm olish ilinjida harakat qildi, hayotning turli xil murakkabliklarini engib o'tishga majbur bo'lgan. Aslida uning qalbidagi, kechinmalaridagi qarashlarga e'tibor qaratilsa, ma'naviy dunyosi yanada teronroq ko'zga tashlanadi. Horigan ko'zlarini tin oldirish uchun, horg'inlik bilan tashqariga nazar tashlar ekan ajoyib bir harakatning guvohi bo'ladiki, yozuvchi bu tasvir orqali uning ruhiy olamidagi o'ziga xos mulohazalarni yuzaga chiqarishga intiladi. Tshqarida katta balxtut g'arq pishgan, meaning ko'pligidan erga ham to'kilganligini kuzatib turar ekan, uning xayolini tut talashayotgan jaydari chumchuq bilan makkai musicha egallaydi, shu voqelikni kuzatar ekan xayoliga juda yaxshi fikr kelib, insoniyatning tinimsiz harakatlariga qiyos qiladi: "Baayni odamlarning o'zi, - deb xayollandi, - shuncha meaning ustida tursalar-da ko'zlari to'ymaydi, bir-biridan qizg'anishini ko'ring! Axir bu tutni butun bir bog'ning qushlari ham eb ado qilolmaydi-ku? Yo ajab" [5, 6-bet].

Talqinlarga nazar tashlar ekanmiz, insonning ruhiy-ma'naviy olamidagi ziddiyatlar, olam va odamni anglash yo'lidagi urinishlar ko'z o'ngimizda jonlanadi. Muhammad Shayboniyxon xotira va xayollarga berilib o'tirar ekan, ustozning xonaga kirganini ham sezmay qoladi.

Foydalanilgan adabiyotlar:

- 1.Doniyorov X. O'zbek xalqining shajara va shevalari. Monografiya. Ikkinchi nashr. – Toshkent, "Navro'z" nashriyoti DUK, 2017. – B. 136.
- 2.Muqumov Z. Qilich va qalam sohiblari (Davlat arboblari haqida tarixiy lavhalar). Risola. – Samarqand, SamDU nashri, 2013. – B. 160.
- 3.Fazlulloh Ibn Ruzbehon Isfahoniy. Mehmonnoma'iy Buxara. – Moskva, Nauka, 1976. –Str. 195.
- 4.Nasirov A. Badiiylik va tarixiy haqiqat. Monografiya. – Turkiya, Istanbul, Kesit, 2019. – B. 140.
- 5.Rajabov Q. Adibning yangi tuhfası. Ma'limot uchun qarang: Siyoyev S. Dashti qipchoq lochini (yoxud Shayboniyxon qissasi). Qissa, hikoya, esselar. – Toshkent, G'afur G'ulom nomidagi nashriyot-matbaa ijodiy uyi, 2021. – B. 288.

HOZIRGI O'ZBEK SHE'RIYATIDA

TARJIMA BADIYYATI

(Farida Afro'z uchliklari misolida)

Atabayeva Guljahon Zufarovna

SamDU 2-bosqich magistranti

She'ri o'ziga, o'zi she'riga o'xshaydigan shoira, donishmand ijodkor Farida Afro'z she'rga shunday ta'rif beradi: "She'r o'zi yurakka sig'magan alam-da... Yurakka sig'magan sevinch... Qalbingdagi ko'zaning ortig'i chiqib ketadi. She'r o'ylaymanki, hodisa. U mana shu yomg'ir yoqqani kabi, chaqmoq

birdaniga chaqqani kabi, toshqin toshgani kabi sodir bo‘ladi. She‘riyat shunday narsaki, bu ko‘ngillarga malham, dillarning og‘riq nuqtasining davosi”. Farida Afro‘zning “Tasbeh” asari ham adabiyotshunosligimizda ajib bir hodisa bo‘ldi. Shoir 33 tasbehni 7 marjonga tizdi, zikr va 99 fiqra bilan tasavvufiy-irfoniy qarashlarni uchliklarga jamladi. “Tasbeh” to‘plamining yana bir o‘ziga xos jihatlaridan biri – uchliklarning rus va ingliz tilidagi tarjimasi ham kitobda havola etiladi. Bu adabiyotimizda o‘ziga xos bir yutuq bo‘ldi desak mubolag‘a qilmagan bo‘lamiz.

Farida Afro‘zning she‘rlarini nemis tiliga o‘g‘irgan tarjimon o‘z xotiralarida bir qiziq voqeani eslaydi. Shoiraning she‘rlari nemis tiliga tarjima qilinib Shveytsariyaning Syurix shahrida adabiyot ixlosmandlariga taqdim etiladi. Adabiyot shinavandalari shoiraning she‘rlarini juda iliq kutib oladilar. Taqdimotdan so‘ng bir notanish kishi Farida Afro‘zning ro‘parasiga keladi va kutilmaganda poyiga tiz cho‘kib o‘z tilida nimalardir so‘zlaydi. Shoir 33 tasbehni 7 marjonga tizdi, zikr va 99 fiqra bilan tasavvufiy-irfoniy qarashlarni uchliklarga jamladi. “Tasbeh” to‘plamining yana bir o‘ziga xos jihatlaridan biri – uchliklarning rus va ingliz tilidagi tarjimasi ham kitobda havola etiladi. Bu adabiyotimizda o‘ziga xos bir yutuq bo‘ldi desak mubolag‘a qilmagan bo‘lamiz.

Hovuchimda turmas sharshara,

Hovuchimga to‘lmas sharshara,

Jilg‘a, bunchalar tillaring shirin [1, 37-bet].

Shoiraning hovuchida turmay to‘kilgan sharshara uning kaftini-da, to‘ldirmaydi. Shoiraning ko‘ngil qatlarini tebratgan ham aslida sharsharaning viqorli tovushi emas, balki jilg‘aning mayin jildirab oqqan sasidir. Uning ovozi, tili shu qadar shirinki, hatto uzoq-uzoqlardan sharillab quyilayotgan sharshara ovozi-da bosib ketadi. Uchlikning rus va inglizcha tarjimasini o‘qib, tilimizning ma‘no qatlaridagi jilvalarning naqadar rang-barang, behad go‘zal ekanligiga amin bo‘laman. “Tillaring shirin” jumlasining latifligini rus tilidagi tarjimada ham, inglizcha tarjimada ham topolmaymiz. Sababi, bu jumlaning so‘zma-so‘z tarjimasi “как сладок твой звон” – “jaranging shirin” yoki “what a wonderful sound you have”-“qanday ajoyib ovozing bor” shaklida amalga oshirilgan. Bu esa asl mohiyatni bera olyapti, ammo tilimizning go‘zal ma‘no qirralarini, rangin jilosini ochib berishga biroz ojiz qolgandek, nazarimda...

В ладони не держится водопад,

Ладонь не заполнит он.

Ручеек, о как сладок твой звон.

Bu uchlikda jilg‘a – “ручеек” so‘zi bilan emas, balki “ручиок shaklida ifodalanganida o‘quvchiga ma‘nodagi o‘zbekona “shira”ni totgandek, tottirgandek bo‘lardi, fikri ojizimcha.

Tulki-ku tumshug‘idan ilinar, shaksiz,

Bo‘rining og‘zi qon, yesa-yemasa

Tegirmondan butun chiqar bu Odam.

Odamizot necha asrlar osha nafs iskanjasida o‘zligi bilan, o‘zi bilan

olishadi. Bu kurash agar hayvonlarda faqat qorin to'yg'azish, o'zidan nasl qoldirish bo'lsa, bizda bu muhoraba, bu kurash o'ta ayovsiz... Bani Odam jismini turfa rang libosga burkash-u, zeb berish, mansab, boylik, kim'ozarga o'ynash bilan ovvora... Bu nafs botqog'iga shu qadar botganki, hatto ayyorligu ochko'zlikda tulki va bo'ridan o'tsa ajabmas. Shoir bu "tasbeh"da bir emas, ikki emas, naq uchta misrada ham xalqimizning boy og'zaki ijodining eng ajib namunalaridan maqol va iborani ustalik bilan keltirib, insonning botiniy olamini ko'z oldimizda yaqqol gavdalandiradiki, beixtiyor bu o'tkinchi dunyoda ruh qolib, jismning xohishi, nafsning so'ngsiz istaklari ketidan bo'ynidan arqon tortilgan holda ketayotgan banda tasviri ko'z oldimizda gavdalanadi.

Farida Afro'z xalq donishmandligi sarchashmasidan bahra olgan, xalqimizning boy ma'naviy merosini o'qigan va uqqan donishmand ijodkor. Sababi o'ta ko'lamdor mazmunni juda siyiq uch misrada bera olish uchun katta mahorat kerak. Tarjimada ham o'sha asl mazmunni berish, o'sha mohiyatni o'quvchiga yetkazish uchun ham ulkan mehnat qilinadi, ter to'kiladi. Bir millat vakili bo'lgan ijodkorning asarini o'zga millatdagi adabiyot ixlosmandlariga yetkazish ham mashaqqatli, ham mas'uliyatli vazifadir. O'quvchi yuqoridagi uchlikning asl mohiyatini, mazmunini anglash uchun xalqimizning til boyliklaridan, jumladan iboralardan xabardor bo'lishi lozim.

Лиса носом попадает в капкан,
Вечно у волка морда в крови,
А Он из зерновов выйдет цел.

Agar tarjima ilmi so'zning aynan tarjimasini bersa-yu, asl mohiyatni bera olmasa tarjima faqat so'zlarning chet tilidagi ayni surati bo'lib qolaveradi.

Tarjima so'zma - so'z o'z maromida bo'lsa-da, o'quvchiga asl botiniy ma'noni ochib berishda, misralardagi ummondek mazmunni anglata olishda biroz oqsagandek... Bu uchlikda tegirmon ma'nosini berish uchun ishlatilgan "зернов" so'zi o'rnida "мельница" deyilsa, maqsadga muvofiq bo'lardi. Tarjimada aynan uch misradagi uchta ibora rusiyzabonga ustalik bilan o'girilgan. Ammo shu iboralarning ma'nosi asarda keltirib o'tilishi kerakdek, nazarimda. Sababi necha-necha ming yillar qatidan yetib kelgan xalq donishmandligi namunalarini aynan tushunish o'zga millat vakillariga murakkablik tug'dirishi tabiiy. Uchlikning ingliz tilidagi tarjimasiga e'tibor qaratsak, bu hol yanada yaqqol namoyon bo'ladi.

Fox stumbles of its muzzle,
Wolf's jaw is bloody no matter what,
But this Man is always intact.

Uchlikning aynan, so'zma - so'z tarjimasiga e'tibor qilamiz: "Tulki tumshug'idan qoqiladi, nima bo'lmasin bo'rining jag'i qon. Ammo kishi har doim buzilmagan (butun)". Uchlikni o'qishingiz bilan dastlab xayolingizga "Jo'jani kuzda sanaydilar" maqoli keladi. Maqolning o'z va ko'chma ma'nosi bor. "Tasbeh"dagi birinchi ma'no o'quvchiga ayon, shoiraning muddaosi esa

boshqa... Shoiraning bu “tasbeh”i shu zamon kishisiga go‘yoki da’vatdek yangraydi. Sababi biz insonlar bu dunyoga Allohning sinovi uchun kelganmiz. Vaqt esa o‘tmoqda. Kimdir bu hayotda vazifasini anglab – anglamay yashamoqda. Farida Afro‘z bu satrlari bilan go‘yoki, yashashdan avval yashashga ulgur, vaqtni zoye’ ketkazma, bu umr o‘tkinchi deya Bani Odamga xitob qilayotgandek. Umrning bahorida gul och, chechak yoz – yoshlikda ilm ol, kasb egalla. Kuz kelganda na o‘zni, na o‘zlikni anglamay, behuda yashamagin, Allohni anglagin, biz unga qaytguvchimiz, ketar oldidan hatto kalimani ham ayta olamizmi, aytishgada ulguramizmi, bu faqat o‘ziga ayon, demoqchidek hushyorlikka chorlaydi. Xo‘sh, bu uchlikning asl ma’nosini anglash o‘z ona tilimizda u qadar oson emas ekan, tarjimon o‘z oldiga qo‘ygan maqsadga qay darajada erishdi ekan?

О, цыплёнок,

Молись, молись.

Осень уже наточила ножи.

Tarjima so‘zma-so‘z shunday o‘girilgan: “O, jo‘ja, ibodat qil, ibodat qil, kuz pichoqlarini qayrab bo‘ldi”. Avvalo, o‘sha millatni anglash uchun ulardek fikrlash kerak. Bu esa deyarli mumkin emas. Chunki insonning fikrlashi dastavval millat bilan, mentalitet bilan, o‘zi yashagan hudud bilan uzviy bog‘liq. Bu irsiyat bilan bog‘liq jarayondir. Kitobxon hech bo‘lmasa shoiraning nima demoqchiligini 60-70% anglashi uchun u o‘sha millat til boyligidan oz bo‘lsa-da xabardor bo‘lishi kerak.

To‘g‘ri, maqollarning aynan bo‘lmasa-da, boshqa tilda yaqin variantlari bor. Lekin bu ham ayni nazarda tutilgan ma‘noni to‘laqonli ochib bermaydi. Shuni nazarda tutgan holda tub millat vakillarigagina tushunarli bo‘lgan til boyliklarini boshqa bir madaniyat, boshqa bir millat vakiliga angarli bo‘lishi uchun asarga ilova tarzida keltirib o‘tish maqsadga muvofiq deb o‘ylayman. Millatning ko‘zgusi bo‘lgan adabiyot elat, irq tanlamaydi. Sababi so‘z-qalb bilan anganadi, his etiladi. Tarjima badiiyati esa millatlarni, madaniyatlarni bog‘lovchi buzilmas ko‘prik vazifasini o‘taydiki, bu kasb egalaridan so‘zga ulkan mas’uliyatni talab etadi.

Foydalanilgan adabiyotlar:

- 1.Фарида Афруз. Тасбех. Четки. Rosary. – Т., Шарк, 2017.
- 2.Yo‘ldosh Q., Muhayyo Yo‘ldosh qizi. Badiiy tahlil asoslari. – Т., Kamalak, 2016.
- 3.Bo‘tayeve Farida Afro‘z. 7 tasbeh yoxud 1001 kecha. –Т., 2020.

OYDINNISO SHE’RIYATIDA POETIK OBRAZ

Tuxtayeva Gulnora Ulug‘bek qizi

SamDU 3-kurs talabasi,

Imiy rahbar: prof. A.Nasirov

Oydinniso (Yo‘ldosheva) – XXI asr o‘zbek adabiyotining ko‘zga ko‘ringan, iste’dodli vakilasi – shoir, tarjimon, ertaknavis. 1980-yil 30-aprelda Samarqand viloyatining Paxtachi tumanida tug‘ilgan. Ko‘plab buyuk allomalarni voyaga yetkazgan Samarqand zaminida ijodga, she’riyatga mehr qo‘ygan qalam

sohiblari talaygina bo'lsa-da, ularning ichida Oydinnisoning egallagan o'rni, she'rga bo'lgan muhabbati alohida ahamiyat kasb etadi. Uning she'rlarida boshqa ijodkorlarnikida bo'lgani kabi muhabbat, tabiat, hijron va sog'inch tushunchalari madh etilsa-da, bu she'rlar Oydinnisoning muhabbatga to'la qalbining bir parchasidan yaralgani yaqqol bilinib turadi.

Adabiyotshunois olimi Muhayyo Yo'ldosheva ta'kidlaganidek, Oydinniso go'zallikdan bahra olishda barcha qatori odam bo'lsa-da, uni hammadan o'zgacha idrok etadi [1,4-bet]. Oydinniso she'rlari mazmunini bir o'qiganda tushunish birozgina mushkul. Uning qalamidan to'kilgan dil dardlarini his etish va she'rni takror-takror o'qish orqali misralarning mazmuni tobora ravshanlashib boradi. Oydinniso she'riyatida modernizm yaqqol ko'zga tashlanadi:

Sizga bir so'z aytmoqchi edim...

Tong hidi ufurgan

havo yanglig' entiktiruvchi

yoki

yomg'ir shivalagan yerning

hovuri kabi dilga yaqin...

Ijodkorning bir so'z aytmoqchi bo'lgani ma'lum. Ammo keyingi misralarni o'qir ekansiz, bu misralar ichidan u qanday so'zni aytmoqchi ekanini topa olmaysiz. Erkin vaznda yozilgan misralar ichra adashib, savollar og'ushida qolasiz. Ijodkor sizni mohirlik bilan chalg'itayotgandek tuyuladi, lekin misralar chalg'itishdan emas, aksincha, qalbi izhorga to'la qizning aytmoqchi bo'lgan "bir so'z"ining tiliga ko'chishiga to'sqinlik qilayotgan kuchning mavjudligidan darak beradi. Bu kuch – uning ibo-hayosi! Ha, o'zbek ayollari, umuman, Sharq xotin-qizlarining qon-qoniga singib ketgan hayo tushunchasi ularning muhabbatidan ustun turadi. Oydinniso – o'zbek shoirasi, Sharq ayoli. U o'zgalar qalamidan to'kilishi mumkin bo'lmagan betakror she'rlarini qat'iyat bilan yozadigan bir vaqtda, unga milliy ruh, milliy tushunchani ham singdira oladi.

"O'sha so'z tug'ildi ko'nglimning sathida..." O'quvchi ushbu misralarni o'qishni boshlaganda avvalgi misralardagidek savollarga ko'milsa ko'miladiki, undan kam bo'lmaydi. Sababi, sevgan yoriga o'sha "bir so'z"ni aytishga qanchalik yaqinlashgan sayin qizning yuragi shunchalik hapqirib boradiki, aytilajak gapning o'rnini faqat va faqat hislar egallay boshlaydi. "Bir so'z" uning ko'nglida tug'ilib, bo'g'zida yonadi. Nafaslarda ifor sohib, qimtilgan lablarga qo'nadi, nigohlarga ko'chadi. Oxir-oqibat bardoshi tugab, ko'z-yoshlarda "jaranglaydi". Aslini olganda ko'z-yoshning jaranglashi mumkin emasdir, ammo bu o'rinda "bir so'z"ni zabon emas, ko'z-yoshlar aytadi.

...Sizga bir so'z aytdim... eshitdingizmi?

Shu o'ringa kelganda o'quvchi biroz chalg'iydi, she'rni qaytadan o'qishga kirishadi. Qaysi misrani bee'tibor qoldirgani haqida o'ylaydi. Biroq she'r yakunidagi aynan shu misra ijodkor qalbida mavjlangan barcha hislarni oshkor etadi. Bu – sevgan yorga aytilgan izhor edi! Bundayin boy va cheksiz muhabbatga to'la she'rlar Oydinniso ijodida ko'plab uchraydi. Ularning birida muhabbat izhorlari baralla kuylansa, boshqasida hijron, sog'inch, yo'qotish, topish kabi hislar madh etiladi.

Namozshomgul shiviriga
kungaboqar qiqirini ulab
kun tikdim.
Egninga ildirib sudradim
o'tmayotgan vaqtni
sen o'tgan taraflarga.
Qara, qanday yarashgan vujudimga
tovush to'latilgan jimjitlik.

Namozshomgul quyosh botishidan otishigacha, ya'ni, tunda ochiladi. Kungaboqar esa uning aksi – quyosh otgan tomondan botar tomonga “ko'zlarini tikadi”. Har ikkisini jamlasa bir kun hosil bo'ladi. Birorta ham shoir zoti yo'qki, tabiatni his etmasa, ruhiyati tabiat bilan chambarchas bog'liq bo'lmasa. Bu she'r orqali yor yo'liga termulgan nigoro ko'zlar vaqtning juda ham sekin o'tayotganidan biroz ranjiydi. O'tmayotgan vaqtni yor o'tgan tomonlarga xayolan egniga ildirib sudraydi. “Namozshomgul shiviri” va “kungaboqar qiqiri” shoiraning o'zidan o'zgaga eshitilmasligi turgan gap(aslida bular badiiy topilma – hayotda bunday tovushlar bo'lmasa-da), u mana shu tovushlarni jimjitlik nuqtasida birlashtiradi va oxir-oqibat kutish azoblarini ijodiy qabul qila boshlaydi.

Isrofil – islomda to'rt bosh farishtadan biri. Qiyomat kuni haqida xabar berib sur chaluvchi farishta. Rivoyatlarga ko'ra, u gunohkorlarning do'zaxda qiynalayotganliklarini ko'rib kunduzi 3 marta, kechasi 1 marta yig'lar ekan. Shoira yuqoridagi misralar orqali Isrofil tilidan gapirib, farishtaning hislarini tuyishga urinadi, uning insonlarga nisbatan mehrga to'la qalbini tasvirlaydi. Boshqa bir tomondan qaralsa, odamlarni hushyorlikka chaqirib ogohlantiradi. Arzimagan ishidan toqatsizlanayotganlarga Isrofil farishtaning o'z vazifasini bajarishni azaldan buyon kutayotganini ko'rsatmoqchi bo'ladi. Bundan kelib chiqadiki, Oydinniso nafaqat muhabbat, ibo-hayo, sadoqat bilan, balki, ruhiga ilohiyotni jo qilib she'rlar yozadi.

Oydinniso she'rlari yillar o'tsa-da o'z ta'sir kuchini yo'qotmasligining sababi undagi topilmalar va hislarning o'zgachaligi hamda shoiraning so'z boyligi kengligida, desak adashmagan bo'lamiz. Qolgan fikrlar esa yillar o'tgani, o'quvchilar safi kengayib borgani, avlodlar almashgani sayin yuzaga chiqib boraveradi.

Shoira o'zi ta'kidlaganidek, hali hammasi oldinda. Ijodkor she'rlari ilmiy tadqiqotchilar va she'riyat ixlosmandlari tomonidan tadqiq etilib, Oydinnisoning qalb so'zlari oydinlashib boraversa, biz yozgan tahlillar shunchaki qoralama bo'lib, haqiqiy ijod haqidagi haqiqiy ilmiy ishlar dunyo yuzini ko'radi, degan umiddamiz.

Foydalanilgan adabiyotlar:

- 1.Yo'ldosheva M., Meni yasha, olam, “Yoshlik” jurnali, 2012-yil, 4-son. 38-bet.
- 2.Oydinniso. Hovur. G'afur G'ulom nomidagi nashriyot-matbaa ijodiy uyi. Toshkent. 2011.

“ISYON VA ITOAT” ROMANIDA OBRAZLAR OLAMI

Xayrullayeva Saida A'zamjonovna

SamDU filologiya, 2-kurs talabasi,

Ilmiy rahbar: prof. A.Nasirov

Har qanday jamiyat muayyan ma'naviy-axloqiy talab-qoidalar tizimi doirasida rivojlanib, taraqqiy etib boradi. Axloq jamiyat taraqqiyotining ma'naviy vositalaridan biri hisoblanadi. Jamiyat va inson qalbining ko'zgusi bo'lgan badiiy adabiyot ma'naviy-axloqiy masalalarga mudom murojaat etishi, murakkab va chigal insoniy munosabatlarni badiiy in'ikos ettirishi, tabiiy. Xalqimizning azaliy orzusi bo'lgan Mustaqillik juda ko'p jabhalarda bo'lganidek, ma'naviyat sohasida ham katta o'zgarishlarni vujudga keltirdi. Millatimiz hayotida mavjud bo'lgan ma'naviy-axloqiy muammolarga har qachongidan ko'ra ham diqqat-e'tibor kuchaydi. Istiqlool mafkurasi xalq va jamiyat hayotiga chuqur singib borayotganligining o'ziyiq bu fikrni isbotlaydi.

O'zining bir qator hikoya va qissalari bilan o'quvchilarini topa bilgan hamda adabiyotshunoslik ilmi sohasida ham muayyan tadqiqotlar olib borayotgan yozuvchi, shoir, munaqqid Ulug'bek Hamdamning “Isyon va itoat” romanida yuqoridagi fikr-mulohazalarni sof ilmiy-nazariy tushuncha va tahlillar bilan asoslashga urinib ko'ramiz. Binobarin, yangi asr ostonasida adabiyot maydonida shakl va mazmun qamrovi, ma'no-mohiyati bilan badiiy tafakkur olamida turli xil mavzudagi asarlar bo'y ko'rsata boshladi. Ayniqsa, yangilanayotgan badiiy tafakkurga sezilarli hissasini qo'shib kelayotgan U.Hamdam izlanishlarida buning yorqin ifodasini kuzatamiz.

Ulug'bek Hamdamning ilk ijodi “Yolg'izlik” qissasida insonning jamiyatdagi o'rnini va o'z mavqeini asrab qolishga intilgan qahramon qiyofasi gavdalanadi, “Muvozanat” romanida esa shu bugunimizda, atrofimizda sodir bo'layotgan voqea-hodisalar qalamga olinadi.

Shuning uchun ham ushbu roman taniqli adabiyotshunoslar orasida qizg'in bahs uyg'otdi va o'zining munosib bahosini oldi. M.Qo'shjonov, O.Sharafiddinov, U.Normatov, A.Rasulov kabi ustoz adabiyotshunoslar hamda P.Qodirovdek katta adiblarimiz romanga yuksak baho berdilar. Mazkur asar borasida O.Sharafiddinov: “Romanni o'qib chiqar ekanman, bugungi kun odamini tasvirlashda hali realizmning ochilmagan imkoniyatlari ko'p ekaniga imon keltirdim” [1, 244-bet], deb qayd etib o'tgan edi.

Akademik M.Qo'shjonov esa quyidagicha baholaydi: “Muallifning maqsadi roman chop qildirib, ko'zga tanilish emas. U hayot haqida, hayotda ro'y berayotgan keskin burilishlar haqida, o'ta ziddiyatli voqealar xususida chuqur o'ylaydi. Faqat o'ylaydigina emas, nimalardandir qanoat hosil qilsa, nimalardandir ko'ngli to'lmaydi, bular xususida bezovta bo'ladi, kuyunadi, qayg'uradi. Mana shu kuyunish va qayg'urishlar uni qo'liga qalam olishiga undaydi” [2, 3-5-betlar].

Ustoz adibimiz P.Qodirov e'tiroficha: “Yaqin o'n yillar ichida U.Hamdamning “Muvozanat” romanidek asar o'qimadim. Roman juda yaxshi

yozilganligi o'ziga xos uslub va g'oyaviy badiiy jihatdan barkamolligi menda juda ajib taassurot uyg'otdi" [3,4-bet].

Binobarin, adib izlanishlarini qo'llab-quvvatlovchilar, ya'ni badiiy niyatiga xayrixohlar ham bo'ldi va aksincha, noto'g'ri talqin qiluvchilar safi ham ancha kengaydi. "Erkin fikr zamonida yashayotgan odamzot jamiyat badiiy tafakkurini xolislik bilan qabul qilar ekan, u yoki bu darajada salbiy qarashlarning bo'lishi tabiiydir. U.Hamdamning asarlarida bosh fenomen inson va uning qismati. Yozuvchi jamiyat hayotini zimdan nigoh solib kuzatadi. Baayni esa o'ta xolislik bilan qahramon kechinmalarini tasvirlay boshlaydi. Bu esa tabiiy bir yo'nalishga tutashib, kitobxon diqqat e'tiborini o'ziga tezda jalb etadi" [4,6-bet].

Ushbu sifatlar U.Hamdam ijodiga xos muhim fazilat ekanligi barchamizga ayondir. Hozirgi adabiy jarayonda ancha yillardan beri qizg'in bahslarga turtki bo'lib kelayotgan adib asarlarini o'qigan kitobxon tasavvurida uning yaratgan qahramonlaridan ibrat olib yashay boshlaydi. Ibrat olsa arziydigan, o'z imon va e'tiqodiga sodiq qolib, hayotini ilm yo'liga safarbar etishga yangi jamiyat tarixini yaratishni bir umr diliga maqsad qilib yashagan Yusuf obrazi istiqlool davri qahramoni deya bimalol aytishimiz mumkin.

Romanda Yusuf boshqa o'rtoqlariga o'xshab, "bozor"ga tez singishib ketolmadi. Lekin jamiyatdagi o'zining mavqe va o'rnini saqlab qolish maqsadida e'tiqodida sobit tura olganligi bilan ham boshqalarga o'rnak bo'la oladi. Yozuvchining ikkinchi romani "Isyon va itoat"da diniy va dunyoviy ilmlar jamlangan. Hajman ixchamgina ushbu asar 2003-yilda nashr etildi. Ushbu roman adabiyotshunos va munaqqidlar orasida hanuzgacha qizg'in bahs-munozaralar og'ushida kelmoqda. Tahlil qilinayotgan "Isyon va itoat" romanida obrazlar tizimini asar strukturasi namoyon bo'lishi bosh qahramon Akbar, Tabib, Larisa xola, Diana, Tursunboy jontalash va uning xotini, o'g'li, Iskandar kabi personajlar orqali gavdalanadi.

Roman voqea-hodisalari bosh qahramon Akbarning atrofida sodir bo'ladi. Romanda bir-biriga mantiqan bog'langan fasllarda goh diniy-ilohiy kiritmalar, shahar va qishloq manzaralari, Diananing hayoti, undan keyin tabibning mungli iztiroblari, Akbarning behalovat kezinishlari, Tursunboy jontalashning tinib-tinchimasliggi yorqin bo'yoqlarda ifoda etiladi. Ushbu hol roman tabiatiga singdirilgan o'ziga xos falsafaning yorqinroq namoyon bo'lishini ta'minlaydi. Romanning mohiyatida isyon kimga qaratilganligi haqida ba'zi fikrlar muallif tomonidan nazorat qilinib, xarakter ruhiyatidagi evrilishlar ko'zga tashlanadi. Asarda o'ziga xos "badiiy priyom"ni qo'llashi orqali Akbarning hayoti va iztirobi yoritilib beriladi.

Xususan, muammoni ilohiy nuqtayi nazaridan talqin etish, romanda yashashning ma'nosi haqida, aniqrog'i isyon va itoat to'g'risida yaxlit bir falsafa yaratishga hamda uni badiiyat vositalari yordamida ifoda etishga qaratiladi. O'z falsafasining o'zak g'oyasini muallif romandagi asosiy qahramonlardan biri bo'lmish tabib tilidan quyidagicha ifoda etadi: "Men, nihoyat isyon azobidan, forig' bo'lib, ozodlikka chiqqandim. Ozodlikning ismi esa itoat edi. Va, men o'zimni uyon bu yonga urishni bas qilib... yo'q-yo'q, bunday emas, qirq-ellik yil davomida meni chirpirak qilib uchirib yurgan kuch asta-sekin orqaga chekindi-da,

men o'zimga o'zim tegishli bo'lib qoldim, desam to'g'riroq bo'ladi. Shunda qarshimda hayotning mazmuni, tug'ilish va o'lishning ma'nisi yarq etib namoyon bo'lganday edi: u itoatda, insonlik qismatiga ko'nikishda edi. Yo'q, bu shunchaki ko'r-ko'rona ko'nikma emasdi, balki anglash va tushunishdan keladigan buyuk itoat – yaratganga tobelik edi. Chunki mendagi Isyon Itoatimning ichiga, uning bir bo'lagiga aylanib o'zga ma'no kasb etgandi. Va, men xotirjam edim. Dunyo qayg'usi-ku ko'pdan beri bezovta qilmay qo'ygandi, endi hatto o'lim ham meni cho'chitmayotgan, qaytaga uni, mo'jizani kutgandek kutadigan bo'lgandim" [5, 98-bet].

Yozuvchi falsafasiga ko'ra «Yaratganga tobelik»dan hayotdagi boshqa ko'plab omillarga itoat qilish zaruriyati kelib chiqadi. O'zining bu g'oyasini asoslash uchun muallif xalqning turli qatlamlariga, har xil millatga, kasbga, e'tiqodga mansub kishilar timsolini yaratadi va ularning hayot yo'lini, taqdirini alohida-alohida hikoya qiladi. Yozuvchi romandagi personajlarga aloqador syujet chiziqlarini ongli ravishda bir-biriga uzviy bog'lab yuborishga urinmaydi. Shu sababli ham har bir obrazga tizimli ravishda ruhiy tahlillar vositasida ochib berishni maqsad qiladi. Ko'rinadiki, romanda yozuvchi g'oyasini tabib tilidan keltirilgan birgina tafsilotda aniq-ravshan qilib tasvirlaydi.

O'z navbatida Akbarning bir umr hayoti isyondan iborat bo'lib qolishini va bundan qutulish uchun safarga o'tlanishini, safar davomida uning hayotida nima, qanday voqea yuz bermasin, qalbidagi adolat tuyg'usini so'ndirmay, halovatini esa ta'min qilish maqsadida, shaharda Diana ismli qiz bilan tanishishi kitobxon tasavvurida uning yolg'izligiga nuqta qo'ygandek tuyuladi: "Shu isyonga kirib hayotimda birinchi marta nima qilayotganimni, qayoqqa ketayotganimni bilmay, tushunmay qoldim. Bor tasavvurlarim chilparchin bo'ldi. Hayotim izmidan chiqib ketganga o'xshaydi. Endi nima bo'ladi, Diana?.. - Mening ham xuddi senikidek hayotim ostin-ustun bo'lib ketdi. Xuddi sendek men ham o'z yuragimning asiri bo'lib o'tiribman" [6, 76-77-betlar].

Akbar u bilan bir umr birga qolishiga ko'zi etmagani uchun ham yana isyon olovi qalbiga rahna solaveradi. Tabib esa bir umr kasallikning paydo bo'lishi va uni yengishga bo'lgan ko'nglidagi isyonni bartaraf qiladigan vosita dori-darmon bilan cheklanmasdan, inson ruhida shunga o'zgarish sezib yashashi lozimligini anglay boshlagan.

Yozuvchi inson qismatining ayanchli xususiyatlari bilan birga, qalb tebranishlarining o'ziga xos ziddiyatlarini ham yorqin tasvirlarda aks ettiradi. Tabib qalbidan kechgan iztirob va quvonchlarini ko'rsatish orqali, shaxsning jamiyatdagi o'rni, uning ma'naviy qiyofasini haqqoniy tasvirlaydi. Tabib xarakterida mujassamlashgan insoniy fazilatlar bilan bir qatorda, insonga bo'lgan munosabatining o'zgarish sabablari, haq va haqsizlik, adolat va adolatsizlik qurboniga aylangan shaxs qismati o'quvchi ko'z o'ngida jonlanadi.

"Ustoz, endi men nima qilishimni bilmayapman. Chiqqanimga ham bir oy bo'ldi, lekin hech qo'lim ishga bormayapti. Maktabga esa olishmas ekan, olgandayam kim borardi endi? O'zi ko'p zerikkandim, u yerda. -Ha-a, mana gap qayerda? Qo'lingni o'sha betamizga ko'tartirgan iblis ham asli shu... zerikish bo'lgan. Senga necha marta aytdim, har qushning o'z parvoz maydoni bo'ladi, sen

o'zingnikini topgin, deb. Unamading, tug'ilgan joyim deding, endi esa bola-chaqam deysan. Hech qayerga ketmayman, deysan, - tabib zo'r berib necha bor takrorlagan muddaosini yana Akbarga tushuntira ketdi" [6, 6-bet].

Tafsilotda ustoz-shogirdning o'zaro suhbatida Akbarning safarga chiqib, qalbini tirnayotgan isyondan qutulish uchun imkon yaratishiga ishonch hosil qila boshlaydi. Shu maqsadda Rossiya o'lkasiga imkon topib, savdo-sotiq qilish uchun o'z harakatini boshlaydi. Ammo, u yerdagi adolatsizliklarni ko'rib, unga qarshi chiqadi. Rus o'lkasidagi ma'lum bir guruh tomonidan aldanib, qarz evaziga olingan mahsulotlardan voz kechishga majbur bo'lsa-da, biroq biroz vaqtdan so'ng o'zligini anglaydi. Ularga qarshi isyon qiladi. Bosh qahramon Akbarning xarakterini, uning borlig'ini qamrab olgan isyon olovi quyidagi tafsilotda yorqinroq aks etgan: "Senlarga umrimda ilk bor duch keldim. Biroq eshitishimcha, senlar mard bo'lishing kerak edi. Qani o'sha mardlik! Axir men birovning haqqini yemadim. Qaytaga meni aldagan haydovchi bilan mol achchig'ida yoqalashdim, xolos. Sen esa, - Akbar «Boss»ning ko'zlariga tik boqdi, haqiqatni axtarib o'tirmay, o'z hamshaharingni, hammilatingni himoya qilding!.. Shu yerda past ketding, borliq mayda odamlardek ish ko'rding... - Akbarning hammayog'i dabdala edi, yuzlariga boshidan sizib qon oqib turardi.

-O'limdan qo'rqmaysanmi?.. – Qo'rqaman. Faqat boshqa chora bo'lmagandan keyin qo'rquvdan nima foyda?" [6,16-bet].

Akbar haqiqatni yuziga tik boqishi natijasida o'z jonini saqlab qoladi. "Boss"ning Akbarga nisbatan munosabatini o'zgarishiga sabab ham, haqiqatni ayta olishi bilan izohlanadi. Unda Akbarga nisbatan adolatsizlik qilganini his etish va moddiy yordam berish, hayotga teranroq nazar solish imkonini uyg'otadi. Haq so'z ayta olishi o'z jonini saqlash bilan birga insonni fikrlashga, teranroq anglab etishga undaydi. Chunki, romandagi ilohiy-diniy kiritmalar ham faqat shunchaki matnda emas, xarakterlararo munosabatlarining oydinlashishiga, hamda muallif g'oyasining izchil bayon etilishini ta'minlaydi. Yozuvchi o'sha voqealarda Odam Ato, Momo Havoning taqiqlangan mevani yeb, jannatdan haydalishtirib oddiy bir haqiqat deb emas, shu kungacha insoniyatning bosib o'tgan yo'lida isyondan halos bo'lishgina emas, balki o'z-o'zini tushunishi, borliq haqida kengroq idrok etishini ham asoslab boradi.

Foydalanilgan dabiyyotlar:

- 1.Шарафиддинов О. Ижодни англаш бахти. –Т., Шарқ, 2004.
2. Қўшжонов М. Шиддат билан ёзилган роман. У.Ҳамдам. Мувозанат. – Т., “Минҳож”, 2004.
3. Қодиров П. Маънавият, постмодернизм ва абсурд / –Т., Ўзбекистон адабиёти ва санъати, 2006.
- 4.Қуроноф Д. Адабий жараёнда “Мом” синдроми. –Т., Академнашр, 2010.
5. Ҳамдамов У. Исён ва итоат. – Т., Янги аср авлоди, 2003.

**ALISHER NAVOIY “G‘AROYIB US-SIG‘AR”
DEVONIDA YUSUF TIMSOLI**

**Mamatova Nilufar
SamDU 4-kurs talabasi
Ilmiy rahbar: U.Qobilov**

Ma'lumki, inson ko'ksidagi qalbning tirikligi, uyg'oqligi bilan boshqa mavjudotlardan afzaldir. Qalbni uyg'otadigan, jonlantirib turadigan eng yaxshi vositalardan biri badiiy adabiyot ekanligi ko'pchilikka ma'lum, albatta. Bu masalada Alisher Navoiy adabiy merosi nafaqat milliy, balki umumbashariy hodisa sanaladi. Bugungi kunda mukammal shakllangan va taraqqiy etayotgan jahon navoiyshunosligi tajribasi ulug' o'zbek shoiri va mutafakkiri Alisher Navoiy ijodining SHarq badiiy tafakkuri oliy mahsuli ekanini e'tirof etmoqda.

Alisher Navoiy lirikasi o'zbek mumtoz adabiyoti xazinasiga qo'shilgan qiyossiz noyob durdonadir. Bu buyuk tafakkur sohibining badiiy yaratmalarisiz, nafaqat, turkiy, balki boshqa qardosh xalqlar adabiyoti ravnaqini tasavvur qilish qiyin. Zero, ulug' shoir she'riy merosida o'ziga qadar yaratilgan Sharq mumtoz adabiyoti an'analarini davom ettiribgina qolmay, yangi badiiy timsollarga murojaat etish orqali mutafakkirona qarashlarini ifodalash bilan ularning mavzular ko'lamini boyitdi. Jumladan, shoir lirikasida alohida o'rin tutuvchi, mumtoz adabiyotda keng ko'lamda qo'llanuvchi timsollardan biri YUsof timsolidir. Navoiyning deyarli barcha devonlarida YUsof obrazi qo'llanishini ko'rish mumkin. Shu kabi “G‘aroyib us-sig‘ar” devonida ham bu timsol alohida o'rin tutadi. Yusuf haqida juda ko'plab qissa va rivoyatlar mavjuddir. Yusuf timsoli keltirilgan va u talqin etilgan asarlarning asl manbai ilohiy muqaddas kitoblar: Tavrot, Injil va Qur'oni karimdir.

Qur'oni Karimda payg'ambarlar nomi bilan ataluvchi oltita sura mavjud bo'lib, shulardan Yusuf qissasiga badiiy adabiyotda eng ko'p murojaat etiladi. Yusuf qissasi Alisher Navoiy ijodiyoti, va umuman, mumtoz adabiyot uchun o'lmas mavzulardan sanaladi. Sharqda keng tarqalgan “Yusuf qissasi” Qur'oni Karimda “hamma qissalardan kattaroq va foydasi ziyodroq qissa” deya ta'riflanadi va u bir yuzu o'n bir oyati karimadan iborat bo'lib, bir yuzu to'qqiz oyati qissaga bag'ishlanadi. U “ahsan ul-qisas” (go'zal qissa) deb ham ataladi. Bu qissaning islomiy adabiyotdagi badiiy variantlari Qur'oni Karimning “Yusuf” surasi asosida shakllanganligi ko'rinadi. Rabg'uziy bu qissaning ahsan (go'zal) deyilishi sabablarini ham izohlaydi.

Ushbu qissa davrlar o'tishi bilan Sharqda go'zal adabiyot namunasi sifatida keng tarqaladi, alohida asarlar sifatida qalamga olinadi. Dastlab, “Qissasi Yusuf” deb atalgan asarlarda keyinchalik Yusuf yonida Zulayho ismi paydo bo'ldi. Bu qissalar ko'plab badiiy tasvirlar, turli voqealar bilan kengaytiriladi. Masalan, Yusuf qissalarida Misr Azizining xotini Zulayho deyilgan, ammo Yusuf surasida Misr Azizining xotini haqida fikr yuritilganda, u Zulayho deb atalmaydi. “Yusuf qissasi” o'zbek va umuman badiiy adabiyotning mashhur asarlaridan hisoblanib, uni o'rganish va tahlil etish nihoyatda muhim ahamiyat kasb etadi. Yusuf haqidagi rivoyatlar asosida ko'plab asarlar yaratilgan.

Bular Abulqosim Firdavsiy, Abu Ali ibn Sino, Qul Ali, Shayyod Hamza, Rabgʻuziy, Durbek, Jomiy, Baxtiyoriy, Suli Faqix, Shahobiddin Oshiq, Dariy, Chalabiy, Nozim Xiraviy, Hoziq va yana boshqa koʻplab shoirlar dostonlar yaratdilar. Ayni paytda, Alisher Navoiy, Gyote va Tolstoy singari ijodkorlar Yusuf haqida asarlar bitishni orzu qilganlar. Mavzuga Nozim Hikmat va Tomas Mannlar ham murojaat qilganlar. Zamonaviy davr oʻzbek shoiri Ramz Bobojon “Yusuf va Zulayho” nomli dramatik asarni yaratgan. Alisher Navoiy bu obrazlarni oʻz gʻazallarida samarali talqin etadi. Masalan, “Gʻaroyib us-sigʻar” devonining 441-gʻazalida shunday misralar keltirilgan:

Oʻgub jannat gulin voiz tilarkim, aylasam savdo,
Necha eski diramgʻa Yusufum, vah, koʻrgil idrokin.

Taʼkidlash joizki, mumtoz adabiyotda Yusuf obrazi talqiniga bagʻishlangan asarlarda Yusuf alayhissalom paygʻambarlik xalqasi sifatida qaraladi. Alisher Navoiy lirikasida Yusuf obrazi talqini bilan bogʻliq tasvirlarni mazmunan quyidagi guruhlar asosida tahlil etish mumkin: 1. Yusuf sarguzashtlari bilan bogʻliq turli voqealarga ishora qiluvchi baytlar. 2. Maʼshuqani Yusufga nisbat berilganini ifodalovchi misralar. 3. Maʼshuqaning Yusufdan ustunligini aks ettiruvchi satrlar. 4. Oshiqni Yusufning intizor otasi Yaʼqubga qiyoslash. 5. Yusuf tarixiga doir badiiy detallarni ifodalovchi baytlar.

Koʻnglagingdinkim topar jon dam-badam Yusuf isi,
Ey azizim, men ham ul koʻnglak aro bir tormen.

Misol uchun sheʼrda Alisher Navoiy Yusuf qissasi voqealaridan bir lavhaga ishora etadi. Unda Yusuf oʻz koʻylagini otasi Yaʼqubga yuborgani va koʻylakdagi Yusuf isidan otasining koʻr boʻlib qolgan koʻzlari ochilgani tasvirlanadi. Alisher Navoiy sheʼriyatda Yusuf obrazi asosan gʻazal janrida talqin etiladi. Yusuf goʻzallik timsoli ekanligi barchamizga maʼlum. Yusuf haqidagi qitssalarga koʻra, Yusuf Yaʼqubning sevikli oʻgʻli boʻlib, akalari bunga hasad qilib, otasi oldidan, aldab dalaga olib chiqadi, quduqqa tashlaydilar va boʻri edi deb yolgʻon ovoza tarqatadilar. Yaʼqub oʻgʻli dardida koʻzlari koʻr boʻlib qoladi va uning ayriliqdagi hayoti “gʻam uyi” sifatida tilga olinadi. Bu izohlarga misol tariqasida quyidagi misralarni keltiramiz.

Yusufim hajrida Yaʼqub gʻam ichra, mutribo,
Oʻylaymenkim, xushlugʻum yoʻq nagʻmayi Dovud ila.

Bunda yuqorida aytganimizdek, ota va farzand orasidagi hijron mavzusi lirik talqin etiladi. Shu bois Yusuf hajr va sabr qissasidir. Bunda lirik qahramon “meni Yusufi hajrida gʻamga botgan Yaʼqub sifatida tasavvur qil”, - deydi.

Yo falak berdi yigʻi koʻr aylagan Yoqubning,
Koʻzlari ochilmoq uchun Mohi Kaʼnon mujdasin.
Ne guli xandon, ne Isodur, ne Yusuf mujdasi,
Topti bir mahjur oʻlar holatda jonon mujdasin.

Xullas, oʻzbek xalqi boy oʻtmish adabiy merosiga ega boʻlib, xalqning koʻp asrlik tarixi yozma yodgorliklar va ogʻzaki ijod namunalari orqali avloddan-avlodga oʻtib kelmoqda. Alisher Navoiy lirikasida Yusuf talqini ham ana shu muhtasham merosning bir qismi hisoblanadi.

Foydalanilgan adabiyotlar:

1. Alisher Navoiy. Gʻaroyib us-sigʻar. – Toshkent, Fan, 1978.
2. Hasanov N. “Qissasi Rabgʻuziy”da Yusuf paygʻambar obrazi talqini // Oʻzbek tili va adabiyoti, 1990. 1-son, 167-176-b.
3. Qobilov. U.U. Yusufnoma mavzusi va uning Alisher Navoiy lirikasidagi talqiniga doir // Sharq yulduzi -T.: 2015. 5-son, 45-51- betlar.

ZEBO MIRZO IJODIDA ONA OBRAZI TALQINI

**Alimova Manzura Xaqberdi qizi,
SamDU filologiya 2-kurs talabasi,
Ilmiy rahbar: prof. A.Nasirov**

Badiiy ijod insondan yuqori darajadagi yuksak isteʼdod va mahoratni talab etuvchi jarayondir. Bu jarayon lazzati va taʼmini totib koʻrish har kimga ham nasib etmaydi. Inson mana shu baxtni oʻziga ato enganligini his etsagina goʻzal va betakror ijodiy ishlar qila oladi. Mustaqillikdan coʻng sheʼriyatimiz chinakam poetik rang-baranglik kasb etdi, yuksak saviyadagi vatan, muhabbat, sevgiga sadoqat, inson ichki kechnmalari singari mavzular doirasi yanada yuksaldi. Bu anʼana adabiyot maydoniga gʻayrati joʻsh urgan vatan shaʼni uchun kurasha oladigan ijodkorlarni etishishiga sabab boʻldi. Zebo Mirzo, Xosiyat Rustamova, Goʻzal Begim, Oydiniso kabi ijodkorlarning lirik qahramonlarida olamni anglashga intilishning kuchayishi, oʻzlik, Vatan, Ona siymosining turfa poetik talqinlarga singdirilganligini kuzatish mumkin. Istiqlol davri sheʼriyati shunday tuygʻularni shakllanishi uchun keng imkon berdi.

Adabiyotshunos N.Rahimjonov qayd etganidek: “lirika – fikr va his tuygʻu sintezining teranlashgan shaklidir. Bu hol yakka-yolgʻiz holatlardan teran falsafiy mazmunga ega boʻlgan umumlashma fikrlarda, bugungi voqeligimizdan kelajakka daxldor belgilarni topa bilish va koʻrsata olishda namoyon boʻlad” [1, 46-bet].

Darhaqiqat, qayd qilinganidek, insonni anglashda lirikaning oʻrni beqiyosdir, undagi turfa xil metaforik obrazlarning badiiy ifodasini inson qalbidagi tuygʻular, kechinmalar mujassamlashganligini kuzatish mumkin. Zebo Mirzo sheʼriyati ham oʻizning rang-barangligi, tasvirning qabariqligi, falsafiy mushahodaning mantiqiyliqi, mazmunning koʻlamdorligi va oʻquvchi yuragida ancha yaqinligi bilan ajralib turadi. Ayol uning sadoqati uchung mehru - oqibati shoira sheʼriyatining asosiy pafosini belgilaydi.

Zebo Mirzo sheʼriyatiga nazar tashlash ekanmiz, bu fikr isbotini “Ranj”, “Yuragim”, “Sensizman”, “Koʻngil posboni” kabi sheʼrlari orqali yaqqolroq koʻramiz. Shoira ijodida keyingi paytlarda oʻzbek adabiyotiga yangicha shiddat va tezlikda kelayotgan modernizmning ayrim xususiyatlari namoyon boʻladi. Modern yoʻnalishida sheʼr yozish shoirdan oliyjanob mehnat talab qildi. Shoira sheʼriyatida ayollar sadoqatining kuychisi, mehrning goʻzlik sari anglanishi sifatida aks etish holatlari etakchilik qiladi:

Bilmaysan,
Men uning qonida oqdim,
Yillarning eng nurli xayoli boʻlib
Izn ber,

qolayin shu lahza haqqi
Uning, faqat uning haloli bo'lib.

Dunyoning eng baxtli ayoli bo'lib! [1, 3-bet]

Ushbu she'rda ayol zotiga bo'lgan chuqur ehtirom she'rning asosiy g'oyasi bo'lib xizmat qilgan. U ayol zotini mukarram deb bilish mana shu she'ra ochib berilgan. Qaysidir insonga halol va mehribon umr yo'ldoshi bo'lishdek buyuk orzu juda chiroyli, guldastalangan holda ifoda etilgan. Shoiraning "Alla sog'inchi" deb nolanuvchi she'rida ham ayol qiyofasini, uning ma'naviy olamini ko'rsatuvchi asar sifatida aks etadi. Unda odamiylik, onalik mehri jo'sh urgan ayol ruhiy holati, dardu quvonchlari shirin tashvishlari asosida ifoda etilgan.

Yuragimning ostidami,
Yo ko'kda, tun pallasi,
(Sarvu suman soyasida
Hurlar aytar allasin)

She'rni ilk ma'nosidanoq jo'shqinlik, serjilolik ko'zga tashlanadi. Har bir so'z sadafga terilgan durga qiyoslanadi. Osmonlarning bag'ridan, erlar qaridan huru-g'ilmonlarning allasi, onalar allasiga tenglashtiriladi. She'rda haqiqiy hayratlanish chinakam yuraklarni larzaga kelishi eng asosiysi onaning naqadar buyuk zot ekanligi har nafasda ifoda etiladi. Shoiraning she'rlarini mutolaa qilarkanmiz she'rdan she'rga o'tish jarayonida yanada yuklaklikni guvohi bo'lamiz. Muallif ayollar dardini kuylaydi. "Sog'inch xanjari" she'rida sog'inchning dardli tomonlarini va uning istiroblarini ifoda etadiki, natijada engil ruh mayin epkin shamol kishi qalbini zabt etadi.

Qo'llarning titrog'i titrog'imdadir,
Jonimni tiriltgan bir mayin bo'sa...
Ruhimni pichoqlab yashayotiran,
Ey muhabbat qayg'u,
Ey go'zal g'ussa...

Bu she'rda ijodkor ma'shuqa timsolida gavdalanib, muhabbat ayollar dilida qanchalik og'riq berishi va ayol muhabbatining qiyosiy darajasi tasvirlanadi. She'rda ayol sevsa yuragiga pichiq sanchilganday, ilk bo'sa esa jonlarga to'lg'oq bag'ishlaganday tasvirlangan. Shoir she'rni mutolaa qilarkansiz, mashuqa bilan birga istirobga tushasiz, yig'laysiz, dardlashasiz, yonsa yonasiz, kuysa kuyasiz. Bu eng asosiy xarakterlanadigan jihatlaridan biridi, chunki lirik qahramonning kechinmalariga "oshno" bo'lasiz, uning dardlariga o'zingizni ham sherik deb his etasiz. Ishq azobi suyak-suyaklarnida zirqiratguvchi ilohiy va go'zal tuyg'u sifatida e'tirof etilishi ham bejiz emas.

Zebo Mirzo ijodini kuzatish jarayonida u nafaqat go'zal she'rlar, balki, o'sha she'rlarda qo'llaniladigan chiroyli badiiy san'atlar ustasi ham ekanligini guvohi bo'lamiz. Xususan, "obi rahmatlar", "o, bu rahmatlar" birikmalarini olsak, dastlabki "obi rahmatlar" obi rahmat daryosi haqida so'z yuritsa, keyingisi cheksiz tashakkur ma'nosida ifoda etiladi va shoir o'zining "Tamom" she'rida aynan mana shu o'xshatishdan juda asosli foydalangan.

She'r va shuur uning bir-biriga o'zaro aloqadorligi, yuksak echimi va betakror fazilatlarini bilan kishini o'ziga tortadi. Zebo Mirzo ijodida ham she'r va

shuur birligi yuzaga kelib, unda shoiraning butun ya'ni go'zal olami o'z tajassumini topgan.

Foydalanilgan adabiyotlar:

1.Раҳимжонов Н. Мустақиллик даври ўзбек шеърияти. Тамойиллар, тажрибалар, сабоқлар. – Т., Фан, 2007. – 260 б.

1. Мирзо Зебо. Нурли кунлар. –Т., Yangi asr avlodi, 2004.–80 б

“SHUM BOLA”NI INTERFAOL USULLAR ASOSIDA O‘RGANISH

Eshquvvatova Farangiz Oroljon qizi
SamDU talabasi,

Ilmiy rahbar: katta o‘qituvchi G.Ernazarova

Jamiyatning har tomonlama ravnaq topishi, taraqqiy etishi, ta'limning rivojlanishiga va mazmunan takomillashib borishiga bog'liq. O'zbekiston Respublikasi Prezidenti Shavkat Mirziyoyevning 2018-yil 5-sentabr kuni “Xalq ta'limini boshqarish tizmini takomillashtirish bo'yicha qo'shimcha chora-tadbirlar to'g'risida” gi farmoni. 2017-yil 7-fevralda O'zbekiston Respublikasi Prezidenti tomonidan qabul qilingan O'zbekistonni rivojlantirishning beshta ustuvor yo'nalishi bo'yicha Harakatlar strategiyasining “Ijtimoiy sohaning rivojlantirishning ustuvor yo'nalishlari” da ta'lim va fan sohasini rivojlantirishga bag'ishlangan bo'limi hukumat tomonidan amalga oshirilayotgan islohotlarga yaqqol misoldir.

Bilamizki, “Shum bola” asari dunyodagi ko'plab xorijiy tillarga tarjima qilingan. Mazko'r asarni o'rganish jarayonida o'quvchilar e'tibori Shum bolaning xulq-atvori, *kechinmalari va odamlarga munosabatiga qaratiladi*. Bunda “Swot-universal tahlil” texnologiyasi qo'l keladi. “Swot- universal tahlil” metodi ta'lim tizimida eng ko'p qo'llanadigan uslublardan biri hisoblanadi. Ushbu texnologiya munozarali masalalarni hal etishda, bahs-munozaralar o'tkazishda yoki o'quv seminari yakunida, o'quv rejasi asosida biron bir bo'lim o'rganib bo'lingach qo'llanilishi mumkin. Bu texnologiya tinglovchilarni o'z fikrlarini himoya qilishga, erkin fikrlash va o'z fikrlarini boshqalarga yetkazishda, ochiq holda bahslashishga o'quv jarayonida egallagan bilimlarini tahlil etishga, qay darajada egallaganliklarini baholashga hamda tinglovchilarni bahslashish madaniyatiga o'rgatadi.

Buning uchun kompyuter ekraniga bo'sh jadval joylashtiriladi yoki A-3, A-4 formatli qog'ozlarda chizilgan jadvallar o'quvchilarga tarqatiladi. Ular Shum bolaning kuchli, zaif tomonlarini, uning usha paytdagi imkoniyatlari, unga tashqi ta'sirlarni izlab topishlari va jadvalga tushirishlari lozim. Uni guruhlardan bir o'quvchi taqdim qilishi mumkin. Har bir o'quvchi o'zining tahlilini tayyorlashi, uni izohlab, yangi fikrlar bilan boyitishi asar qahramonini yanada yaxshi o'rganishiga zamin yaratadi.

Ushbu texnologiya orqali o'quvchilar shum bola haqidagi nazariy va amaliy tajribalarni tahlil qilish, taqqoslash orqali muammoni hal etish yo'llarni topishga, bilimlarni mustahkamlash, obrazning xulq-atvori, yutuqlari hamda kamchiliklari mustaqil tanqidiy fikrlashni, nostandart tafakkurni shakllantirishga xizmat qiladi.

Dars jarayonida muammoli vaziyatlar yaratish va uning yechimini topish ham dars sifatini oshiradi. Shuning uchun “Muammo” texnologiyasini ham shu o‘rinda ko‘rsatib o‘tamiz. “Muammo” texnologiyasi bu-mantiqiy fiklash operatsiyasi (tahlil,umumlashtirish) va o‘quvchilarning izlanishli faoliyati, qonuniyatlarini hisobga olib tuzilgan ta’lim va o‘qitishning ilgari ma’lum bo‘lgan usullarini qo‘llashi, qoidalarining yangi tizimidir. O‘qituvchi muammoli vaziyat yaratadi, o‘quvchini uni yechishga yo‘naltiradi,yechimni izlashni tashkil etadi.Muammoli o‘qitishni boshqarish, o‘qituvchi mahoratini talab etadi,chunki muammoli vaziyatning paydo bo‘lishi individual holat bo‘lib tabaqalashtirilgan va individuallashtirilgan yondashuvni talab etadi.

“Muammo” texnologiyasi o‘quvchilarga asarda yuzaga kelgan muammolarni o‘rganishga, uning yechimini topishga, mulohaza yuritishga yordam beradi.Darslikda eslatib o‘tilganidek, “Shum bola” asarini o‘qib chiqish o‘quvchilarga qo‘shimcha topshiriq tarzida berilgani ma’qul. Mustahkamlash darsida “Galereya” texnologiyasidan foydalanish mumkin. Ushbu texnologiya “Shum bola” asarini to‘liq qamrab olgan holda, kichik guruhlarda tashkil qilinadi .Har bir guruhga Shum bolaning yangi bir sarguzashtini tasvirlash vazifasi topshiriladi. Guruh a’zolari topshiriqni qog‘ozda bajaradilar va uni sinfning istalgan joyiga (doska,devoryokieshikka) yopishtiradilar. Har bir guruh o‘z ishining taqdimotini tayyorlaydi. Navbati bilan taqdimot o‘tkaziladi. O‘qituvchi va barcha o‘quvchilar birgalikda ko‘rgazma oldiga boradilar taqdimotni tinglab shu asosda savollar beriladi.Ush bu texnologiya o‘quvchilarni erkin mushohada yuritishiga yo‘l ochadi, ayni chog‘da mavzuni to‘lq o‘zlashtirish imkonini beradi.

Dars she’rni ifodali o‘qish,yod olishdan boshlanib,o‘qitishning zamonaviy usullardan biri “Klaster” hamda bahs -munozara shaklida olib boriladi. O‘qituvchi o‘quvchilarga:“Tarixga nazar tashlansa,daqiqalar qimmatlimi yoxud asarlar?Buyuk shaxslar hayotida ularning qay biri muhimroq mavqega ega ?Inson taqdiri lahzalarda hal bo‘lishi mumkinmi? Buyuk kashfiyotlar qanday yuzaga keladi?Umuman, biz vaqt deganda nimani tushunamiz?Hozir, keyin tushunchalariga munosabatingiz” kabi savollar bilan murojat qiladi va javoblarga qarab,o‘quvchilarni ramziy ma’nodagi “Lahza” va “Asr” guruhlariga bo‘ladi So‘ngra,she’r ifodali o‘qib bo‘lingach,uning har bir satri haqida mulohaza yuritiladi.

Birinchi banddagi:

G‘uncha ochilguncha o‘tgan fursatni

Kapalak umriga qiyos etgulik.

Ba’zida bir nafas olg‘ulik muddat

Ming yulduz so‘nishi uchun yetgulik

kabi misralar haqida o‘qituvchi tomonidan o‘rtaga quyidagicha savvollar tashlanadi. G‘uncha nima? Uning ochilish fursati qanday kechadi? Nega bu jarayon kapalak umriga qiyos etilmoqda? Bir nafas nima,o‘zi? Vaqtmi,tiriklikmi? Yulduz so‘nishi-chi?

Ushbu muammoli savollarga har bir guruh a’zosi o‘zining mustaqil fikrini yoxud jamoa xulosasi asosida javob berishi mumkin. Dastavval, “Lahza” guruhidagilar taxminan shunday javoblarni berishlari maqsadga muvofiq.

Gulg'uncha-atirgulning ochilishidan oldingi holati.Uning g'unchalikdan gul holatiga o'tishi jarayonini esa kuzatib bo'lmaydi, demak,qisqa fursatda bir holdan ikkinchi holga o'tadi,uni har qancha urinmang, oddiy ko'z bilan ko'rish mumkin emas. Shoir she'rda g'unchaning gul holatiga o'tishidagi oniy so'zlayotir.Yana tabiatda bizning o'lchovimiz bilan atigi 3-4soatgina umr ko'radigan pashshava kapalaklar ham bor.Ammo bu vaqt ular uchun butun bir umrni belgilaydi.Jumladan, she'rda kapalak umrining qisqaligi,ammo shu davr ichida u tug'ilib, voyaga yetib,nasl qoldirishga ulgurishi tilga olingan.

“Asr” guruhining javobi: She'rdagi ma'no uning abadiyligi bilan aloqador.Chunki gulg'uncha (nim ochilgan atirgul) ta'rif va tavsifga loyiq. Afsuski,u ochilgan,uzoq yashamaydi, barglari to'kilib ketadi. Ammo uning maftunkorligi,xushbo'y hidi va tarovati,go'zalligi ana shu vaqtdagi beqiyosligida. Xuddi shu davridagi viqori uning alohida xususiyatini belgilaydi.Zotan, uning kapalak umriga qiyoslanishida ham shunday ma'no mavjud.Kapalak eng kam umr ko'radigan hashorat bo'lishiga qaramasdan,rang-barang tovlanishi-yu, nafisligi,ajib manzara kasb etishi bilan dillarga zavq bag'ishlaydi,u bu davrda o'z jozibasi orqali ko'pchilikning ko'nglini xushnud etishga erishadi.Xullas, o'quvchilar ushbu she'r orqali vaqt kabi muammoli tushuncha haqida erkin mulohaza yuritish, munosabat bildirish ko'nikmalarini hosil qilish hamda ularning tafakkurini shakllantirishga erishish mumkin. Ayniqsa, adib ijodiy uzasidan o'rganilgan bilimlarni mustahkamlashda “Skarabey”, “Akvarium”,“Labirint” va “Piramida” texnologiyalarini qo'llash dars samadorligini oshiradi.

“Mening o'g'rigina bolam” hikoyasida o'zi guvoh bo'lgan oddiy voqea asosida shafqatsiz jamiyatni va shunday sharoitdahan o'zining insonligiga, mehr-oqibatiga zarracha putur yetkazmagan insonni ko'rsatadi. Yozuvchi o'z ota-onasi o'lib, uchta singlisi bilan katta onasi –“qora buvisi” qo'lida qolgan paytidagi uylariga o'g'ri kelishi voqeasini so'zlaydi. Birinchi jahon urushi payti, “zamon chappasiga ketgan” vaqt, barcha kosiblar singan, ish yo'q hamma och-yalang'och. Oddiy kosib, ishsizyigit ikki bolasi, xotini, onasini boqa olmay,o'g'irlik qilishga majbur bo'ladi.

Kechasi “Qora buvi” ning tomiga chiqqanida qo'qqisidan aksirib yuboradi. Yetimlar taqdirini o'ylab, mijja qoqmay yotgan “qora buvi”, “O'g'rigina bolam, axir kasbing nozik, tumov-pumovingni yozib chiqsang bo'lmaydimi!”,-deydi. “Qora buvi” ning mehribonona ,samimiy munosabati o'g'rining ham xasrat qopini ochib yuboradi. U tomda, kampir pastda dardlashadilar, urushning kasofati, xalqning qashshoq hayoti,shaharning yetimga to'lib ketgani, xullas, osmon uzoq yer qattiqligi to'g'risida suhbat quradilar.

G'afur G'ulom ijodini o'rganish jarayonida adib asarlarining til xususiyatlarini ham e'tibordan chetda qoldirmaslik lozim.Shuo'rinda “Shumbola” asarida ishlatilgan quydagi maqol va iboralarga to'xtalsak: “Og'zi qaro-alomat, ichi qizil -qiyomat”, ”Sheriklik oshni it yemas”, ”Ashulaga osh -non beradi”, “Qora po'stakdan burga qidirish qiyin”, “Ikki quyonni quvlagan birisini ham tutolmas”. Mazkur maqol va iboralar o'z o'rnida mohirlik bilan qo'llanganki, ulardan birortasini olib tashlab, boshqasiga almashtirib bo'lmaydi.

Xulosa qilib aytganda, Gʻafur Gʻulom asarlarini oʻrganishda yuqoridagidek ilgʻor pedagogic va axborot-kommunikatsion texnologiyalardan unumli foydalanish maqsadga muvofiqdir. Bu oʻquvchilarning darsni yaxshi oʻzlashtirishlariga, adabiyotga boʻlgan qiziqishlarining oʻsishiga zamin yaratadi.

Foydalanilgan adabiyotlar:

- 1.Raxmanov Gʻ. Ona tili darslarida A.K.T.lardan foydalanish shakillari.
- 2.Ishmuhammedov R., Abduqodirov A. Taʼlimda innovatsion texnologiyalar. –T., 2008.
- 3.Yoʻldoshev J., Usmonov S., Pedagogik texnologiya asoslari:- T.:“Oʻqituvchi”, 2004y.
- 4.Mamajonov S. Gʻafur Gʻulom prozasi .-T., Fan, 1966
- 5.Gʻafur Gʻulom. Mukammal asarlar toʻplami. 5 t. –T., Fan, 1986.

ABDULLA ORIPOVNING BADIYYAT HAQIDAGI QARASHLARI

Usmanova Dildora

SamDU 2-kurs magistranti

Yillar davomida shakllangan ijod va ijodiy jarayon haqidagi turfa xil qarashlarni kuzatish mumkin. Buning zahirida odam va olamni anglash mohiyati mujassamlashtirilganligini alohida qayd etish lozim. Har bir ijodkor badiiylilik qonuniyatlarini, olam va odamni qanday anglasa, shunday badiiylilikga singdirishga intiladi. Ammo baʼzi ijodkorlar borki, ularning hayotga teranroq nazar solishi, bu tushunchalarni ijodga, ijodiy jarayonga uzviy birligini ifodalashga intilishi kuzatiladi. Adabiyot har bir davrning ijtimoiy-siyosiy, maʼnaviy-axloqiy muammolarini koʻtarib chiqishi va ularga javob izlashiga koʻra tarbiyaviy ahamiyatga ega. Uning ijtimoiy-maʼrifiy xususiyati, ayniqsa, xalqning milliy ruhini ifodalab berishda koʻrinadi. Tabiiyki, bu jarayonda xalqona poetik tafakkur tarzi ijodkorning adabiy shaxsiyati darajasini namoyon qiladi. Chinakam isteʼdod egasi, xalq dilining ulkan tarjimoni Abdulla Oripov ijodida xalqona poetik tafakkur tarzi yetakchilik qiladi.

Abdulla Oripov chinakam xalqning ehtiromi va eʼtirofiga sazovor boʻlgan shoirdir. Uning xalq ardogʻiga, el-yurt hurmatiga sazovor boʻlishining oʻziyoq ijodkorning sheʼr va dostonlari xalq ruhi va qalbining ifodasiga aylanganidan darak beradi. “Yozuvchilikning maktabi ham, dorilfununi ham bitta. U ham boʻlsa, bir umr hayotning ichida boʻlish, oʻz xalqi bilan hamdardu hamnafas boʻlib yashash, haqiqat va adolatga sadoqat bilan xizmat qilishdir”.

Zero, Abdulla Oripov butun hayoti davomida “oʻz xalqi bilan hamdardu hamnafas boʻlib” yashab, ijod qilayotgan shoirdir. Shoir oʻz sheʼrlarida badiiy mazmunga mos shakl tanlaydi. Badiiy ijoddagi xalqona ruh insoniyatning bir necha ming yillik hamrohi boʻlgan xalq ogʻzaki ijodi motivlari, xalq badiiy tafakkuridagi yetakchi tamoyillar bilan uygʻunlikda idrok etiladi. Ayni shuning oʻziyoq Abdulla Oripov sheʼriyatini xalqona badiiy tafakkur nuqtai nazaridan alohida oʻrganish ehtiyojini maydonga keltiradi. Bu esa, shubhasiz, shoir ijodidagi mazkur muammoning nazariy asoslarini, xalq donishmandligi, hikmatlar xazinasini va uning ildizlarini hamda folklor motivlarini bir butunlikda tadqiq etish masalasini keltirib chiqaradi.

Abdulla Oripovning mashhur «O‘zbekiston» she’rida qaratqich kelishigi qo‘shimchasi (-ning) shaklini o‘zgartirib, ya’ni «mening» o‘riniga «manim» tarzida qo‘llashi ham, aynan, she’rning badiiy qiymati oshishiga xizmat qilgan. Ora-orada takrorlanib keladigan «O‘zbekiston Vatanim manim» satri o‘z orginalligi, shuningdek, shu misradagi ikki so‘zning (Vatanim, manim) o‘zaro ichki qofiyalanib kelishi kuchli emotsiyani paydo qiladi. Shoir xuddi shu she’rida: “Balki ustoz Oybekdek to‘lib, Yozajaksan yangi bir doston, Balki Habib Abdulla bo‘lib, Sahrolarda ochajaksan kon”, degan misralar bor. E’tibor qilinsa, adabiy tilga norma-mezonlariga bo‘lmagan «-jak” grammatik qo‘shimchasi asosan o‘g‘iz lahjasida keng qo‘llanadi. She’riy misrada qo‘shimchaning “yozajaksan”, “ochajaksan” tarzida anormal qo‘llanishi til badiiyatiga xizmat qilgan. Shu nuqtai nazardan qaraganda oddiy ko‘ringan birgina grammatik qo‘shimcha ham she’riy asarning badiiy tili masalasida o‘z ahamiyatiga ega, albatta.

Abdulla Oripov she’rlarining badiiy til xususiyatlari tadqiq qilinayotgan mavzu e’tiboridan bir sidra nazardan o‘tkazish shoir ijodining poetik mohiyatini yana ham teranroq anglashga xizmat qiladi.

Darhaqiqat, Abdulla Oripovning o‘zi ehtirom bilan ta’kidlaganidek, “... Ma’lum did va saviyaga ega bo‘lmagan ijodkor adabiyotning birinchi elementi bo‘lmish tilning o‘zidayoq kimligini bildirib qo‘yadi. Didsiz shoir biror so‘zni biron o‘rinda eplab ishlatishi gumon. Gap shunchaki tizmalar emas, balki anchayin jiddiy she’riyat ustida ketayotibdi. Fikrimni isbotlash uchun ba’zi misollarga murojaat etaman. “Muhokamat ul-lug‘atayn”da Alisher Navoiy yig‘lamoq so‘zining bir necha sinonimlarini keltiradi.

Xususan, bo‘zlamok, o‘kramok, bo‘kramok, siqtamok va hokazo. Bizning “shoirlarımızning qahramoni yig‘layapti deylik. Ammo u qaysi sababga ko‘ra va qanday holatda ko‘z yoshi to‘kmoqda? Uzoqroq izlanishga toqati qolmagan yoki didi nomukammal shoir qahramonim umuman yig‘layapti, deb qo‘ya qoladi. Holbuki, haligiga o‘xshash sinonimlar shoirga bunday o‘rinda juda qo‘l kelishi mumkin. Masalan, tasavvurimcha, bolasi o‘lgan ona bo‘zlaydi, ota o‘kraydi. Yoki ma’lum bir satrda unli va undoshlarning uyg‘un kelishi uchun tuproqni tufroq deyishga ham to‘g‘ri keladi. Bunday misollarni ko‘plab keltirish mumkin”

Abdulla Oripov nazdida milliy til va uning leksik boyliklarini did bilan ishlatish, ona tilimizning so‘z xazinalariga katta e’tibor, bu yo‘ldagi ongli, chinakam mehnatgina san’atkorni pog‘onama-pog‘ona yuksak cho‘qqiga ko‘tarishi mumkin. Bu masalani shoir ijodining tadqiqotchilari va ixlosmandlari ham doimo alohida ta’kidlab ko‘rsatganlar. “Obrazlilik, -deb ta’kidlaydi akademik M.Qo‘shjonov va adabiyotshunos Suvon Meli, -Abdulla Oripovni adabiyotning birinchi elementi - til xususida o‘ylashga majbur qiladi. U so‘zlarga jilo bera oladi. Uning asarlarida bizga ma’lum so‘zlar yangicha ma’no kasb etgandek bo‘ladi. Shu bilan barobar, o‘zbek tilining boyligi haqida ham qayg‘uradi. Ba’zan fikrlarni betakror so‘zlar bilan ifodalay oladi. Buning uchun u o‘zbek tilining bor boyliklaridan unumli foydalanadi”.

Shoir ijodida tilga munosabatning ikki ko‘rinishi badiiy aks etadi. Birinchidan, shoir o‘z she’rlarida tilni tabiatning faqat insongagina in’om etilgan ulug‘ ne’mati sifatida tasvirlaydi. Til va ruhni egizak tushunchalar sifatida badiiy

idrok etadi. Ikkinchidan, tilga ana shunday badiiy va falsafiy munosabat shoir ijodida ham amaliy tabiati bilan namoyon bo'ladi. Tildan mohirona foydalanish, so'z ummonidan g'avvos kabi "durri g'alton"lar terish, so'zga inja va muqaddas go'zallik sifatida munosabatda bo'lib istifoda etish, uning ilohiy qudratini ruhan his qilish shoir badiiy olamining o'ziga xos belgilaridan biridir.

Foydalanilgan adabiyotlar:

- 1.Qo'shjonov M, Meli Suvon. Abdulla Oripov. – T., Ma'naviyat, 2000.
- 2.Qo'shjonov M. Onajonim, she'riyat. – T., O'qituvchi, 1984.
- 3.Asqar H. Qonida jo'shadi ajdodlar ruhi / O'zbekiston adabiyoti va san'ati. 1991. 29-mart.
- 4.Vohidov E. Har zamonning o'z muhri bor. // Guliston. – T., 2003. -№ 3.
- 5.Abdulla Oripov. Tanlangan asarlar. To'rt jildlik. Birinchi jild. She'rlar va dostonlar. – T., G'afur G'ulom nomidagi Adabiyot va san'at nashriyoti, 2000.

NAZAR ESHONQUL HIKOYALARIDA BADIYLIK VA QAHRAMON

**Qosimov Mirjalol,
SamDU 1-kurs magistri**

O'zbek adabiyoti 80-yillarning ikkinchi yarmiga kelib badiylik jarayonini tubdan o'zgartira boshladi. Mustaqillik ko'pgina sohalar kabi adabiyot ijod olamiga ham o'zi xohlaganchalik erkinlik va yengilliklar olib keldi. O'zbek adabiyoti jahon adabiyoti an'ana va yangiliklari bilan kengroq tanishdi, o'zining yangi-yangi yo'nalishlarini yaratdi. Qalam ahli ijod bilan jiddiyroq shug'ullana boshladi. Adabiyotning ko'pgina ochilmagan qirralari ochildi, ko'plab yosh ijodkorlar yetishib chiqdi. Adabiyotga kirib kelmoqchi va kirib kelayotgan hech bir ijodkor e'tibordan chetda qolmadi. Yosh adabiyotchilarni, yosh ijodkorlarni kashf etish bugungi kun tajribali qalam ahllarining asosiy vazifasiga aylandi.

Mustaqillik davri nasri o'zbek adabiyotida tub burilish yasadi. Umuman, bu davrda adabiyotshunosligimiz uchun juda ko'p sifat o'zgarishlariga olib keldi. Adabiyotshunos Q. Yo'ldoshev: "Davr va adabiyot munosabati g'oyat murakkab muammodir. Chunki zamonning asosiy belgisi uning tinimsiz harakatdaligi, o'zgarib turishi bo'lsa, asl adabiyotning bosh xususiyati uning o'zi yaratgan zamonga qaraganda ko'proq yashashga intilishi, barqarorroq bo'lishga urinishidir" kabi fikrlarni bildirib o'tadi [1, 15-bet].

Istiqlol davriga kelib adabiyotimizda shunday salmoqli, shunchalik o'zgarishlar bilan to'la yo'g'rilgan adabiyot yuzaga keldiki, bu davr yutuqlarini hech qanday dalillar bilan inkor eta olmaymiz. Bu davrga kelib (adabiyot) dunyoni tushinish va tushintirish, inson psixologiyasi, xalq saviyasini yuksaltirishga intilish adabiy jihatdan yangilanish bosqichiga qadam qo'ydi. Avvalombor adabiyotning vazifasi yangilandi.

Umuman, yozuvchilar olam va odam haqida boshqacharoq-falsafiyroq fikrlay boshladilar. Bu yangilanish insonni tasvirlash tamoyillarida ham o'z aksini topib bordi. Endilikda inson adabiyotda o'z mohiyatini qaytadan kashf etdi. Insoniyat adabiyotda bosh qadriyatga aylandi. Yozuvchilar uni o'z boricha tasvirlashga harakat qildilar. Inson yaratish uchun tuzumning qandaydir

manfaatlari bilan hisoblashish shart bo'lmay qoldi. Inson qanday bo'lsa, shu holicha ulug'landi, joyi kelganda qilmishlari uchun kamsitildi. Inson qanchalik ulug'lanmasin o'z hatti-harakatlariga, hatto o'y-hayollariga javob beradigan zot tarzida tasvirlana boshlandi. Bir so'z bilan aytganda istiqlool adabiyoti insonni murakkablashtirdi, noziklashtirdi, bir xil qarashlar tizimi bilan tushinib ham, tushintirib ham bo'lmaydigan injiqroq ekanligini ro'y-rost aks ettira boshladi. Shuning uchun ham biz istiqlool adabiyotini shaxs adabiyoti deb atay olamiz.

Keyingi yillarda yaratilgan asarlar didaktikadan yiroq, insonga "tarbiya berishga" harakat qilmaydi, qaysi yo'l to'g'ri, qaysi ishni qilmaslikni o'rgatmaydi. Xulosa chiqarishni o'quvchining o'ziga qoldiradi.

Istiqlool adabiyoti ham voqeabozlikdan, muammochilikdan, ishlab chiqarish masalalarini hal etishdan qutilib bormoqda. Bugungi nasrimizda modernizm, postmodernizm, absurd adabiyoti xususiyatlari belgi bermoqda. Bu holat bizning ijodkorlarga ham g'arb adabiyoti tajribalari o'rganish mumkin bo'lganligi tufayligina, shunaqasiga ham bir yozib ko'raylik degan injiq bir istak sababligina, shunday yozish mumkinligi boisgina, o'zgalarni qoyil qilish istagi samarasigina emas, balki mafkuraviy bo'g'ovlardan qutilgani bois, inson har tarafdan tadqiq etila boshlagani sabab, har xil insonni xilma-xil yo'sinda badiiy tadqiq etish mumkin ekani tufayli, odamni faqat mehnat jarayonida emas, balki boshqa turfa holatlarda ko'rish va ko'rsatish imkoni borligi natijasida sodir bo'lmoqda.

Mustaqillik davri adabiyoti haqidagi taniqli adabiyotshunos olimimiz Abdug'ofur Rasulovning quyidagi fikrlari bizning mushohadalarimiz dalili bo'la oladi. "Mustaqillik davri o'zbek adabiyotining qator fazilatlarini sanashimiz, tarixiy va zamonaviy qahramonlar xarakterini misol qilib keltirishimiz, yozuvchilarimiz ham mumtoz adabiyotimiz manbalaridan unumli foydalanib, hozirgi ilg'or jahon adabiyotida paydo bo'layotgan yangiliklardan emin-erkin bahramand bo'layotganlarini aytishimiz mumkin. Lekin bizningcha hozirgi o'zbek adabiyotida realizm adabiyoti ilg'or prinsiplardan foydalanilayotganligi hamda modern-obsurt, syurrealizm, avangardizm oqimlari, eksistensializm metodiga murojaat etilayotganini ta'kidlash joiz" [2,20-bet]. Mustaqillik yillariga kelib bizning bu kabi fikrlarimizni o'zida qamrab olgan ko'plab sermazmun nasriy asarlar vujudga keldi. To'g'ri, ularning hammasini ham o'qimishli asarlar deb ayta olmaymiz.

Mustaqillik davri adabiyotida yosh shoir va shoirlar faol bo'lsa, nasrda ijodiy uzviylik davomiylilik ustivorligi nomoyon bo'ldi. Oxirgi o'n yillikda O.Yoqubov, O'.Hoshimov, Sh.Xolmirzayev, O.Muxtor, T.Malik, X.Do'stmuhammad, A.Dilmurod, N.Eshonqulov, N.Norqobilov, Tog'ay Murod, T.Rustamov, A.Yo'ldoshev, L.Bo'rixon, S.Vafo, J.Ergasheva singari turli avlodga mansub ijodkorlar o'ziga xos yo'sinda qalam tebratib, milliy proza taraqqiyotiga ta'sir ko'rsatmoqdalar.

Mustaqillik davrining dastlabki davrlari nasrining eng e'tiborli jihatlaridan biri shuki, badiiy asarlarda odamga ijobiy-salbiy yoki tipik-notipik singari qoliplar orqali emas, balki mavjudligining o'zi bilan adoqsiz sir-u sinoatlarga tola tirik inson tarzida yondashishning qaror topib borayotganligi bilan hamohangdir.

Inson ruhiyatining tahlili, uni chuqur tushunish va tasvirlash mahorati-adabiyotning tub mohiyatini belgilovchi sifat darajasiga ko'tarilishi birdan yuz bergani yo'q. Adabiyotning turli rivojlanish bosqichlarida bu muammo turlicha tushunilgan. Agar ijodiy metodlar va ularning estetikasi nuqtai nazaridan psixologizm muammosiga yondoshsak, bu masalaning zamon va davr talabiga muvofiq yanada realroq, yanada qabariqroq bo'lib borganligining guvohi bo'lamiz.

Hozirgi adabiy jarayonda, jumladan, modernistik ruhda yozilayotgan asarlarimizning aksariyatini analitik prinsipda tahlil qilmoq maqsadga muvofiq bo'ladi. Chunki, bu prinsipda "voqealar tafsiloti"ning tasviriga nisbatan "his-tuyg'ular tafsiloti" tasviri birinchi planga chiqadi. Qahramonning ruhiy jarayoni, bu jarayonning betinim o'zgaruvchanligi, fikrlar, hislar va kecinmalarning rivoji va oquvchanligi keng tahlil etiladi.

Bugunning hikoya va qissalarida fikrning badiiy ifodasi o'zgardi. "Biroq metaforaga yo'g'rilgan fikr tasavvurning metaforasiga aylanadi, fikr qilinadigan metafora his-tuyg'ularga uyg'un idrokning hosilasi. Shu bois, badiyat ehtirosli fikrdan tug'iladi, ijodkor esa o'z tasavvuridagi go'zallikni badiiy kashf etadi, yaratadi" degan edi adabiyotshunos olim Malika Rustamova.

Yozuvchi Nazar Eshonqulning badiiy asarlari inson tafakkuridagi evrilishlarni, shaxs va jamiyatning dialiktik birligini o'ziga xos badiiy uslubda aks ettirishi bilan alohida ajralib turadi. Uning barcha asarlariga xos bo'lgan ramziy majoziy talqinlar, inson ruhiyatidagi iztiroblarni, ruhiy-ma'naviy olamidagi o'zgarishlarni "Qora kitob" qissasi misolida ham kuzatish mumkin. Ushbu qissa voqeyalari asar qahramoni tilidan hikoya qilinadi. Asarning sujet liniyasiga e'tibor qaratsak sujet tugundan boshlanadi, asta sekin voqealar rivoji davomida qahramon xarakteridagi ichki kurashlar, ruhiy bir isyon jarayonida uning hayotida tub burilish bo'lgan holatni ko'rishimiz mumkin va u ma'lum ma'noda qahramon iroda yo'nalishini belgilab beradi. Adib unda ko'proq ramziy ma'no kasb etuvchi detal va obrazlarni topib, kitobxon holatini to'la jalb qilib olishga harakat qiladi, qismlarni aniq bir g'oyaviy yo'nalishga bo'ysundirib, asarda yuz berishi mumkin bo'lgan tarqoqlikdan qutila oladi.

Adabiyotlar:

- 1.Қозоқбой Йўлдош. Ёпиқ сўз. – Тошкент, «Янги аср авлоди» 2006.
- 2.Расулов А. Бадийлик-безавол янгилик. – Toshkent, "Шарқ". 2007.
- 3.Eshonqul N. Momoqo'shiq. – Toshkent, G'afur G'ulom nomidagi nashriyot-matbaa ijodiy uyi, 2019.

IJODKORNING OBRAZ YARATISH MAHORATI

Narimbetova Gulruh

Qorapoq Davlat Universiteti talabasi

Har bir asar yaratilganida davr qahramon xakteri va asar sujeti shu asarning saviyasini belgilab beruvchi asosiy omillardandir. Hikoya janri hozirgi kunda keng ommalashayotgan janrlardan biri. Bir nechta yosh ijodkorlar ayni shu janrda yaratilgan asarlari bilan tanilayotganligi ham sir emas. Shunday qalami o'tkir dolzarb mavzularni yoritish, ularni omallashtirish qobilyatiga ega bo'lgan yosh ijodkorlardan biri Javlon Jovliyev, O'zbekiston davlat san'at va madaniyat

institutining “San’atshunoslik jurnalistikasi” yo’nalishida taxsil olgan. Uning “Yoshlik” “Teatr” jurnallarida “O‘zbekiston adabiyoti va san’ati” “Hurriyat” “Toshkent oqshomi” va boshqa matbuot nashrlarida ijodiy ishlari va maqolalari chop etilgan. Javlon Jovliyev bugungi kunda o‘zining “Ozodlik” “Ayol” “Lobar, Lobar, Lobarim mening” “Buhoro-buhoro” kabi hikoyalari va “Qo‘rqma” romanlarini o‘z kitobxonlariga taqdim etadi.

Bu asarlarda yoritilgan mavzular dolzarbligi bilan keng ommaning va adabiyotshunoslarning ham diqqat markazida. Javlon Jovliyev hikoyalarida yaratilgan obrazlar xayoliy yoki fantastik to‘qimalar emas. Ular siz va bizning oramizda yashayotgan oddiy insonlar. Ammo, adib oddiy obrazni qahramon darajasiga shunday kotarganki bunga lol qolmasdan iloj yoq. Javlon Jovliyevning hikoyalaridagi qahramonlar oddiy, sodda, omi qishloq insonlari yoki ilimli qatlam vakillari. Bir qaraganda ijodkor o‘z asarlarida yaratgan obrazlari bir-biridan mutlaqo yiroqdek, lekin Javlon Jovliyev ularning umumiy va alohida xarakterlarini tahlil qila olgan. O‘z hikoyalarida insonning botiniy va zohiriy dunyosi har doim ham muttanosib bo‘lavermasligi, inson ba‘zan tashqi muhit ta’sirida o‘zini anglay olmay qolishi mumkunligini kitobxonga yaqqol dalillab bergan. Javlon Jovliyev hozirgi kunda ham samarali va saviyali ijod qilmoqda.

To‘g‘ri, hayot o‘zi sahna, unda qo‘yiladigan namoyishning muallifi-taqdir. Agar shu namoyishda qahramonlar o‘rni almashib qolsa asar to‘laligicha mukammal ijroga ega bo‘la olmaydi. Javlon Jovliyevning aynan “Ayol” hikoyasida shu so‘zlarning tasdig‘ini ko‘rish mumkin. Oiladagi erkak va ayolning o‘rni almashib qolishi natijasida hayotida chigal muammolar va tuzatib bo‘lmas xatolar vujudga kelgan. Natijada bir ayolning qadirsizlanishi bundanda yomoni bir onaning e’tiborsiz qolishiga olib kelgan.

“Hali Quyosh qishloqqa salom berib o‘ynoqi teraklar mayin shabadaga tebranib shivirlamasdanoq ayol o‘rnidan turib uyidagi ishlarni saranjomladi... keyin eski kiyimlarni kiydi-yu kavushini sudragancha dala tomon oshiqdi”.[3:10] Ushbu jumlar orqali muallif “ayol”ning hayot tashvishlarini tortayotkan zahmatkash inson sifatida ko‘rsatishga harakat qilgan. Lekin asar qo‘rqinchli jumlar bilan boshlangan. “Ayol fermaning yollanma ishchisi edi. Paxta, kartoshka, piyoz, kunjut, o‘tog‘ida kunlik to‘lov evaziga mehnat qilar, oila shu pul bilangina kun ko‘rardi. Eri ishsiz...”. [2:116]

Shu ikki og‘iz so‘zning (eri ishsiz) qanchalik qo‘rqinchli vaziyatga olib kelishi asar davomida kitobxonga uqtirilgan. Bir “ayol”ning qadirsizlanish cho‘qqisiga chiqqanligiga qaysidir ma’noda shu ikki og‘iz so‘z sababchidek. Haqiqatdan ham bir oilada bir onaning, bir umr yo‘ldoshning tug‘ilgan kuni yaqinlari tomonida unitilishi bu katta fojia. Bundan tashqari farzandlarning otasidan o‘rnak olib katta bo‘lishi bu kelajakdagi shunday fojialarning ko‘payishiga ishora emasmi? Oiladagi bu muvozanatning buzilishida “ayol”ning ham hissi yoq emas. Uning xatosi o‘zini erkak ro‘liga qo‘yib ko‘rishida bo‘ldi. “Tug‘ilgan kunim... Tug‘ilgan kunim... qutlug‘ bo‘lsin!”,- deya achchiq suvni ko‘zini chirt yumgancha ichib yubordi”[1,2].

Xulosa o‘rnida shuni aytish kerak-ki, bugungi kunda o‘zbek nashrida o‘zining keng qamrovli o‘tkir sujetli hikoyalari bilan kitobxonlar orasiga shiddat

bilan kirib kelayotgan Javlon Jovliyevning hikoyalari taqsinga loyiq. Javlon Jovliyev o'z asarlarida obraz yarata olish qobiliyati yuksak ekanligini yaqqol isbotlash layoqatiga ega ekanligi ahamiyatli.

Foydalanilgan adabiyotlar

1. Jovliyev J. Ayol. Hikoya. – Toshkent, 2019.
2. Sultonov I. Adabiyot nazariyasi. – Toshkent, O'qituvchi, 2005.
3. Qosimov Y. Adabiyotshunoslik nazariyasi. – Toshkent, 2005.

G'AFUR G'ULOMNING O'XSHATISH SAN'ATIDAGI MAHORATI

Ya. Po'latova, SamDU, 1-kurs talabasi

Ilmiy rahbar: dots.U.Rashidova

Til sir-u sinoatga limo – lim, benihoya murakkab, mukammal va muhtasham bir xilqatdir. Shu xilqatda turib, uning temir nizomiga mutlaqo muvofiq holda tashqi dunyoni ko'radi, eshitadi va idorok etadi. Bunday yondashuv dastlab tilda xalq ruhi aks etishi haqidagi g'oyaga asos solgan olmon allomasi V. Gumbolddan boshlanganligini, keyinchalik ko'plab yozuvchilarimiz tomonidan rivojlanganligini yaxshi bilamiz. Shuningdek, o'zbek adabiyotida o'ziga xos o'rin tutgan G'afur G'ulom ham tilimiz rivojiga o'zining buyuk hissasini qo'shgan desak mubolag'a bo'lmaydi. Xalqning o'ziga xos sajiyasi, milliy mentaliteti, madaniyati, ma'naviyati, ruhiyati, tafakkuri bo'lganidek yozuvchilarimizning ham o'ziga xos tili, ichki imkoniyatini ochib beradigan o'xshatishlari bor.

“O'xshatish bir belgining ikki buyumda borligini, bu buyumning boshqa o'xshash belgilarga ega ekanligini ko'rsatishga aytiladi. Birinchi narsa yoki hodisaning hamma belgilari biz uchun tanish. Ikkinchi narsa yoki hodisaning faqat ba'zi bir belgilarinigina bilamiz. Biz bunday vaqtda bu ikki narsani bir-biriga o'xshatamiz”.

Demak, aytish mumkinki, insonning dunyoni bilishda o'xshatish – qiyoslash benihoya katta o'rin tutadi. O'xshatishlar eng qadimgi davrlardan boshlab nutq ta'sirchanligini ta'minlaydigan alohida vosita sifatida yozuvchilar diqqat markazida bo'lib kelgan. Badiiy-estetik qimmat, lingvopoetik salmoq nuqtai nazaridan erkin o'xshatishlar G'afur G'ulomning mahoratini namoyon etuvchi vositalardan biri sifatida badiiy nutqida alohida o'rin tutadi.

G'.G'ulom “Yodgor” qissasida badiiy tasvir maqsadiga muvofiq ravishda xilma-xil o'xshatishlar yaratadi, bu o'xshatishlar bilan o'quvchilarni rom etadi, muayyan ruhiy yoki jismoniy holat xususiyat – perdmatlarni o'quvchi ko'z oldida yaqqol gavdalandiradi. Masalan: Baxt yo'llariday oq va keng manglayda marvarid donalariday mayda ter. Bu gapda o'xshatish konstruksiyasi erkin o'xshatish bo'lib, bu qissa qahramoni To'ra tomonida Mehriq nisbatan aytilgan. To'ra Mehriq birinchi marta ko'rganda uning ruhiy holatini favqulotda aniqlik bilan o'xshatgan. Mana bu misollarda ham ana shunday o'ziga xos, erkin o'xshatishlarni ko'rishimiz mumkin: Ashulaning ayrim bandlari havoning issiqligida erib ketganday avjsiz, lazzatsiz. Bu o'xshatishda ashula ayta olmaganligi uchun uning ayrim bandlari issiqda erigan ya'ni yalla kuyini maromiga yetkazib ijro etolmaganligi haqida so'z yuritiladi.

Yoki: Uning ovozi chertilgan jonon kosaday jaranglar edi. Gʻafur Gʻulom bu oʻxshatishda qizning ovozini chiroyli tasvirlash uchun kosa ovozi etalonini ishlatgan. Bunday oʻxshatishlar xalq orasida kam qoʻllaniladi, chunki bunday oʻxshatish faqat yozuvchiga xos boʻlganligi uchun xalq orasida ommalashmagan.

Ikki yil ikkita issiq oʻpichday tez oʻtib ketdi. Toʻra qizil qoʻshinda xizmat qilgan paytlarda ikki yil oʻtib ketgani, yigitlik umri shuncha qisqa qoʻyilganligini adib shunday goʻzal oʻxshatish bilan tasvirlaydi. Leningradga yaqinlashgan sari yuragim kaptarbachchaday tipirchilaydi. Toʻra Leningradga meditsina fakultetiga oʻqishga ketayotgan edi, uning sabri yetmayotganday, yuragi tinmasdan dukkilar edi. Bu yerda Toʻraning ichki hissiyoti tasvirlangan.

Muhabbat quchogʻiday issiq yoz, charoslar baxt chehrasiday xol otgan, qizilurugʻ ishqday shirin. Men dunyo koʻrmagan chapani yigit boʻlganimdan keyin, bu paranji ichidagi hurrkovich quyondek, ota – bobolarcha aytganda , “qogʻozdagi qantdek qiz” boʻlgandan keyin, nima qilishimizni bilmay qoldik. Koʻz oldimda baxtli kelajak porlaganday boʻldi. Haligina toʻlqinlari bilan ovuntirilgan ariqcha ters oqayotganday boʻldi. Umirday mayda toʻlqinlar bilan oqib borayotga ariqcha.

Gʻafur Gʻulom erkin oʻxshatishlar qatori turgʻun oʻxshatishlardan ham keng foydalanadi. Turgʻun oʻxshatishlar mohiyati shundan iboratki, ulara oʻxshatish etalonida ifodalangan obraz barqarorlashgan boʻladi, bunday oʻxshatishlar, garchi muayyan shaxs yoki ijodkor tomonidan qoʻllanilgan boʻlsada, vaqt oʻtishi bilan turgʻunlashgan , umumxalq tili leksikasidan joy oladi. Buday oʻxshatishlar xuddi tildagi tayyor birliklar kabi nutqqa olib kiriladi.

Birinchi Prezidentimiz Islom Karimov haqli ravishda taʼkidlaganiday, “Xalqimiz turmush va tafakkur tarziga nazar tashlaydigan boʻlsak, boshqalarga hech oʻxshamaydigan, ming yillar davomida shakllangan, nafaqat oʻzaro muomala, balki hayotimizning uzviy bir qismi sifatida namoyon boʻladigan bir qator oʻziga xos xususiyatlarni koʻramiz”.

Ana shu xususiyatlar ham oʻzbek tilidagi turgʻun oʻxshatishlarda muayyan tarzda ifodalanadi. Masalan: Gʻafur Gʻulomning “Yodgor” qissasidagi turgʻun oʻxshatishlar oʻziga xos badiiylik kasb etadi. Qiz marmarday bilaklarigacha shimarib qoʻyilgan koʻylak yenglari orasidan kichik shohi roʻmolchasini olib, burun uchlari, duduq ustlariga qoʻngan shabnamday toza terlarni arta boshladi. Bu oʻxshatishda marmarday yaʼni silliq, tarang bilaklarini ifodalash uchun qoʻllangan. Xalq orasida ham bu oʻxshatishdan keng foydalaniladi. Masalan, “qizgʻish marmarday silliq boʻyning”, “Marmarday yaltiroq tepaliklar” jumllarini xalqa ommalashganiga guvoh boʻlamiz.

Xalq orasida “Ilonni yogʻin yalamoq” iborasi keng qoʻllanadi. Bu ibora ayyor, quv insonlarga nisbatan ishlatiladi. Tilimizda ilon oʻz oʻljasining boshkoʻzini aylantirib falaj qilganligi, baʼzi insonlar esa oʻzining gap-soʻzlari orqali insonlarni boshini aylantirgani uchun dono xalqimiz “ilonning yogʻini yalaganday” oʻxshatishini ishlatadi. Ilonning yogʻini yalaganday bildirib, meni avradi, bosh – koʻzimni aylantirdi.

Ko'zlarim kossasidan chib ketguday. Hayratda qolmoq ma'nosini bildiruvchi bu o'xshatish ijodkor tomonidan badiiy va ematsional-eksperissiv bo'yog'ini oshirish uchun xizmat qilgan.

Oppoq momiqday yuzlarida g'ivir- shivir ijirg'anish boshlandi. Bu o'xshatish xalq orasida ko'p ishlatiladi. Masalan, "Momiqday oppoq qo'llar", "Momiqday oppoq bulutlar" kabi. Uyimiz to'ydagiday bolib ketdi. Turmushda har narsaning taroziday ikki pallasi bo'ladi. Tanam po'latdek baquvvat ekan va shu kabi o'xshatishlar xalq orasida ommalashgan turg'un o'xshatishlardir.

Umuman, obrazli milliy tafakkur mahsuli bo'lgan tug'un o'xshatishlar bo'yicha tadqiqot ishlarini olib borgan N. Mahmudov, D. Xudayberganovalar tomonidan yaratilgan "O'zbek tilidagi o'xshatishlarning izohli lug'ati" da jami 530 dan ortiq turg'un o'xshatishlar tahlil qilingan. Guvohi bo'lganimizdek, o'shatishlardan G'. G'ulom samarali foydalana olgan va natijada o'quvchida go'zal nutqqa oshuftalik tuyg'ularini his qildirgan olgan .

Foydalanilgan adabiyotlar:

1.Mahmudov N, D.Xudayberganova. O'zbek tilining o'xshatish-larining izohli lug'ati. –Toshkent, "Ma'naviyat", 2013.

2.G'ulomov G'. Yodgor. – Toshkent, G'afur G'ulom nomidagi adabiyot va san'at nashiryoti, 1983.

XURSHID DO'STMUHAMMADNING "BOZOR"IDA RAMZIYLIK

Maxkamtosheva Marxabo

SamDU 2-kurs talabasi

Ilmiy rahbar: A.Nasirov

90-yillar romanchiligining ma'naviy miqyosi va badiiy salohiyati o'ziga xos poetik strukturaga intiladi. Unda badiiy uslub tushunchasi mohiyati va chegarasi, ijodiy nutqda so'z zalvori, asar ma'nosini, hayot mohiyatini shakllantirish usullari aks etadi. San'at bag'ridan sizib chiqadigan uslubiy o'ziga xoslik (aksar ijodkorlar nazdida uslub tushunchasi harakat dinamizmi) shakliy tasdiq hamda mazmun yurishlarini boshqaradi. Shu ma'noda, yangicha izlanishlarda shartli-nisbiy mavqye ifodasini namoyon etish tarziga aylanadi.

Ulkan badiiy salohiyatni ilmiy tahlil etish, uning mohiyatini kitobxonga yetkazishda ijtimoiy fanlarning, xususan, adabiy-nazariy tadqiqotlarning kamligi va nomukammalligi masalani bar qadar murakkablashtirib yuboradi. Shulardan kelib chiqqan holda aytish mumkinki, garchand, bu borada konseptual qarashlarning butun qamrovga ega tarixiy shakllanish tajribalari mavjud bo'lsa-da, badiiy tizim bir tomondan o'rganilmoqda. Ishda muammoni Bu mulohazalarning barchasi poyetologik kategoriyalarning to'liq ishlanmaganligini dalillaydi. Ayni paytda, mazkur nazariy bo'shliqlar poyetik matnni to'la idrok yetishni cheklab qo'yadi. Fandagi shunday muammolardan biri – uslub muammosining poetik tizimda namoyon bo'lish tarzini ochib berish hamda umumlashtirish masalasidir.

X.Do'stmuhammad "Bozor" romanida yangi iqtisodiy tizimga o'tish davrida inson dunyoqarashida namoyon keskin evrilishlarni tadqiq etadi. Qahramon shaxsiyati, davr ruhiyati hamda ma'naviy-axloqiy mezon chorrahasida

kesishadigan badiiy talqinda jamiyat a'zolari ongida sodir bo'layotgan yangilanishlar mohiyati, tushuncha-tasavvur-ye'tiqodda kuzatilayotgan «sinishlar» butun murakkabligi bilan qamrab olinadi. Asarda taqdirlararo o'ziga xoslik va umumkayfiyat muvozanati tasviri Qosimbek, Fozilbek, Qadriya, Solih Qori, Yegam Bobo, G'ulomjon kabi personajlar xarakterida maromiga yetadi. Katta umuminsoniy masalalar (ma'naviy tanazzul, milliy o'zlikni anglash, iqtisodiy taqchillik) tahlili roman takomili badiiy mundarijasini tayin etadi. Bu kabi holatlar keltirilgan parchada ham yaqqol ko'zga tashlanadi:

“Fozilbek izdihom orasida turtinib-surtinib borayotganiga qaramay qulog'iga chalinayotgan vahimali va bir-biridan sovuq Mish-mishlarga diqqat qildi. «Bitta-yarimta diyonatli inson topilishiga topiladi-ya!..» - Fozilbek qulog'iga qadalgan ushbu jumlaning mahkam «tutib» oldi: “Bitta-yarimta diyonatli inson... topilishiga topiladi-ya!” Atrofida esa tumonat, tanga sochsang, yerga tushmaydi. Shuncha olomon orasida birortasi adashib-netib ketishi hyech gap emasmi?.. Osmondan ellik-oltmish Fozilbek tushib, qo'shilib ketsa-chi?.. undayam farqi yo'qmi?.. Shu yerda yurgan, qayoqlargadir oshiqayotgan ne-ne orzu-xayollarda turtinib-surtinib borayotgan odamlarning bor yo'qligi bozor uchun bilinmaydimi? - Odam yo'qolibdi!.. -O'lmasa topilar” [1, 47-bet]

Yozuvchi ana shu o'rinlarda qahramon botiniga nazar tashlaydi, hamda ko'ngil va ruhda mavjlanadigan ziddiyatlarga suvratiga chizgilar beradi. Aksar holatlarda adib, dastavval, ijtimoiy vaziyatni tipiklashtiradi va uning silsilalarida badiiy xarakter shakllanish va namoyon bo'lish tarzini mantiqan asoslay boradi. Shu kabi oddiy mulohazaning o'zidayoq falsafiy umumlashmalar yaratishga moyil yozuvchi inson irodasiga ishonch va milliy ma'naviyat ifodasiga e'tiqod hissini birlashtirib yuboradi.

Muallif “Bozor” romanida g'oyaviy tayanch markaziga birdaniga o'tmaydi. Asta-sekinlik bilan kitobxonni psixologik vaziyatga tayyorlaydi. Chunki har bir tafsilot avvalo, insonni tushunish va tushuntirishga qaratilgan bo'ladi. Bular yozuvchi qo'lliyotgan priyomga bog'liq ravishda yuzaga chiqadi. Adib davr ruhiyati tasvirini Fozilbek va Baxtish muloqoti vositasida ochib beradi. Inson mohiyati, hayot o'lchovi va yashashdan kuzatiladigan maqsad to'g'risida falsafiy mushohada yuritgan adib yangilanayotgan tafakkur va ijtimoiy sharoit taqozosini mohirlik bilan uyg'unlashtiradi hamda diqqat e'tiborni bozor va undagi mashmashalarni oilaga ta'siri doirasida tasvirlashga urinadi: “Fozilbek mahmadona do'sti boshlagan mavzuga astoydil qiziqishini namoyish qilib qo'ymoqchidek bosiqlik bilan tilga kirdi: - Gunohkorlik tuyg'usi odam tug'ilgan lahzadayoq insonga ilashar ekan. - Har kimga ham yemas!... -Mayli-da! Lekin hali tug'ilib ulgurmagan, to'g'rirog'i, onasining qornida yotgan homilalik paytlaridayoq odamda o'z jonini saqlash ilinji, ehtiyoji shakllanib ulgurgan ekan! Va jonzod borki, joni chiqib ketgunga qadar, e-eng so'ngi soniyaga qadar jon qayg'usida nafas oladi va jonini saqlash ilinjida hyech qanday yovuzlikdan ham razillikdan ham qaytmaydi” [1,85-bet].

Har bir ijodkor badiiy izlanishlarda “...goh modernizm unsurlaridan, goh realistik tasvir prinsiplaridan, goh romantik bo'yoqlardan foydalangan tarzda” [2, 3-bet] davr ruhiyati milliy shamoyilini berishga intiladi. Qosimbek hamda uning

o'g'illari – Diyorbek, Fozilbek fe'l-atvoriaro ziddiyatlarni badiiy tadqiq sahniga ko'targan adib fan-texnika asri tadriji va uning oqibatlarini tahlilga tortadi. Yozuvchi muhokamasida zamon ruhiyati qahramon g'oyaviy chiziqlarini harakatga keltiradigan hamda tartibga soladigan tizimni tasniflaydi. Romanda bozor timsoli qorishiq mohiyatni izohlab, mustaqil komponentlar estetik uzluksizligini ta'min eta boradi:

“Fozilbekning nazarida yonida oppoq libosga o'ralgan, har narsadan xabardor farishta borayotgandek tuyuldi. U bilan istagan mavzuda suhbatlashish mumkin...”

- O'zingiz aytgan rivoyatdagi... bo'rilar otlarni quvib yetish fursati kelmadimi, ishqilib?

Qadriya jiddiy edi.

- Rivoyat emas. Dunyoning barham topishidan darak beruvchi belgi, ishora u. Bu dunyoda belgisiz hech bir narsa yo'q” [1,187-bet].

“Bozor” romani komponentlari uchun xos xususiyatlardan biri olamni idrok etish miqyoslari darajalanishida namoyon bo'ladi. Mustaqil ijodiy sharhlarning adabiy turkumdagi yaxlitligi ifoda konstruksiyasini yagona estetik markazga yig'adi. Unda juzv va butunlik nisbati, mushohada va tarix ziddiyati, shakl va takomil uyg'unligi iste'foda topadi. Ma'lum bo'ladiki, adib g'oyaviy ibtidoda haqqoniylikka erishish jarayonida erkin va rasional tahlil imkoniyatlaridan unumli foydalanadi. Muallif inson idrokini har xil aqida hamda turg'unlikdan tozalashga urinarkan, rivoyat vositasida tasvir mohiyatida inqilob yasaydi. Jumladan, “Bozor” epik maydonida kiritma birinchidan, aqidalararo-tasavvuraro mushohada barqarorligi, ikkinchidan, ibtidoiy-ilohiy-dunyoviy falsafa tadriji, uchinchidan, inson ma'naviy xarakteriga erishish istagini butunlashtiradi:

“Odam ato... uni tufroqdin yaratib, Bo'li!” dedi. Shul zamon ul jonli odamga aylandi... Fozilbekda ne gunoh?!. Oradan ikki yuz yil o'tdi, Odam ikki yuz yil yig'ladi... “Ikki yuz yil emish, - miyig'ida kuldi Fozilbek, - hozirgacha yig'laydiyu!.. Yig'lamagan jon bormi?.. Turqi sovuq timsoh ham yig'laydi... Odam ham yig'lab o'tadi dunyodan, qiyomatgacha yig'laydi, bir kun Kulish ilnjida haftalb, oylab yig'laydi»... Xullas, Odam Hovvaning diydoriga yetishish orzusida ikki yuz yil yig'ladi, yig'lay-yig'lay diydoriga yetdi, Hovva undin yuklig' bo'ldi, so'ng... so'ngra Odamning urug'i qirq ming bandaga yetdi. Yetdiyu, ketgancha-ketdi: tug'ilaverdi, tug'ilaverdi. «Hoy, esingni yig'!» deydigan aqli to'kis topilmadi-izn qo'ldan chiqdi. Izn ixtiyordan ketgach... mana, oqibati!.. Bu ulug' va adoqsiz qismat zanjirining bir halqasi vazifasini o'tash Fozilbekning ham manglayiga bitilgan ekan, oat omonatidan ona qarorg'ohiga ko'chdiyu, vujudga aylandi, vujud shakl-shamoyili tugal inson qiyofasiga yetgach esa, keldi” [1, 48-49-betlar].

Bu yerdagi matnda adib Fozilbekning dunyoga kelish sababini to'liq tushuntirmaydi. Balki har bir tafsilotni o'quvchi o'zi tushunib olishiga solib qo'yadi. Mantiq shunday tartibda jilvalanadi. Shu sababli ham yozuvchi talqiniga ko'ra bozorga rahbarlikning qiyinligi undagi dahshatli illatlar bilan belgilanadi. Unday illatlardan biri sifatida asarda sotuvchi-yu xaridorlarning turli-tuman amaldorlar, tashkilotlar va shubhali «soqchi»lar tomonidan talanishi manzarasi

chiziladi. Manzaraning ta'sirchan chiqishiga yozuvchi romanga o'zining «Jajman» hikoyasi mazmunini ustalik bilan singdirish, ya'ni «tog'ni» yutvorsayam to'ymaydigan» nojins mahluq timsolini yaratish orqali erishadi. Muallif falsafasidan ayon bo'lishicha, bunday nojins jonzotlardan qutulmoq uchun «bozorga asl odamlar kerak». Shu tariqa yozuvchi o'zining maqsadlaridan biri hozirgi zamon bozorida harakat qiladigan inson qiyofasini chizish ekanligini ayon etadi va asari markaziga Fozilbekdek qahramon timsolini qo'yadi. Uning qiyofasini tasvirlashda muallif realistik tasvir yo'llaridan ancha chekinib, romantik bo'yoqlarga keng o'rin beradi. To'g'ri, Fozilbek hozirgi bozorchilarga xos xususiyatlardan butunlay mahrum emas. Jumladan, o'sha odamlar kabi «Fozilbek bozordan beri kelmaydi, olomon oqimiga qo'shildi deguncha joni orom oladi. Demak, u ham oladi! U o'zining hamma qatori oluvchi ekanidan tonmaydi, faqat miyig'ida kulib, aybdor odamdek o'ng'aysizlanib, «har kim didi-farosatiga yarasha oladi» deb falsafa so'qiydi».

Ko'pchilik bozorchilarga xos tomonlari bo'lsa-da, Fozilbek ulardan keskin farqlanib turuvchi fazilatlarga, favqulodda belgilarga egadir ham. Xuddi shu fazilatlari Fozilbekni ko'proq yozuvchi xayolidagi, idealidagi qahramon sifatida tasavvur qilishga yo'l ochadi. Muallif hozirgi bozorlarimizda har qadamda uchraydigan odam qiyofasini chizishdan ko'ra o'z xayollarida, orzularida, yuksak mukammallik to'g'risidagi tasavvurlarida yaratilgan haqiqiy tadbirkor inson siymosini gavdalantirishga harakat qilgan. Fozilbek aksariyat bozorchilardan o'ta halolligi, fidoyiligi, qalbi beg'ubor tuyg'ularga to'qligi va kitobga bo'lgan cheksiz muhabbati bilan ajralib turadi.

Adabiyotshunos olim H.Karimov to'g'ri ta'kidlaganidek: «To'g'ri, hayotiy voqyelik faqat yozuvchi uchungina o'rganish, yaratish manbai emas, u olim, san'atkor, rassom uchun ham bilish va ijod manbaidir» [3,7-bet]. Ana shu ko'chirmada anglashiladiki, yozuvchi hayotni o'rganadi. Minglab inson xarakterini yurak qo'ridan, qalb ichki kechinmalaridan o'tkazadi, eng ma'qul kelgan jihatlarini bitta, birgina inson tiynatiga, uning borlig'iga muhrlaydi. Shu jihati adibdan mahorat talab etadi, mahorat esa yozuvchining hayot voqyeligini qay tariqa o'zlashtirganligi bilan bevosita bog'liq, zahmattalab, murakkab jarayondir. Adib ushbu jarayonda tanlagan obraz ruhiyatini sinchkovlik bilan chizishga urinar ekan, jumladan Fozilbekning ikki o't aro arosat hayotini bozor ichki g'alayonlariga umumlashtirib yuboradi.

Bozor odamlariyu manzaralari, muammolariyu ziddiyatlari tasviriga qanchalik o'rin berilmasin, ularning har tomonlama ko'lamli, to'laqonli timsolini yaratish romannavisning asosiy maqsadi hisoblanmaydi. Bozor va uning odamlari yozuvchiga inson hayoti muammolarini badiiy tahlildan o'tkazish uchun bir vosita bo'lib xizmat qiladi. Hatto yuqorida tilga olingan nojins jondor ham to'g'ridan-to'g'ri bozorning doimiy bir unsuridek tuyulsa-da, Fozilbek aytganidek, «odamlar... badanidagi illatlardan vujudga kelgan» mahluq sifatida ko'rsatiladi.

Bozor inson hayoti muammolarini ko'tarish uchun nihoyatda qulay vosita sifatida tanlanishi yozuvchi hohishi ilangina emas, balki ko'proq turmush taqazosiga ko'ra ro'y bergandek tuyuladi, chunki hozir roman qahramonlaridan

Diyorbek aytganidek, «odamlarning ko'ngli, o'y-xayoli, maslak-maqsadigacha bozorxonga aylanib ketadi».

Shunga ko'ra Fozilbek juda to'g'ri ta'kidlaganidek, «bozor – odamlarning asl basharasini kunday ravshan ko'rish mumkin bo'lgan eng qulay joy» hisoblanadi. Shu tariqa muallif bozordan inson hayoti muammolarini, ofatlarini kunday ravshan ko'rsatuvchi ko'zgu sifatida foydalanishga urinadi. Inson hayoti muammolarini badiiy talqin etishda muallif «Orom kursi» qissasida ancha yaxshi samaralar bergan yo'ldan, ya'ni modernistik tasvir unsurlariga kengroq erk berish tamoyili zididan boradi. Romanda unumli qo'llangan modernistik tasvir unsurlari qatoriga ramzlardan nihoyatda keng foydalanish va ular zimmasiga cheksiz teran ma'no yuklash, kutilmagan voqyealarga alohida e'tibor qaratish va ularni qayta-qayta tilga olish yo'li bilan ayrim masalalarning muhimligini ta'kidlab borish, psixologik tahlilda o'ta qisqalikka intilish va realizmga xos mufassallikdan qochish kabi usullar kiradi.

Foydalanilgan adabiyotlar:

- 1.Дўстмуҳаммад Х. Бозор. Роман. – Т., 1998.
- 2.Содиқ С. Ҳаққонийлик кучи // Ўзбекистон адабиёти ва санъати, 2000. 8-декабрь.
- 3.Каримов Ҳ. Адабиёт назариясининг илмий асослари. –Т.: “Янги нашр” нашриёти, 2010.

U. HAMDAM “OTA” ROMANIDA MILLIY KOLORIT

Ubaydullayeva Marjona,

SamDU talabasi,

Ilmiy rahbar: dot.A.Toshpo'latov

O'zbekistonning taniqli romannavisi, shoiri bo'lmish Ulug'bek Hamdamning mashhur “Ota” romani 2018-2019-yillar oralig'ida yozilgan. Ushbu roman barcha otalarga bag'ishlanadi. O'tkir Hoshimovning "Dunyoning ishlari" qissasida o'zbek onalari haqiqiy timsol darajasiga ko'tarilgan bo'lsa, Ulug'bek Hamdamning "Ota" romanida o'zbek otalarining chinakam umumlashma timsoli aks etgan. Darhaqiqat, bugungacha milliy adabiyotimizdagi biror asarda ota obrazi alohida namoyon bo'lmagan edi. U.Hamdamning "Ota" romanida ham asar qahramonlarining ruhiyatida milliylikni, milliy koloritni ko'rishimiz mumkin. Xususan, ushbu romandagi voqealar muallif tomonidan hikoya qilib beriladi. Romanda Oychechak opa, O'tkir aka, Po'lat, Yog'du, Erboy, Nikita kabi ikkinchi jahon urushini ko'rgan, unda ishtirok etgan achchiq taqdir egalari hamda Po'lat ota va Erboy ota o'rtasidagi adovat tufayli yuzining bir tarafi kuyib, ne azoblarni boshidan kechirgan Sevinchning ayanchli hayoti qalamga olinadi. Roman qahramonlari orasida Oychechak opaning ruhiyatida milliylik, umumbashariylik ustunlik qiladi. Birdan bir ishongan farzandi Po'latning befarzandligi uni shifokorlardan umid bo'lmagach, to folbin-domlolarigacha borishicha sababchi bo'ladi. Xususan, romanning boshlanma qismida shunday tasvir bor: "Belida churrasi bor emasmi, unday o'tirsa "o'poq" bo'ldi, bunday o'tirsa "so'poq". Soat emas, daqiqa sanab, bo'lari bo'lib, so'lari so'lib, ammo umid bilan axiyri Toshkentga yetib oldi opa. Endi birgina istagi shulkim,"isonafas" domulloning sehrli damidan belidagi

belangisi ketib, o'g'il-kelini murodiga yetib – peshonalariga farzand bitib, hammalari bir bo'lib, Yaratganga shukrona aytib, tuqqan yurtiga ravona bo'lishsa, bas..."Oychechak opa barcha dardlariga malham sifatida "isonafas" Toshdomla deb bilardi. Chunki boshqa umid qolmagan edi. Ushbu tasvirda Oychechak opaning milliy odatlarimizga qarshiligi aks etgan: "Yo'q! Tilab olgan nevaramni to'yini buzishga hech kimning haddi sig'maydi!" deya to'polon ko'tardi.

- Xotin, esingni yig'! Mahallada o'lim! Ertaga nima degan odam bo'lamiz? – deya ovozi imkon qadar pastlatib gapirishga urindi O'tkir aka.

- O'lsin o'lmay! – deya tutaqdi Oychechak opa. O'lishga topgan vaqtini qarang bularni!..."Ushbu tasvirda Oychechak opa nevarasini 15 yil kutganligi, mahallada o'lim bo'la turib, karnay-surnaylarning ovozi pasaytirishni xohlamay, to'yni to'xtatgisi kelmasdi. Milliy odatlarimizga ko'ra, mahallada o'lim bo'lsa, bir tarafda xursandchilik, to'y-hashamlar ham bo'lsa, to'ylar to'xtatiladi. Oychechak opa yakka-yu yolg'iz, arzanda o'g'lining farzandini 15 yil kutdi, 15 yil deganda ularning uyida ham chaqaloq yig'isi eshitildi, ularning oilasida tug'ilgan farzand bu shunchaki farzand emas, balki hayot-mamot masalasi, ular naslining davomchisi, ulardan keyin chirog'ini yoqib qolguvchi merosxo'r edi. Shuning uchun ham to'yni to'xtatgisi kelmadi, milliy odatlarimizga qarshi bordi. Romanda keltirilgan ushbu tasvirda esa Oychechak opaning nevarasi — Sevinch salomatligini o'ylab: "Hamma shu yerda edi-yu chaqaloqni ko'rsa, onasi Yog'du, otasi Po'lat ko'rar, qolganlarni bu zavq chetlab o'tar, Oychechak opa hatto eri O'tkir akani ham Sevinchginaning yoniga yo'latmasdi. Nima emish, chillasi chiqmagan bolaga nomahramning nigohi tushib, nafasi tegmasligi kerakligi to'g'risida muqaddas kitoblarda bitilganmish...", –hech kimni Sevinchni yoniga kiritmaydi. Oychechak opa ham O'zbek oyim kabi ish tutadi. Ularning ruhiyatida milliylik ustuvor. Roman qahramonlaridan biri — O'tkir akaning ruhiyatida milliylik nevarasiga ism qo'yishda ko'rinib turadi: "Shundog'am bir tomonimiz arabi-yu boshqa tomonimiz forsiy otlarga to'lib ketgan. Hatto ular juda-juda ko'p. O'rtada muvozanatni saqlash uchun, otlarimiz aytilganda, qaysi millatga tegishli ekanimiz bilinib tursin. Yo'q, men boshqa millatlar ismlarini qo'yishga qarshi emasman, Faqat me'yor bo'lsin, chek-u chegara bo'lsin, deyman. Oilalar bor, otlarini so'rasang, nuqul arabcha, oilalar bor, nuqul forsha. O'zlari turkiy bo'lgani, qonlarida turkiylarning qonlari jo'shib oqib turgani holda nega bunday ot qo'yishadi, sira tushunmayman..."O'tkir akaning gaplarida ham jon bor. Hozirgi kunda shunday ismlar qo'yilyaptiki, bolalarning o'zlari o'z ismlarini xohlashmay, boshqa ism qo'yib olmoqdalar. Mashhur kino aktrisa yoki aktyorning ismlarini o'z farzandlariga qo'yishmoqdalar. Ism qo'yish to'g'risida Hadisi shariflarda shunday deyilgan: "Qiyomat kuni har bir inson o'z ismi bilan chaqiriladi.

عن أبي الدرداء قال رسول الله صلى الله عليه وسلم: إنكم تدعون يوم القيامة بأسماءكم وأسماء آبائكم فأحسنوا أسماءكم

Abu Dardodan rivoyat qilinadi: Rasululloh (sollallohu alayhi va sallam) aytdilar: "Batahqiq, qiyomat kuni sizlar o'z ismlaringiz va otalaringiz ismlari bilan chaqirilasizlar. Bas, (shundoq ekan) ismlaringizni go'zallashtiring!"

Bola tug'ilganida ko'pincha ota-onalar unga qanday ism qo'yishga o'ylanib qolishadi. Lekin ko'p bosh qotirmay, ma'nosi g'aliz, tumtaroq ismlarni qo'yib yuborishadi. Shu qo'yiladigan ism bola bilan nafaqat foniy dunyoda, balki qiyomatda, jannat yo do'zaxda ham birga bo'ladi. Shu jumladan, O'tkir aka ham nevarasiga Sevinch deb ism qo'yadi. Shu vaqtgacha bo'lgan voqelarni unutib, sevinaylik, xursand bo'laylik, baxtli yashaylik degan maqsadda shunday ism qo'yishadi. Romanning asosiy qahramonlaridan biri Po'latning ruhiy olamida milliylik, milliy kolorit masalasi konflikt holda nomoyon bo'ladi. Po'lat onasi-Oychechak opaning " ishlari"ga, turli xil "kuf-suf"larga tobi yo'q, azayimxon, tabib, domlalarga esa ishonmaydi. Oychechak opa "folga ishonma, folsiz yurma" qabilidagi ayollardan, – Po'lat esa onasining teskarisi. Po'lat ham otasi singari har bir masalaga milliy an'analardan turib yondashadigan, milliy o'zlikka uyg'un tarzda hal qilishga intilardi. Shunday bo'ladi ham. Po'lat ota o'z qizini, 15 yil tirnoqqa zor bo'lib, 15 yil kutgan jigargo'shasini hech nimani surishtirmay, do'sti–Erboy otaning:"Asakani tug'ruqxonasida birovdan nikohsiz bola tug'ib yotibdi",– degan gapi bilan uni o'ldiradi. Musulmon olamida nikohsiz tug'ilgan bolalar harom sanaladi. Shu o'rinda, Po'lat ota ruhiyatida, uning ichki olamida shunday gaplar aylanadi: "Nega bunday qilding, Sevinch, nega? Senga shunday tarbiya bergan edimmi? Kim o'rgatdi senga bunday yo'l tutishni? Otani aldashni-chi?..Hech zamonda musulmon qiz haromdan bola tug'adimi? Uni bolam deb qaysi yuz bilan bag'ringga bosasan? Odamlarni ko'ziga qanday qaraysan? Meni ko'zimga-chi? Ajdod-avlodimiz oldida nima degan odam bo'ldik endi? Hech o'yladingmi shuni?.. Sevinch!.. Sevinch!.. Sen hammasiga nuqta qo'yding, nuqta! Axir, dardni bir o'zing chekdingmi? Biz ham yoningda edik-ku!.. Tortgan azoblarimiz sen tufayli suvlarga oqdi endi! Ha, oqdi! Hech narsa qolmadi, hech narsa! Faqat bitta ish qoldi: ota qiladigan ish, men qiladigan ish!... "Ushbu Po'lat ota monologida milliylik, milliy kolorit aks etgan. O'zbek xalqi musulmon xalq bo'lganligi bois, Po'lat ota ham musulmon urf-odatlarini o'z o'rniga qo'yib ado etardi. Shu uchun ham nikohsiz, yakka-yu yagona, arzanda qizidan tug'ilgan nevarasini qabul qilolmadi. Hayotda 3 xil toifali insonlar bo'ladi. Po'lat otaga ham qilgan ishidan so'ng, ularning gap-so'zlariga duch keladi. Po'lat otaning bu ishini birinchi toifadagilar to'g'ri der, ikkinchi toifadagilar "o'z qizining qotili" deb qo'llarini bigiz qilib ko'rsatishar, uchinchi toifaga kiruvchilar esa chetdan shunchaki tomoshabin bo'lib kuzatib turishi tabiiy. Romanda yana shunday tasvir borki, faqat va faqat otalar uchun aytilganday: "Axir men otaman, ota! Bu dunyo otalar qo'lida edi-ku yoki men tufayli chiqib ketdimi? Yo'q, yo'q bunga yo'l qo'yib bo'lmaydi. Aslo kerak paytda otalar qattiq turmas ekan, dunyo ham o'z o'rnida turmaydi: buziladi-ketadi. Mana, men seni ko'p yaxshi ko'rib yubordim. Yuzing kuyik,yuraging kuymasin dedim, erkaladim, papaladim. "O'zbek xalqi mehmondo'st, bolalarini ham sizlab gapiradigan, bolajon yurt. Po'lat ota ham 15 yil kutgan farzandini juda yaxshi ko'rardi, hech kimga ishonmasdi. Po'lat ota mehribon, jonkuyar otalardan edi. U qizini hech kimdan kam qilmay o'stirdi, kiymay-kiydirdi, yemay-yedirdi, loqaydlik tufayli uning yuzi badbashara bo'lib qoldi. Milliy odatlarimizga ko'ra, qiz bolaning bo'yi yetganidan keyin unga sovchilar kelishi kerak. Lekin Po'lat otaning uyiga hech kim kelmasdi. Po'lat ota

va Yogʻduning ruhiyatida "endi nima qilamiz, biz nimalarni orzu qilmagan edik, nevaralarimiz boʻlsa, ularni oʻynatib yurar edik qarilik gashtini surib" degan oʻy aylanardi. Roman qahramonlarining ruhiy olamida milliylik, milliy kolorit namoyon boʻlgan. Ayniqsa, Poʻlat ota ruhiyatida oʻzbek milliy otasining ruhiyati aks etgan.

BOSHLANGʻICH SINIF DARSLIKLARIDAGI MATNLARGA MUSTAQIL YONDOSHUV

**Gʻayratova Zulfizar,
Termiz DPI 2-kurs magistri**

Oʻzbekiston Respublikasini yanada rivojlantirish boʻyicha Harakatlar strategiyasida "Uzluksiz taʼlim tizimini yanada takomillashtirish, sifatli taʼlim xizmatlari imkoniyatlarini oshirish, yosh avlodning ijodiy va intellektual salohiyatini qoʻllab-quvvatlash va roʻyobga chiqarish"i kabi ustuvor vazifalar belgilanib, bu borada boshlangʻich sinf oʻquvchilarining intellektual qobiliyatlarini rivojlantirish amaliyotini tahlil qilish imkoniyatini kengaytiradi. "Mantiqiy fikrlash mezonlarini aniqlashtirish, oʻquvchilarning intellektual rivojlanishlari va oʻz qobiliyatlari va moyilliklariga muvofiq malakalarni egallash boʻyicha tavsiyalar ishlab chiqish muhim ahamiyat kasb etadi" [1,44-bet].

Darhaqiqat, boshlangʻich sinf oʻquvchilariga saboq berish nihoyatda katta masʼuliyat bilan birgalikda, yuksak bilm va saviyani ham talab etadi. Shuning uchun bu jarayonga kirib kelgan yosh oʻqituvchining tayyorgarlik holatini jiddiy tekshirish, qator sinovlardan oʻtkazish natijasida ishga qabul qilsa, maʼqul ish boʻlar edi. Chunki boshlangʻich sinflarda olgan bilm va koʻnikmalar yoshlarning tafakkur qilishga, mustaqil matn ustida ishlash imkoniyatini beradi. Bolalarning mustaqil mashqlarni bajarishi, ularni shu tushunchalar asosida koʻnikmasini shakllantirish, bu katta mahoratni, ijodkorlikni, salohiyatni ham talab etishi, tabiiy holder.

Glaballashuv jarayonida dunyo olimlari intellekt tuzilishini tadqiq qilishga intilmoqdaki, bu izlanishlarda, olib borilayotgan tadqiqotlarda, tajribalarda oʻz ifodasini topib kelmoqda. Amerikalik psixolog F.Fridman intellektning turli xususiyatlari haqida soʻz yuritir ekan, ularning eng xarakterli jihatlariga nazar soladi va uning oltita tarkibdan iborat qarashlarni ilgari surganligini kuzatish mumkin:

- 1) sonli operatsiyalarga nisbatan qobiliyatlilik;
- 2) lugʻat boyligi;
- 3) geometrik shakllar orasidagi oʻxshashlik va farqlarni ajrata olish uquvi;
- 4) nutq tezligi yoki surʼati (aniq va ravshan javob berish, muloqot qilish);
- 5) fikrlashga qobiliyatlilik (yakdil tafakkur qilish va hukm chiqarish);
- 6) xotira (tafakkur qilish, mustaqil fikrlash, xulosalar chiqarishga intilish)

[2,48-bet].

Darhaqiqat, boshlangʻich sinif oʻquvchilarini barkamollik sari eltuvchi bitta harakat mavjud boʻlib, bu ham mustaqil tafakkur qilishga harat qilishi bilan bogʻliq. Oʻquvchi yoshlarni sanash qobiliyati, ranglarni ajratish holatining tezligi,

birdan hokum chiqarish, qarorlar qabul qilish jarayonlariga jiddiy nazar tashlash kerak. Shu ma'noda o'quvchi yoshlarni jiddiy va teran xulosa chiqarish qobiliyatini asta-sekinlik bilan bo'lsada, shakllantirib boorish kerak bo'ladi. Bularning negizida o'qituvchining bilimi solohiyati, keskin hokum chiqarishi, uning pedagogic mahorati mujassamlashgan bo'ladi.

Masalan: 2-sinflarning "Kitobim - oftobim" nomli sinfdan tashqari o'qish kitobidan olinga qiyidagi matnga, yani "kim baxtiyor?" nomli she'riga nazar tashlaylik:

O'tirib goh Mirjalol,
O'zicha surar xayol:
"Bobomlarga maza

xo'p"

Uxlaydilar rosa ko'p.
Xunob bo'lib erta-kech,
Misol echmaydilar hech.

Yoki, shu she'ring davomini o'qishni taklif qilib, har bir bandini bitta o'quvchiga o'qitish, undan kerakli saboqlar chiqarish zaruratini ham anglatadi:

Avtobusga chiqqan chog',
Joy tayyor, dimog'i chog'
Hamma beradi salom,
Doim hurmatda bobom [3,27-bet].

Bu misralardan kelib chiqadigan bir qator savopllarni bolalar, ya'ni o'quvchilar hukmiga tashlash va ularni mustaqil bajarishni nazorat qilish lozim. Eng avvola matnni ifodali qilib uch yoki to'rt o'quvchiga o'qitish kerak, shundan keyin matn ustida savollar tuzdirish kerak, bu jarayondagi faol o'quvchilarni alohida rag'batlantirish kerak, chunki o'quvchining ruhi ko'tariladi, boshqalar ham shu kabi o'qisam, javob bersam degan fikrni xayolan jonlantiradi. Bu esa o'quvchining fikrlashga, mustaqil xulosalar chiqarishga imkon beradi.

1-jadval.

Muammolarning qo'yilishi	Javoblar
1.Matnni ifodali o'qish (3 ta o'quvchi tomonidan bajarilishini ta'minlash).	3 ta o'quvchi ifodali o'qidi
2.Misralarda shaxsni nomini ifodalovchi so'z qaysi?	Mirjalol
3. Bolalarga xos xislatlarni qaysi so'zlar ifodalab kelgan?	Uxlaydi, xunob, ko'p, misol
4.She'riy misrada nechta so'z mavjud?	19 ta
5.Bu misralar tarkibida nechta tinish belgisi mavjud?	6 ta
6. Texnika nomini ifodalovchi so'z qaysi?	avtobus

Bu tushunchalar bilan tafakkur qilgan o'quvchi, o'zining mustaqil fikrlarida asoslar mavjudligini his etadi, bu esa uning yana-da yaxshiroq fikrlashga undaydi. O'qituvchining asosiy vazifasi o'quvchilarning tafakkur qilish jarayonini

juda tez va adolatli tarzda tahlil qilib boorish lozim. Har bir fikr bildiruvchi shaxsning xarakter xususiyatini anglashga intilish jarayonlariga jiddiy e'tibor qaratish lozimligini unitmaslik kerak. O'quvchining mustaqil fikrlashi zahirida adolatli xulosa chiqarish tushunchasi ham mavjud bo'ladiki, bu esa ular o'rtasidagi farqni aniqlash imkonini beradi.

2-jadval.

Topishmoqlar	Javoblar
1.Yo'ldan adashib Tolib, Rosa qolibdi horib. Harita va plan ham, Kompas, gnomonlar ham, Qolgan edi yo'qolib, Ne qilsin endi Tolib?	Daraxtlarga qarab aniqlash
2.Unga o'simliklar yuzini burar, Qumursqalar inin og'zin qurar, Avstraliya" - so'zi unga taqalar, Bu tomonning nomi qanday atalar?	Janub
3.To'rt tomoning aniqlab berar, Darajada joylar aks etar. Osmondami, suvda, o'rmonda, sayohating chog' asqotar?	Kompas

Shuning uchun mustaqil matn ustida ishlashga undash, bola psixologiyasining turfa xil jihatlarini ochishga, tafakkur qilishga keng imkon beradi. Qayd qilingan tushunchalardan kelib chiqqan holda, o'quvchilarning qarashlarini yanada kengaytirish, ularni zerikishlarini oldini olish maqsadida, quyidagi topishmoqqa diqqatini qaratish kerak bo'ladi. Yuqorida biz qayd qilgan, bolalarning psixologiyasi va xarakter qirralarini aniqlashdan tashqari, ularning mustaqil fikrlash imkoniyatining kengligi ham, bu tushunchalarni asoslaydi. Har qanday qarashlar, tahlillarning zahirida tafakkur qilish yoki fikrlash, mustaqil xulosa chiqarish tushunchasi mavjud ekan, unadan bolalarning qarashlarini shakllanishiga keng imkon berishini unitmaslik lozim.

Matn ustida ishlash jarayoni o'quvchining tafakkur qilishga undash bilan birgalikda, ularning o'rtasidagi qarashlarni, tushunchalarni shakllanishiga ham imkon beradi. Shuning uchun har bir o'quvchi bilan guruh ichida individual yoki jamoaviy, yan'ni kichik guruhlar o'rtasida musabobalar tashkil etish, guruh sardorini tanlash, uning vazifalarini zudlik bilan tushuntirish, har bir xatti-harakatning o'ziga xosligini anglab borishini alohida qayd etish zarur bo'ladi. Maktab yoshidagi boshlang'ich sinf o'quvchilari turli xususiyatga ega bo'lishi mumkin, chunki ba'zilar maktabgacha ta'lim muassasasiga borgan bo'lishi, ba'zilar esa, umuman bu maskanni ko'rmagan bo'lishi tabiiy. Shuning uchun matn ustida ishlash jarayonini samaradorligini ta'minlash maqsadida, o'quvchilar bilan individual shug'ullanishga imkon topish, har bir o'quvchini fikrlashga undash maqsadga muvofiqdir.

Sinfidagi didaktik o'yin-bu kichik yoshdagi o'quvchilarning intellektual qobiliyatlarini rivojlantirish uchun juda muhimdir bo'lgan vositalardan biridir. Umumta'lim o'quvchilari o'rtasida tashkillashtirishi lozim bo'lgan o'yinning ahamiyati shundan iboratki, uni nafaqat darsda, balki darsdan tashqari

mashg'ulotlarda ham qo'llash mumkin "Matematik bo'sh vaqt soati", "Mutaxassislar jangi", "Aqlli va zukko qizlar" kabi to'garak mashg'ulotlari paytida ham unumli foydalanish mumkin [4,35-bet].

Qayd qilingan tushunchalarga asoslangan holda, didaktik o'yinlar rivojlanayotgan, kognitiv bolalarda fikrlash, xotira, e'tibor, ijodiy tasavvurni, tahlil qilish va sintez qilish qobiliyatini, fazoviy munosabatlarni idrok etish, konstruktiv qobiliyat va ijodkorlikni rivojlantirish, o'quvchilarni kuzatish, mulohaza yuritishning asoslilikini yuzaga chiqarishga imkon beradi. Shuningdek, o'z-o'zini tekshirish odatlari, bolalarni o'z harakatlarini vazifaga bo'ysundirishga intilishi, boshlangan ishni oxirigacha etkazishga o'rgatish kabi tushunchalarni, mustaqil xulosa chiqarish imkonini kengaytiradi.

Boshlang'ich sinflarda darslarni tayyorlash va o'tkazishda quyidagi tamoyillarni amalda qo'llash o'quvchilarining intellektual qobiliyatlarini rivojlantirishga kengroq imkoniyatlar yaratadi degan tushunchani ilgari suramiz:

1. Bolaning intellektiga ko'p qirrali rivojlanish ta'siri tamoyili. Bu tushunchadan shuni anglash mumkinki, darslar uchun nafaqat berilgan mavzu bo'yicha bilim, ko'nikma va malakalarni shakllantirishga hissa qo'shadigan, balki bir qator intellektual fazilatlarini rivojlantiradigan mashqlarni tanlash va tuzish, ular ustida o'quvchini mustaqil ishlash imkoniyatini aniqlash, shunga qaratilgan vazifalarni berib borish, uning bajarilishini nazorat qilish zarur bo'ladi.

2. Ta'limga samarali yondashish tamoyilidan unumli foydalanish. Mashg'ulotni shunday tashkil etishga harakat qilish kerakki, bolalar vazifalarni hal qilishning o'ziga xos usullarini izlashsin, chunki bir vaqtning o'zida ularning aqliy faoliyati faollashadi va intellektual fazilatlarini yaxshilanadi.

3. O'quvchining oqilona javob berish tamoyilini yuzaga chiqarishga harakat qilish. Topshiriqlarni shunday shakllantirish kerakki, bolalar o'z nuqtai nazarini, yechimining o'z tafakkuri, mustaqil qarashi asosida tahlil eta olish imkoniyatini kengaytirish talab etiladi.

4. O'quvchi yoshlarda ijobiy motivatsiya printsiplari asosida matnga yondoshuvni tashkil etish lozim. Muvaffaqiyatli o'quv jarayoni uchun sinfda maxsus sharoitlar yaratish-quvonch, ajablanish, zavqlanish muhiti. Muvaffaqiyatli vaziyat yaratishdan keng foydalanish, o'quvchilarni o'zlarining kuchli, ongli, xulosali tomonlariga, muvaffaqiyatga erishishlariga ishonishga undash yaxshi natijalar beradi.

5. O'quvchilarda insonparvarlik va hamkorlik tamoyilini shakllantirib borish, eng muhim vazifalardan biri ekanligini unitmaslik kerak bo'ladi. Maktabda boshlang'ich ta'lim davrida allaqachon o'quvchilarning intellektual qobiliyatlarini rivojlantirishda gender farqlari namoyon bo'ladi. O'g'il bolalar fazoviy-vizual munosabatlarga ancha yaxshi yo'naltirilgan, qizlarning og'zaki intellekt darajasi yuqori.

Boshlang'ich sinf o'quvchisining tafakkuri o'ziga xosdir, bu esa o'z navbatida turli xil tafakkur shakllariga oid qobiliyatlar hali rivojlanmaganligi bilan ifodalanadi. Tabiiyki, bu o'qitishda ma'lum qiyinchiliklar yaratadi. Boshlang'ich sinf o'quvchilari tilga olingan mantiqiy tafakkur jarayonlarini egallaydilar. Bu ona tili, matematika kabi o'quv fanlarini o'rganishi davomida yaqqol namoyon bo'ladi.

Boshlang'ich sinf matematika darslari orqali o'quvchilarning intellektual qobiliyatlarini rivojlantirish imkoniyatlari boshqa o'quv predmetlariga nisbatan kengroqdir. Sababi, biz matematika darsidan oddiygina bir masala yechimini topish orqali ham fanlararo integratsiyani amalga oshiramiz, ham o'quvchini kengroq nazariy bilimni amaliy hayotga bog'lab o'rganishlariga yordam beramiz va matematika darslarida o'quvchilar o'zi yashayotgan hayotdagi bo'layotgan o'zgarishlardan ham o'z o'rnida xabardor bo'ladilar. Misol sifatida, 3-sinf matematika darsligidagi bir masalani keltirib o'tmoqchimiz:

Masala. Anvarning akasi va singlisi bor. Uchalasining yoshini qo'shib hisoblaganda 17 yosh. 6 yildan keyin ularning yoshini hisoblaganda qancha bo'ladi? Yuqoridagi birgina masalani yechimini izlash orqali o'quvchilarda birinchidan, tarbiya fani bilan integratsiya qilib aka-uka, opa-singillar orasidagi mehr-oqibat haqida o'quvchilarning fikrlarini kengaytirish mumkin. Ikkinchidan, hayotga bog'lab masala yechimini topishda esa o'quvchilarga quyidagicha savol berish mumkin, sizning akangiz (ukangiz), opangiz(singlingiz) va sizning yoshingizni qo'shganimizda natija nechi bo'ladi? 6 yildan keyin qanday o'zgaradi bu oraliq? 9 yildan keyinchi?, 10 yildan keyinchi?. Bu kabi savollardan keyin o'z-o'zidan o'quvchi berilgan masalaning yechimini ongli ravishda aniqlay oladi. Demoqchi bo'lganimiz, masala yoki misol yechimlarini topishda ko'pincha bola yasahyotgan muhit va vaziyatga bog'lab yechimlar topilishi o'rgatilsa, biz aytganimizni bajaradigan „robot”larni emas, o'z fikri-mulohazasiga ega, intellektual rivojlangan kelajak avlodni voyaga yetkazamiz.

Boshlang'ich sinf o'quvchilarining intellektual qobiliyatlarini rivojlantirishda quyidagi holatlarga ham diqqat qilish lozim bo'ladi.

1)Nostandart masalalar. 2) Mantiqiy masalalar. 3) Muammoli vaziyatlarga keltiruvchi masala turlaridan kengroq foydalansak o'z maqsadimizga osonroq erishamizga imkon yaratishi mumkin.

Intellektual qobiliyat inson hayotining rivojida juda ham muhim jihat hisoblanadi. Chunki intellektual qobiliyat yetuk rivojlangan inson keng fikrlovchi, chuqur o'ylovchi, yetti o'lchab bir kesadigan va o'z o'rnida o'zining fikrini bildirib, isbotlay oladigan sifatlarga ega bo'ladi. Shuning bilan birga keltirilgan namunalar orqali boshlang'ich sinf o'quvchilarining intellektual qobiliyatlarini rivojlantirishda barcha fanlar birgalikda xizmat qilishini ta'minlay olish o'qituvchining asosiy vazifasi ham hisoblanadi, - degan fikrni ilgari surmoqchimiz.

Adabiyotlar:

1.Abduraxmonov N. Boshlang'ich sinf o'quvchilarining intellektual qobiliyatlarini rivojlantirish – ijtimoiy pedagogik zaruriyat // Toshkent Davlat Pedagogika Universiteti Ilmiy Axborotlari. Ilmiy-nazariy jurnal. 2022. 7-son, 45-bet.

2.G'oziyev E. Ta'lim jarayonida o'quvchilar tafakkurining o'sish. – Toshkent, “Fan” nashriyoti 1980 yil. 46-bet.

3.Musurmonova D., Mirzayev R. Kitobim – oftobim. Sinifdan tashqari o'qish kitobi. Maktab kutubxonasi. –Toshkent, “Qaldirg'och” nashriyoti, 2021. 27-bet.

4. Sultonov M.M. Matematika darslarida boshlang'ich sinf o'quvchilarining o'quv-intellektual qobiliyatini rivojlantirish. O'quv qo'llanma. – Toshkent, "Fan", 2012. 35-bet.

OYBEK IJODIDA XALQONA OHANGLAR

Yoqubov Odil

Alisher Navoiy nomidagi

ToshDO'TAU mustaqil tadqiqotchisi

Har qanday ijodkor akomilida xalq og'zaki ijodining ta'siri kattadir. XX asr o'zbek adabiyoti namoyandalariga xalq og'zaki ijodi ko'p tomonlama ta'sir etgan. Qodiriy, Cho'lpon, Hamza, Oybek, Abdulla Qahhor, G'afur G'ulom, Hamid Olimjon, Mirtemir, Shayxzoda va boshqa ko'plab so'z san'atkorlari ijodining takomilida folklorning roli juda kattadir. U zamonlarda folklor obida emas, balki jarayon holatida bo'lib, bo'lajak san'atkorlarga bevosita ta'sir ko'rsatish imkoniga ega edi [1, 14-b]. Bu fikrlarimiz bevosita Muso Toshmuhammad o'g'li Oybek ijodiga ham taalluqlidir.

Oxunjon Sobirovning "Oybek ijodida folklor" [6] risolasida Oybekning xalq og'zaki ijodidan foydalanish mahorati o'rganilgan. Adabiyotshunos Oybek poemalaridan, "Qutlug' qon" romanidagi Yo'lchi xarakteridan, "Navoiy" romanining insonparvarlik pafosidan, "Oltin vodiya shabadalar" romanidagi jamoa hayoti tasvirlaridan folklor unsurlarini izlaydi. SHu orqali: "Oybek o'z asarlarida folklor ruhidan, motivlaridan ijodiy oziqlandi, xalq qahramonlari tiplari, milliy xarakterlar yaratish uchun folklorning qahramonlik, erkparvarlik pafosidan, xalqchil ruhi va optimizmidan, mukammal ishlangan umumlashma obrazlaridan ilhom oldi" [6, 95], - degan fikrni ilgari suradi.

Biz ham ushbu maqolada yozuvchining «Bolalik xotiralarim» xotira-qissasi va «Qutlug' qon» romanidagi ayrim obrazlarni xalqona ohanglar orqali inkishof etishdagi Oybek mahoratini imkon qadar kuzatishga harakat qildik. Jumladan, bahoriy kayfiyat Gulnor diliga xushnudlik bag'ishlagani bois, uning qo'shiqlarida mayin ohanglar oqadi. Tomda o'ynayotgan va dunyo tashvishlaridan bexabar bolakaylar qushig'i ham ularning kayfiyatiga monand:

Laylak keldi, yoz bo'ldi,

Qanoti qog'oz bo'ldi... [3, 167-b].

Aksincha, boyning qizi Nuri haqida so'zlaganida yozuvchi bolalar tilidan xalq qo'shiqlarining tanqidiy mazmundagi matnlarini qo'llaydi:

YOmg'ir yog'aloq,

Echki tug'aloq.

Boyning qizining

Qorni yumaloq... [3, 98-b].

Alioxunning yangroq qo'shig'ida esa iqtisodiy nochorlik tufayli vaqtida oila qura olmagan, tirikchilik tashvishida sarson mardikoru kosibning orzu va armonlari mujassamlashgan:

Man safarga chiqqanda
Yor eshigida qolgan.
«Qachon kalisan yor?» dap,
Qora koʻzga yosh olgan.

Kunda koʻrmadim yorni,
Kunida koʻrarman dap,
Umid uzmadim yordan
Oʻlmasam suyarman dap...[3, 52-b].

Oybek xotiralarga berilar ekan, oʻsha paytdagi oʻylari haqida shunday yozadi: «Dasturxonda har kungi non, faqat non. Yogʻ ham yoʻq, sut ham yoʻq. Sigirni allaqachon sotib yuborganmiz. Qand ham yoʻq, turshak ham yoʻq. «Hech boʻlimganda jiyda boʻlsa-chi», deb oʻylayman ichimda, ammo indamayman» Bu holat «Bolalik xotiralarim» xotira-qissasida keltirilgan mana bu xalq qoʻshigʻiga naqadar vobasta:

Minishga ulov boʻlsa,
Qish keldi, olov boʻlsa!
Qor qalin, sovuq qattik,
Sergoʻsht bir palov boʻlsa!...[3, 36-b].

Shahar koʻrgan aravakash Joʻra («Qutlugʻ qon») otni harqancha ardoqlab, unga boʻlgan tizginsiz mehrini ifoda etmasin, ot sotib olishga-da, hayotini izga solishga-da qoʻli kaltalik qiladi. Uning ojiz va nochor, ayni paytda ertadan umidvor holati tasvirida Oybek davr koloritini qahramonning xasta va boʻgʻiq tovushda xirgoyi qilgan qoʻshigʻi orqali aynan «shahar koʻrganligiga» monand tarzda ifodalaydi:

Lyublyu, lyublyu Mamajon, lyublyu, Mamajon,
Stakanda choy ichgan lyublyu Mamajon. [4, 21-b].

Xotira-qissada yozilishicha, maktabdor domla ilk bahorning juma kunlaridan birida shogirdlarini dalaga olib chiqadi. Guzarlardan oʻtisharkan, Oybek domlaning oʻrtoqlaridan biri narsalarni aravasiga ortib olganligidan soʻzlaydi. Demak, ustoz ilmi toliblar qatorida yayov yurgan. Agar “ot-ulovi” bor, oʻziga toʻq kishi boʻlganida ehtimol domla safarga yayov chiqmagan boʻlarmidi. Balki u oʻzini shogirdlariga yaqin tutgani uchun ham ular bilan bir safda ketgandir. Bu sayohatdan murod nima edi?

SHubhasiz, ustoz shogirdlarining keng dala, sharqiroq suvlar, anvoyi gullar qoʻynida yayrashini tilaydi. Sayohat davomida machitga qoʻngan ustoz Qurʼoni Karimdan oyatlar tilovat qilganida qori bolalalar koʻzlarini yumib, sel boʻlib tinglaydilar. Uning shogirdlariga Fuzuliydan oʻrgatgan ayrim baytlarga diqqat qilaylik :

Dahr aro bir siniq devor koʻrsang, oʻyla bil:
Ul Sulaymon mulkidir kim, charx vayron aylamish [3, 63-b].

Dunyo neʼmatlariga mehr qoʻymaslik, umrning oʻtkinchiligi haqida soʻzlaguvchi gʻazalda Sulaymon mulkining har bir burjida “bir siniq devor” borligidan, charxning vayronkorligidan soʻz boradi. Boshqa bir gʻazalda ham, zulm va jabrning haddan ortganligidan soʻylay turib, Fuzuliy tilidan: “Kim etsam

zulmu javrundan onga dod aylaram”- deyiladi. Jabr-zulmning haddan oshganligidan faqat Ollohga dod deyish mumkinligi haqidagi fikrlar shuni ko’rsatadiki, Oybekning ustozlari mumtoz adabiyot mohiyatini shogirdlariga diniy-tasavvufiy mohiyatda to’g’ri etkaza olgan.

Domla Fuzuliy she’rlaridan namunalar yod o’qir ekan, g’azalning o’ziga ta’sirini adib shunday keltiradi: “G’azal nihoyat ta’sirli... Hammamiz jim tinglaymiz. Men sel bo’lib, erib ketaman. Fuzuliyning she’rlarini sevaman. She’rlari nafis. O’zim gul va mahbub haqida go’zal she’rlarini bilaman... Muzika yo’q, childirma yo’q, dutor, tanbur yo’q, ammo she’r bor, qo’shiq bor! Faqat yosh, tiniq tovush bilan, ohang bilan she’rlarga ko’ngilga etib boradigan muzika beramiz, jon beramiz!” [3, 63-b] - deb yozadi adib.

Demak, Oybek ta’sirchan mumtoz g’azallar, Qur’on ohanglaridan sel bo’lib, erib ketganida she’riy misralarning jon tomirini anglashni, ritmni tuyishni, adabiyot ko’ngil mulki ekanligini o’rganadi. «Qutlug’ qon» romani qahramonlaridan biri Shokir ota xasta ovozdagi kuylaydi. Uning qo’shig’i xuddi yig’i kabi yoxud g’arib va dardkash odamning yo’qlashi kabi tuyuladi:

Ko’rmasaydim bu umr sahrasini,
Chekmagaydim ko’kka o’tlik ohini.
Pora-pora yirtirdi ko’ksimni sitam,
So’rg’uchi bormi ko’ngilning zorini?... [4, 283-b].

Ko’rinadiki, Oybek uslubining shakllanishida xalqona ohanglardan barakali foydalanish muhim ahamiyat kasb etadi. Yozuvchi «Bolalik xotiralarim» xotira-qissasi va «Qutlug’ qon» romanida xalq og’zaki ijodining boy xazinasidan barakali foydalanadi. Shu orqali o’zining estetik ideallarini yuzaga chiqarishga, qahramonlarning kayfiyat-holatlari, davr koloritini ishonarli, estetik ta’sirchan ifodalashga, nasr va nazm mutanosibligini ta’minlashga muvaffaq bo’ladi.

Адабиётлар:

1. Матёкубова Т. Ғафур Ғулом бадиияти. - Т., Фан ва технология, 2006.
2. Миллатни уйғотган адиб. Илмий мақолалар тўплами. -Т., “Университет”, 2005.
3. Ойбек. Болалик хотираларим. -Т., Адабиёт ва санъат, 1995.
4. Ойбек. Қутлуғ қон. -Т., Ўқитувчи, 1980.
5. Сабриддинов А. Ойбекнинг шеърий маҳорати. -Т., Фан, 2006.
6. Собиров О. Ойбек ижодида фольклор. -Т., Адабиёт ва санъат, 1975.

“SHUM BOLA”DA “BOSH” KOMPONENTLI IBORALAR TAHLILI

**O.Mamarajabova,
SamDU 1-kurs magistranti,
Ilmiy rahbar: dots.U.Rashidova**

Frazeologiyaning alohida yo’nalish sifatida shakllanishi va rivojlanishida mashhur rus tilshunosi V.V.Vinogradovning xizmatlari alohida ahamiyat kasb etadi. O’zbek frazeologiyasining shakllanishida Sh. Raxmatullaev, Sh. Maqsudov, Sh. Shorahmedov va boshqa tilshunos olimlarning alohida o’rni bor. Sh.

Rahmatullaev o'zbek frazeologiyasining ilmiy asosda chuqur o'rganilishi va takomillashuviga o'zining munosib hissasini qo'shgan olim hisoblanadi.

Odam tana a'zolari haqidagi somatik iboralar hamma tillarda mavjud va asosiy o'rinni egallaydi. Xalq ichida paydo bo'lib, sayqallashib, tez-tez ishlatilib o'sha xalq tiliga singib boradi. Somatik iboralarni o'rganish, o'sha xalqning madaniyati va urf-odatlarini o'rganishimizga yordam beradi. Tilshunos olim X. Hamidov somatik iboralar haqida shunday fikr bildirgan: "Inson hayoti bilan bog'liq frazeologizmlarni shakllantirgan asoslardan birinchisi insonning tana a'zolari nomlari(somatizmlar)dir. Bunday iboralar somatizmlar vositasida yuzaga kelgan bo'lib, turg'unlashgan holda insonning idroki, tafakkuri, e'tiqodi, his-tuyg'ulari, jamiyat bilan muomala munosabati, xulq-atvori, tashqi ko'rinishini ifodalaydi. Ular ma'no jihatdangina emas, balki tuzilishi, obrazlilik bilan ham bir-biriga mos va yagona ichki shakl asosida yuzaga kelgan" (2, 48).

Dastlabki somatik frazeologiyalar insonga har doim ko'rinib turadigan inson tashqi tana a'zolari nomlari asosida yuzaga kelgandir. Bosh insonning asosiy organlaridan biri bo'lib, hayotning simvoli deb hisoblanadi. O'ylash, fikrlash, fikr yuritish, idrok qilish, reja tuzishda bosh miyaning roli juda kattadir. Bosh haqidagi frazeologizmlar insonning aql va qobiliyatining yaxshi va yomonligiga baho beradi.

Bosh umumturkiy so'z. "O'zbek tilining izohli lug'ati" (O'TIL)da bu so'zning umumturkiy hamda ko'p ma'noli ekani izohlangan. Lug'atda mazkur so'zning 20 ta ma'nosi borligi qayd etilgan [O'TIL, I, 207]. Polisementik xarakterga ega mazkur leksema asosida tilimizda bir qancha iboralar shakllangan: boshiga ko'tarmoq, boshida qolmoq, boshida yong'oq chaqmoq, boshini olib ketmoq, boshi oqqan tomonga, boshi osmonda, boshi egilmoq, bosh ustiga, boshi buzuq, boshi bog'liq kabi.

G'.G'ulomning "Shum bola" qissasi tilini o'rganar ekanmiz unda bosh komponenti asosida shakllangan quyidagi iboralarni uchratdik: bir yoqadan bosh chiqarmoq, boshini yemoq, boshi toshga tegmoq, boshi toshdan bo'lmoq, boshi ko'kka yetmoq, boshdan o'tkazmoq kabi. Quyida mazkur iboralarning semantik tahlili xususida so'z yuritamiz.

Tilimizda hamjihatlik, yakdillik bilan harakat qilmoq ma'nosida "bir yoqadan bosh chiqarmoq" iborasi qo'llanadi. Mazkur fe'l ibora "bir tan, bir jon bo'lib" iborasi bilan ma'nodoshlik hosil qiladi. Qissada ibora berilgan hamda jumla davomida ibora mazmunini yanada aniqlashtiruvchi ishni bamaslahat qilmoq birikmasi qo'llangan: Mana endi uchalimiz bir yoqadan bosh chiqarsak, hamma ishni bamaslahat qilsak,el-yurt oldidada sizlar mening hurmatimni bajo keltirib, "hazrat", "hazrat" desalaringiz men sizlarni "pirbachchalar"desam shariatga xos ta'zim-tavozelarni o'rgatsam,kuzgacha birimiz o'n bo'lib,bisoti bag'al orttirib,qo'yin-qo'njimiz to'lib shaharga izzat-obro' bilan kirib borsak yomon bo'lmaydi.

Ma'limki, o'zbek xalqi olqish va qarg'ish so'z va jumalarni ko'p qo'llaydi. Umring uzoq bo'lsin, zavol ko'rma, o'lma ma'nolarini ifodalash uchun keksalar yoshi "boshing toshgan bo'lsin" deya duo qilishadi. Qissada "boshing toshgan bo'lsin" iborasi boshing toshgan bo'lgur tarzida qo'llangan: Bittang bu yerda qol,

bittang ota ota meros, boshing toshdan bo'lgur sigirim bor, shuni olib chiqib, ekindan bohsagan yerning uvatlarida yetaklab yurib boqib kelasan, bu yerda qolganing bitta –yarimta mehmon –izlam kelsa choy-poyga qarab turasan, -dedi.

Qissada xuddi shunday olqish, duo ma'nosini ifodalovchi "boshimizdan shavqatlari arimasin" iborasi qo'llangan: Nikolay hazratlari xudoyi taoloning yerdagi ko'lankasidir. Boshimizdan shavqatlari arimasin.

Qissada bosh komponentli "boshing toshdan bo'lsin" olqishi hamda unga qarama-qarshi "boshingni yesin" qarg'ishi qo'llangan. "Boshini yemoq" iborasi O'TILda polisemantik ibora sifatida ikki ma'noga egaligi ta'kidlangan: 1. O'ldirmoq, halok qilmoq, nobud qilmoq. 2. Oxirigacha borib, yetib tugatmoq [O'TIL, I, 207]. Qissada mazkur salbiy baho ottenkasiga ega ibora lug'atga izohlangan birinchi ma'noda qo'llangan:

-Ha, taqdir bir yetimni hadeb ura berishmi, xizmatga tuhmatmi taqdir? -deb yig'lab yubordim. - Ha, xizmatning boshingni yesin! -dedi domla.

Boshi toshga tegmoq - Ko'kterakday shahri azimda boshimga tekkan toshlarning soni ko'zimdanda oqqan yoshlardan ko'proq.

Boshi ko'kka yetmoq - Qopning og'zini ochib bolalarga ikkita-ikkitatadan olma olib berdim. Boshlari ko'kka yetib ketdi.

Boshdan o'tkazmoq - Biz ham ko'p musofirchiliklarni boshdan o'tkazdik, bolam. Kishi musofir bo'lmaguncha, musulmon bo'lmaydi degan ekan, azizlar.

Boshini chiqarmoq - Hoji boboning ijozatisiz o'z kavagimdan boshimni chiqarganim yo'q.

Boshidan shavqati arimoq - Nikolay hazratlari xudoyi taoloning yerdagi ko'lankasidir. Boshimizdan shavqatlari arimasin.

Xulosa qilib aytganda, "bosh" komponentli iboralar timizda faol qo'llanish xususiyatiga ega. Qissa tilidagi "bosh" komponentli iboralar to'planib tahlil etilganda ularning aksariyati fe'l so'z turkumiga oid iboralar ekani aniqlandi. Iboralar qissa tilini xalq tiliga yaqinlashishiga, fikrlarni tasviriylilik asosida o'quvchiga yetkazishga xizmat qilgan. "Bosh" komponentli iboralarning ayrimlari insinning idroki bilan bog'liq bo'lgan ruhiy olamni, his-tuyg'ularni ifodalasa, ba'zilar milliy dunyoqarash me'yorlariga borib tutashadi, ya'ni mental, genderlik xususiyatiga ega bo'ladi. Qissa tilida qo'llangan iboralarning tahlili yozuvchining individual uslubi haqida muayyan xulosalarga kelish imkonini beradi. Biz mazkur maqolada faqat "bosh" komponentli ayrim iboralarni tahlilga tortdik, xolos. Keyingi ishlarimizda tahlillarni davom ettiramiz.

Foydalanilgan adabiyotlar:

1. G'.G'ulomov. Shum bola. –T., G'afur G'ulom nomidagi adabiyot va san'at nashriyoti, 1983.
2. Hamidov X. Turk frazeologiyasi masalalari. –T., Bayoz, 2019. -160 b.
3. Mamatov A.E. O'zbek tilida frazeologizmlarning shakllanishi masalalari. – T.: O'TA, 2001 № 3. -.46-49 b.
4. Pinxasov U. Hozirgi o'zbek adabiy tili leksikologiyasi. –T., "Fan", 1968.
5. Rafiyev A. Iboralar nutqimiz ko'rki – T.: "Fan" 1985.
6. Raxmatullayev Sh. O'zbek tilining frazeologik lug'ati. –T., Qomuslar yosh tahririyati. –T., 1982.

MUNDARIJA

Xolmurodov R. Gʻafur Gʻulom abadiyati.....	3
Umurov H. “SamDU qopqasida bir qizni koʻrdim” sheʻri haqida.....	5
Muhiddinov M. Badiiy tafakkur va talqindagi izdoshlik.....	8
Toʻrayev D. Oʻzbekning oʻktam shoiri.....	13
Mirzaev I. Gʻafur Gʻulom va SamDU.....	17
Karimov B. “Shum bola”ning makoni va zamoni.....	19
Karimov S. Gʻ.Gʻulom lingvopoetikasi xususida ayrim mulohazalar.....	24
Hasanov Sh.,Ernazarova G.Gʻulom sheʻriyatida vaqt falsafasi.....	29
Oʻrayeva D. Gʻ.Gʻulom ijodiga folklordagi kulgiga asoslangan dramatik janrlar taʼsiri.....	35
Quvvatova D. Gʻafur Gʻulomning intellektual sheʻriyati.....	39
Hasanov Sh. “Umrimiz boqiydir, umrimiz boqiy...”.....	43

Musurmanov E., Achilova N. Syuy Yuan Gʻafur Gʻulom talqinida.....	46
Nasirov A. Gʻafur Gʻulom sheʻriyatida Samarqand talqini.....	51
Qobilov U. Gʻafur Gʻulom ijodi va sharq adabiyoti.....	55
Murtazoev B. Gʻagur Gʻulomning Alisher Navoiy ijodi haqidagi qarashlari....	57
Soatova N., Parizod T. Gʻafur Gʻulom ijodida folklor motivlari.....	60
Davronova M., Kurbanova Ch. Gʻafur Gʻulom va Abdulla Oripov sheʻriyati....	62
Matyoqubova T. Gʻ. Gʻulom ijodiyotining psixobiografik talqini.....	66
Yoʻldoshev N., Xoʻjanova N. Gʻ. Gʻulomning bagʻishlov sheʻrlari.....	73
Raximova G., Obidjonova R. Gʻ. Gʻulom ijodida milliy qadriyatlar talqini.....	76
Toshpoʻlatov A. Realikka evrilgan afsonalar.....	78
Xursanov D. Gʻ. Gʻulom sheʻriyatida anʻanaviy motivlar tipologiyasi.....	82
Ubaydullayev N. Badiiy asarlarda shaxs adabiy portretini yaratish.....	87
Umrzoqov R. “Shum bola” qissasida begonalashuv.....	90
Neʼmatova H. “Hoki musallo”da muallifning safar taassurotlari talqini.....	95
Tugalov T. Gʻafur Gʻulomning bashoratlari.....	98
Sariboyeva M., Turdimurodov M. Gʻ. Gʻulom ijodini yangicha oʻrganish.....	100
Muhiddinova B. Gʻafur Gʻulom Vasliy Samarqandiy faoliyati haqida.....	103
Mardiyeva M. “Shum bola”da sonda shakllangan frazeologik birliklar.....	105
Jabbarova D. Badiiyat va shaxs talqini.....	108
Isabaeva G. Ijodkor “men”i iztiroblarining badiiy ifodaga koʻchishi.....	111
Ramazonova G. Gʻafur Gʻulom va Shayxzoda.....	114
Xoʻjamqulov A. Badiiy ijodda folklor anʻanalari.....	115
Saymuratova I. Badiiy asar tili va yozuvchi uslubi.....	119
Avazov V. Mohiyat va badiiylik ifodasigi.....	122
Hamidova D. Gʻ. Gʻulom nasrining L.Boʻrixon ijodidaga taʼsiri.....	126
Muratova G. Gʻafur Gʻulom hikoyalarida ruhiy kechinmalari tasviri.....	129
Islomov J. “Shum bola” qissasida dramatik pafos.....	132
Suvonova R. Joy nomlari bilan bogʻliq metonimiya.....	135
Buriyeva F. Hozirgi oʻzbek sheʻriyatida milliy kolorit.....	137
Samandarova N. Tarixiy romanda muallif shaxsiyati, estetik ideali.....	141
Abdulxamidova X. Mustaqillik davri romanlarida vaqt va makon talqini.....	144
Tajibaeva L. Mumtoz adabiyot–yangi oʻzbek sheʻriyati takomilining asosi.....	148
Abdusalomova K. Matnazar Abdulhakim sheʻriyatida navoiyona ruh.....	152
Boltaeva L. Gʻafur Gʻulomning “Shum bola” qissasida sharq bozori tasviri....	156
Urazbaev Gʻ. Hozirgi oʻzbek hikoyachiligida anʻana va uslub.....	158
Fayzullayev M. Faxriyor sheʻriyatida poetik fikrning badiiy ifodasi.....	161
Mardanova G. Arbain anʻanasida yozilgan sheʻrlarda ona obrazi.....	164
Abdunazarov Oʻ. Nosir Fozilov ijodida shaxs konsepsiyasi.....	167
Toshmamatov U. Jamol Kamolning “Shahribonu” dostoni poetikasi.....	170
Bobotayev M. “Shum bola” qissasidagi baʼzi dialektizmlar haqida.....	172
Xasanov A. “Sudxoʻrning oʻlimi”da yasama terminlar struktur xususiyati.....	175
Achilova N., Abduraxmonova M. Dunyo mifologiyasida ajdarho obrazi.....	178
Buxorov Sh. Aziz Qayumov talqinida “Boburnoma” va Bobur	183
Mavlonov A. “Saddi Iskandariy”da qoʻllangan ornitologiyaga oid terminlar.....	186
Nazarova F. Asqad Muxtor hikoyalarida shxs talqini.....	188

Hamroyeva N. Xurshid Davron she'riyati leksikasi.....	191
Ro'ziqulova D. G'afur G'ulom lirikasida tabiat tasviri.....	194
Tog'ayeva S. Badiiylikda majoziy talqin.....	196
Shamsiddinov B. "Qo'rqma" romanida xarakter talqini.....	198
Umarova I. Alisher Navoiy obrazining badiiy talqini.....	201
Maxamatkulova Sh. "Qaydasan Moriko" qissasida xarakter yaratish.....	202
Sodiqov M. "Dashti qipchoq lochini" asarida tarixiy shaxs talqini.....	206
Atabayeva G. Hozirgi o'zbek she'riyatida tarjima badiiyati.....	209
Tuxtayeva G. Oydinniso she'riyatiga poetik obraz.....	212
Xayrullayeva S. "Isyon va itoat" romanida obrazlar olami.....	215
Mamatova N. Alisher Navoiy "G'aroyib us-sig'ar" devonida Yusuf timsoli.....	219
Alimova M. Zebo Mirzo ijodida Ona obrazi talqini.....	221
Eshquvvatova F. "Shum bola"ni interfaol usullar asosida o'rganish.....	223
Usmanova D. Abdulla Oripovning badiiyat haqidagi qarashlari.....	226
Qosimov M. Nazar Eshonqul hikoyachiligida badiiylik va qahramon.....	228
Narimbetova G. Ijodkorning obraz yaratish mahorati.....	230
Po'latova Y. G'afur G'ulomning o'xshatish san'atidagi mahorati.....	232
Maxkamtosheva M. Xurshid Do'stmuhammadning "Bozor"da ramziylik.....	234
Ubaydullayeva M. U. Hamdamning "Ota" romanida milliy kolorit	238
G'ayratova Z. Boshlang'ich sinf darsliklaridagi matnlarga mustaqil yondoshuv.....	241
Yoqubov O. Oybek ijodida xalqona ohanglar.....	246
Mamarajabova O. "Shum bola"da "Bosh" komponentli iboralar tahlili.....	248

GʻAFUR GʻULOMNING POETIK MAHORATI

mavzusidagi ilmiy-amaliy
konferensiya materiallari
(13-may 2023-yil)

Muharrir N. Choriyev
Musahhih O. Sharapova
Texnik muharrir O. Mirzayev

ISBN 978-9943-9601-3-8

2023-yil 03-mayda tahririy-nashriyot boʻlimiga qabul qilindi.
2023-yil 11 mayda original-maketdan bosishga ruxsat etildi.
Qogʻoz bichimi 60x841/16. “Times New Roman” garniturasini.
Offset qogʻoz. Shartli bosma tabogʻi – 15,75.
Adadi 100 nusxa. Buyurtma №502.

SamDU tahririy-nashriyot boʻlimida chop etildi.
140104, Samarqand sh., Universitet xiyoboni, 15.